

Namo tassa bhagavato arahato sammāsambuddhassa

Khuddakanikāye

Nettipakaraṇa-ṭīkā

Ganthārambhakathāvaṇṇanā

Samvaṇṇanārambhe (dī. ni. ṭī. 1.ganthārambhakathāvaṇṇanā; ma. ni. ṭī. 1.1 ganthārambhakathāvaṇṇanā; saṃ. ni. ṭī. 1.1.1 ganthārambhakathāvaṇṇanā) ratanattayavandanā samvaṇṇetabbassa dhammassa pabhavanissayavisuddhipaṭivedanatthaṃ, taṃ pana dhammasamvaṇṇanāsu viññūnaṃ bahumānuppādanatthaṃ, taṃ sammadeva tesam uggahaṇadhāraṇādikkamaladdhabbāya sammāpaṭipattiyā sabbahitasukhanipphādanatthaṃ. Atha vā maṅgalabhāvato, sabbakiriyāsu pubbakiccabhāvato, paṇḍitehi sammācaritabhāvato, āyatim paresam diṭṭhānugatiāpajjanato ca samvaṇṇanāyaṃ ratanattayapaṇāmakiriyā. Atha vā ratanattayapaṇāmakaraṇaṃ pūjanīyapūjāpuññavisesanibbattanatthaṃ, taṃ attano yathāladhasampattinimitassa kammaṃ balānuppādanatthaṃ, antarā ca tassa asaṅkocanatthaṃ, tadubhayaṃ anantarāyena aṭṭhakathāya parisamāpanatthaṃ. Idameva ca payojanaṃ ācariyena idhādhippetam. Tathā hi vakkhati “vandanājanitaṃ...pe... tassa tejasā”ti. Vatthuttayapūjā hi niraṭṭhāyapūjā hi niraṭṭhāyapūjā aparimeyyappabhāvo puññāṭṭhāyoti bahuvidhantarāyepi lokasannivāse antarāyanibandhanasakalasaṃkilesaviddhamānāya pahoti, bhayādiupaddavaṇṇa nivāreti. Yathāha –

“Pūjārahe pūjayato, buddhe yadi va sāvake”ti. (dha. pa. 195; apa. therā 1.10.1) ca,
Tathā –

“Ye, bhikkhave, buddhe pasannā, agge te pasannā, agge kho pana pasannānaṃ aggo vipāko hotī”ti (a. ni. 4.34; itivu. 90) ca,

Tathā –

““Buddho”ti kittayantassa, kāye bhavati yā pīti;
Vameva hi sā pīti, kasiṇenapi jambudīpassa;
“Dhammo”ti...pe... ‘saṅgho’ti...pe... dīpassā”ti. (dī. ni. aṭṭha. 1.6; itivu. aṭṭha 90; dī. ni. ṭī. 1.ganthārambhakathāvaṇṇanā; ma. ni. ṭī. 1.1; a. ni. ṭī. 2.4.34) ca,

Tathā –

“Yasmiṃ, mahānāma, samaye ariyasāvako tathāgataṃ anussarati, nevassa tasmim samaye rāgapariyuṭṭhitaṃ cittaṃ hoti, na dosa...pe... na mohapariyuṭṭhitaṃ cittaṃ hoti”ti (a. ni. 6.10; 11.11) ca,

Tathā –

“Araññe rukkhāmūle vā...pe...;
Bhayaṃ vā chambhitattaṃ vā, lomamaṃso na hessatī”ti. (saṃ. ni. 1.249) ca;

Tattha yassa ratanattayassa vandanaṃ kattukāmo, tassa guṇāṭṭhāyayogasandassanatthaṃ “**mahākāruṇika**”ntiādinaṃ gāthāṭṭhāyamaṃha. Guṇāṭṭhāyayogena hi vandanārahabhāvo, vandanārahe ca katā vandanā yathādhippetappayojanaṃ sādhetīti. Tattha yassā samvaṇṇanaṃ kattukāmo, sā netti

visesato yathānulomasāsanassannissayā, tassa ca vicittākārappavattivibhāvinī. Tathā hi suttantadesanā na vinayadesanā viya karuṇāppadhānā, nāpi abhidhammadesanā viya paññāppadhānā, atha kho karuṇāpaññāppadhānāti tadubhayappadhānadesanāvisesavibhāvanam tava sammāsambuddhassa thomanam kātuṃ tammūlakattā sesaratanānam “**mahākāruṇikam nātha**”ntiādi vuttam.

Tattha kiratīti (dī. ni. 1. 1.1; ma. ni. 1. 1.1; sam. ni. 1. 1.1; a. ni. 1. 1.1) **karuṇā**, paradukkham vikkhipati apanetīti attho. Atha vā kiṇatīti **karuṇā**, paradukkhe sati kāruṇikam hiṃsati vibādhatīti attho. Kampanam karotīti vā **karuṇā**, paradukkhe sati sādhuṇam hadayakhedaṃ karotīti attho. Kamiti vā sukham, tam rundhatīti **karuṇā**. Esā hi paradukkhāpanayanakāmatālakkaṇā, attasukhanirapekkhatāya kāruṇikānam sukham rundhati vibandhatīti attho. Kiriyaṭi dukkhitesu pasāriyatīti vā **karuṇā**, karuṇāya niyuttoti **kāruṇiko** yathā “dovāriko”ti (a. ni. 7.67). Yathā hi dvāraṭṭhānato aññattha vattamānopi dvārapaṭibaddhajīviko puriso dvārānativattavuttitāya dvāre niyuttoti “dovāriko”ti vuccati, evam bhagavā mettādivasena karuṇāvihārato aññattha vattamānopi karuṇānativattavuttitāya karuṇāya niyuttoti “kāruṇiko”ti vuccati. Mahābhinihārato paṭṭhāya hi yāva mahāparinibbānā lokahitattameva lokanāthā tiṭṭhantīti. Mahanto kāruṇikoti **mahākāruṇiko**. Satipi bhagavato tadanñaguṇānampi vasena mahantabhāve kāruṇikasaddasannidhānena vuttattā karuṇāvasenevettha mahantabhāvo veditabbo yathā “mahāveyyākaraṇo”ti. Evañca katvā “mahākāruṇiko”ti iminā padena puggalādhiṭṭhānena satthu mahākāruṇā vuttā hoti.

Aparo nayo – atthasādhanato karuṇam karuṇāyanam karuṇāsampavattanam arahatīti **kāruṇiko**. Bhagavato hi sabbaññutāya anavasesato sattānam hitam, hitupāyañca jānato, tattha ca akilāsuno hitesitā satthikā, na tathā aññesanti. Atha vā karuṇā karuṇāyanam sīlam pakati sabhāvo etassati **kāruṇiko**. Bhagavā hi pathavīphassādayo viya kakkhāḷaphusanādisabhāvā karuṇāsbhāvo sabhāvabhūtakaruṇoti attho. Sesam purimasadisameva. Atha vā mahāvisayatāya, mahānubhāvātāya, mahapphalatāya ca mahatī karuṇāti **mahākāruṇā**. Bhagavato hi karuṇā niravasesesu sattesu pavattati, pavattamānā ca anaññasādharāṇā pavattati, diṭṭhadhammikādibhedañca mahantameva sattānam hitasukham ekantato nipphādeti, mahākāruṇāya niyuttoti **mahākāruṇiko**, tam mahākāruṇikam. Sesam sabbam vuttanayeneva veditabbam. Sumāgadhātipadānam viya cettha saddasiddhi veditabbā.

Nāthatīti **nātho**, veneyyānam hitasukham āsīsatīti patthetīti attho, mettāyanavasena cettha hitasukhāsīsanam veditabbam, na karuṇāyanavasena paṭhamapadena vuttattā. Atha vā nāthati veneyyagatam kilesabyasanam upatāpetīti **nātho**, nāthatīti vā **nātho**, yācatīti attho. Bhagavā hi “sādhu, bhikkhave, bhikkhu kālena kālam attasampattim paccavekkhitā”tiādinā (a. ni. 8.7, 8) sattānam tam tam hitappaṭipattim yācitvāpi mahākāruṇāya samussāhito te tattha niyojati. Paramena vā cittissariyena samannāgato, sabbasatte vā sīlādiguṇehi isati abhibhavatīti paramissaro bhagavā “**nātho**”ti vuccati, tam nātham.

Ñātabbanti **ñeyyam**, atīdibhedabhinnam sabbam saṅkhatam, asaṅkhatāñca. Saṅgaraṇaṭṭhena **sāgaro**, patitapatitānam attano puthulagambhīrabhāvehi saṃsīdanam nimmuḷlanam karotīti attho. **Sam-**saddassa cettha “sābhāvo, sārāgo”tiādisu (dha. sa. 389, 391) viya niruttinayena daṭṭhabbo. **Saṅgaraṇaṭṭhena**ti vā saṅgarakaraṇaṭṭhena, ṭhitadhammatāya “ayam me mariyādā, imam velam nātikkamāmi”ti lokena saṅgaram saṅketam karonto viya hotīti attho. Saṅgaraṇam vā samantato galanam sandanam udakena karotīti **sāgaro**. Kappavutṭhānakāle hi mahāsamuddo ito cito ca paggharivā sakalam lokadhātuṃ ekogham karotīti. Lokiyā pana vadanti “sāgarassa rañño puttehi sāgarehi nibbattito khatoti **sāgaro**, puratthimo samuddappadeso, tam sambandhatāya ruḷhivasena sabbopi samuddo tathā vohariyatī”ti. Sāgarasadisattā **sāgaro**, ñeyyameva sāgaroti **ñeyyasāgaro**. Sadisatā cettha puthuladuttaragambhīrānādikālikatāhi veditabbā, nihīnam cetamopammaṃ. Tathā hi ñeyyasēva sātīsayā puthulatā aparimāṇalokadhātubyāpanato, sabbaññutaññāsseva taraṇiyatāya duttaratā, gambhīratā, ādikoṭīrahitā ca pavatti, na itarassa paricchinnadesattā bhāhirakavītarāgehipi ittarena khaṇena

atikkamitabbattā, parimitagambhīrattā, parimitakālattā ca. Ñeyyasāgarassa pāraṃ pariyantaṃ gatoti **ñeyyasāgarapāragū**, taṃ ñeyyasāgarapāraguṃ.

Gamaṇācetta ñāṇagamaṇameva, na itaraṃ ñeyyaggahaṇato, taṃ pana ñāṇaṃ duvidhaṃ sammasanapaṭivedhabhedato, tathā hetuphalabhedato. Tattha “kiccaṃ vatāyaṃ loko āpanno” tiādina (dī. ni. 2.57; sam. ni. 2.4, 10; peṭako. 23) karuṇāyanavaseneva abhinivisitvā anekākāravokāre saṅkhāre sammasantaṃ bhagavato **sammasanañāṇaṃ** chaṭṭisaṅgasaṃsārahassamukhena ñeyyasāgarāṃ ajjhogāhetvā tassa pāraṃ pariyantaṃ agamāsi, yaṃ “mahāvajirañāṇa” nti vuccati. **Paṭivedhañāṇaṃ** pana sabbaññutaññānapadaṭṭhānaṃ āsavakkhayañāṇaṃ, āsavakkhayañānapadaṭṭhānaṃ sabbaññutaññāṇaṃ, yaṃ “mahābodhī” ti vuccati. Pāragamaṇaṃ tassa kiccaṃsiddhiyā, samatthātāya ca veditabbaṃ. Tathā yathāvuttaṃ sammasanañāṇaṃ **hetu**, itaraṃ **phalaṃ**. Saha sammasanañāṇena vā āsavakkhayañāṇaṃ **hetu**, sabbaññutaññāṇaṃ **phalaṃ** tadānisamsabhāvatoti veditabbaṃ.

Vandeti namāmi, abhitthavāmi vā. Saṅhaṭṭhena **nipuṇā**, anupacitañāṇasambhārānaṃ agādhaṭṭhena **gambhīrā**, ekattādivhedato nandiyāvattādivibhāgato ca **vicitrā** viṣiṭṭhā nānāvidhā nayā etissāti **nipuṇagambhīravicitranayā**, nipuṇagambhīravicitranayā desanā assāti **nipuṇagambhīravicitranayadesano**, taṃ nipuṇa...pe... desanaṃ. Nayatīti vā **nayo**, pāligati, sā ca vuttanayena atthato **nipuṇā**, atthato byañjanato ca **gambhīrā**, saṅkhepavittārānulomādippavattiyā nānāvidhatāya **vicitrā**. Tathā hi paññattianupaññattīdivasena, saṃkilesabhāgiyādilokiyādītadubhayavomissatādivasena, kusalādikhandañāṇasāṅgahādīsamaṃyavimuttādīṭṭhapanādikusalamūlādīṭṭhānādivasena ca anekavidhā pāligatīti.

Tattha (dī. ni. 1. ganthārambhakathāvaṇṇanā) dvīhākārehi bhagavato thomaṇā veditabbā attahitasampattito, parahitappaṭipattito ca. Tesu attahitasampatti anāvaraṇañāṇādhiṅgamato, savāsanānaṃ sabbesaṃ kilesānaṃ accantappahānato ca veditabbā, parahitappaṭipatti lābhasakkārādinirapekkhacittassa sabbadukkhanīyānikadhammadesanato, paṭiviruddhesupī niccaṃ hitajjhāsayañāṇaparipākakālāgamanato ca veditabbā. Sā panettha payogato, āsayato ca duvidhā, parahitappaṭipatti, yathāvuttābhedaṃ duvidhā ca attahitasampatti pakāsītā hoti. Kathaṃ? “Mahākāruṇika” nti iminā āsayato, “nipuṇa...pe... desana” nti iminā payogato, “nātha” nti iminā pana ubhayathāpi bhagavato parahitappaṭipatti pakāsītā karuṇākiccādīpanato, “ñeyyasāgarapāragu” nti iminā sātīsayāṃ attahitasampatti paramukkamsagatañāṇakiccādīpanato.

Atha vā tīhākārehi bhagavato thomaṇā veditabbā hetuto, phalato, upakārato ca. Tattha **hetu** mahākāruṇā, sā pana paṭhamapadena sarūpeneva dassitā. **Phalaṃ** catubbidhaṃ ñāṇasampadā pahānasampadā ānubhāvasampadā rūpakāyasampadā cāti. Tāsu padhānabhūtā **ñāṇapahānasampadā** “ñeyyasāgarapāragu” nti iminā padena pakāsītā. Padhāne hi dassite avinābhāvato itaraṃpi dvayaṃ dassitameva hoti. Na hi buddhānaṃ ānubhāvarūpakāyasampattīhi vinā kadācīpi dhammakāyasirī vattatīti. **Upakāro anantaraṃ** abāhiraṃ katvā tivīdhayānamukhena vimuttidhammadesanā, sā “nāthaṃ, nipuṇa...pe... desana” nti padadvayena pakāsītāti veditabbaṃ.

Tattha (dī. ni. 1. ganthārambhakathāvaṇṇanā) “mahākāruṇika” nti etena sammāsambodhiyā mūlaṃ dasseti. Mahākāruṇāsañcoditamānaso hi bhagavā saṃsārapaṅkato sattānaṃ samuddharaṇattham katābhinihāro anupubbena pāramiyo pūretvā anuttaraṃ sammāsambodhiṃ adhigatoti karuṇā sammāsambodhiyā mūlaṃ. “Ñeyyasāgarapāragu” nti etena pubbabhāgappaṭipattiyā saddhiṃ sammāsambodhiṃ dasseti. Anāvaraṇañāṇapadaṭṭhānañhi maggañāṇaṃ, maggañāṇapadaṭṭhānaṃ anāvaraṇañāṇaṃ “sammāsambodhī” ti vuccati. Vuttappabhedāṃ pana sammasanañāṇaṃ saha paññāpāramiyā tassā pubbabhāgappaṭipadā. Tassā hi ānubhāvena līnuddhaccapaṭiṭṭhānāyūhanakāmasukhallikattakilamathānuyogasassatucchedādiantadvayavirahitā ukkaṃsapāramippattā majjhimā paṭipadā bhāvanāpāripūriṃ gatā. “Nātha” nti iminā sammāsambodhiyā phalaṃ dasseti lokattayanāyakabhāvadīpanato. Tathā hi sabbāntatthaparihārapubbaṅgamāya

niravasesahitasukhavidhānatapparāya niritasayāya payogasampattiyā, sadevamanussāya pajāya accantupakāritāya aparimitanirupamabhāvaguṇavisesasamaṅgitāya ca sabbasattuttamo bhagavā aparimāṇāsu lokadhātūsu aparimāṇānaṃ sattānaṃ anuttaragāraṇaṭṭhānabhūtatāya ca “nātho”ti vuccatīti. “Nipuṇa...pe... desana”nti iminā sammāsambodhiyā payojanaṃ dasseti. Saṃsāramahoghato sattasantāraṇatthañhi bhagavatā sammāsambodhi abhipatthitā, tañca sattasantāraṇaṃ yathāvuttadesanāsampattiyā samijjhati tadavinābhāvato. Iminā bhagavato sātisayā parahitappaṭipatti dassitā, itarehi attahitasampattīti tadubhayena attahitāya paṭipannādīsu catūsu puggalesu bhagavato catutthapuggalabhāvaṃ dīpeti, tena ca anuttaradakkhiṇeyyabhāvaṃ, uttamavandanīyabhāvaṃ, attano ca vandanakiriyāya khettaṅgatabhāvaṃ dīpeti.

Ettha ca yathā “mahākāruṇika”nti iminā padena bhagavato mahākāruṇā dassitā, evaṃ “ñeyyasāgaraparāgu”nti etena mahāpaññā dassitā. Tesu **karuṇā**ggahaṇena lokiyesu mahaggatabhāvappattāsādhāraṇaguṇadīpanato bhagavato sabbalokiyaguṇasampatti dassitā hoti, **paññā**ggahaṇena sabbaññutaññānapadaṭṭhānamaggaññānadīpanato sabbalokuttaraguṇasampatti. Tadubhayaggahaṇasiddho **eva** cattho nāthasaddena pakāsīyati. Karuṇāvacanena upagamanaṃ nirupakkilesaṃ dasseti, paññāvacanena apagamanaṃ. Tathā karuṇāggahaṇena lokasamaññānurūpaṃ bhagavato pavattiṃ dasseti lokavohāraṇasayattā karuṇāya, paññāggahaṇena samaññāya anatidhāvanam. Sabhāvānavabodhena hi dhammānaṃ samaññaṃ atidhāvītvā sattādisammasanaṃ hotīti. Tathā karuṇāggahaṇena mahākāruṇāsamaṇāpattivihāraṃ dasseti, paññāggahaṇena tīsu kālesu appaṭihataññaṃ, catusaccaññaṃ, catupaṭisambhidāññaṃ, catuvesārajjaññaṃ. Karuṇāggahaṇena mahākāruṇāsamaṇāpattīññaṃ gahitattā sesāsādhāraṇāññaṃ, cha abhiññā, aṭṭhasu parisāsu (ma. ni. 1.151, 178) akampanaññaṃ, dasa balāni, cuddasa buddhaññaṃ, soḷasa ññaṇacariyā, aṭṭhārasa buddhadhammā (mahāni. 69, 156; cūḷani. mogharājamāṇavapucchāniddeśa 85; paṭi. ma. 3.5; dī. ni. aṭṭha. 3.305; vibha. mūlaṭī. suttantabhājanīyavaṇṇanā; dī. ni. ṭī. 3.141), catucattālīsa ññaṇavatthūni sattasattati ññaṇavatthūnīti (saṃ. ni. 2.34) evamādīnaṃ anekesaṃ paññāppabhedānaṃ vasena ññaṇacāraṃ dasseti.

Tathā karuṇāggahaṇena caraṇasampatti, paññāggahaṇena vijjāsampatti. Karuṇāggahaṇena sattādhīpatitā, paññāggahaṇena dhammādhīpatitā. Karuṇāggahaṇena lokanāthabhāvo, paññāggahaṇena attanāthabhāvo. Tathā karuṇāggahaṇena pubbakāribhāvo, paññāggahaṇena kataññūtā. Karuṇāggahaṇena aparantapatā, paññāggahaṇena anattantapatā. Karuṇāggahaṇena vā buddhakaradhammasiddhi, paññāggahaṇena buddhabhāvasiddhi. Tathā karuṇāggahaṇena paresaṃ tāraṇaṃ, paññāggahaṇena sayamaṃ tāraṇaṃ. Tathā karuṇāggahaṇena sabbasattesu anuggahacittatā, paññāggahaṇena sabbadhammesu virattacittatā dassitā hoti. Sabbesañca buddhaguṇānaṃ karuṇā ādi taṃnidānabhāvato, paññā pariyoṣānaṃ tato uttari karaṇīyābhāvato, iti ādipariyoṣānadassanena sabbe buddhaguṇā dassitā honti. Tathā karuṇāvacanena sīlakkhandhapubbaṅgamo samādhikkhandho dassito hoti. Karuṇānidānañhi sīlaṃ tato pāṇātipātādiviratippavattito, sā ca jhānattayasampayoginīti. Paññāvacanena paññākkhandho. Sīlañca sabbabuddhaguṇānaṃ ādi, samādhī majjhe, paññā pariyoṣānanti evampi ādimajjhāpariyoṣānakalyāṇā sabbe buddhaguṇā dassitā honti nayato dassitattā. Eso eva hi niravasesato buddhaguṇānaṃ dassanupāyo, yadidaṃ nayaggāhaṇaṃ, aññathā ko nāma samattho bhagavato guṇe anupadaṃ niravasesato dassetuṃ. Tenevāha –

“Buddhōpi buddhassa bhāṇeyya vaṇṇaṃ, kappampi ce aññaṃabhāsamaṇo;
Khīyetha kappo cīradīghamantare, vaṇṇo na khīyetha tathāgatassā”ti. (dī. ni. aṭṭha. 1.304;
3.141; ma. ni. aṭṭha. 3.425; udā. aṭṭha. 53; apa. aṭṭha. 2.7.20; bu. vaṃ. aṭṭha. 4.4; cariyā. aṭṭha.
nidānakathā, pakiṇṇakakathā; dī. ni. ṭī. 1.ganthārambhakathāvaṇṇanā; ma. ni. ṭī. 1.1; saṃ. ni.
ṭī. 1.1.1; a. ni. ṭī. 1.1.1; vajjira. ṭī. ganthārambhakathā; sāraththa. ṭī.
1.ganthārambhakathāvaṇṇanā);

Teneva ca āyasmatā sārīputtattherenāpi buddhaguṇaparicchedanaṃ pati anuyuttēna “no hetama, bhante”ti (dī. ni. 2.145) paṭikkhipitvā “apica me, bhante, dhammanvayo vidito”ti (dī. ni. 2.146) vuttaṃ.

Evam sankhepena sakalasabbaññuguṇehi bhagavantam abhitthavitvā idāni saddhammam thometum “**vijjācaraṇasampannā**”tiādimāha. Tattha vijjācaraṇasampannā hutvāti vacanaseso. Vindiyam dhammānaṃ salakkhaṇaṃ, sāmāññalakkhaṇaṃ vindaṭṭi **vijjā**, lobhakkhandhādīni vā vijjhanaṭṭhena **vijjā**, catunnaṃ vā ariyasaccānaṃ viditakaraṇaṭṭhena **vijjāti** evam tāvettha vacanattatho vijjā veditabbā. Pabhedato pana tissopi vijjā **vijjā bhayabheravasutte** āgataniyāmeneva, aṭṭhapi vijjā **vijjā ambatṭhasuttādīsu** (dī. ni. 1.278 ādayo) āgataniyāmeneva. Caranti tehīti **caraṇāni**, sīlasamvarādayo pañcadasa dhammā, iti imāhi vijjāhi, imehi ca caraṇehi sampannā sampannāgatāti **vijjācaraṇasampannā**.

Yenāti yena dhammena karaṇabhūtena, hetubhūtena ca. Tattha maggadhammassa karaṇattho veditabbo niyyānakiriyāsādhakatamabhāvato, nibbānadhammassa hetuattho ārammaṇapaccayabhāvato. Paccayattho hi ayam hetvattho. Pariyattidhammassapi hetuattho yujjateva paramparāya hetubhāvato. Phaladhamme pana ubhayampi sambhavati. Kathaṃ? “Tāya saddhāya avūpasantāyā”ti vacanato maggena samucchinnānaṃ kilesānaṃ paṭippassaddhippahānakiccatāya phalassa niyyānānugūṇatā, niyyānapariyosānatā cāti iminā pariyāyena siyā karaṇattho niyyānakiriyāya. Sakadāgāmimaggavipassanādīnaṃ pana upanissayapaccayabhāvato siyā hetuattho. Evañca katvā **aggappasādasuttādīsu** (itivu. 90) aggādibhāvena aggahitāpi phalapariyattidhammā **chattamāṇavakavimānādīsu** (vi. va. 886 ādayo) saraṇiyabhāvena gahitāti tesam magganibbānānaṃ viya mahāaṭṭhakathāyaṃ saraṇabhāvo uddhaṭo. Viśesato cettā maggapariyāpannā eva vijjācaraṇadhammā veditabbā. Te hi nippariyāyena niyyānakiriyāya sādhakatamabhūtā, na itare. Itaresam pana niyyānatthātāya niyyānatā. Yadi evam kasmā “vijjācaraṇasampannā hutvā”ti vuttam, niyyānasamakālemeva hi yathāvuttavijjācaraṇasampattisamadhigamoti? Nāyaṃ virodho samānakālatāya eva adhippetatā yathā “cakkhuñca paṭicca rūpe ca uppajjati cakkhuvīññāṇa”nti (ma. ni. 1.204, 400; 3.421, 425, 426; saṃ. ni. 2.43-45; 4.60; kathā. 465, 467). **Sampannāti** vā padassa vattamānakālatthātā veditabbā “uppannā dhammā”ti (dha. sa. tikamātikā 17) ettha uppannasaddassa viya. Evañca katvā vacanasesamantareneva padayojanā siddhā hoti. “Yenā”ti ca padaṃ ubhayattha sambandhitabbaṃ “yena dhammena vijjācaraṇasampannā, yena dhammena niyyanti”ti.

Lokatoti khandhādilokato, vaṭṭatoti attho. Nti taṃ magganibbānaphalapariyattibhedam dhammaṃ. **Uttamanti** seṭṭham. Tathā hesa attanā uttaritarassa abhāvena “anuttaro”ti vuccati. Tattha maggassa niyyānahetuādiatthena, nibbānassa nissaraṇavivekādiatthena, phalassa ariyasantabhāvādiatthena ca seṭṭhatā veditabbā. Svāyamattho “yāvātā, bhikkhave, dhammā saṅkhatā, ariyo aṭṭhaṅgiko maggo tesam aggamakkhāyatī”ti (itivu. 90; a. ni. 4.34) ādisuttapadānusārena vibhāvetabbo.

Dhammanti yathānusiṭṭham paṭipajjamāne apāyato, saṃsārato ca apatamāne katvā dhāretīti **dhammo**. Sammā, sāmāñca sabbadhammānaṃ buddhattā **sammāsambuddho**, sabbaññūtānāvaraṇaṇāṇo samantacakkhu bhagavā, tena yathā sammāsambodhisamadhigameneva sabbe buddhaguṇā sampāpuṇīyanti, evam sammadeva āsevanāya bhāvanāya bahulīkiriyāya sammāpaṭipattiyā sammadeva paccavekkhāyāya sakkaccaṃ dhammadesanāya veneyyasantānesu patiṭṭhāpanena –

“Ariyaṃ, vo bhikkhave, sammāsamādhiṃ desessāmi (ma. ni. 3.136; peṭako. 24).

Maggānaṭṭhaṅgiko seṭṭho (dha. pa. 273; netti. 170; peṭako. 30). Yāvātā, bhikkhave, dhammā saṅkhatā vā asaṅkhatā vā, virāgo tesam aggamakkhāyatī (itivu. 90; a. ni. 4.34). Ekāyano ayam, bhikkhave, maggo sattānaṃ visuddhiyā (dī. ni. 2.373; ma. ni. 1.106; saṃ. ni. 5.367, 384).

Dhammaṃ, vo bhikkhave, desessāmi ādikalyāṇa”nti (ma. ni. 3.420; netti. 5) –

Ādivacanehi, abhitthavanena ca pūjito mānito apacitoti **sammāsambuddhapūjito**, taṃ sammāsambuddhapūjitaṃ dhammaṃ vandeti sambandho.

Ayam panettha saṅkhepattho – yassa dhammassa adhigamane vijjāsampannā ceva honti caraṇasampannā ca, sabbavaṭṭadukkhato ca niyyanti, tameva ariyānaṃ

sakalaguṇasamaṅgibhāvanimittam, anavasesadukkhaniissaraṇahetubhūtañca uttamam pavaram saddhim pariyaṭṭidhammena navavidham lokuttaradhammam bhagavatāpi sammāpaṭipattiādividhinā pūjitaṃ namāmi, abhithhavāmi vāti.

Ettha ca ‘yena lokato niyyanti, vijjācaraṇasampannā ca hontī’ ti padadvayena yathākkamam dhammassa bhāvetabbabhāvo, sacchikātabbabhāvo ca vutto. Tesu paṭhamena vijjāsampattiyā dhammam thometi, dutiyena vimuttisampattiyā. Tathā paṭhamena jhānasampadāya, dutiyena vimokkhasampadāya. Paṭhamena vā samādhisampadāya, dutiyena samāpattisampadāya. Paṭhamena vā khayañāṇabhāvena, dutiyena anuppādañāṇabhāvena. Atha vā purimena vijjūpamatāya, dutiyena vajirūpamatāya. Purimena vā virāgasampattiyā, dutiyena nirodhasampattiyā. Tathā paṭhamena niyyānabhāvena, dutiyena niissaraṇabhāvena. Paṭhamena vā hetubhāvena, dutiyena asaṅkhatabhāvena. Paṭhamena vā dassanabhāvena, dutiyena vivekabhāvena. Paṭhamena vā adhipatibhāvena, dutiyena amatabhāvena dhammam thometi. Atha vā paṭhamena niyyānikabhāvadassanato svākkhātātāya dhammam thometi, dutiyena sacchikātabbabhāvato sandiṭṭhikatāya. Tathā purimena akālikatāya, pacchimena ehipassikatāya. Purimena vā opaneyyikatāya, pacchimena paccattaṃ veditabbatāya dhammam thometi.

‘Uttama’ nti ca etena aññassa visiṭṭhassa abhāvadīpanena paripuṇṇatāya dhammam thometi, ‘sammāsambuddhapūjita’ nti etena parisuddhatāya. Sabbadosāpagamena hissa pūjanīyatā. Parisuddhatāya cassa pahānasampadā, paripuṇṇatāya pabhavasampadā. Pahānasampattiyā ca bhāvanāpāripūrī anavasesadosasamuggahāṇato, pabhavasampattiyā sacchikiriyānibbatti tatuttari karaṇīyābhāvato. Anaññasādhāraṇatāya hi uttamoti. Tathā bhāvetabbabhāvenassa saha pubbhāgasīlādīhi sekkhā sīlasamādhīpaññākkhandhā, sacchikātabbabhāvena saha asaṅkhatāya dhātuyā asekkhā sīlasamādhīpaññākkhandhā dassitā hontīti.

Evam saṅkhepena sabbasaddhammaguṇehi saddhammam thometvā idāni ariyaśaṅgham thometum ‘**sīlādiguṇasampanno**’ tiādi vuttaṃ. Tattha **sīlādiguṇasampannoti** sīlasamādhīpaññāvimuttīyādiguṇehi sampanno samannāgato, sampannasīlādiguṇo vā. Ariyānañhi taṃtaṃmaggavajjhakilesappahānena hatapaṭipakkhā suvisuddhā sīlādayo ‘sampannā’ ti vattabbataṃ arahanti, na puthūjjanānaṃ, yato ‘suppaṭipanno’ tiādinā (ma. nī. 1.74; a. nī. 6.10; udā. 18) ariyaśaṅgho thomīyati. Atha vā **sīlādiguṇasampannoti** paripuṇṇasīlādiguṇo. Ariyapuggalānañhi ariyasaccappaṭivedhena saheva yathārahaṃ sekkhāsekkhā sīlādīdhammakhandhā pāripūriṃ gacchantīti. **Ṭhito maggaphalesū** ti maggesu, phalesu ca ṭhito, maggaṭṭho, phalaṭṭho cāti attho. **Yoti** aniyamato ariyaśaṅgham niddisati, tassa ‘**ta**’ nti iminā niyamaṃ veditabbaṃ.

Nanu ca ariyaśaṅghe na sabbe ariyapuggalā maggaṭṭhā, nāpi sabbe phalaṭṭhāti? Saccametam, avayavadhammena pana samudāyaṃ niddisanto evamāha yathā ‘samaṃ cuṇṇa’ nti. Yathā hi yogacuṇṇassa avayavesu labbhamāno samabhāvo samudāye apadisīyati ‘samaṃ cuṇṇa’ nti, evam ariyaśaṅghassa avayavabhūtesu ariyapuggalesu labbhamāno maggaṭṭhaphalaṭṭhabhāvo samudāyabhūte ariyaśaṅghe ṭhito ‘maggaphalesū’ ti apadiṭṭhoti veditabbaṃ.

Ārakattā kilesehi, anaye na iriyanato, aye ca iriyanato, sadevakena ca lokena ‘saraṇa’ nti araṇīyato **ariyo**, diṭṭhisīlasāmaññena saṃhatattā **saṅgho**, ariyo ca so saṅgho cāti **ariyaśaṅgho**, taṃ ariyaśaṅgham. Pujjabhavaphalanibbattanato attano santānaṃ punātīti vā **puññaṃ**, khittaṃ vuttaṃ bījaṃ viruṇaṭṭhānatāya tāyati rakkhatīti **khettam** kedārādi, khettam viyāti **khettam**, sattānaṃ puññassa mahapphalabhāvakaraṇena viruṇaṭṭhānatāya khettanti **puññakkhettam**. Anuttaram vandeti sambandho.

Ettha ca ‘sīlādiguṇasampanno’ ti etena ariyaśaṅghassa bhagavato anujātaputtataṃ dasseti, tenassa pabhavasampadā dīpitā hoti. ‘Ṭhito maggaphalesū’ ti etena pahānasampadam, ñāṇasampadañca dasseti kilesānaṃ samucchadappaṭippassaddhippahānadīpanato, maggaṭṭhalaññādhigamadīpanato ca. ‘Ariyaśaṅgha’ nti etena pabhavasampadam sabbasaṅghānaṃ aggabhāvadīpanato, sadevakena ca lokena

araṇīyabhāvadīpanato. “Puññakkhettaṃ anuttara”nti etena lokassa bahūpakāratam dasseti aggadakkhiṇeyyabhāvadīpanato.

Tathā “sīlādiguṇasampanno”ti idaṃ ariyaśaṅghassa sammāujuñāyasāmicippaṭipannabhāvadīpanam. “Ṭhito maggaphalesū”ti idaṃ satipi santānavibhāgena anekabhāve catupurisayugaatṭhapurisapuggalabhāvadīpanam. “Ariyaśaṅgha”nti idaṃ āhuneyyādibhāvadīpanam. “Puññakkhettaṃ anuttara”nti idaṃ lokassa hitasukkhāya paṭipannatādīpanam. Tathā “ṭhito maggaphalesū”ti idaṃ ariyaśaṅghassa lokuttarasaraṇagamanasabbhāvadīpanam, tenassa bhagavato orasaputtabhāvo dassito hoti. “Sīlādiguṇasampanno”ti iminā panassa vihatavidhastakilesā anavasesā sekkhāsekkhā sīlādīdhammakhandhā dassitā. “Ariyaśaṅgham puññakkhettaṃ anuttara”nti iminā tesam tesaññeva yathāvuttaguṇavisesānam suparisuddhataṃ dīpeti. Tenassa mahānubhāvatam, anuttaradakkhiṇeyyabhāvam, vandanārahabhāvam, attano ca vandanākiriyaṃ khettaṅgatabhāvam dīpeti. Saraṇagamaṇaṃ sāvakānam sabbaguṇānam ādi, sapubbabhāgappaṭipadā sekkhā sīlakkhandhādayo majjhe, asekkhā sīlakkhandhādayo pariyośananti ādimajjhapariyośanakalyāṇā sabbe ariyaśaṅghaguṇā imāya gāthāya pakāsītāti vedittabbam.

Evam gāthāttayena saṅkhepato sakalaguṇasaṅkittanamukhena ratanattayassa paṇāmam katvā idāni tam nipaccakāram yathādhippete payojane pariṇāmento “**vandanājanita**”nti gāthamāha. Tattha **vandanājanitanti** vandanākārena nibbattitam, ratanattayaguṇābhittavanavasena, nipaccakāravasena vā uppāditanti attho. **Itīti** evam “mahākāruṇika”ntiādiṭṭhākena. Ratijananatṭhena **ratanam**, buddhadhammasaṅghā, cīttīkatādibhāvo vā ratanaṭṭho. Vuttañhetam –

“Cīttīkataṃ mahagghaṇca, atulam dullabhadassanam;
Anomasattaparibhogam, ratanam tena vuccatī”ti. (khu. pā. aṭṭha. 6.3; dī. ni. aṭṭha. 2.33; sam. ni. 5.223; su. ni. aṭṭha. 1.226; mahāni. aṭṭha. 50; dī. ni. ṭī. 1.ganthārambhakathā; ma. ni. ṭī. 1.4; sam. ni. ṭī. 1.1.4; a. ni. ṭī. 1.1.4; sāratta. ṭī. 1.ganthārambhakathāvaṇṇanā);

Cīttīkatabhāvādayo ca anaññasādhāraṇā buddhādīsu eva labbhanti, ratanānam tayaṃ **ratanattayam**, tasmim ratanattaye. **Hatantarāyoti** vidhastapaddavo hutvāti sambandho, etena attano pasādasampattiyā, ratanattayassa ca khettabhāvasampattiyā tassa puññassa atthasaṃvaṇṇanāya upaghātaupaddavānam vihanane samatthataṃ dasseti. **Sabbatthāti** sabbasmim anto ceva bahi ca, ajjhātikabāhiravatthūsūti attho. **Sabbatthāti** vā sabbasmim kāle, saṃvaṇṇanāya ādimajjhapariyośanakālesūti vuttam hoti. **Hutvāti** pubbakālakiriyaṃ, tassa “karissāmatthavaṇṇana”nti etena sambandho. **Tassāti** yaṃ ratanattaye vandanājanitam puññam, tassa. **Tejasāti** ānubhāvena balena.

Evam ratanattayavandanāya payojanam dassetvā idāni nettippakaraṇassa gambhīratthattā atthasaṃvaṇṇanāya dukkarabhāvam dassetum “**ṭhiti**”ntiādimāha. Tattha **ṭhitinti** ṭhānam anantaradhānam avicchedappavattim. **Ākaṅkhamānenāti** icchamānena patthayantena, “ahovatāyam saddhammanetti ciraṃ tiṭṭheyyā”ti evam patthayantenāti vuttam hoti. **Ciranti** dīghakālam, pañcavassasahassaparimānam kālanti attho. **Saddhammanettiyāti** saddhammasaṅkhātāya nettiyā. Saddhammo hi veneyyasantānesu ariyaguṇānam nayanato **netti**, saddhammassa vā netti **saddhammanetti**, tassā saddhammanettiyā, svāyamattho **aṭṭhakathāyam** vicārito eva. **Therenāti** thiraguṇayuttena. **Abhiyācitoti** ādaragāravena yācīto. Abhimukham vā yācīto, anuttaram katvā yācītoti attho. Uddissa vā yācīto, garutaram katvā yācītoti attho, “karotu āyasmā nettippakaraṇassa kañci atthasaṃvaṇṇana”nti evam nettiyā atthasaṃvaṇṇanam pati ajjhesitoti vuttam hoti. Ettha ca saddhammassa ciraṃ ṭhitikāmena ajjhāsayasampannena sāsane thiraguṇayuttena sabrahmacārinā ādaragāravena, abhimukham vā yācītena me na sakkā tassa abhiyācanam paṭikkhipitunti dasseti “**ṭhitim ākaṅkhamānenā**”ti gāthāya.

Padumuttaranāthassāti padumuttarassa sammāsambuddhassa. **Passatāti** pubbenivāsacakkhunā,

samantacakkhunā eva vā hatthatale ṭhapitāmalakam viya abhinīhāram passantena. **Tādināti** tādibhāvayuttana, sabbattha vā nibbikārena, “amhākam bhagavatā”ti vacanaseso. **Yassāti** āyasmato mahākaccānattherassa. **Ṭhapitoti** –

“Etadaggaṃ, bhikkhave, mama sāvakanam bhikkhūnam saṃkhittena bhāsitassa vitthārena attham vibhajantānam yadidaṃ mahākaccāno”ti (a. ni. 1.188, 197) –

Evam ṭhapito. Sīlādiḡṇavisesehi mahantā sāvakāti **mahāsāvakā** (theragā. aṭṭha. 2.1288; a. ni. ṭī. 2.3.59), mahākassapādayo, tesu ayamāyasmā aññataroti, mahāsāvako ca so ḡṇavisesayogato uttamo cāti **mahāsāvakuttamo**.

Jhānādīsu sātisayānam āvajjanādivasībhāvānam, ariyiddhivasena paramassa ca cetovasībhāvassa adhigatattā **vasippatto**. Atthādīsu savisesabhedagatapaṭisambhidāññattā **pabhinnapaṭisambhido**. “Paṇḡito, bhikkhave, mahākaccāno, mahāpañño, bhikkhave, mahākaccāno”tiādinā (ma. ni. 1.205) anekesu ṭhānesu bhagavatā pasamsitattā **sambuddhena pasamsito**. Tena vuttam “satthu ceva saṃvaṇṇito saṃbhāvito, viññūnañca sabrahmacārīna”nti.

Anumoditāti “sādhu sādhu, kaccāna, sādhu kho, tvaṃ kaccāna, imaṃ dhammasaṃvaṇṇanam abhāsī”ti evam anumoditā. Ekasmiṃ kira samaye ayam mahāthero jambuvanasaṇḡe viharanto attano santikāvacarānam bhikkhūnam imaṃ hāranayapaṭimaṇḡitam pakaraṇam abhāsī. Bhāsivā ca bhagavato santikam upasaṅkamitvā bhagavantaṃ abhivādetvā ekamantaṃ nisīno yathābhāsitaṃ imaṃ pakaraṇam bhagavato nivedesi. Tam sutvā bhagavā “sādhu sādhu”tiādinā anumoditvā “tasmātiha, tvaṃ kaccāna, imaṃ dhammasaṃvaṇṇanam dhammanettitveva dhārehi”ti nāmaggaṇam akāsīti vadanti. Desanāhārādīnandiyāvaṭṭanayādīhāranayānusāreneva sabbadhammasaṃvaṇṇanānam gatiyoti āha “**sāsanassa sadāyattā, navaṅgassatthavaṇṇanā**”ti.

Gambhīraññehīhi gambhīrehi ññehi, na saddhāmatkena, gambhīraññehi vā mahāpaññehi ariyehi. Pakaraṇassa gambhīratthataṃ, attano ca ññassa nātivisayatam viditvā saṃvaṇṇanārambhe saṃsīdantampi maṃ sāsanagūṇādiupanissayasampadā ussāhesīti imamattham dasseti “**kiñcāpi**”tiādinā.

“**Pañcapi nikāye ogāhetvā**”ti iminā nettiyā pañcapi mahānikāye anupavisitvā avaṭṭhānam, tesam saṃvaṇṇanābhāvañca dīpeti. Tattha “katamo assādo ca ādīnavo cā”tiādipeṭakopadesapāḡim (peṭako. 23) ānetvā idha desanāhārādīnam padatthavinicchayo peṭakena saṃsandanaṃ nāma. “**yathābala**”nti iminā sabbathā sabbabhāgenāpi nettiyā saṃvaṇṇanā mayā na sukarā kātum, attano pana ññabalānurūpaṃ karissāmīti niratimānataṃ dīpeti.

Suvisuddhanti suṭṭhu visuddham, nikāyantaraladdhidosehi antarantarā anuppavesitehi asammissanti adhippāyo. **Asaṃkiṇṇanti** sanikāyepi padatthantaraparikkappanādinā asaṃkiṇṇam tādisasaṅkararahitam anākulam suparicchinnam. Vividhehi ākārehi nicchinotīti **vinicchayo**. Atthānam vinicchayo **atthavinicchayo**. Gaṇṭhiṭṭhānabhūtesu atthesu khilamaddanākārena pavattā vimaticchedakathā, nipuṇo sukhumo saṅho atthavinicchayo etassāti **nipuṇatthavinicchayo**. Atha vā atthe vinicchinotīti **atthavinicchayo**, yathāvuttaatthavisayaññam, nipuṇo cheko atthavinicchayo etassāti **nipuṇatthavinicchayo**, tam nipuṇatthavinicchayam. **Samayanti** siddhantaṃ. Idaṃ vuttam hoti – mahāvihāravāsīnam siddhanto vuttanayena suparisuddho, anākulo, saṅhasukhumavinicchayo ca, siddhantaṃ tam avilomento anukūlato tattha siddhamyeva dhammanettiṃ pakāsayinganto nettippakaraṇassa atthasaṃvaṇṇanam karissāmīti.

Pamādalekhanti aparabhāge potthakārūḡhakāle pamajjitvā likhanavasena pavattappamādapāṭham. **Vajjetvāti** apanetvā. **Pāḡim sammā niyojayanti** tam tam nettipāḡim tattha tattha udāharaṇabhāvena ānītasutte sammadeva niyojento, atthasaṃvaṇṇanāya vā tam tam udāharaṇasuttasaṅkhātam pāḡim tasmim tasmim lakkhaṇabhūte nettiganthe sammadeva niyojento. **Upadesanti** nettiupanisam

nettihadayaṃ. Yvāyaṃ sapaṭṭhānavibhāgassa tetthiṃsavidhassa nettipadatthassa saha nimittavibhāgena asaṅkarato vavatthito visayo, taṃ. **Vibhāvento** pakāsento. Tassā nettiyā karissāmi atthavaṇṇananti sambandho.

Ettha ca “abhiyācito”ti iminā atthasaṃvaṇṇanāya nimittam dasseti, “ṭhitim ākaṅkhamānena ciram saddhammanettiya”ti iminā payojanam, “karissāmatthavaṇṇana”nti iminā piṇḍattham. Saṃvaṇṇiyamānā hi pakaraṇatthā saṃvaṇṇanāya piṇḍattho. “Tamupanissāyā”tiadinā karaṇappakāram.

Idāni saṃvaṇṇanāya savane niyojento “**iti attha**”nti osānagāthamāha. Tattha “**sakkacca**”nti padaṃ ubhayattha yojetabbaṃ “sakkaccaṃ vibhajantassa, sakkaccaṃ nisāmayathā”ti.

Ganthārambhakathāvaṇṇanā niṭṭhitā.

Nidānakathāvaṇṇanā

Vacanatthajānanena viditappakaraṇatthasāmaññatthassa pakaraṇakathā vuccamānā sobheyyāti nettipadatthaparijānanameva ādimhi yuttarūpanti tadattham pucchati “**tattha kenaṭṭhena netti**”ti. Tattha **tatthāti** “tassā nettiyā karissāmatthavaṇṇana”nti yadidaṃ vuttam, tasmim; yassā karissāmatthavaṇṇananti paṭiññātam, sā netti kenaṭṭhena nettīti attho. **Tatthāti** vā “nettippakaraṇassā”ti etasmim vacane yā netti vuttā, sā kenaṭṭhena nettīti attho. “**Nayanatṭhena**”ti idaṃ kattukaraṇādhikaraṇasādhanaṃ sādharāṇavacananti “**ariyadhammaṃ nayati**”ti kattusādhanavasena tāva nettisaddassa attham vatvā idāni karaṇādhikaraṇasādhanavasena vuttam “**nayanti tāyā**”tiadi vuttam.

Tathā hi vuttanti nettiupadesādhinattā eva suttāvabodhassa vuttam. **Peṭake** “tasmā nibbāyitukāmena sutamayena atthā pariyesitabbā, tattha pariyesanāya ayam anupubbī bhavati soḷasa hārā pañca nayā atṭhārasa mūlapadāni”tiadi (peṭako. 3). Hāranayavicāraṇā vinimutto atthasaṃvaṇṇanāviseṣo natthīti āha “**suttassa atthasaṃvaṇṇanā nettiupadesāyattā**”ti. Svāyamattho parato pakīṇṇakakathāyaṃ āvi bhavissati. Evaṃ mahāvisayā cāyaṃ netti kuto pabhavāti āha “**suttappabhavā**”ti, etena nettiyā pamāṇabhūtatam dasseti. Idañca suttassa nettisannissayatāparidīpanaparam, na therappabhavatāpaṭikkhepaparam. Thero hi pañca mahānikāye ogāhetvā taṃsannissayeneva tesam saṃvaṇṇanābhūtam imaṃ pakaraṇam abhāsi, tasmā ayameva saṃvaṇṇanādhammo, yadidaṃ saṃvaṇṇetabbadhammasannissayatā.

Pakaraṇaparicchedatoti pakaraṇassa vibhāgato. Hāravacārādayo hi tayo nettippakaraṇassa vibhāgā, pakaraṇabhūtaparicchedato vā. Tīṇi hi etāni pakaraṇāni tayo adhiḅārā, yadidaṃ hāravacārādayo. **Pāḷivavatthānatoti** pāṭhasannivesato.

“**Sabbo hi pakaraṇattho**”tiadinā saṅgahavārassa anvatthasaññātam dasseti. “**Nanu cettha paṭṭhānam asaṅgahita**”nti codako byabhicāramāha. Itaro yadipi sarūpato asaṅgahitam, atthato pana saṅgahitanti dassento “**nayidameva**”tiadinā pariharati. Puna “**tathā hi**”tiadinā tamevattham pāḷiyā pākāṭataram karoti. **Atthanayā** nandiyāvaṭṭādayo. **Saṅkhārattikā** puññābhisaṅkhārādayo, kāyasaṅkhārādayo ca. Tesu atthanayānaṃ aññamaññasaṅgaho parato āvi bhavissati. Itare pana kāmāvacarā, rūpāvacarā ca kusalā cetanā **puññābhisaṅkhāro**, akusalā cetanā **apuññābhisaṅkhāro**, arūpāvacarā kusalā cetanā **aññābhisaṅkhāro**. Puññābhisaṅkhāro ca apuññābhisaṅkhāro ca kāyadvārappavatto **kāyasaṅkhāro**, so eva vacīdvārappavatto **vacīsaṅkhāro**, manodvārappavatto pana tividhopi **cittasaṅkhāro**. Iti jātivāsena purimattike vuttā eva dhammā dvāravasena dutiyattike vuttā, te eva ca purimattiketi aññamaññasaṅgaho vedītabbo.

Yatthāti yasmim vāre. **Peṭaket** peṭakopadese. **Sampatamānāti** saṃvaṇṇanāvasena sannipatantā. “**Byañjanavidhiputhuttā**”ti idaṃ ekasmim sutte anekesaṃ hārānaṃ sannipatanassa kāraṇavacanam.

Tathā hi “anekasāmatthiyanicitā saddā”ti akkharacintakā vadanti.

“**Na sarūpato**”ti iminā saṅgahavāre viya uddesaniddesavāresupī paṭṭhānassa atthato uddhaṭaṭaṃ dasseti. Mūlapadaggahaṇeneva gahitattā uddesavāre tāva evaṃ hotu, niddesavāre pana kathanti? Tatthāpi nayaggahaṇeneva mūlapadānīpi gahitānīti veditabbaṃ. Na hi mūlapadehi vinā kāci nayayojanā sambhavati. Apare pana “hāranayā viya paṭṭhānaṃ na suttassa saṃvaṇṇanāviseṣo, atha kho tasmim tasmim sutte saṃkilesabhāgiyatādilabbhamānavisesamattanti na tassa pakaraṇassa padatthasaṅgaho. Evañca katvā tettiṃsāya nettīpadatthesu paṭṭhānaṃ asaṅgahitaṃ, uddesaniddesavāresu ca anuddhaṭamevā”ti vadanti.

“**Pāḷito eva viññāyati**”ti vuttamatthaṃ samatthento “**tathā hi...pe... ābhata**”nti āha, tena therena bhāsītabhāvo viya bhagavatā anumoditabhāvopi pāḷianugato evāti dasseti. Sāvakabhāsītattā nidānaṃ na vuttanti na sakkā vattuntī codento “**sāvaka...pe... bhāsita**”nti āha. **Nayidaṃ ekantikanti** ca sāvakabhāsītābuddhabhāsītābhāvo nidānavācanassa, nidānavācanassa ca akāraṇaṃ ubhayatthāpi ubhayassa dassanato. Tasmā nidānavācanena nettīyā asāvakabhāsītā na sijjhatīti dasseti. Tenāha “**na ca tāvatā tāni appamāṇaṃ, evamidhāpi daṭṭhabba**”nti.

Yeneva kāraṇena nidānavācanassa pamāṇabhāvasādhanatā, teneva kāraṇena imassa pakaraṇassa pamāṇabhāvasiddhīti dasseti “**nidānañca nāmā**”tiādīnā. Idāni “atha vā”tiādīnā nettīyā nidānavācanena abyabhicārahetumāha. Ayañhettha payogo na nettīyā nidānaṃ vattabbaṃ pāḷiyā atthasaṃvaṇṇanābhāvato. Yā hi pāḷiyā atthasaṃvaṇṇanā na tassā nidānavācanaṃ diṭṭhaṃ yathā paṭṭisambhidāmagassa, niddesādīnañcāti.

“**Ayaṃ vibhāgo**”tiādīnā ekavidhato paṭṭhāya yāva caturāsītisahassappabhedā, tāva yathādassitassa pakaraṇavibhāgassa puna “**ādinā nayena pakaraṇavibhāgo veditabbo**”ti idaṃ nigamaṇaṃ. Tattha **ādinā nayanāti ādisaddena** abhiññeyyadhammaniddesato paññattipaññāpetabbadhammavibhajanato tiyaddhāpariyāpannadhammavicārato caturoghanittharaṇatthato pañcābhīnandanādippahānato chataṇhākāyupāsamanato saṅgahavārādisattavārasaṅgahato aṭṭhamicchattasamugghātāpanatoti evamādīnaṃ saṅgaho daṭṭhabbo.

1. Saṅgahavāraṇṇanā

Yanti aniyamattho sabbanāmasaddo kammaśādhanaśāsenā vutto. Athāvabodhanattho saddappayogo atthaparādhīno kevalo atthapadatthako, so padatthavipariyesakārīnā iti-saddena parabhūtena saddapadatthako jāyatīti āha “**yanti aniyamato upayoganiddeso**”ti. **Lokoti kattuniddesotiādīsūpi** eseva nayo.

Evaṃ “**ya**”ntiādīnaṃ gāthāpadānaṃ kammakattukiriyākattuvisesanādidassanāśāsenā atthaṃ vatvā idāni avayavajotanaśāsenā padatthaṃ dassetuṃ “**lokiyanti etthā**”tiādīmāha. Lokasaddo idha sāmattiyato sattalokavācano daṭṭhabbo. Tenāha “**pūjanakiriyāyogyabhūtāvāsenā**”ti. Sāsanantaradhānato paraṃ pūjanā aññābuddhuppādena veditabbā, yathetarahi vipassīdisammāsambuddhānaṃ. “**Dīpaṅkaro**”tiādīnā yadipi **buddhavaṃsadesanāyaṃ** (bu. vaṃ. 2.75) bhagavatāva vuttaṃ, sumedhapaṇḍitattabhāvena pana pavattiṃ sandhāya vuttanti āha “**yathāha bhagavā sumedhabhūto**”ti.

Pariññākkamenāti nātapariññādīpaṭipāṭiyā. **Lakkhaṇāvabodhappaṭipattiyāti** vipassanāya. Tena vuttaṃ “**suññatamukhādīhi**”ti. **Tathā ca vuttanti** viññūhi vedanīyatāya eva sāsanaśāsenā vuttaṃ bhagavatā –

“Etu viññū puriso asaṭṭho amāyāvī ujūjātiko, ahamanusāsāmi, ahaṃ dhammaṃ desemi,

yathānusiṭṭhaṃ tathā paṭipajjamāno na cirasseva sāmāññeva ussati, sāmaṃ dakkhitī’ tiādi (ma. ni. 2.281).

Yaṃ-saddo sāsanaṅvisayo, lokapālasaddo satthuvisayopi lokam pati guṇibhūtoti “**tassā**” ti paṭiniddesassa katham satthuvisayatāti codanam manasikatvā āha “**salokapāloti cetthā**” tiādi, guṇibhūtopi lokapālasaddo padhānabhūto viya paṭiniddesaṃ arahati. Añño hi saddakkamo, añño atthakkamoti.

Dhammagāravena bhagavā dhammam pūjento veneyyabandhave acintetvā samāpattisamāpajjanadhammapaccavekkhaṇāhi sattasattāham vītināmesīti āha “**bhagavato...pe... dīpetabbā**” ti. Tattha ādisaddena sāvakehi dhammassavanassa, tesam paccuggamanādīnañca saṅgaho veditabbo.

Iccassāti iti assa, evaṃ bhagavato aviparītaanantarāyikanīyānikadhammadesanāya sabbaññūtānāvaraṇabhāvadīpanenāti attho. **Tenāti** catuvesārajjayogena. Tadvinābhāvinā **dasabala... pe... pakāsītā hoti. Āveṇikabuddhadhammādīti** ettha ādisaddena tīsu kālesu appaṭihataññāni, catusaccaññāni, catupaṭisambhidāññāni, pañcagatiparicchedakaññāni, cha abhiññāññāni, satta ariyadhaññāni, satta bojjaṅgā, aṭṭha vijjā, aṭṭhasu parisāsu akampaññāni, aṭṭha vimokkhā, nava samādhicariyā, nava anupubbavīhārā, dasa nāthakaraṇā dhammā, dasa ariyavāsā, dvādasa dhammacakkākarā, terasa dhutadhammā, cuddasa buddhaññāni, pannarasa caraṇadhammā, soḷasa ñānacariyā, soḷasa ānāpānassatī, ekūnavīsati paccavekkhaṇāññāni, catuvīsati paccayavibhāvanaññāni, catucattārīsa ñānavatthūni, sattasattati ñānavatthūni, catuvīsati koṭṭisatasahassasamāpattisañcārimahāvajiraññānam, anantanayasamantapaṭṭhānapavicayadesanākārappavattaññāni cāti evamādīnam bhagavato guṇavisesānam saṅgaho daṭṭhabbo.

Aparo nayo – guṇavisiṭṭhatam dīpeti, sā ca guṇavisiṭṭhatā mahākaruṇāmahāpaññāhi veditabbā tāhi satthusampattisiddhito. Tattha **mahākaruṇāya** pavattibhedo “bahukehi ākārehi passantānam buddhānam bhagavantānam sattesu mahākaruṇā okkamati” tiādīnā **paṭisambhidāmagge** (paṭi. ma. 1.117) vuttanayena veditabbo. **Mahāpaññāya** pana pavattibhedo vutto eva. Tattha karuṇāya bhagavato caraṇasampatti, paññāya vijjāsampatti. Karuṇāya sattādhipatitā, paññāya dhammādhipatitā. Karuṇāya lokanāthatā, paññāya attanāthatā. Karuṇāya pubbakāritā, paññāya kataññūtā. Karuṇāya aparantapatā, paññāya anattantapatā. Karuṇāya buddhakaradhammasiddhi, paññāya buddhabhāvasiddhi. Karuṇāya paresam tāraṇam, paññāya sayam tāraṇam. Karuṇāya sabbasattesu anuggahacittatā, paññāya sabbadhammesu virattacittatā pakāsītā hotīti anavasesato parahitapaṭipattiyā, attahitasampattiyā ca pāripūrī veditabbā. **Tīsupi avatthāsūti** hetuphalasattūpakārāvattāsu.

Abhisamayo paṭivedhasāsanassa, manasikaraṇam paṭipattisāsanassa, savanādīhi paricayakaraṇam pariyaṭṭisāsanassatī tiṇṇampi vasena yojetabbo. Tenāha “**yathāraha**” nti. “**Sakkaccaṃ dhammadesanenā**” ti iminā idha “sāsana” nti vuttassa tividhassāpi saddhammassa avisesena desanāpūjam vatvā thomanāpūjanassa vasena tam vibhajitvā dassento “**ariyam, vo bhikkhave**” tiādimāha. Tattha “**thomanenā**” ti padenāpi “sakkacca” nti padam yojetabbam. Pūjanādvayassāpi vā vasena idhāpi padayojanā veditabbā. **Ariyabhāvādayoti** ariyaseṭṭhaaggabhāvādayo. **Niyyānādayoti** niyyānahetudassanādayo. **Svākkhātātādayoti** svākkhātāsandiṭṭhikatādayo.

Idāni ariyasāṅghaguṇānampi imāya gāthāya pakāsītābhāvam dassetuṃ “**yasmā panā**” tiādi vuttaṃ. **Bālyādisamatikkamanatoti** bālaabyatthābhāvādisamatikkamanato.

Ñānaviseso sutacintābhāvanāmayaññāni. Sotabbamanasikātabbapaṭivijjhitaṭṭhāvatthā **avatthābhedo. Ubhayanti** byañjanapadam, atthapadañca. **Ubhayathāti** karaṇakammasādhanaṅvasena

paccekam yojetabbaṃ. **Paṭipajjitabbattāti** ñātabbattā.

“**Ayañca gāthā**”tiādi kesañci vādo. Tathā hi apare “therenevāyaṃ gāthā bhāsītā”ti vadanti. Attūpanāyikāpi hi kadāci dhammadesanā hoti eva yathā “dasabalasamannāgato, bhikkhave, tathāgato catuvesārajjavīsārado”tiādi (saṃ. ni. 2.21-22). Evañca katvā “katame soḷasa hārā”tiādivacanaṃ samatthitaṃ hoti.

Yathāvuttaatthamukhenevāti mūlapadasaṅkhātaatthuddhārenea. **Parato āgamissatīti** niddesavārassa pariyoṣāne āgamissati “tīṇi ca nayā anūnā”tiādinā (netti. 4 dvādasapada).

Vuccatīti kattari kammaniddesoti āha “**vadatī**”ti. Atha vā **vuccatīti** kammakattuniddesoyaṃ. Ayañhettha attho – hārā, nayā cāti ubhayaṃ pariggahitaṃ saṃvaṇṇakena sabbathā gahitañce, vuccati suttaṃ, sayameva suttaṃ saṃvaṇṇetīti, etena hāranayesu vasībhāvena suttasaṃvaṇṇanāya sukarataṃ dasseti.

Pakārantarenāti pubbe “sāsana”nti vuttamatthaṃ “desanā, desita”nti tato aññena pakārena. **Niyametvāti** tassa ekantato viññeyyataṃ avadhāretvā. **Viññeyyatā** viṣiṭṭhesu desanādesitesu viññeyyapade labbhamānā vijānanakiriya.

Desanādesitāni ca yāvadeva vijānanatthānīti vijānanaṃ padhānanti tameva niddhārento “**tatrāti tasmim vijānane**”ti āha.

Etthāhāti navaṅgasāsanavaviddhasuttantāti etasmim atthavacane āha codako. Tassāyaṃ adhippāyo – navahi aṅgehi vavattithehi aññamaññasaṅkararahitehi bhavitabbaṃ, tathā ca sati asuttasabhāvāneva geyyaṅgādīnīti navavidhasuttantavacanaṃ virujjheyya. Atha suttasabhāvāni geyyaṅgādīni, evaṃ sati “sutta”nti visuṃ suttaṅgaṃ na siyā, evaṃ sante aṭṭhaṅgasāsaṇaṃ āpajjatīti. Tenāha “**kathaṃ panā**”tiādi. Geyyaṅgādīsu katipayānampi suttabhāve yathāvuttadosānativatti, pageva sabbesanti dasseti “**yañcā**”tiādinā. **Saṅgahesūti** aṭṭhakathāsu. Porāṇaṭṭhakathānañhi saṅkhepabhūtā idāni aṭṭhakathā “saṅgahā”ti vuttā. Suttaṃ nāma sagāthakaṃ vā siyā, niggāthakaṃ vāti aṅgadvayeneva tadubhayaṅgaṃ katanti visuṃ suttaṅgassa asambhavo tadubhayavinimuttassa suttassa abhāvato. Tena vuttaṃ “**suttaṅgameva na siyā**”ti. **Athāpi** kathañci. **Siyāti** vakkhamānaṃ sāmāññavidhiṃ sandhāyāha. Evampi ayaṃ dosoti dassento “**maṅgalasuttādīna**”ntiādimāha.

Tabbhāvanimittanti geyyaṅgabhāvanimittaṃ. Veyyākaraṇassa tabbhāvanimittanti sambandho. Codako “gāthāvirahe”ti vacanaṃ aggaṇhanto “pucchāvissajjanaṃ byākaraṇa”nti vacanamattameva gahetvā “**evaṃ sante**”tiādinā codeti. Itaro pana okāsaviddhito anokāso vidhi balavāti ñāyaṃ gāthāviraḥitaṃyeva veyyākaraṇanti, idhādhippetanti ca dassento “**nāpajjati**”tiādinā pariharati. **Tathā hīti** teneva kāraṇena, satipi saññantaranimittayoge anokāsasaññānaṃ balavabhāvenevāti attho.

Saṅgahavāraṇaṇā niṭṭhitā.

2. Uddesavāraṇaṇā

1. Vibhāgenāti sarūpavibhāgena. Adiṭṭhaṃ jotiyati etāyāti **adiṭṭhajotanā**. Diṭṭhaṃ saṃsandīyati etāyāti **diṭṭhasaṃsandana**, saṃsandanaṃ cettha sākacchāvasena vinicchayakaraṇaṃ. Vimati chijjati etāyāti **vimaticchedanā**. Anumatīyā pucchā **anumatipucchā**. “Taṃ kiṃ maññathā”ti hi kā tumhākaṃ anumatīti anumati pucchitā. **Kathetukamyatāti** kathetukamyatāya.

“**Hariyanti etehi**”tiādinā karaṇādhikaraṇakattubhāvakkammāsādhanaṃ vasena **hāra**-saddassa atthaṃ vatvā sadisakappanāvasena dassetuṃ “**hārā viyā**”tiādi vuttaṃ. Puna ganthakaraṇādiatthena

ganhādisaddānaṃ viya hāra karaṇādiatthena hārasaddasiddhiṃ dassetuṃ “**hārayanti**” tiādimāha. “**Haraṇato, ramaṇato cā**” ti iminā manoharā manoramā cete saṃvaṇṇanāvīsesāti dasseti.

Upapattisādhana yuttīti lakkhaṇahetu. **Vuttanayenāti** “nanu ca aññepi hārā yuttisahitā evā” tiādinā desanāhāre vuttanayānusārena.

Catunnaṃ byūho etthāti bhinnādhikaraṇānampi padānaṃ aññapadatthasamāso labbhāti “urasilomo” tiādināṃ (dī. ni. tī. 3.54, 303) viyāti vuttaṃ.

Sesanti “vivacanameva vevacana” nti evamādi.

Anuppavesīyantiti avagāhīyanti. **Samādhīyanti**ti pariharīyanti. **Vinā vikappenti**ti jāti sāmāññaṃ, bhedo sāmāññaṃ, sambandho sāmāññantiādinā padatthantarabhāvavikappanamantarena.

Padatthānādimukhenāti padatthānavevacanabhāvanāpahānamukhena. **Kecīti** padatthānaparikkhāraāvattaparivattanapaññattiotaraṇe sandhāya vadati.

2. Sambandhoti hetuphalabhāvayogo. Tathābhūtānañhi dhammānaṃ ekasantānasiddhatā ekattanayo. **Vibhāgo** satipī nesaṃ hetuphalabhāve vibhātasabhāvātā. Añño eva hi hetu, aññaṃ phalanti. **Byāpāraviraho** nirīhatā. Na hi hetuphalānaṃ evaṃ hoti “ahaṃ imaṃ nibbattemi, imināhaṃ nibbatto” ti. **Anurūpaphalatā** paccayuppannānaṃ paccayānukūlatā. Samūhādiṃ upādāya lokasaṅketasiddhā vohāramattatā **sammutisabhāvo**. Pathavīphassādīnaṃ kakkhaḷaphusaṇādīlakkhaṇaṃ **paramatthasabhāvo**. Ayañhettha saṅkhepo – yasmīṃ bhinne, itarāpohe vā cittena katena tathā buddhi, idaṃ **sammutisaccaṃ** yathā ghaṭe, sasambhārajale ca, tabbipariyāyena **paramatthasaccanti**. **Paramatthasaccappaṭivedhāyāti** nibbānādhigamāya.

Antoti abbhantaro. **Padhānāvayavenāti** mūlabhāvena. “Nandī dukkhassa mūla” ntiādīsu (ma. ni. 1.13) taṇhā “nandī” ti vuttā. “Saṅgāme ca nandiṃ caratī” tiādīsu pamodoti āha “**taṇhāya, pamodassa vā**” ti.

3. Jātibhedatoti kusalā, akusalāti imasmā vīsesā. **Yujjanti**ti ettha hetuattho antonīto veditabboti āha “**yojīyanti**” ti. Kehi yojīyanti? Saṃvaṇṇanakehīti adhippāyo. **Yujjanti**ti vā yuttā honti, tehi samānayogakkhamā taggahaṇeneva gahitā hontīti attho tadekatthabhāvato. Imasmīṃ atthe “**navahi padehī**” ti sahayoge karaṇavacanaṃ, purimasmīṃ karaṇe. “**Ete kho**” ti ca pāṭho. Tattha **kho**-saddassa padapūraṇatā, avadhāraṇatthātā vā veditabbā. **Ete evāti** ete taṇhādayo eva, na ito aññeti attho. **Aṭṭhāraseva** na tato uddhaṃ, adho vāti. Purimasmīṃ pakkhe mūlapadantarābhāvo, dutiyasmīṃ tesam anūnādhikatā dīpitā hoti.

Uddesavāraṇṇanā niṭṭhitā.

3. Niddesavāraṇṇanā

4. Niddesavāre sāmāññatoti sādharmaṇato. **Vīsesenāti** asādharmaṇato. **Padatthoti** saddattho. **Lakkhaṇanti** sabhāvo. **Kamoti** anupubbī. **Ettāvatāti** ettakappamāṇabhāvo. **Hetvādīti** hetuphalabhūmiupanisāsabhāgavisabhāgalakkhaṇanayā. Vīsesato pana lakkhaṇanti sambandho.

Hārasaṅkhepavaṇṇanā

1. Yaṃ, bhikkhaveti ettha **yanti** paccattavacanaṃ, tañca sukhaṃ, somanassanti dvayena samānādhikaraṇanti katvā “**assādīyatīti assādo, sukhaṃ, somanassañcā**” ti vuttaṃ. Sukhādivedanā

viya manāpiyarūpādipi avītarāgassa assādetabbanti āha “**evaṃ iṭṭhārammaṇampī**”ti. “**Assādeti etāyāti vā assādo, taṇhā**”ti etena “**ya**”nti hetuatthe nipātoti dasseti. Tatrayamattho – yena hetunā pañcupādānakkhandhe paṭicca assādanīyabhāvena uppajjati sukhaṃ somanassaṃ, ayaṃ taṇhāsankhāto assādo assādanakiriyāya kāraṇanti. Iti katvā ayamattho diṭṭhābhinandanādibhāvato vipallāsesupi sambhavaṭṭi āha “**evaṃ vipallāsāpī**”ti. **Aniṭṭhampī pi**-saddena iṭṭhampīti yojetabbaṃ, anavasesā sāsavā dhammā idha ārammaṇaggahaṇena gahitāti āha “**sabbesaṃ tebhūmakasaṅkhārāna**”nti.

Dukkhādukkhamasukhavedanānanti ettha dukkhasabhāvā eva adukkhamasukhā vedanā gahitā aniṭṭhārammaṇassa adhippetattā, na sukhasabhāvā. Yaṃ sandhāya vuttaṃ “**yāyaṃ, bhante, adukkhamasukhā vedanā, santasmiṃ esā paṇīte sukhe vuttā bhagavatā**”ti (ma. ni. 2.88; saṃ. ni. 4.267). “**Sukhapariyāyasabbhāvato**”ti iminā iṭṭhatāmatatopi lesena sattānaṃ ārammaṇassa assādanīyatā sambhavaṭṭi dasseti.

Ādīnava dosanissandanatāya doso, svāyaṃ pīlanavuttiyā veditabboti āha “**ādīnava dukkhā vedanā, tissopi vā dukkhatā**”ti. Evaṃ dosatthataṃ ādīnavassa dassetvā idāni kapaṇatthataṃ dassetuṃ “**atha vā**”tiādi vuttaṃ. **Yatoti** yasmā dosakapaṇasabhāvattāti vuttaṃ hoti.

Nissaratīti vivitti, sabbasaṅkhāravivekoti attho. **Sāmaññaniddesenāti** nissaraṇasaddavacanīyatāsāmaññena. **Purimānanti** assādādīnavatānaṃ. **Upāyo cātiādīsu ca**-saddo padapūraṇamattanti katvā āha “**pacchimānañcā**”ti, phalādīnanti attho. **Tadantogadhabhedānanti** ariyamaggapariyāpannavisesānaṃ.

Kāmbhavādīnanti ādi-saddena na rūpārūpabhāvā eva gahitā, atha kho te ca saññībhavādayo ca ekavokārabhavādayo ca gahitā. Tenāha “**tiṇṇaṃ tiṇṇaṃ bhavāna**”nti.

Yāvadeva anupādāparinibbānatthā bhagavato desanāti āha “**nanu ca...pe... nipphādīyati**”ti. “**Vuttamevā**”ti iminā punaruttidosam codeti. Itaro “**saccameta**”nti anujānitvā “**taṅca kho**”tiādīnā pariharati. “**Paramparāyā**”ti etena ajjhataṃ yonisomanasikāro viya na paratoghoso āsannakāraṇaṃ dhammādhigamassa dhammassa paccattaṃ vedanīyattāti dasseti. Tathā hi “**akkhātāro tathāgatā, paṭipannā pamokkhanti, jhāyino mārabandhanā**”ti (dha. pa. 276) vuttaṃ. **Tadadhigamakāraṇaṃ** ariyamaggādhigamakāraṇaṃ siyā. Kiṃ pana tanti āha “**sampattibhavahetū**”ti, tena carimattabhāvahetubhūtaṃ puññasampattiṃ vadati.

“**Attānudiṭṭhiṃ ūhacca, evaṃ maccutaro siyā**”ti idaṃ ariyamaggassa pubbabhāgapaṭipadāya phalabhāvasādhanam. Yena hi vidhinā attānudiṭṭhisamugghāto, maccutaraṇaṅca siyā, so “**eva**”nti iminā pakāsītoti. Attānudiṭṭhisamugghātamaccutaraṇānaṃ phalabhāve vattabbameva natthi.

“**Dhammo have**”ti pana gāthāyaṃ lokiyassa puññaphalassa vuttattā āha “**idaṃ phala**”nti. Yaṃ nibbattetabbaṃ, taṃ **phalaṃ**. Yaṃ nibbattakaṃ, so **upāyo**. Ayamettha vinicchayo. Tenāha “**etena nayanā**”tiādi. **Upadhisampattīti** attabhāvasobhā.

Visuddhīti ñāṇadassanavisuddhi adhippetāti āha – “**etthāpi...pe... viññātu**”nti. “**Yasmā panā**”tiādīnāpi tamevatthaṃ vacanantare pākāṭataraṃ karoti.

Sarūpato āgatāni “yato kho, bhikkhave, bhikkhu pañcannaṃ upādānakkhandhānaṃ samudayaṅca atthaṅgamaṅca assādaṅca ādīnavaṅca nissaraṇaṅca yathābhūtaṃ pajānātī”tiādīsu (saṃ. ni. 3.26-28). **Ekadesena āgatāni** “**saṃyojanīyesu, bhikkhave, dhammesu assādānupassino viharato** (saṃ. ni. 2.53), bahudukkhā bahupāyāsā, ādīnava ettha bhiyyo (ma. ni. 1.117), saṅkhārānametaṃ nissaraṇaṃ, yadidaṃ nibbāna”ntiādīsu (paṭi. ma. 1.24; 3.41). **Na sarūpena āgatāni** yathā sāmaññaphalassuttādīsu. **Atthavasenāti** assādetabbādiatthavasena. **Na papañcitoti** na vitthārito.

2. **Eseva nayoti** atidesena vicīyamānavacanaseso atidiṭṭho. Bhāvatthe tohi āha “**vissajjanti vissajjana**”ti. **Sutte āgataṃ** na atthasamvaṇṇanāvasena aṭṭhakathāyaṃ āgataṃ adhippāyo. **Pucchānurūpatā idha pubbāparanti** catubyūhapubbāparato imaṃ visesetvā dasseti. **Pucchānusandhīti** pucchāya vissajjanena anusandhānaṃ. **Aṭṭhakathāyaṃ** pana heṭṭhimadesanāya pucchānimittapavattauparidesanāya sambandho “pucchānusandhī”ti vuttaṃ. **Pubbāpekkhanti** pucchitavissajjitapadāpekkhaṃ. “**Suttassā**”ti vā iminā pucchāvissajjanānugītiyo ṭhapetvā seso vicayahārapadattho saṅgahitoti padassāpi saṅgaho veditabbo. Imasmiṃ pakkhe gāthāyaṃ **ca-saddo** padapūraṇamatte daṭṭhabbo.

“Cakkhu anicca”nti puṭṭhe “āma, cakkhu aniccamevā”ti ekantato vissajjanaṃ **ekamaṃsabyākaraṇaṃ**. “Aññindriyaṃ bhāvetabbaṃ, sacchikātabbañcā”ti puṭṭhe “maggapariyāpannaṃ bhāvetabbaṃ, phalapariyāpannaṃ sacchikātabba”nti vibhajitvā vissajjanaṃ **vibhajjabyākaraṇaṃ**. “Aññindriyaṃ kusala”nti puṭṭhe “kiṃ anavajjaṭṭho kusalaṭṭho, udāhu sukhavipākaṭṭho”ti paṭipucchitvā vissajjanaṃ **paṭipucchābyākaraṇaṃ**. “Sassato attā, asassato vā”ti vutte “abyākatameta”ntiādinā avissajjanaṃ **ṭhapanāṃ**. “Kiṃ panete kusalāti vā dhammāti vā ekatthā, udāhu nānatthā”ti idaṃ pucchanaṃ **sāvasesaṃ**. Vissajjanassa pana sāvasesatā veneyyajjhāsayasena desanāyaṃ veditabbā. Appāṭihīraṃ **sauttaraṃ**. Sappāṭihīraṃ **niruttaraṃ**. Sesā vicayahāraniddese suviññeyyameva.

Ettha ca assādo assādahetu yāva āṇattihetūti evaṃ hetūnampi assādādayo veditabbā. Tattha saṅkhepato sukhasukhapaccayalakkhaṇo **assādo**, so visesato saggasampattiyā dīpetabbo. Sā hi tassa ukkaṃso, sesā panettha bhavasampatti tadanvāyikā veditabbā. Tassa hetu dānamayaṃ, sīlamayaṅca puññakiriyavattu. Dukkhadukkhapaccayalakkhaṇo **ādīnavo**. Vipariṇāmasaṅkhāradukkhatānaṃ tadavarodhato vaṭṭadukkhasāpi ettha saṅgaho. Visesato pana kāmānaṃ okāroti daṭṭhabbo, svāyaṃ saṃkilesavattunā, ittarapaccupaṭṭhānatādīhi ca vibhāvetabbo, tassa hetu dasa akusalakammāpathā. Nekkhammaṃ **nissaraṇaṃ**, tassa hetu yathārahaṃ tadanucchavikā pubbabhāgappaṭipadā. **Phalaṃ** desanāphalameva, tassa hetu desanā. **Upāyo** yathāvuttaupāyova, tassa hetu cattāri cakkāni. **Āṇatti** upadeso, tassa rāgaggiādīhi lokassa ādittatā, satthu mahākaruṇāyogo ca hetu.

Tathā catūsu ariyasaccesu samudayena **assādo**, dukkhena **ādīnavo**, magganīrodhehi **nissaraṇaṃ**, maggo vā **upāyo**, tadupadeso **āṇatti**, anupādisesā nibbānadhātu **phalaṃ**. Iti anupubbakathāya saddhiṃ buddhānaṃ sāmukkaṃsīkāya dhammadesanāya niddhāraṇabhāvena vicayo veditabbo. Padassa padatthasambandho **hetu**. So hi tassa pavattinimittaṃ, pañhassa ñātukāmatā, kathekukāmatā ca. Adiṭṭhajotanādīnāhi catunnaṃ ñātukāmatā, itarassa itarā. Vissajjanassa pañho **hetu**. Evaṃ sesānampi yathārahaṃ vattabbaṃ.

3. **Byañjanatthānaṃ yuttāyuttaparikkhāti byañjanaggahaṇena** padaṃ gahitaṃ, **atthaggahaṇena** pañhādīhi saddhiṃ assādādayo gahitā. Vicayahārapadatthā eva hi yuttāyuttādivisesasahitā yuttihārādīnaṃ padatthā. Tathā hi padaṭṭhānapadatṭhānikabhāvavisiṭṭhā teyeva padaṭṭhānahārassa padatthā. Lakkhaṇalakkhitabbatāvisiṭṭhā, niddhāritā ca lakkhaṇahārassa, nibbanādivibhāvanāvisiṭṭhā catubyūhahārassa, sabhāgadhammavasena, visabhāgadhammavasena ca āvaṭṭanavisiṭṭhā āvaṭṭahārassa, bhūmivibhāgādivisiṭṭhā vibhattihārassa, paṭipakkhato parivattanavisiṭṭhā parivattanahārassa, pariyaivevacanavisiṭṭhā vevacanaṇahārassa, pabhavādivipaññāpanavisiṭṭhā paññattihārassa, khandhādīmukkehi otaraṇavisiṭṭhā otaraṇahārassa, padapadatthapañhārambhasodhanavisiṭṭhā sodhanahārassa, sāmāññāvisesaniddhāraṇavisiṭṭhā adhiṭṭhānahārassa, paccayadhammehi parikkhāraṇavisiṭṭhā parikkhārahārassa, pahātābhābhāvetabbatāniddhāraṇavisiṭṭhā samāropanahārassa padatthā. “**Byañjanassa sabhāvaniruttitā, atthassa suttādīhi avilomanāṃ yuttabhāvo**”ti iminā asabhāvaniruttitā, suttādīhi vilomanāṅca ayuttabhāvoti dīpeti, tena yuttāyuttīnaṃ hetuṃ dasseti.

4. **Yonisomanasikārādīti ādisaddena** saddhammassavanasappurisūpanissayādisādhāraṇaṃ, asādhāraṇāṅca deyyapaṭiṅgāhakādiṃ saṅgaṇhāti. **Sambhavatoti** yathārahaṃ tassa dhammassa anurūpaṃ. **Yāva sabbadhammāti** ettha **sabbaṃ** nāma padesasabbaṃ, na sabbasabbanti. Ayañhi

sabbasaddo yathā paṭhamavikappe sutte āgatadhammavasena padesavisayo, evaṃ dutiyavikappe padaṭṭhānapadaṭṭhānikaniddhāraṇena taṃtampakaraṇaparicchinnaḍḍhammaggaṇato padesavisayo eva, na anavasesadhammavisayoti. Suttāgatadhammānaṃ yāni padaṭṭhānāni, tesaṃca yānīti evaṃ kāraṇaparāmaṇāniddhāraṇalakkhaṇo padaṭṭhānahāro, parikkhārahāro pana suttāgatadhammānaṃ taṃtampaccayuppannānaṃ paṭihetupaccayatāvisesavibhāvanalakkhaṇoti satipi kāraṇavicāraṇabhāve ayaṃ padaṭṭhānahāraparikkhārahāraṇaṃ viseso.

5. Yathā “samānādhikaraṇasamānapade” tiādīsu ekasaddassa attho **samānasaddo**, evaṃ ekarasatṭhena bhāvanā “ekuppādā” tiādīsu (kathā. 473) viya **ekalakkhaṇā**ti ettha **ekasaddo** samānatthoti āha “**samānalakkhaṇā**”ti. **Samvaṇṇanāvāsena**ti ettha kammatthe **ana**-saddo, samvaṇṇetabbatāvāsena ti attho. **Lakkhaṇā**ti upalakkhaṇā. “Nānattakāyanānattasaññino (dī. ni. 3.341, 357, 359; a. ni. 9.24), nānattasaññānaṃ amanasikārā” tiādīsu **sahacāritā** daṭṭhabbā. Saññāsahagatā hi dhammā tattha saññāggahaṇena gahitā. “Dadaṃ mittāni ganthatī” tiādīsu (saṃ. ni. 1.246; su. ni. 189) **samānakiccatā**. Piyavacanattacariyā samānatatāpi hi tattha mittaganthanakiccena samānakiccā gayhanti saṅgahavatthubhāvato. “Phassapaccayā vedanā” tiādīsu (ma. ni. 3.126; saṃ. ni. 2.1, 39; mahāva. 1; vibha. 225; udā. 1; netti. 24) **samānahetutā**. Yathā hi phasso vedanāya, evaṃ saññādīnampi saḥajātādīnā paccayo hoti evāti tepi samānahetutāya vuttā eva honti. Tathā hi vuttaṃ “tajjāmanoviññādhātusamphassajā cetanā” ti (dha. sa. 5), “phuṭṭho sañjānāti, phuṭṭho cetetī” tiādi (saṃ. ni. 4.93). Evaṃ “taṇhāpaccayā upādāna” nti (ma. ni. 3.126; saṃ. ni. 2.1, 39; mahāva. 1; vibha. 225; udā. 1; netti. 24) evamādi pi udāharitabbaṃ. “Avijjāpaccayā saṅkhārā” tiādīsu (ma. ni. 3.126; saṃ. ni. 2.1, 39; mahāva. 1; vibha. 225; udā. 1; netti. 24) **samānaphalatā** daṭṭhabbā. Yathā hi saṅkhārā avijjāya phalaṃ, evaṃ taṇhupādādīnampi tepi tattha gahitāva honti. Tenāha “purimakammabhavasmim moho avijjā āyūhanā saṅkhārā nikantī taṇhā upagamaṇaṃ upādāna” nti. “Rūpaṃ assādeti abhinandati, taṃ ārabba rāgo uppajjati” ti (paṭṭhā. 1.1.424) vutte taṃsampayuttā vedanādayo vuttā eva honti samānārammaṇabhāvato. Na hi tehi vinā tassa uppatti atthi. **Evamādiḥī**ti ettha **ādisaddena** atthappakaraṇalingasaddantarāsannidhānasāmatthiyādīnampi saṅgaho daṭṭhabbo. Atthādivāsena pi hi sutte avuttānampi vuttānaṃ viya niddhāraṇaṃ sambhavatīti. **Vuttappakārenā**ti “vadhakatṭhena ekalakkhaṇāni” tiādīnā pāḷiyaṃ, “sahacāritā” tiādīnā atṭhakathāyañca vuttena pakārena.

6. “Phusanatṭhena phasso” tiādīnā niddhāretvā vacanaṃ **nibbacanaṃ**, taṃ pana padasseva, na vākyassāti āha “**padanibbacana**” nti. Adhippāyanidānānipettha byañjanamukheneva niddhāretabbāni. Nibbacanaṃ pubbāparasandhīsu vattabbameva natthīti āha “**visesato byañjanadvāreṇeva atthapariyesanā**” ti. **Pavattinimittaṃ** ajjhāsayaḍi.

7. “**Padatṭhāne**” ti idaṃ sutte āgatadhammānaṃ kāraṇabhūtepi dhamme niddhāretvā sabhāgato, visabhāgato ca āvaṭṭanaṃ kātabbanti dassanattamaṃ vuttaṃ, na tantivasena. Tasmā padaṭṭhānaniddhāraṇāya vināpi āvaṭṭanaṃ yuttamevāti siddhaṃ hoti. Padassa vā saddapavattiṭṭhānaṃ **padaṭṭhānaṃ** padattho. Etasmim pakkhe “ārambhatha nikkamathāti (saṃ. ni. 1.185; netti. 29; peṭako. 38; mī. pa. 5.1.4) vīriyassa padaṭṭhāna” nti (netti. 29) ettha yvāyamārambhadhātuādiko attho vutto, taṃ vīriyasaddassa pavattiṭṭhānaṃ vīriyasaddābhidheyyo atthoti evamattho veditabbo. Sesesupi ese va nayo. **Sesakama** nāmagahitato itaraṃ, taṃ pana tassa paṭipakkhabhūtaṃ vā siyā, aññaṃ vāti āha “**visabhāgatāya aggahaṇena vā**” ti. **Samvaṇṇanāya yojentoti** yathāvuttavisabhāgadhammaniddhāraṇabhūtena atthakathanena pāḷiyaṃ yojento. Tenāha “**desana**” nti. “**Paṭipakkhe**” ti idaṃ nidassanamattaṃ daṭṭhabbaṃ sabhāgadhammavasena pi āvaṭṭanassa icchitattā.

8. **Nāmasāsenā**ti sādharmaṇānāmasāsenā. Pāḷiyaṃ pana “micchattaniyatānaṃ sattānaṃ, aniyatānañca sattānaṃ dassanapahātabbā kilesā sādharmaṇā” tiāgatattā (netti. 34) “**dassanapahātabbādīnāmasāsenā**” ti vuttaṃ. **Vatthuvāsena**ti sattasāntānavāsena. So hi dhammānaṃ pavattiṭṭhānatāya idha “vatthū” ti adhippeto. Tenāha – “puthujjanassa, sotāpannassa ca kāmarāgabyāpādā sādharmaṇā” tiādi (netti. 34). **Vuttavipariyāyena**ti nāmato, vatthuto ca āveṇikatāya. Taṃtaṃmaggaphalaṭṭhānañhi taṃtaṃmaggaphalaṭṭhatā, bhābbānaṃ bhābbatā, abhābbānaṃ abhābbatā

asādhāraṇā.

9. “**Bhāvite**”ti idaṃ bhāvanākiriyaṃ upalakkhaṇaṃ, na ettha kālavacanicchāti āha “**bhāvetabbeti attho**”ti. Bhāvanā cettha āsevanāti, kusalasaddopi anavajjaṭṭhoti veditabbo. **Paṭipakkhatoti** vipakkhato. Visadisūdāharaṇena byatirekato yathādhīppetadhammappatiṭṭhānā hesā.

10. **Padatthassāti** padābhidheyyassa atthassa, sabhāvadhammassa vā.

Nikkhepo desanā. **Pabhavo** samudayo.

12. “**Avuttānampi saṅgaho**”ti iminā avuttasamuccayattho **ca**-saddoti dasseti.

13. “**Gāthāruḷhe**”ti iminā pālīāgatova pañho veditabbo, na itaroti dasseti. Tenāha “**buddhādīhi byākate**”ti. **Tassa atthassāti** āradhassa atthassa, tena ārambhasodhanassa visayamāha. Ettha ca atthadvāreṇeva padapucchāsodhanampi kariyatīti puna “**tassa atthassā**”ti vuttaṃ. Atha vā **vissajjitamhīti** vissajjane. Vissajjanasodhanena hi pañhāsodhanaṃ. **Pañheti** pucchāyaṃ. **Gāthāyanti** upalakkhaṇaṃ, tena gāthāyaṃ, suttageyyādīsu cāti vuttaṃ hoti. **Yamārabbhāti** yaṃ sīlādīmārabbhā gāthādīsu desitaṃ, tasmim ārambheti attho. **Pucchitāti** pucchākārīnī, “kā ettha padasuddhi, kā pañhāsuddhi, kā ārambhasuddhī”ti evaṃ pucchākārīnī pucchāṃ katvā pavattitā suddhāsuddhāparikkhāti yojanā.

14. **Na vikappayitabbāti** yathā loke “jāti sāmāññaṃ, bhedo sāmāññaṃ, sambandho sāmāñña”ntiadinā sāmāññaṃ jātiādiṃ, tabbidhurañca visesaṃ vikappenti parikkappenti, evaṃ na vikappayitabbāti attho. Yadā yo kālaviseso “sve”ti laddhavohāro, tadā so taṃdivasātikkame “ajjā”ti, puna taṃdivasātikkame “hiyyo”ti vohariyatīti anavaṭṭhitasabhāvā ete kālavisesā. Disāyapi “ekam avadhim apekkitvā puratthimā disā, tato aññaṃ apekkitvā pacchimā nāma hoti”tiadinā anavaṭṭhitasabhāvātā veditabbā. **Jātiādiapekkhāyāti** jātiādidukkhavisesāpekkhāya. **Saccāpekkhāyāti** saccasāmāññaapekkhāya. “Taṇhā”ti vuccamānaṃ kāmataṇhādiapekkhāya sāmāññaṃ samānaṃ saccāpekkhāya viseso hotīti evamādiṃ sandhāyāha “**esa nayo samudayādīsupī**”ti.

16. **Etthāti** etasmim buddhavacane. Tenāha “**sikkhattayasaṅkhātassā**”tiādi. Yathārutāṃ yathākathitaṃ saddato adhigataṃ niddhāritaṃ, na atthappakaraṇaṅgasaddantarāsannidhānādippamāṇantarādhiyataṃ. “**Atthato dassitā**”ti idaṃ yasmim sutte bhāvanāva kathitā, na pahānaṃ, taṃ sandhāya vuttaṃ.

Nayasaṅkhepavaṇṇanā

17. **Taṇhāvijjāhi** karaṇabhūtāhi. Saṃkilesa pakkho etassāti **saṃkilesapakkho**, saṃkilesapakkhiko suttattho, tassa nayanalakkhaṇoti yojanā. Vodānapakkhassa suttatthassāti sambandho. Vuṭṭhānagāminiyā, balavavipassanāya ca dukkhādīsu pariññeyyatādīni maggānugaṇo gahaṇākāro **anugāhaṇanayo**. Yadi evaṃ kathaṃ nayoti āha “**tassa panā**”tiādi. Tattha “**nayavohāro**”ti iminā nayādhiṭṭhānaṃ nayoti vuttanti dasseti.

18. **Bādhakādibhāvato**ti bādhakapabhavasantiniyyānabhāvato. **Aññathābhāvābhāvenāti** abādhakaappabhavaasanti aniyyānabhāvābhāvena. **Saccasabhāvattāti** amusāsabhāvattā. **Avisaṃvādanatoti** ariyasabhāvādibhāvassa na visaṃvādanato ekantikattāti attho.

19. **Samkiliṭṭhadhammāti** saṃkilesasamannāgatā dhammā **saddhammanayakovidāti** saccapaṭiccasamuppādādidhammanayakusalā, ekattādinayakusalā vā.

20. **Atthavissajjanesūti** “ime dhammā kusalā”tiādīnā (dha. sa. 1) sutte katapañhavissajjanesu ceva atthakathāya kataatthasaṃvaṇṇanāsu ca. “**Vodāniyā**”ti iminā anavajjadhammā idha kusalāti adhippetā, na sukhavipākāti dasseti. Tassa tassa atthanayassa yojanattamaṃ manasā volokayateti yojanā.

21. Yadi karaṇabhūtaṃ, kathaṃ tassa atthantarābhāvoti āha “**yena hī**”tiādi. Disābhūtadhammānam volokayanasaṃvaṇṇanāyānabhāvato vohārabhūto, kammabhūto ca nayo, na nandiyāvaṭṭādayo viya atthabhūtoti “**vohāranayo, kammanayo**”ti ca vuccati.

Dvādasapadavaṇṇanā

23. **Apariyosite padeti** uccāraṇavelāyaṃ pade asamatte, vippakateti attho. Pariyosite hi “pada”ntve samaññā siyā, na “akkhara”nti adhippāyo. Padassa vevacanatāya atthavasena pariyāyaṃ kharantaṃ sañcarantaṃ viya hoti, na evaṃ vaṇṇo avevacanattāti āha **pariyāyavasena akkharāṇato**”ti. **Na hi vaṇṇassa pariyāyo vijjati**”ti idaṃ akārādivaṇṇavisesaṃ sandhāya vadati, na vaṇṇasāmaññaṃ. Tassa hi vaṇṇo akkharanti pariyāyo vutto evāti.

Akkharasaddassa atthamaṃ vatvā tappasaṅgena vaṇṇasaddassapi vattumaṃ “**kenatthena vaṇṇo**”tiādīmāha. Tattha nanu padena, vākyena vā attho saṃvaṇṇīyati, na akkharenāti codanaṃ manasi katvā āha “**vaṇṇo eva hī**”tiādi. **Padādibhāvenāti** padavākyabhāvena. **Yathāsambandhanti** yathāsaṅketamaṃ. **Ayaṃ**-saddo imassatthassa vācako, ayaṃ attho imassa saddassa vacanīyoti yathāgahitasāṅketānurūpaṃ saddatthānaṃ vācakavacanīyabhāvo. Atha vā yvāyaṃ saddatthānaṃ aññaṃmaññaṃ avinābhāvo, so **sambandho**. Tadanurūpaṃ ekakkharaṃ nāmapadaṃ “mā evaṃ maññasi”tiādīsu **mā-kārādi**. **Kecīti** abhayagirivāsino. Te hi abhidhammadesanaṃ “manasādesanā”ti vadanti, yato rāhulācariyo “visuddhakarūṇaṃ manasādesanā vācāya akkharāṇato akkharasaññitā”ti āha.

Satvappadhānanti drabyappadhānaṃ. Nāmapade hi drabyamāvibhūtarūpaṃ, kiriyā anāvibhūtarūpā yathā “phasso”ti (ma. ni. 3.126; saṃ. ni. 2.1, 39; mahāva. 1; vibha. 225; udā. 1; netti. 24). Ākhyātapade pana kiriyā avibhūtarūpā, drabyamanāvibhūtarūpaṃ yathā “phusatī”ti. Tena nesamaṃ satvakiriyāppadhānatā vuttā. **Kiriyāvisesaggahaṇanimitanti** kiriyāvisesāvabodhahetu kiriyāvisesadīpanato, yathā “cirappavāsi”nti (dha. pa. 219) ettha **pa**-saddo vasanakiriyāya viyogaviṣṭhataṃ dīpeti. “Evaṃ manasi karoṭha, mā evaṃ manasākatthā”tiādīsu kiriyāvisesassa jotako **evaṃ**-saddo. “Evaṃsīlā (dī. ni. 3.142) evaṃdhammā”tiādīsu (dī. ni. 2.13; ma. ni. 3. 198; saṃ. ni. 5.378) satvavisesassa. Evaṃ sesanipātapadānampīti adhippāyo. Tenāha “**kiriyāya...pe... nipātapada**”nti.

Saṅkhepato vuttaṃ, kiṃ pana tanti āha “**padābhīhita**”nti. Atha vā **saṅkhepato vuttaṃ**, yo akkharehi saṅkāsītōti vuccati. **Padābhīhitaṃ** padehi kathitaṃ, yo padehi pakāsītōti vuccati. Tadubhayaṃ, yadi padasamudāyo vākyamaṃ, tassa ko paricchedo. Yāvatā adhippetatthapariyosānaṃ, tāvatā ekavākyantipi vadanti, bahūpettha pakāre vaṇṇenti. Kiṃ tehi, sākhyaṃ sābyayaṃ sakārakaṃ savisesanaṃ “vākyā”nti daṭṭhabbaṃ. Nanu ca padenapi attho byañjīyatīti codanaṃ manasi katvā āha “**padamattasavanepi hī**”tiādi. Ākāresu vākyavibhāgesu abhīhitaṃ kathitaṃ nibbācanaṃ **ākārābhīhitaṃ nibbācanaṃ**. “**Abhīhitanti** ca pāliāgata”nti vadanti.

“Nibbānaṃ maggati, nibbānatthikehi vā maggīyati, kilese vā mārento gacchatīti **maggo**”tiādīnā (dha. sa. attha. 16) nibbānanānaṃ vitthāro. Tamniddesakathanattā niddesoti imamatthamāha “**nibbānavitthāro niravasesadesanattā niddeso**”ti. **Padehīti** vākyāvayavabhūtehi, vākyato vibhajjamānehi vā ākhyātādīpadehi. Tenāha “**vākyassa vibhāgo**”ti, tathā cāha “**apariyosite**”tiādi. Apare pana “pakatipaccayalopādesādivasena akkharavibhāgo **ākāro**, niruttinayena padavibhāgo **nibbācanaṃ**, vākyavibhāgo **niddeso**. **Vaṇṇapadavākyāni** hi avibhattāni, vibhattāni ca cha **byañjanapadāni**”ti vadanti. **Chaṭṭhaṃ vacananti** chaṭṭhaṃ padaṃ. **Kātabbanti** “akkharaṃ padaṃ

byañjanaṃ ākāro tatheva nirutti niddeso chaṭṭhavaṇṇaṃ”nti gāthāyaṃ evaṃ kattabbaṃ, saṃvaṇṇanāvāsena vā ākārapadaṃ catutthaṃ kātābanti attho. Sabbo saddavohāro vibhattehi, avibhattehi ca akkharapadavākyeheva, tadaññappakāro natthīti āha “**yānimānī**”tiādi.

24. Kāsanāsaddo kammaṭṭhoti dassetuṃ “**kāsīyati**”tiādi vuttaṃ. Padehi tāva atthassa saṅkāsanā, pakāsanā ca hotu, padāvadhikāpi saṃvaṇṇanā icchitāti akkharehi pana kathanti āha “**akkharehi suyamānehi**”tiādi. **Padatthasampañipattīti** padābhidheyyaathāvabodho. “**Akkharehi saṅkāsetī**”tiādinā akkharakaraṇaṃ saṅkāsanabhūtaṃ ugghaṭṭanakiriyāya vadantena yathāvutto attho sādhitoti dassetuṃ “**tathā hi**”tiādi vuttaṃ.

Vibhajanuttānikammapaññattīti ekattaniddeso samāhāroti ayaṃ dvandasamāso. **Ubhayenāti** “vivaṇṇā, vibhajanā”ti iminā dvayena. **Etehi** ettha **eva**-kāro luttaniddiṭṭhoti āha “**etehi evā**”ti. “**Saṅkāsanā...pe... abhāvato**”ti iminā yathādhippetaanūnāvadhāraṇaphalaṃ dasseti. **Ugghaṭṭanādīti** ādisaddena vipañcananayāni saṅgaṇhāti.

25. Sammā yuttoti sammā aviparītaṃ, anavasesato ca yutto sahito. Tathā hi vuttaṃ “**anūnā**”ti. Sabbo hi pāḷiattho atthapadaatthanayehi anavasesato saṅgahito. Tenāha “**sabbassa hi**”tiādi.

26. Kasmā panettha mūlapadapadaṭṭhānāni asaṅgahitānīti? Padatthantarābhāvato. Mūlapadāni hi nayānaṃ samuṭṭhānamattatā padaṭṭhānānīti dassitoyāya nayo. Tena vuttaṃ “**ito vinimutto koci nettipadattho natthī**”ti.

Nettiyā kāraṇabhūtāya. **Hārā saṃvaṇṇetabbāti** suttassa atthasaṃvaṇṇanāvāsena hārā vitthāretabbā. **Svāyanti** so ayaṃ saṃvaṇṇanākkamo. Yena anukkamena nettiyaṃ desitā, teneva sutte atthasaṃvaṇṇanāvāsena yojetabbāti. **Evaṃ siddheti** desanākkameneva siddhe. **Ayaṃ ārambhoti** “soḷasa hārā paṭhama”nti evaṃ pavatto ārambho. **Imamatthanti** imaṃ vuccamānaniyamasaṅkhātaṃ atthaṃ.

Yadi desitakkameneva hāranayā sutte yojetabbā siyuṃ, kiṃ so kamo kāraṇanirapekkho, udāhu kāraṇasāpekkhoti? Kiñcetha – yadi tāva kāraṇanirapekkho hāranayānaṃ anukkamo, aneke atthā vuccamānā avassaṃ ekena kamena vuccantīti. Evaṃ sante yena kenaci kamena sutte yojetabbā siyuṃ, tathā sati niyamo niratthako siyā. Atha kāraṇasāpekkho, kiṃ taṃ kāraṇanti? Itaro kāraṇagavesanaṃ akatvā attho evettha gavesitabboti adhippāyena “**nāyamanuyogo na katthaci anukkame nivisati**”ti vatvā “na pana mayaṃ devānaṃpiyassa manorathaviḅhātāya cetemā”ti kamakāraṇaṃ vicārento “**apicā**”tiādinā desanāhārassa tāva ādito desanāya kāraṇaṃ paṭiṭṭhapeti. Tattha **dhammadeśanāya nissayo** assādādīnavanissaraṇāni, sarīraṃ āṇatti. **Pakatiyā** sabhāvena. Niddhāraṇena vināpi **paṭiṭṭhābhāvato** nissayabhāvato.

“**Tathā hi vakkhati**”tiādinā yathāvuttaṃ atthaṃ pākaṭataraṃ karoti. Esa nayo itaresupi.

Vicayānantaranti vicayahārānantaraṃ. Sesesupi eseṃ nayo. **Tathā hīti** lakkhaṇahārāvibhaṅge yuttāyuttānaṃ kāraṇaparamparāya pariggahitasabhāvānaṃ avuttānampi ekalakkhaṇatāya gahaṇaṃ vuttaṃ.

Atthato niddhāritānanti atthuddhārapubbāparānusandhiādiatthato suttantarato uddhaṭṭānaṃ saṃvaṇṇiyamānasutte ānītānaṃ pāḷidhammānaṃ. Saddato, pamāṇantarato ca laddhānaṃ idha vicāretabbatā āha “**niravasesato**”ti. **Atthassāti** abhidheyyatthassa. **Dhammassāti** sabhāvadhammassa. **Tattha tattha taṃ abhiniropeti** tasmim tasmim atthe, dhamme ca taṃ nāmaṃ abhiniropeti, “ayamevaṃnāmo”ti voharati. “Atthassa, dhammassā”ti padadvayena sāmāññāto attho, dhammo ca anavasesetvā gahitoti āha “**anavasesapariyādāna**”nti, yato vuttaṃ “tattha tatthā”ti. **Tathāti** yathā anavasesatthāvabodhadīpakāṃ anavasesapariyādānaṃ kataṃ catubyūhapāḷiyaṃ, evaṃ **punappunaṃ**

gabbhamupetīti ettha asaddavatī atthā pavattivasena labbhamānā sammāpaṭipatti uddhaṭṭi upasaṃhārattho tathā-saddo.

Tenevāti suttantarasamśandanassa sabhāgavisabhāgadhammantarāvaṭṭanūpāyabhāvato eva. **Yatoti** sabhāgavisabhāgadhammāvaṭṭanassa sādharmaṇādidhammavibhajanūpāyattā. **Paṭivibhattasabhāveti** paṭibhāgabhāvena vibhattasabhāve.

Te dhammāti paṭipakkhato parivattitadhammā. Na pariyāyavibhāvanā paññattivibhāgapariggāhikāti āha “**pariyā...pe... subodhanañcā**”ti.

Pucchāvisodhanaṃ vissajjanaṃ. **Ārambhavisodhanaṃ** desanāya atthakathanāṃ. Tadubhayavicāro dhātādīsu asammuyhantasseva sambhavatīti āha “**dhātāyatanā...pe... sampādetu**”nti. **Suddho ārambhoti**ādipālīnidassanenapi ayamevattho udāhaṭṭoti veditabbaṃ.

“**Kāraṇākāro**”ti padaṭṭhānaṃ sandhāya vadati. **Pabhedato desanākāro**ti vevacanaṃ. **Niddhāretvā vuccamānānī**ti uddharitvā samāropiyamānānīti adhippāyo. **Suttassa atthaṃ tathattāvabodhāyā**ti suttassa padaṭṭhāvagamamukhena catusaccābhisamayāya.

Veneyyattayayutto atthanayattayūpadeso “**veneyyattayappayojito**”ti vutto. Veneyyattayañhi paccayasamavāye tadupadesaphalaṃ adhigacchantaṃ atthaṃ payojeti nāmāti. **Tadanukkamenevā**ti tesam ugghaṭṭitaññuādīnaṃ desanānukkameneva. **Teti** tayo atthanayā. **Tesanti** ugghaṭṭitaññuādīnaṃ. Yathā uddesādīnaṃ saṅkhepamajjhimavitthāravuttīyā tiṇṇaṃ puggalānaṃ upakāratā, evaṃ tesam atthanayānaṃ. **Tassā**ti atthanayathassa. **Tatthā**ti tassaṃ tassaṃ bhūmiyaṃ.

Samuṭṭhānaṃ nidānaṃ. **Anekadhā** saddanayato, niruttinayato cāti anekappakāraṃ. **Padattho** saddattho. **Vidhi anuvādoti** idamettha vidhivacanaṃ, ayamanuvādoti ayaṃ vibhāgo veditabbo. **Samādhātābhoti** pariharitabbo. **Anusandhiyā anurūpaṃ nigametabbanti** yāya anusandhiyā sutte upari desanā pavattā, tadanurūpaṃ saṃvaṇṇanā nigametabbā. **Payojananti** phalaṃ. **Piṇḍatthoti** saṅkhepattho. **Anusandhī**ti pucchānusandhiādiānusandhi. **Upogghāṭoti** nidassanaṃ. **Cālanā**ti codanā. **Paccupaṭṭhānaṃ** parihāro.

Pakatiādipadāvayavaṃ bhinditvā kathanāṃ **bhedakathā** yathā “dibbantīti devā”ti (ma. ni. aṭṭha. 1.153). Padassa atthakathanāṃ **tatvakathā** yathā “buddhoti yo so bhagavā sayambhū anācariyako”ti (mahāni. 192; cūḷani. pārāyanatthutīgāthānidessa 97; paṭi. ma. 1.161). **Pariyāyavacanaṃ** vevacanaggahaṇaṃ yathā “paññā pajānanā”ti (dha. sa. 16). Vicayayutticatubyūhāparivattanahārekadesasaṅgahitā, vevacanaḥārasaṅgahitā cāti āha “**te idha katipayahārasaṅgahitā**”ti.

Attano phalaṃ dhāretīti **dhammoti** hetuno dhammabhāvo veditabbo. **Ñāpakahetūpi** ñāṇakaraṇaṭṭhena kārake pakkhipitvā āha “**kārako sampāpakoti duvidho**”ti. Puna cakkhubijādīnibbattakameva kāraṇaṃ katvā dassento “**puna...pe... tividho**”tiādīmāha. “Tayo kusalahetū”tiādīnā (dha. sa. 1059-1060) āgatā alobhādayo, lobhādayo ca **hetuhetu** nāma. “Cattāro kho, bhikkhave, mahābhūtā hetu, cattāro mahābhūtā paccayo rūpakkhandhassa paññāpanāyā”tiādīnā (ma. ni. 3.86) āgato **paccayahetu** nāma. Kusalākusalaṃ kammaṃ attano vipākaṃ pati **uttamahetu** nāma. Cakkhādibijādi cakkhuvīññānaṅkurādīnaṃ **asādhāraṇahetu** nāma. Kusalākusalaṇaṃ satipi paccayadhammabhāve iṭṭhāniṭṭhaphalavisesahetubhāvadassanatthaṃ viṣuṃ gahaṇaṃ, saddamaggānaṃ pana ñāpakasampāpakahetubhāvadassanatthanti daṭṭhabbaṃ. Aṅkurādīkassa asādhāraṇahetu bījādīsamānājātiyahetutāya **sabhāgahetu**. Sādhāraṇahetu bhusasalīlādīsamānājātiyatāya **asabhāgahetu**. Indriyabaddhasantāniko **ajjhattikahetu**, itaro **bāhirahetu**. Keci pana “sasantāniko ajjhattikahetu, itaro bāhirahetū”ti vadanti. **Pariggāhako** upatthambhako. **Paramparahetu** upanissayapaccayo.

Nibbānassa anibbattaniyepi samudayappahānasamudayanirodhānaṃ adhigamādhigantabbabhāvato nibbānaṃ pati maggassa hetubhāvo viya maggaṃ pati nibbānassa phalabhāvo upacārasiddhoti āha “**phalapariyāyo labbhati**”ti.

Paṭipajjamānabhūmi maggadhammā. **Paṭipannabhūmi** phaladhammā.

Kiccototi sarasato. **Lakkhaṇatoti** upalakkhaṇato. **Sāmaññatoti** samānabhāvato. Tena samānahetutā, samānaphalatā, samānārammaṇatā ca gahitā hotīti. Tattha yaṃ vattabbaṃ, taṃ heṭṭhā **lakkhaṇahāraniddesavaṇṇanāyaṃ** vuttameva.

Apicettha sampayogavippayogavirodhapakaraṇaliṅgasaddantarāsannidhānasāmatthiyādīnampi vasena nayavibhāgo vedītabbo. Tattha **sampayogato** tāvanayavibhāgo – “nāhaṃ, bhikkhave, aññaṃ ekadhammampi samanupassāmi, yaṃ evaṃ lahuparivattaṃ, yathayidaṃ citta”nti (a. ni. 1.48) cittassa lahuparivattitā gahitā, taṃsampayogato cetāsikānampi gahitāva hoti aññattha nesam cittaṃ sampayogadīpanato. Atha vā “sañña”ti. Saññāsahitatāvacaṇena hi nesam vedanācetanādivantatāpi sampayogato dīpitā hoti.

Vippayogato – “ahetukā”ti. Hetusampayuttā hi dhammā “sahetukā”ti vuttāti tabbidhurā dhammā vippayogato “ahetukā”ti vuttāti viññāyati. Atha vā “asañña”ti. Saññāvippayuttā hi dhammapavatti idhādhippetā, na saññāya abhāvamattanti viññāyati.

Virodhato – “aṭṭhamako (yama. 3.indriyayamakapāḷi.439), saddhānusārī”ti (pu. pa. mātikā 7.36) ca vutte taṃ santatiyaṃ saṃyojanattayappahānaṃ viññāyati, tathā “sati vā upādisese anāgāmitā”ti (dī. ni. 2.404; ma. ni. 1.137) vutte pañcorambhāgiyasāṃyojanappahānaṃ, “dīṭṭheva dhamme añña”ti (dī. ni. 2.404; ma. ni. 1.137) vutte anavasesasāṃyojanappahānaṃ viññāyati.

Pakaraṇato – “abyākatā dhammā”ti (dha. sa. mātikā). Adhikārato hi kusalākusalabhāvena na kathitāti nāyati. “Upadhī hi narassa socanā”ti (saṃ. ni. 1.12, 144) ca. Bāhirā hi dhammā idha “upadhī”ti adhippetāti viññāyati.

Liṅgato – “sītenapi ruppanti, uṇhenapi ruppanti”tiādi (saṃ. ni. 3.79). Sītādiggahaṇena hi liṅgena bhūtopādāyappakārasseva dhammassa rūpabhāvo, na itarassa.

Saddantarāsannidhānato – “kāyapassaddhi, kāyāyatana”nti. “Yā vedanākkhandhassā”tiādivacaṇato hi purimo kāyasaddo samūhavācī, itaro āyatanasaddasannidhānato pasādavācī.

Sāmatthiyato – “sabbaṃ, bhikkhave, ādittaṃ (saṃ. ni. 4.28; mahāva. 54), sabbe tasanti daṇḍassā”ti (dha. pa. 129) ca, tathā “sabbāvantaṃ lokaṃ mettāsahagatena cetāsā...pe... pharitivā viharatī”tiādi (dī. ni. 1.556; 3.308; ma. ni. 1.77, 232, 459, 509; 2.309; 3.230; vibha. 642). Ettha hi satipi sabbasaddassa anavasesasattavācakatte ādittatā sāpekkhasseva atthassa vācakattā padēsavācī sabbasaddo, lokasaddopi sattavācī. Sattārammaṇā hi appamaññāti. Tathā “mātaraṃ pitaraṃ hantvā”ti (dha. pa. 294-295) sabbena sabbaṃ hi sapaṭikkhepato, mātupitughātakammassa ca mahāsāvajjatāpavedanato, idha ca tadanuññāya katāya mātupitughāniyā tādisā keci pāpadhammā veneyyavasena gahitā viññāyati. Ke pana teti? Taṇhāmānā. Taṇhā hi janani sattānaṃ. “Taṇhā janeti purisa”nti (saṃ. ni. 1.55-57) hi vuttaṃ. Pitughāniyo māno taṃ nissāya attasampaggaṇhato “ahaṃ asukassa ruñño, rājamahāmatassa vā putto”ti yathā. **Sāmatthiyādīnanti ādisaddena** desapakatiādayo saṅgayhanti.

Labbbhamānapadatthaniddhāraṇamukhenāti tasmim tasmim sutte labbbhamānaassādādhārapadatthaniddhāraṇadvārena. **Yathālabbbhamānanti** yaṃ yaṃ labbbhamānaṃ,

lakkhaṇānurūpaṃ vā **yathālakkaṇaṃ**. Hetuphalādīni upadhāretvā yojetabbāni tesam vasenāti adhippāyo. Idāni hetuphalādayo ye yasmim hāre savisesam icchitabbā, te dassetuṃ “**visesato panā**”tiādīmāha. Taṃ suviññeyyameva.

Niddesavāraṇṇanā niṭṭhitā.

4. Paṭiniddesavāraṇṇanā

1. Desanāhāravibhaṅgavaṇṇanā

5. Anvatthasaññatanti atthānugatasaññabhāvaṃ, “desanāhāro”ti ayaṃ saññā anvatthā atthānugatāti attho.

Avuttamevāti pubbe asaṃvaṇṇitapadameva. “**Dhammaṃ vo**”tiādi (ma. ni. 3.420) vacanassa sambandhaṃ dassetuṃ “**kattha panā**”tiādi vuttaṃ. Tepiṭakassa hi buddhavacanassa saṃvaṇṇanālakkaṇaṃ nettippakaraṇaṃ, tañca pariyaṭṭidhammasaṅgāhake suttapade saṃvaṇṇetabbabhāvena gahite gahitameva hoti. Tenāha “**desanāhārena...pe... dasseti**”ti.

Yesam assādādīnaṃ vibhajanalakkaṇo desanāhāro, te gāthāya, idhāpi ca āgate “assādaṃ ādīnava”ntiādīnā udāharaṇavasena vibhajitum “**tattha katamo assādo**”tiādi āradhamaṃ. Tattha **tatthāti** tassaṃ “assādādīnavatā”ti gāthāyaṃ vutto katamo assādo. Atha vā “assādaṃ ādīnava”ntiādīnā yo idha assādādīnaṃ uddeso, tattha katamo assādoti ceti attho. Esa nayo sesesupi. Kammakaraṇatthabhinnassa visayavisayitālakkaṇassa assādadvayassa nidassanattham gāthādvayudāharaṇaṃ, tathā kāmavipariṇāmalakkaṇassa, vaṭṭadukkhalakkaṇassa cāti duvidhassāpi ādīnavassa nidassanattham “ariyamaggo nibbāna”nti duvidhassāpi nissaraṇassa nidassananidassanatthañca dve dve gāthā udāhaṭā.

Dhammo have rakkhati dhammacārīnti (jā. 1.10.102-103; netti. 5, 26, 31; peṭako. 22) ettha dhammacārīno maggaphalanibbānehi sātisayārakkhā sambhavati, sampattibhavassāpi vipariṇāmasaṅkhāradukkhatāhi duggatibhāvo icchitovāti adhippāyenāha “**nissaraṇaṃ anāmasitvā**”ti. Tathā hi vakkhati “nibbānaṃ vā upanidhāya sabbā upapattiyō duggatī”ti.

Avekkhassūti vidhānaṃ. Tassā pana avekkhāya pavattiākāro, visayo, kattā ca “suññato, lokam, mogharājā”ti padattayena vuttāti āha – “**suññato...pe... āpatti**”ti. Tattha saṅkhārānaṃ suññatā anattasabhāvatāya, attasuññatāya ca siyā. Yato te na vasavattino, attasāravirahitā ca, yato te anattā, rittā, tucchā ca attanā, tadubhayaṃ dasseti “**avasavattitā**”tiādīnā. **Evaṃ maccutaro siyāti** evaṃ paṭipattiyā maccutaro bhavyeyāti attho. Parikappetvā vidhiyamānassa maccutaraṇassa pubbabhāgapaṭipadā desanāya paccakkhato sījhamānaṃ sātisayaṃ phalanti āha “**tassa yaṃ...pe... phala**”nti.

6. Udāharaṇavasenāti nidassanavasena. Tattha “**puggalavibhāgenā**”ti iminā ugghaṭṭitaññūā dipuggalapayojito assādādīsu bhagavato desanāvīsesoti dasseti.

Ghaṭitamattanti sotadvārānusārena manodvārikaviññāṇasantānena ālambitamattaṃ. **Sassatādiākārassāti** sassatucchedākārassa. Idañhi dvayaṃ dhammadeśanāya cāletabbaṃ, na anulomikakhanti, yathābhūtaññaṃ vā. Etasmiñhi catukke āsayasāmaññatā. Vuttañhetam –

“Sassatucchedadiṭṭhī ca, khanti cevānulomikā;
Yathābhūtañca yaṃ ññaṃ, etaṃ āsayasaññita”nti. (visuddhi. mahāṭī. 1.136; dī. ni. ṭī.
1.paṭhamamahāsaṅgītikathāvaṇṇanā; sāratta. ṭī. 1.paṭhamamahāsaṅgītikathāvaṇṇanā,
verañjakaṇḍavaṇṇanā; vi. vi. ṭī. 1.verañjakaṇḍavaṇṇanā);

Calanāyāti vikkhambhanāya. **Parānuvattiyāti** samucchedanāya. Ugghaṭṭite jānātīti **ugghaṭṭitaññūti** mūlavibhujādīpakkehena saddasiddhi veditabbā. **Vipaṅcītanti** “visamaṃ candimasūriyā parivattantī” tiādīsu (a. ni. 4.70) viya bhāvanapūmsakaniddesoti āha “**mandaṃ saṅika**”nti. Nissaraṇaādīnavanissaraṇaassādādīnavanissaraṇānaṃ vibhāvanā veneyyattayavinayanasamatthā.

Cattāroti assādo ca ādīnavo ca assādo ādīnavo ca assādo nissaraṇaṅcāti ete cattāro. Yadi nissaraṇavibhāvanā veneyyavinayanasamatthā, kasmā pañcama na gahitoti āha “**ādīnavāvacanato**”ti. Yadi hi ugghaṭṭitaññuṃ sandhāya ayaṃ nayo vuccati, nissaraṇamattena siddhaṃ siyā. Atha vipaṅcītaññuṃ, neyyaṃ vā, ādīnavo ca nissaraṇaṅca assādo ca ādīnavo nissaraṇaṅca vattabbo siyā? Tathā appavattattā na gahito. Tenāha “ādīnavāvacanato” tiādi. **Desananti** sāmāññato gahitaṃ “suttekadesaṃ gāthaṃ vā” ti viseseti. Padaparamaaggahaṇaṅcettā saupāyassa nissaraṇassa anāmaṭṭhattā.

“**Kalyāṇa**”nti iminā iṭṭhavipāko, “**pāpaka**”nti aniṭṭhavipāko adhippetoti āha “**ayaṃ assādo, ayaṃ ādīnavo**”ti. Lābhādīnaṃ puññaphalattā tadanurodhaṃ vā sandhāya “**ayaṃ assādo**”ti vuttaṃ. Tabbipariyāyena alābhādīnaṃ **ādīnavatā** veditabbā.

Kāmāti kilesakāmasahitā vatthukāmā. **Virūparūpenā**ti appatirūpākārena. **Mathentī**ti maddanti. **Pabbajitomhī**ti pabbajjaṃ upagato amhi. **Apaṇṇakanti** avirajjhanakaṃ. **Sāmaññanti** samaṇabhāvo. Samitapāpabhāvoyeva **seyyo** sundarataro.

Tattha “kāmā hi citrā madhurā manoramā”ti ayaṃ assādo, “virūparūpena mathenti citta”nti ayaṃ ādīnavo, “apaṇṇakaṃ sāmāñña”nti idaṃ nissaraṇanti āha “**ayaṃ...pe... nissaraṇaṅcā**”ti.

Phalādīnaṃ ekakavasena ca tikavasena ca pāliyaṃ udāhaṭṭattā vuttaṃ “**dukavasenapī**”ti.

Sukhā paṭipadā, dukkhā paṭipadāti yā dve paṭipadā, tāsū ekekā dandhakhippābhīññatāya dve dve hontīti āha “**paṭipadābhīññakato vibhāgo paṭipadākato hotī**”ti. Katapubbakiccassa pathavīkasiṇādīsu sabbapaṭhamāṃ “pathavī”tiādīnā pavattamanasikāro **paṭhamasamannāhāro**. **Upacāranti** upacārajjhānaṃ. Paṭipajjitabattāya jhānampi “**paṭipadā**”ti vuccati. Tadaññā heṭṭhimapaññato adhikā paññāti katvā “**abhiññā**”ti vuccati.

Kileseti nīvaraṇappakāre, taṃsahagatakilese ca. **Aṅgapātubhāvanti** vitakkādijhānaṅgapaṭilābhaṃ.

Abhinivisantoti paṭṭhapento. **Rūpārūpaṃ pariggaṇhantoti** rūpārūpadhamme lakkhaṇādīhi paricchindītvā gaṇhanto. Pariggahitarūpārūpassa maggapātubhāvadandhatā ca nāmarūpavavattānādīnaṃ kicchāsiddhiyā siyāti na rūpārūpariggaṇhacchatāya eva dukkhāpaṭipadatā vattabbāti ce? Na, nāmarūpavavattāpanādīnaṃ paccanīkakilesamandatāya sukhasiddhiyampi tathāsiddhavipassanāsahagatānaṃ indriyānaṃ mandatāya maggapātubhāvato. **Rūpārūpaṃ pariggaṇhetvāti** akicchenapi pariggaṇhetvā, kicchena pariggaṇhite vattabbameva natthi. Evaṃ sesesupi. **Nāmarūpaṃ vavattāpentoti** “nāmarūpamattamaṃ, na añño koci sattādiko”ti vavattāpanaṃ karonto. Kataro panettha vāro yuttarūpoti? Yo koci sakiṃ, dvikkhattuṃ, anekasatakkhattunti evamādīsu hi vikkhambhanavāresu sakiṃ, dvikkhattuṃca vikkhambhanavāro sukhā paṭipadā eva, na tato uddhaṃ sukhā paṭipadā hoti, tasmā tikkhattuṃ vikkhambhanavārato paṭṭhāya dukkhā paṭipadā veditabbā. Apica kalāpasammasanāvāsāne udayabbayānupassanāya uppannassa vipassanupakkilesassa tikkhattuṃ vikkhambhanena kicchātāvāro dukkhā paṭipadā veditabbā. Ettha dandhattā paṭipadāya etassa akicchattepi purimānaṃ kicchatte dukkhāpaṭipadatā vuttanayāva. Yassa pana sabbattha akicchata, tassa paramukkaṃsagatā sukhā paṭipadā veditabbā.

Yathā nāmarūpariggaṇhacchatāya maggapātubhāvadandhatāya dukkhā paṭipadā dandhābhīññā vuttā, tathā tabbipariyāyena catutthī, tadubhayavomissatāvasena dutiyā, tatiyā ca ñātābātī dassento āha

“**iminā...pe... veditabbā**”ti. Vaṭṭadukkhato niyyānassa adhippetattā “**vipassanāpakkhikā evā**”ti vuttaṃ.

Hetupāyaphalehīti ettha taṇhācaritatā, mandapaññatā ca paṭhamāya paṭipadāya **hetu**, taṇhācaritatā, udatthapaññatā ca dutiyāya, diṭṭhacaritatā, mandapaññatā ca tatiyāya, diṭṭhacaritatā, udatthapaññatā ca catutthiyā. **Upāyo** pana yathākkamaṃ satisamādhivīriyapaññindriyāni, satipaṭṭhānājhānasammappadhānasaccāni ca upanissayabhūṭāni. **Phalaṃ** vaṭṭadukkhato niyyānaṃ.

Samādhimukhenāti samādhimukhena bhāvanānuyogena. Tenevāha “**samathapubbaṅgamāya vipassanāyā**”ti. **Idhāti** imasmim nettippakaraṇe. Vakkhati “**rāgavirāgā cetovimutti sekkhaphala**”nti, “**rāgavirāgā cetovimuttikāmadhātusamatikkama**”nti ca. **Soti** anāgāmī.

Tenāti paṭipakkhena. **Tatoti** paṭipakkhato. Samānādhikaraṇavasena ca cetovimuttisaddānaṃ samāsaṃ katvā bhinnādhikaraṇavasena vuttaṃ “**atha vā**”tiādi vuttaṃ. Puna “**cetaso vā**”tiādinā aññapadatthavasena cetovimuttipadānaṃ samāsaṃ dasseti. Viññāṇapariyāyena ceto-saddena vuttayojanā na sambhavatīti āha “**yathāsambhava**”nti.

Hā-saddo gatiattho, gati cettha ñāṇagati adhippetāti āha “**hātabbāti gametabbā**”ti. **Netabbāti** ñāṇepetabbā.

7. **Tanti** puggalavibhāgaṃ. **Ñāṇavibhāgenāti** sutamayādiññāppabhedena. **Nibbattananti** uppādanaṃ. **Tatthāti** tasmim ugghaṭṭitaññūtātiādi puggalavibhāgabhūte desanābhājane. **Desanāyanti** sutte. **Taṃ dassetunti** taṃ puggalavibhāgaṃ dassetuṃ. “**Svāyaṃ hāro kathaṃ sambhavatī**”ti keci paṭhanti.

Sāti vuttappakāradhammatthānaṃ vīmaṃsanapaññā. **Adhikāratoti** “**sattā vā dhammaṃ desayati**”tiādiadhikārato. **Sāmatthiyato** ugghaṭṭitaññuādiveneyyavinayanasamathabhāvato. **Pariyattidhammassa upadhāraṇanti** etthāpi “**adhikārato sāmatthiyato vā**”ti ānetvā yojetabbāṃ.

“**Vīmaṃsādipariyāyavatī** paṭhamavikappavasena, **vīmaṃsādivibhāgavatī** dutiyavikappavasena, cintāya hetubhūṭāya nibbattā **cintāmayī**”ti evamādivuttanāyānusārena sakkā yojetunti āha “**sesaṃ vuttanāyamevā**”ti.

Sutacintāmayaññesūti sutamayaññe ca cintāmayaññe ca sutacintāmayaññesu ca sutacintāmayaññesūti ekadesasarūpekaseso veditabbo. Cintāmayaññeyeva hi paṭiṭṭhitā mahābodhisattā carimabhava vipassanaṃ ārabhanti, itare sutacintāmayaññesūti. **Tehīti** tathā paṭhantehi. **Vuttanāyenāti** “**upādārūpaṃ pariggaṇhāti, arūpaṃ pariggaṇhāti**”tiādinā **paṭipadākathāyaṃ** (netti. aṭṭha. 5) vuttanāyena.

8. Parato ghoso paccayabhūto etissāti adhippāyo. “**Paccattasamuṭṭhitena ca yonisomanasikārenā**”ti idaṃ āvuttināyena dutiyaṃ āvaṭṭatīti veditabbāṃ. Tena sāvakanāṃ bhāvanāmayaññuppatti saṅgahitā hoti. Sāvakanāmeva vā ñāṇuppatti idhādhippetā ugghaṭṭitaññuādivibhāgakathanato. Etasmim pakkhe pubbe vuttaekasesanayopi paṭikkhitto daṭṭhabbo. “**Āsayapayogapabodhassa nipphāditattā**”ti etena pacchimacakkadvayapariyāpannāni pubbahetusaṅgahāni sutacintāmayaññāni sandhāya “**imā dve paññā atthī**”ti vuttanti dasseti. Atthibhāvo cetāsaṃ paṭipakkhena anupaddutatā veditabbā. **Aparikkhatattā** anabhisaṅkhatattā. **Sutamayaññassāpi** purimasiddhassa.

9. **Desanāpaṭipadāññānavibhāgehīti** nissaraṇadesanādidesanāvibhāgehi, dukkhāpaṭipadādi paṭipadāvibhāgehi, sutamayaññādiññānavibhāgehi.

Avasiṭṭhapārisajjenāti khattiyagahapatiparisapariyāpanna. **Aṭṭhannanti** khattiyaparisā brāhmaṇagahapatīsamānacātumahārājikatāvatiṃsamārābrahmaṇaparīsāti imāsaṃ aṭṭhannaṃ.

Samatthetīti samatthaṃ sambandhatthaṃ karoti.

Tameva dvādasapadabhāvaṃ dīpetvāti sambandho. **Tadatthassāti** chachakkapariyāyatthassa (ma. ni. 3.420 ādayo). Sabbapariyattidhammasaṅgāhakattā chachakkapariyāyassa, tadatthassa ca dhammacakkappavattena suttena (saṃ. ni. 5.1081; mahāva. 13; paṭi. ma. 2.30) saṅgahitattā vuttaṃ “**sabbassāpi...pe... vibhāvento**”ti. Visayibhāvena byañjanapadānaṃ, visayabhāvena atthapadānaṃ sambandhaṃ sandhāyāha “**tesaṃ...pe... sambandhabhāva**”nti.

Padāvayavo akkharāni. **Padatthoti** padatthāvayavo. **Padatthaggahaṇassāti** padatthāvabodhassa. **Visesādhānaṃ** visesuppatti. **Vākyabhedeti** vākyavisesa. **Cittaparitosanaṃ** cittārādhanāṃ. **Buddhinisānaṃ** paññāya tejanaṃ tikkhabhāvakaraṇaṃ. **Nānāvākyavisayatāpi siddhā hoti** padādīhipi saṅkāsanassa siddhattā. Ekavākyavisayatāya hi atthapadānaṃ saṅkāsanādayo yathākkamaṃ akkharādivisayā evāti niyamo siyā. **Etenāti** atthapadānaṃ nānāvākyavisayatthena.

Ugghaṭṭanādiatthānīti ugghaṭṭanavipañcananayanappayojanāni.

10. Upatiṭṭhati etthāti **upaṭṭhitanti** upaṭṭhitasaddassa adhikaraṇatthataṃ dassetuṃ “**upaṭiṭṭhanaṭṭhāna**”nti vuttaṃ yathā “padakkanta”nti. Tenāha “**idaṃ nesa**”ntiādi. **Paṭipattidesanāgamanehī**ti paṭipattigamanadesanāgamanehi. “Kicchaṃ vatāyaṃ loko āpanno jāyati ca...pe... jarāmarāṇassā”tiādinā jarāmarāṇato paṭṭhāya paṭiccasamuppādamukhena vipassanaṃ abhinivisitvā mahāgahaṇaṃ chindituṃ nisānasilāyaṃ pharasuṃ nisento viya kilesagahaṇaṃ chindituṃ lokanātho ñāṇapharasuṃ tejento buddhabhāvāya hetusampattiyā paripākagatattā sabbaññutaññādhigamāya vipassanāgabbhaṃ gaṇhāpento antarantarā nānāsamāpattiyō samāpajjitvā anupadadhammavipassanāvasena anekākāravokārasaṅkhāre sammasanto chattimsakoṭṭisatasahassamukhena yaṃ ñāṇaṃ pavattesi, taṃ “**mahāvajirañña**”nti vadanti. **Aṭṭhakathāyaṃ** pana “catuvīsakoṭṭisatasahassasamāpattisañcārimahāvajirañña”nti (dī. ni. aṭṭha. 3.141) āgataṃ, taṃ devasikaṃ vaḷaṅjanakasamāpattīnaṃ purecarānucaraññaṃ sandhāya vuttaṃ. Yaṃ pana vakkhati “ñāṇavajiramohajālapadālana”nti, taṃ saha vipassanāya maggaññaṃ veditabbaṃ. **Etaṃ brahmacariyanti** sāsanabrahmacariyaṃ adhippetanti taṃ dassento “**brahmuno**”tiādimāha.

Desanāyāti karaṇatthe idaṃ karaṇavacanaṃ. **Niyuttoti** ettha hetuattho antonītoti dassento “**niddhāretvā yojito**”ti āha.

Desanāhāravibhaṅgavaṇṇanā niṭṭhitā.

2. Vicayahāravibhaṅgavaṇṇanā

11. Jātiliṅgakālasādhana vibhattisaṅkhyāvisesādito saddato padavicayo kātabbo. Tattha kariyamāno ca yathāsabhāvaniruttīyā eva kato sukato hotīti dassento “**idaṃ nāmapadaṃ ...pe... ayaṃ saddato padavicayo**”ti vatvā “**so panāya**”ntiādimāha. **Vattabbaatthasaṃvaṇṇanāti** taṃtaṃpadavacanīyassa atthassa bhedaṃ vatvā pariyaeyhi vivarivā kathanāṃ.

Viciyamānassa suttapadassāti pucchāvasena pavattasuttapadassa. “Suttantarapadānīpi pucchāvaseneva pavattānī”ti vadanti “na sabbampi suttapada”nti. Ekasseva padassa sambhavantānaṃ anekesaṃ atthānaṃ uddhāro **atthuddhāro**. Ekasseva pana atthassa sambhavantānaṃ anekesaṃ padānaṃ uddhāro **paduddhāro**. Sabbe hi saṃvaṇṇiyamāne sutte labbhamāne sabbe padatthe. **Nava suttanteti** suttageyyādivasena navappakāre suttasmiṃ ānetvā vicinatīti yojanā. Atha vā “**sabbe nava**

suttante”ti iminā pavicayalakkhaṇena hārena suttageyyādīni sabbānipi navappakārāni suttāni vicinatīti attho. Tenāha “**suttageyyādike**”tiādi.

“Kosalānaṃ purā rammā”tiādikā (su. ni. 982) chapaññāsa gāthā **vatthugāthā**. “Pārāyanamanugāyissa”nti (su. ni. 1137 ādayo) pana ādikā ekūnavīsati gāthā **anugītīgāthā**. **Idaṃ nāmaṃ katanti** idaṃ “pārāyana”nti nāmaṃ kataṃ. Tenāha “pāraṃ gamanīyā ime dhammā, tasmā imassa dhammapariyāyassa ‘pārāyanantveva adhivacana’”nti (su. ni. pārāyanatthutīgāthā; cūḷani. pārāyanatthutīgāthā 149 ādayo). **Buddhiyaṃ viparivattamānanti** imassa vicayahāravibhaṅgassa desanākāle āyasmā mahākaccāno attano buddhiyaṃ vattamānaṃ katvā evamāhāti yojanā.

Ekamaṣabyākaraṇassa ayanti **ekamaṣabyākaraṇīyā**, ekamaṣena vā byākātābhattā **ekamaṣabyākaraṇīyā**, ekamaṣabyākaraṇayoggāti attho. Sesapadadvayepi eseva nayo. **Ṭhapanīyāti** ṭhapatābhattā abyākaraṇīyāti attho. Samayantarapariyāyena nivāraṇadhammaṃ pati saṃsayapakkhando pucchatīti adhippāyenaṃha “**vimaticchedana**”nti. Pakatiyā pana nivāraṇadhammaṃ ajānanto ñātukāmatāya pucchatīti adiṭṭhājotanāya pucchāpi siyā. Tathā hi vakkhati “lokassa nivāraṇādīni ajānantenā”ti.

Ekavatthupariggahāti ekassa abhidheyyatthassa gahaṇato.

Vimuttipariyācācāndriyāni vivaṭṭapakkhe ṭhitassa saddhādayo dhammā, kiṃ panettha ariyānampi indriyalokena saṅgaho hotīti āha “**pariyāpannadhammasena**”tiādi.

Kāḷapakkhacātuddasīghanavanasanaṇḍameghapaṭalacchādānaaḍḍharattīnaṃ vasena **caturaṅgasamannāgatena**. **Vivicchāti** vicikicchāya. Tenāha “**vicikicchāhetū**”ti. **Dukkhamassa mahabbhayanti** ettha vuttaṃ “assā”ti padaṃ “jappābhilepanaṃ assa brūmī”ti ānetvā sambandhitābhattā dassento “**jappā taṇhā assa lokassā**”ti āha. “**Sabbasattāna**”ntiādinā, “**sabbasovā**”tiādinā ca anvayato, byatirekato ca sātisayaṃ avijjāya nīvaraṇabhāvaṃ dasseti. “Dūre santo pakāsanti (dha. pa. 304; netti. 11), ratto atthaṃ na jānāti”ti (netti. 11, 27) gāthādvayenāpi anugītivicayaṃ dassētīti yojetabbaṃ.

Rūpāvacarāti rūpāvacarasattā. Vipariṇāmadukkhatāya muccanassa kāraṇavacananti sambandho. **Yato** vaṭṭadukkhatō muccanaṃ. **Taṃ** vaṭṭadukkhaṃ **anavasesapariyādānavasena** saṅkhāradukkhatāgahaṇena.

Ekādhāraṇti ekavatthu adhiṭṭhānaṃ. Nivāraṇaṃ vikkhambhanaṃ pidhānaṃ samucchodoti atthadvayassa pucchitattā “**anekādhāraṇaṃ dassetu**”nti vuttaṃ. Tenāha “**nivāraṇasaṅkhātāṃ saṃvaraṃ...pe... pidhiyyanti pacchijjantī**”ti (su. ni. aṭṭha. 2.1041; cūḷani. aṭṭha. 3). Tassattho “nivāraṇasaṅkhātāṃ vikkhambhanaṃ, saṃvaraṃ, pidhānaṃca kathehi”ti.

“**Vodāna**”nti iminā sotānaṃ vikkhambhanavisuddhi, “**vuṭṭhāna**”nti iminā samucchedavisuddhi adhippetāti āha “**pucchāya duvidhatthavisayatāṃ vivaritaṃ ‘eva’ntiādi vutta**”nti. Tathā cāha “**vodāyati...pe... ariyamaggo**”ti.

Diṭṭhimānāvijjāsotāpi taṇhāsotānugāti āha “**yebhuyyena anurodhavasena**”ti. **Upacāravasenāti** nissitupacāravasena. **Sabbasmāti** cakkhuto yāva manatoti sabbasmā dvārato. **Sabbappakārenāti** taṇhāyanamicchābhinivesanaunnamanādippakārena.

Tameva satinti yāyaṃ sati pubbabhāge sotānaṃ vikkhambhanavasena vuttā, tameva satim. Maggakkhaṇe sotānaṃ saṃvaraṃ pidhānaṃ brūmī. Yasmā pana pidhāyikāpi sati maggakkhaṇe paññānugā, paññākiccamevettha adhikaṃ, tasmā vuttaṃ “**paññāyete pidhiyare**”ti.

Samvarapidhānānanti ettha samvarasaddena nivāraṇaṃ vuttaṃ.

Yasmiṃ yasmiṃ ariyamagge anadhigate yaṃ yaṃ abhisāṅkhāravīññāṇaṃ uppajjanārahaṃ, tasmīṃ tasmīṃ adhigate taṃ taṃ viññāṇaṃ anuppādanirodhena nirujjhati saddhiṃ attanā sampayuttanāmarūpenāti āha “**tassa tassa viññāṇassa nirodhena sahevā**”ti. Anuppādanirodho hi ettha “nirodho”ti adhippeto anupādisesanibbānassa adhippetattāti. Anusandhīyati etenāti **anusandhi**, idha pucchiyamāno attho.

Saha visayena dassetunti ettha saccāni eva visayo. Pahātabbasabhāvaṃ samudayasaccaṃ, tassa visayo dukkhasaccaṃ. “Saṃyojanīyesu, bhikkhave, dhammesu assādānupassino viharato taṇhā pavaḍḍhatī”ti (saṃ. ni. 2.53, 57) hi vuttaṃ. Pahāyakasabhāvaṃ maggasaccaṃ, tassa visayo nirodhasaccanti āha “**saha visayena...pe... saccesū**”ti. Kāmañcettha “samudayo dvīsu bhūmīsū pahīyati”ti āraddhaṃ, “dassanena tīṇi saṃyojanāni pahīyanti, bhāvanāya satta saṃyojanāni pahīyanti”ti pana vibhāgavacanameva vattanti āha “**pahāyakavibhāgamukhena pahātabbavibhāgaṃ dassetu**”nti.

Niravasesakāmarāgabyāpādā tatiyamaggena pahīyanti, itare catutthamaggenāti vuttaṃ “**itarehi pana niravasesa**”nti. **Tatthāti** kammavipākavaṭṭappabhedenā tedhātuke bhavattaye. **Samyojanavasenāti** sabbadā yojanavasena bandhanavasena.

12. Aggaphalañāṇatāya ekampi samānaṃ tannimittassa khayānuppādārammaṇassa paccavekkhañāṇassa vasena phalavohārena dve nāmāni labhati.

Somanassanāmalābho iminā ārammaṇasaṅketenāti tadatthaṃ vivaranto “**khaye...pe... samaññāyā**”ti āha.

13. **Taggahaṇenevāti** phassapañcamakapañcarūpindriyaggahaṇeneva. **Sahacaraṇādināti** sahañātānianantarādipaccayabhāvena ceva nissayārammaṇādinā ca. “**Sampayutta**”nti iminā sahitatā avisiṭṭhatā idhādhippetāti āha “**avibhāgena gahaṇiyabhāvaṃ sandhāyā**”ti.

Kathaṃ samādhindriyaṃ uppādetīti āha “**satiggahaṇena cettha pariyuṭṭhānappahānaṃ idhādhippeta**”nti. Na hi samādhinā pariyuṭṭhānappahānaṃ sambhavati.

Padahati etenāti **padhānaṃ**, vīriyaṃ. **Teti** vīriyasāṅkhārā. **Ekarasenāti** yathā indriyāni ekarasāni honti, evaṃ ekarasabhāvena saraṇato pavattanato. Tathā pavattiyā eva suṭṭhu vata vīriyaṃ vāhesīti yoginā saṅkappetabbato tadupagavīriyavāhanaṭṭhena “**sampahaṃsanā**”ti vuttaṃ. Tenāha “**evaṃ me...pe... hetubhāvato**”ti.

Iddhisaddassa paṭhamo kattuatto, dutiyo karaṇatto vutto, **pādasaddassa** eko karaṇatto eva. Pajjitabbā ca iddhī vuttā, na ca ijjhanti. Pajjitabbā ca iddhī pajjanakaraṇena pādena samānādhikaraṇā na hontīti “**paṭhamena atthena iddhi eva pādo**”ti kathaṃ sakkā vattum, tathā iddhikiriyaṅkaraṇena sādhetabbā buddhisāṅkhātā iddhi pajjanakiriyaṅkaraṇena pajjitabbāti dvinnaṃ karaṇānaṃ na samānādhikaraṇatā sambhavatīti “**dutiyaena atthena iddhiyā pādo**”ti kathaṃ sakkā vattunti ce? Sakkā, pādassa ijjhamānaḷṭhāsa ijjhanakaraṇūpāyabhāvato. Atha vā “paṭhamena atthena iddhiyā pādo, dutiyaena atthena iddhi eva pādo iddhipādo”ti evaṃ yojanato. Kathaṃ? Anantaratto paccāsattiñāyena idha paṭhamoti adhippeto, tato purimo dutiyoti.

“Chandaṃ ce bhikkhu adhipatiṃ karitvā labhati samādhi”ntiādi (vibha. 432) vacanato **chandasaṃdhīpadhānasāṅkhārasamannāgataṃ iddhipādaṃ bhāvetīti** etthāpi chandādhipati samādhi **chandasaṃdhīti** adhipatisaddalopaṃ katvā samāso vuttoti viññāyati. Adhipatisaddatthadassanavaseneva pana “chandahetuko, chandādhiko vā samādhi”ti

sammohavinodaniyaṃ (vibha. aṭṭha. 431) vuttaṃ, tasmā idhāpi chandādhīpati samādhī **chandasaṃmādhī**ti veditabbo. Taṃ pana chandaṃ vuttanayena saddhāsīsenā dassento “**saddhādhīpateyyā cīttekaggatā**”ti vuttaṃ. “**Idaṃ padhāna**”nti vā vīriyaṃ vuttaṃ. Vīriyasaddāpekkhāsahitaṃ ekavacanena vatvā catubbidhassapi vīriyassa adhippetattā nibbattetabbadhammavibhāgena ca “**ime saṅkhārā**”ti vuttaṃ. Tena padhānabhūtā saṅkhārāti evaṃ samāso veditabbo. Saṅkhatasaṅkhārādinivattanatthañcetha padhānaggahaṇaṃ. Atha vā taṃ taṃ viśesaṃ saṅkharotīti **saṅkhāro**, sabbampi vīriyaṃ. Tattha catukiccasādhakato aññassa nivattanatthaṃ padhānaggahaṇanti padhānabhūtā seṭṭhabhūtāti attho.

Vīriyiddhipādaniddese “**vīriyasamādhīpadhānasaṅkhārasamannāgata**”nti (vibha. 435) dvikkhattuṃ vīriyaṃ āgataṃ. Tattha purimaṃ samādhivīsesanaṃ “vīriyādhīpati samādhī **vīriyasamādhī**”ti, dutiyaṃ samannāgamaṅgadassanattaṃ. Dve eva hi sabbattha samannāgamaṅgāni samādhī, padhānasaṅkhāro ca. Chandādayo samādhivīsesanāni. Padhānasaṅkhāro pana padhānavacaneneva viśesito, na chandādīhīti na idha vīriyādhīpatitā padhānasaṅkhārassa vuttā hoti. Vīriyañca samādhīṃ viśesetvā ṭhitameva samannāgamaṅgavasena padhānasaṅkhāravacanena vuttanti nāpi dvīhi vīriyehi samannāgamo vutto hoti. Yasmā pana chandādīhi viśiṭṭho samādhī tathā viśiṭṭheneva tena sampayutto padhānasaṅkhāro, sesadhammā ca, tasmā samādhivīsesanānaṃ vasena “**cattāro iddhīpādā**”ti vuttā. Viśesanabhāvo ca chandādīnaṃ taṃtaṃapassayanavasena hotīti **chandasaṃmādhī... pe... iddhīpādā**nti ettha nissayatthepepi pādasaddena upāyathena chandādīnaṃ iddhīpādātā vuttā hoti. Tathā hi abhidhamme **uttaracūḷabhājanīye** “cattāro iddhīpādā chandīddhīpādō”tiādīnā (vibha. 457) chandādīnameva iddhīpādātā vuttā. **Pañhāpucchake** ca “cattāro iddhīpādā – idha bhikkhu chandasamādhī”ti (vibha. 462) ārabhitvāpi puna chandādīnaṃyeva kusalādībhāvo vibhatto. Upāyiddhīpādadassanattameva hi nissayiddhīpādadassanaṃ kataṃ. Aññathā catubbidhatāva na hotīti. Ayamettha pāḷivasena atthavinicchayo veditabbo.

Tadaṅgasamucchedanissaraṇavivekanissitattaṃ vatvā paṭippassaddhivivekanissitassa avacanāṃ “chandasaṃmādhī...pe... iddhīpādāṃ bhāveti”ti (vibha. 432) bhāvetabbānaṃ iddhīpādānaṃ vuttattā. Bhāvitiddhīpādassa hi sacchikātabbā phalaparīyāpannā iddhīpādāti.

Vossaggasaddo pariccāgattho, pakkhandanatto cāti vossaggassa duvidhatā vuttā. **Yathāvuttena pakārenāti** tadaṅgasamucchedappakārena, tanninnabhāvārammaṇappakārena ca. **Parīṇamantaṃ** vipassanakkhaṇe.

14. Pubbabhāgapaññāyāti ekāvajjananānāvajjanavīthīsu pavattaupacārapaññāya. **Adhigamaṇāyāti** appanāpaññāya. Puna **pubbabhāgapaññāyāti** nānāvajjanupacārapaññāya, paṭisandhipaññāya vā. **Upacārapaññāyāti** ekāvajjane, sabbattha vā pavattaupacārapaññāya.

Pucchāvissajjanavicayopīti yathāvuttāya pucchāya viśajjanavicayopi. **Vuttanayānusārenāti** adīṭṭhajotanā, vimaticchedanā cāti heṭṭhā vuttanayānugamanena.

15. Sekhe asekkheti sekkhe ariyapuggale, asekkhe ariyapuggale. **Vipassanāpubbaṅgamappahāneti** vipassanaṃ purecārikaṃ katvā pavattakilesappahāne, pahānābhisamayeti attho.

“Yaṃ aniccaṃ dukkhaṃ anattā”ti pāḷiṃ dassetvā puna “yaṃ anicca dukkhe anattāni”ti vacanaṃ evampettha paṭhanṭīti dassetuṃ.

Sesasaṃkilesavodānadhammāti gedhato avasiṭṭhasaṃkilesadhammā ca sabbavodānadhammā ca. **Abhāvenāti** abhāvanena abhāvakaraṇena.

Payogaparakkamanti bhusaṃ yogo **payogo**, payogova parakkamo **payogaparakkamo**, cittaṃ.

Ukkipatīti kosajjapakkhe patituṃ adento kusalapakkhe uddhaṃ khipento viya pavattati. **Padhānavīriyanti** akusalānaṃ anuppādanaṭṭhena uttamavīriyaṃ. **Yojetabbānīti** “āsevamāno vāyamatī”tiādinaṃ yojetabbāni. **Anuppannāti avattabbataṃ āpannānanti** bhūmiladdhārammaṇādhiggaḥitāvikkhambhitāsamugghāṭituppannānaṃ.

16. “Aṭṭhamakassa indriyānī”ti vuttattā “**paṭhamamagge saddhādayo**”tiādi vuttam. Indriyaggaṇaṇca pāḷiyam nidassanamattaṃ daṭṭhabbam.

Asubhānupassanā kāyānupassanāsatiṭṭhānanti āha “**satipaṭṭhānabhāvanāya suniggahito kāmavitakko**”ti. Samādhi uppajjamāno kāmavitakkampi niggahetvā eva uppajjatīti dassento “**anavajjasukhapadaṭṭhānenā**”tiādimāha. “**Kusalesu dhammesu āraddhavīriyo**”tiādinaṃ dhammacchandato uppajjamāno vīriyacchando khantiṃ paribrūhetīti dasseti. Anavajjadhammānaṃ upakāradhammāsevanaṃ viya anupakāradhammaparivajjanampi paññānisevaneneva hotīti āha “**samādhiādīna**”ntiādi.

17. Sabbadhammādhīṭṭhānaṃ desanaṃ puggalādhīṭṭhānena vibhajituṃ “**loko nāmā**”tiādi vuttanti dassento “**sabbadhammānanti...pe... dassetu**”nti āha. Mahaggatadhammesu ṭhānaṃ taṃsampādanāva. Tathā sesesu. **Vaḍḍhiyamānesūti** yathā vimuttiṃ paripācayanti, evaṃ brūhiyamānesu.

Dassanapariññāti rūpārūpadhammānaṃ salakkhaṇato, paccayato ca pariḷānaṇā. Tenāha “**ñātapariññā**”ti. Paṭipakkhavidhamanena saddhiṃ lakkhaṇattayavibhāvanā idha “**bhāvanāpariññā**”ti adhippetāti āha “**bhāvanā...pe... pariññā cā**”ti. Dassanattā pariññā **dassanapariññā**, bhāvanattā pariññā **bhāvanāpariññāti** evaṃ vā ettha attho daṭṭhabbo.

Kakkhaḷaphusanādīti kakkhaḷādiphusanādi. **Abhijānitvāti** abhiññāya paññāya jānitvā, ṭhitassa abhijānanahetu vāti attho. **Atthoti** phalaṃ. **Nayoti** vuttanayo.

“**Yaṃ asaṅkhata**”ntipi paṭhanti. **Catunayakovidoti** ekattanānattādinayacatukke nipuṇo. **Desanāyuttikusaloti** dhammānaṃ desanāvīdhimhi kusalo.

Sadisī kātabbā saṃsandanavasenāti adhippāyo. **Ānetabbā** “ayaṃ desanā imāya desanāya evaṃ saṃsandatī”ti. **Atthato apetaṃti** ayuttatthaṃ. **Asambandhatthanti** aññamaññaṃ asambandhapadatthaṃ. Nanu paṭṭhānavicāro nayavicāro viya hārehi asammisso vicāraṇantaroti codanaṃ manasi katvā āha “**yasmā panā**”tiādi. **Idha nikkhittoti** idha suttavicāye suttatthavicārabhāvato nikkhitto, etena vā paṭṭhānassa hārantogadhabhāvadassaneneva mūlapadānaṃ viya paṭṭhānassa padatthantarābhāvo dassitoti veditabbam.

Imassa suttassāti saṃvaṇṇiyamānasuttaṃ sandhāyāha. **Kasmiṃ vā padeti** saṃvaṇṇiyamānaṃ gāthaṃ sandhāyāha. **Tabbicayenāti** pucchādivicayena, assādādivicayena ca.

Vicayahāravibhaṅgavaṇṇanā niṭṭhitā.

3. Yuttihāravibhaṅgavaṇṇanā

18. Evametassa suttassa attho na gahetabbo, evaṃ pana gahetabboti aggahetabbagahetabbānaṃ atthānaṃ vijahanaggaṇaṇatthāya yuttāyuttivicāraṇāyaṃ vajjetabbesu tāva paṭhamam paṭipattīti dassento āha “**atathākārena gayhamānā suttatthā visayo**”ti yathā “vāmaṃ muṇca, dakkhiṇam gaṇhā”ti (dha. sa. aṭṭha. 498; visuddhi. mahāṭī. 1.14; saṃ. ni. ṭī. 1.1.213). Vajjetabbabhāvato hi suttapadehi suttatthe vivecite gahetabbabhāvo ca avasiṭṭho hoti. Tathā hi vakkhati “mettāvihārassa sato byāpādo cittaṃ

pariyādāya ṭhassatī’ti na yujjati desanā, ‘byāpādo pahānaṃ abbattham gacchatī’ti yujjati desanā’’ti (netti. 21).

Yuttiniddhāraṇena ayathāsabhāvato vivecitvā yathāsabhāvato dhammassa gahaṇakāraṇāni kathento ‘‘mahantā apadisitabbā etesanti **mahāpadesā**’’ti imamattamāha ‘‘**buddhādayo**’’tiādinā. **Paṭiṭṭhānānī** paṭiṭṭhānasādhanāni. **Sesesūti** saṅghāpadesādīsu. Paṭhamattho eva hi idha pāli āgato, vinicchayane kāraṇaṃ mahāpadesoti adhippāyo. **Suttotaraṇādīti** ādisaddena suttānotaraṇādīpi saṅgayhati. Suttotaraṇavinayasandassanāni hi kenaci yathābhatassa ganthassa ‘‘dhammo’’ti vinicchayane kāraṇaṃ. Suttānotaraṇavinayāsandassanāni ‘‘adhammo’’ti. **Yadi evanti** yadi yathābhatassa ganthassa suttavinayehi saṃsandanaṃ ‘‘dhammo’’ti, asaṃsandanaṃ ‘‘adhammo’’ti vinicchayakāraṇaṃ, evaṃ santeti attho. Sampadīyati nīpīyati dhammo etehīti **sampadāyā**, akkhātāro.

Vinīyanti rāgādayo etenāti **vinayo**, kāraṇaṃ. Tenāha ‘‘**rāgādivūpasamanimitta**’’nti. Kiṃ pana taṃ? Sādhīṭṭhānasamathavipassanādīdhammā. Ye parato ‘‘tecattālīsaṃ bodhaṅgamā dhammā’’ti (netti. 24) vakkhati.

Vinayamahāpadesā kappiyānulomato anulomakappiyaṃ nāma, taṃsadisatāya suttantamahāpadesāpi **anulomakappiyanti** aṭṭhakathāvohāro. Tena vuttaṃ ‘‘**yaṃ anulomakappiyanti vuccati**’’ti.

Yadipi tattha tattha pavattā bhagavato pakīṇṇakadesanā **aṭṭhakathā**, sā pana dhammasaṅgāhakehi teṭṭakam buddhavacanaṃ saṅgāyitvā tassa atthasaṃvaṇṇanānurūpena vācanāmaggaṃ āropitattā **ācariyavādo** nāma. Tena vuttaṃ ‘‘**ācariyavādo nāma aṭṭhakathā**’’ti. Tissopi saṅgītiyo āruḷho eva hi buddhavacanassa atthasaṃvaṇṇanābhūto kathāmaggo pacchā tambapaṇṇiyehi mahātherehi sīhaḷbhāsāya ṭhapito. **Attanomaṭi** theravādo. **Samentameva gahetabbanti** yathā pāliya saṃsandati, evaṃ mahāpadesato atthā uddharitabbāti dasseti. Pamādapāṭhavasena ācariyavādassa kadāci pāliya asaṃsandanaṃpi siyā, so na gahetabboti dassento āha – ‘‘**suttena samento eva gahetabbo**’’ti.

Catūhi mahāpadesehi yujjatiti catūhi mahāpadesehi na virujjhati. Idāni taṃ avirujjhanākāraṃ dassento ‘‘**yena yenā**’’tiādi vuttaṃ. Suttotaraṇādī eva hettha kāraṇaṃ. Tassa ca anekākāratāya ‘‘**pakārenā**’’ti vutto. Saṃvaṇṇiyamāne sutte saṃvaṇṇanāvasena gahetabbanti sambandho. **Ābhatenāti** ānītena. **Suttatoti** suttantarato. Ayañhettha attho – kenaci pasāṅgena suttantarato uddharitvā ānītena suttapadena suttotaraṇādīnā, kāraṇappakārena ca catumahāpadesāvirodhena saṃvaṇṇiyamāne sutte saṃvaṇṇanāvasena atthajātaṃ gahetabbanti. Tenāha ‘‘**tena...pe... kātabbā**’’ti. Tattha **yuttihārayojanā kātabbāti** yuttiniddhāraṇavasena ayaṃ yuttihāro yojetabbo. Atha vā **yuttihārayojanā kātabbāti** iminā hārena vakkhamānanayena yuttigavesanaṃ katvā tāya yuttiyā sabbahārayojanā kātabbāti attho. Lakkhaṇañhetam yuttigavesanāya, yadidaṃ yuttihāro. Tenāha ‘‘sabbesaṃ hārānaṃ, yā bhūmī, yo ca gocaro tesam. ‘‘Yuttāyuttaparikkhā’’ti (netti. 4), ‘‘imāya yuttiyā aññamaññehi kāraṇehi gavesitabba’’nti (netti. 20) ca.

19. Yadi vā sabbāni padāni ekaṃ attham abhivadantīti yojanā.

20. **Jarāyaṃ ṭhitassa aññathattanti** ṭhitassa yaṃ aññathattaṃ aññathābhāvo, ayaṃ jarā nāma. **Khaṇikamaraṇaṃ** khaṇikanirodho. **Samucchadamaraṇaṃ** khīṇāsavānaṃ khandhapariniḅbānaṃ.

Kevalassāti jarāya amissassa. **Aññāva jarā, aññaṃ maraṇanti** ‘‘paṭiññātassa kevalassa maraṇassa diṭṭhattā’’ti hetu. **Yathā taṃ devānanti** sadisūdāharaṇaṃ, visadisūdāharaṇaṃ pana iddhipādādayo, anvayabyatirekā gahetvā yojetabbā.

Tehīti jarāmaraṇehi.

“**Jīraṇabhijjanasabhāvā**”ti iminā lesena taṇhājarāmarāṇānaṃ anaññattaṃ yojeti. Yadi “aññā taṇhā, aññā jarā, aññā maraṇa”nti siddhovāyamattho, yaṃ sandhāya vuttaṃ “**na ida**”ntiādi, tathāpi sakkuṇeyyaparīhārāyaṃ codanāti ajjhāruḷhaṃ tattha dosaṃ dassetuṃ “yadi ca yathā jarāmarāṇa”nti pāḷipavattāni dassento “**yadi...pe... dasseti**”ti āha. **Bhāvoti** adhippāyo. **Etesanti** taṇhājarāmarāṇānaṃ.

“**Imāya yuttiyā aññamaññehi kāraṇehi gavesitabba**”nti ca keci paṭhanti, byañjanatopi gavesitabbaṃ, aññattha atthato aññatthampīti adhippāyo. Tameva byañjanato aññattham dassetuṃ pāḷiyam “**salloti vā**”tiādi vuttaṃ. **Imesanti** salladhūpāyanānaṃ. **Ichāvīpariyāyeti** icchitālābhe, appaccayasamavāye vā. **Idampi samatthanaṃ hoti** yathādhippetassa aññatthassa byatirekadassanabhāvato. **Jarāmarāṇavipariyāyeti** jarāmarāṇe asati. Na hi yathādhippetajarāmarāṇābhāve taṇhā na hotīti.

Dvidhā vuttāti dvippakārena vuttā, dvikkhattuṃ vā vuttā. **Yaṃ idaṃ...pe... ārammaṇakaraṇavasena vā abhilapananti** evaṃ kiriyāparāmasanaṃ yojetabbanti veditabbaṃ. **Visesoti** ayaṃ etāsaṃ icchātaṇhānaṃ pakatisankhāto viseso. “**Dvīhi nāmehi**”tipi pāḷi. **Yadipi evanti** kāmaṃ visayavisesesu evaṃ yathāvuttaavatthāvisesena icchātaṇhānaṃ atthi kāci bhedaṃ vuttāti attho. Sabhāvato pana bhedo natthīti dassento “**tathāpi**”ti āha.

Ichchantīti kāmenti. **Taṇhāyanā** pātukāmatā. **Santāpanaṭṭhenāti** paridahanabhāvena. **Ākaḍḍhanaṭṭhenāti** avaharaṇaṭṭhena. **Saritānīti** rāgavasena allāni. Taṃsāmpayuttapītivāsena siniddhāni **sinehitāni**. **Visattikāti** vitthata rūpādīsu tebhūmakadhammesu byāpanavasena. **Visaṭṭīti** purimavevacanameva ta-kārassa ṭa-kāraṃ katvā vuttaṃ. **Visālāti** vipulā. **Visakkatīti** parisakkati sahati. Ratto hi rāgavatthunā pādena tāḷiyamānopi sahati. “Osakkaṇaṃ, vipphandaṇaṃ vā visakkaṇa”nti vadanti. Aniccādikam niccādito gaṇhantī **visaṃvādikā** hoti. **Visaṃharatīti** tathā tathā kāmesu ānisaṃsaṃ dassentī vividhehi ākārehi nekkhammābhimukhappavattito cittaṃ saṃharati saṃkhipati. **Visaṃ** vā dukkhaṃ, taṃ harati, vahaṭīti attho. Dukkhanibbattakassa kammaṃsa hetubhāvato **visaṃmūlā**, visaṃ vā dukkhādibhedā vedanā mūlaṃ etāyāti **visaṃmūlā**, dukkhasamudayaṭṭhā visaṃ phalaṃ etissāti **visaphalā**. Rūpādīdukkhasseva paribhogo etāya, na amatassāti **visaparibhogā**. Sabbattha niruttivasena padasiddhi veditabbā. Yo panettha padhāno attho, taṃ dassetuṃ puna “**visatā vā panā**”tiādi vuttaṃ.

Sinehanaṃ pemakaraṇaṃ. **Bandhanaṭṭhenāti** saṃyojanaṭṭhena. **Āsīsaṇaṭṭhenāti** icchanaṭṭhena. **Abhinandaṇaṭṭhenāti** assādanaṭṭhena, sampaṭicchanaṭṭhena vā.

21. Anabhiratīti ukkaṇṭhā. **Ñāṇanibbidāti** nibbidānupassanā. Yathā ca dukkhū...pe... cāresu yutti vuttāti yojanā.

Sukhāpaṭipadādandhābhiññā sukhāpaṭipadākhippābhiññā **sukhāpaṭipadādayo**. Yo dukkhāya paṭipadāya visesaṃ adhigantaṃ bhabbo, tassa sukhāpaṭipadāyogyassa viya kariyamānā dhammadesanā visesāvahā na hoti, tasmā sā na yuttāti imamatthaṃ dasseti “**rāgacarito**”tiādinā. Rāgacaritassa tathā tathā kāmaṇaṃ ādīnaṃ, okāraṃ, saṃkilesaṃ, nekkhamme ānisaṃsaṃca avibhāvetvā ādito vipassanākaṭṭhāva kariyamānā na visesāvahā hoti āsayassa asodhitattāti etamatthaṃ dassento pāḷiyam “**vipassanā...pe... desanā**”ti āhāti veditabbaṃ. **Sesapadesupīti** yathā “rāgacaritassā”tiādinā rāgacaritakoṭṭhāsavasena pāḷiyam desanāya ayutti vuttā, iminā nayena sesapadesupi dosacaritakoṭṭhāsādīsipi “dosacaritassa puggalassa asubhaṃ deseyyā”tiādinā pāḷiyam avuttopi yathāsambhavamatto niddhāretvā vattabbo. Kasmā pana yuttihāre ayuttiniddhāraṇā katāti codanaṃ manasi katvā āha “**ettha cā**”tiādi. **Sesepi ese va nayoti** sesepi dosacaritādivasena niddhāritesu ayuttigavesanesu ayameva upāyo. **Anulomappahāna**”ntipi pāḷi, so evattho.

“**Yāvatikā ñāṇassa bhūmī**”ti etena yuttihārassa mahāvisayaṃ dasseti. Kasmā panāyaṃ mahāvisayoti? Yuttivicārabhāvato, saṃvaṇṇetabbassa ca dhammassa nānāyanipuṇādiguṇavisesayogatoti dassento “**taṃ kissa hetū**”ti āha.

Aparabhāgeti pacchābhāge. Mettāvihāribhāgassa aparihīnatāvacanato ayogo vutto. Tenāha “**sato**”ti. **Yathāvuttakāraṇato evāti** paṭipakkhattā eva.

Pahānekaṭṭhabhāvato diṭṭhimaññitassa. Ādīnavadassanena vitakkaṃ jigucchantā dutiyajjhānassa āsannaupacārājjhānadhammāpi vitakkārammaṇā na honti, pageva dutiyajjhānadhammāti adhippāyēnāha “**ārammaṇakaraṇattho hettha sahaḡatasaddo**”ti.

Evamaṃ yuttihāralakkhaṇaṃ āgamato yuttāyuttavicāraṃ dassetvā idāni āgamānugatāya yuttiyāpi taṃ dassetuṃ guṇamukhena dosavibhajaṇaṃ vibhajanto “**apicetthā**”tiādimāha. Taṃ uttānatthameva.

Yuttihāravibhaṅgavaṇṇanā niṭṭhitā.

4. Padaṭṭhānahāravibhaṅgavaṇṇanā

22. Tesam tesanti anavasesapariyādānaṃ, tena ye sutte vuttā ca dhammā, ye ca tesam kāraṇabhūtaṃ, tesam sabbesampīti vuttaṃ hoti. **Sabbadhammayāthāvaasampaṭivedho**ti imamatthaṃ dassetuṃ “**kattha pana so**”tiādi vuttaṃ.

Piyāyitabbajātiyanti pemaṇīyasabhāvaṃ. **Micchāpaṭipadāti** pamādāpatti, micchābhiniveso vā. Ekavāraṃ uppannāpi pāṇātipātacetanā verappasavanato dosassa, ekavāraṃ uppannāpi pamādāpatti, micchābhiniveso vā mohassa uppattikāraṇanti pāḷiyaṃ avuttampi nayato niddhāretabbanti dassento “**dosassa...pe... imināva nayena attho veditabbo**”ti āha. Nimittatthaggaṇalakkhaṇaṃ vaṇṇasaṅghānaṃ, anubyañjanatthaggaṇalakkhaṇaṃ anubyañjananti “**nimittānubyañjanaggahaṇalakkhaṇā**”ti vuttaṃ. Tattha tattha **nimittaṃ** itthipurisanimittaṃ. **Anubyañjanaṃ** hatthapādahasitakathitādi. Phasso paccayo etissāti **phassapaccayā**, tambhāvo **phassapaccayatā**. Assādeti etāyāti **assādo**, taṅhā.

Vatthūni ñeyyadhammoti āha “**vatthuavippaṭipatti visayasabhāvapaṭivedho**”ti. Idhādhippetam sammāpaṭipattiṃ dassetuṃ “**sīlasamādhisampadāna**”nti vuttaṃ. Ekadesupalakkhaṇavasena, vaṇṇagandharāgisappāyavasena vā pāḷiyaṃ “**vinīlakavipubbakaggahaṇalakkhaṇā asubhasaññā**”ti vatvā “**tassā nibbidāpadaṭṭhāna**”nti vuttaṃ **nibbidam dassento** “**nibbidā**”tiādi vuttaṃ. Tattha paritassanato visesetuṃ “**ñāṇenā**”ti visesitaṃ. **Tathā pavattanti** nibbidanākārena pavattaṇaṃ.

Yoniso ummujjantiyā videharañño dhītāya **rucāya** jātissaraññaṃ kammassakataññānaṃ kāraṇaṃ ahoṣi, na pana asappurisūpanissayato, ayoniso ummujjantassa tasseva rañño senāpatino **alātassa bījakassa** dāsassāti imamatthaṃ dassento “**imassa ca...pe... udāharitabbo**”ti āha. **Soti pasādo**. **Avatthāvisesoti** sampayuttadhammānaṃ anāvilabhāvalakkhito avatthābhedo. **Āyatanagatoti** ṭhānagato, ratanattayavisayoti attho. “**Kāyo**”tiādinā avatthāvisesena vinā sabhāvasiddhameva padaṭṭhānaṃ dasseti.

Imasmaṃ ca ṭhāne pāḷiyaṃ pubbe yesaṃ dhammānaṃ padaṭṭhānaṃ niddhāritaṃ, te dhammā yesaṃ dhammānaṃ padaṭṭhānāni honti, te dassetuṃ “**aparo nayo**”tiādi āradhanti veditabbaṃ. Assādamanasikāro ayonisomanasikāralakkhaṇo vutto nidassanamattaatthoti veditabbo, yebhuyyena sattānaṃ lobhasena ayonisomanasikārā saṃvattantīti dassanatthaṃ vā evamaṃ vuttaṃ. Upapatti eva **opapaccayaṃ**, tassa bhāvo **opapaccayikanti** āha “**upapattibhavabhāvenā**”ti. **Vavatthitabhāvoti** vavatthitabhāvo rūpassa dassanādipaṭinīyatārammaṇakiccatā. **Bhavassa aṅgānīti** bhavassa kāraṇāni. Dutīye **aṅgānīti** avayavā, kammavaṭṭampi vā kāraṇaṅgabhāvena yojetabbaṃ.

Kammaṭṭhānassāti bhāvanāya brūhanā vaḍḍhanā. **Tesūti** titthaññūtādīsu. Kalyāṇamittassa sammadeva payirupāsānāyapīti taṃ nissāya laddhena sabbāya dhammassavanena dhammupasamhitaṃ pāmojjaṃ hotīti titthaññūtā pītaññūtāya padaṭṭhānaṃ. Evamaṃ yāya vimuttiyā sati vimuttiñānadassanaṃ

hotīti sā tassa padaṭṭhānanti ayamatto pākaṭoti āha “**purimānaṃ...pe... suviññeyyo evā**”ti. **Saha adhiṭṭhānenāti** ñātapariññāya saddhim. Ñātapariññā hi tīraṇapariññāya adhiṭṭhānaṃ. Sesam suviññeyyameva.

Padaṭṭhānahāravibhaṅgavaṇṇanā niṭṭhitā.

5. Lakkhaṇahāravibhaṅgavaṇṇanā

23. “Lakkhaṇahārassa visayaṃ pucchati”ti vuttaṃ, “ko pana tassa visayo”ti vutte samānalakkhaṇā avuttadhammā. Kāyānupassanāya samāraddhāya vedanānupassanādayo sukheveva sījjhantīti tabbacanena vedanāgatāsatiādīnaṃ vuttabhāvo dassito **satipaṭṭhānabhāvena ekalakkhaṇattāti** kāyānupassanāsatipaṭṭhānassa saddhānuggahitāni vīriyasatisamādhipaññindriyāni sādhanam, evaṃ itaresampīti katvā vuttaṃ. Ayam attho **aṭṭhakathāyameva** (netti. aṭṭha. 51) parato āgamissati. Iminā nayena sesesupi ekalakkhaṇatāniddesesu attho veditabbo. **Paratoti catubyūhahāraṇṇanāyamaṃ** (netti. aṭṭha. 20).

Asammissatoti vedanādayopi ettha sitā ettha paṭisandhāti kāye vedanānupassanāpasāṅgepi āpanne tadasammissatoti attho.

Avayaviḅāhasamaññātidhāvanasārādānābhini vesanisedhanattham kāyamaṃ aṅgapaccāṅgehi, tāni ca kesādīhi, kesādike ca bhūtopādāyarūpehi vinibbhujitum “**tathā na kāye**”tiādīmāha. Pāsādādinagarāvayavasamūhe avayavivādinopi avayaviḅāhaṇam karonti. Nagaram nāma koci attho atthīti pana kesañci samaññātidhāvanam siyāti itthipurisādisamaññātidhāvane nagaranidassanam vuttaṃ. **Añño koci** sattādiko. **Yamaṃ passati** itthim, purisam vā. Nanu cakkhunā itthipurisadassanam natthīti? Saccam natthi, “itthim passāmi, purisam passāmi”ti pana pavattasamaññāvasena “yamaṃ passati”ti vuttaṃ. Micchādassanena vā diṭṭhiyā yamaṃ passati, na tam diṭṭham rūpāyatanam hoti, rūpāyatanam vā tam na hotīti attho. Atha vā tam kosādibhūtopādāyasamūhasaṅkhātam diṭṭham na hoti, diṭṭham vā yathāvuttaṃ na hotīti attho. **Yamaṃ diṭṭham tam na passatīti** yamaṃ rūpāyatanam, kesādibhūtopādāyasamūhasaṅkhātam vā diṭṭham, tam paññācakkhunā bhūtato na passatīti attho.

Na aññadhammānupassīti na aññasabhāvānupassī, asubhādito aññākārānupassī na hotīti vuttaṃ hoti.

Pathavīkāyanti kesādiṃ pathavīdhammasamūhattā “kāyo”ti vadati, lakkhaṇapathavimeva vā anekabhedabhinnaṃ sakalasarīragataṃ pubbāpariyabhāvena pavattamānaṃ samūhavasena gahetvā “kāyo”ti vadati. Evaṃ aññatthāpi.

Ākārasamūhasaṅkhātassāti aniccatādiākārasamudāyapariyāyassa.

Tisu bhavesu kileseti bhavattayavisayakilese. **Sabbatthikanti** sabbattha līne, uddhate ca citte icchitabbatthā, sabbe vā līne, uddhate ca bhāvetabbā bojjaṅgā atthikā eṭāyāti **sabbatthikā**. **Anto saṅkocoti** anto olīyanā, kosajjanti attho.

24. Gahitesūti bhāvanāggahaṇena gahitesu, bhāvitesūti attho, vacanena vā gahitesu. Bhāvanāggahaṇadīpanatthattā pana vacanena gahaṇassa bhāvanāggahaṇamettha padhānaṃ. Yassa satipaṭṭhānā bhāvitā, tassa sammappadhānādayo bodhipakkhiyadhammā na bhāvitāti netam thānaṃ vijjatīti ca samānalakkhaṇatāpadesena imamattam dassetum pāḷiyam “**catūsu satipaṭṭhānesu bhāviyamānesu cattāro sammappadhānā bhāvanāpāripūriṃ gacchanti**”tiādi vuttaṃ.

Vipallāsā pahiyanti ujuvipaccanīkabhāvato. “Āhārasamudayā kāyassa samudayo,

phassasamudayā vedanānaṃ samudayo (saṃ. ni. 5.408), saṅkhārapaccayā viññāṇaṃ, viññāṇapaccayā nāmarūpa’nti (saṃ. ni. 1.1, 39; ma. ni. 3.126; mahāva. 1; udā. 1; vibha. 225) vacanato kāyādīnaṃ samudayabhūtā kabaḷikārāhārapphassamanosañcetanāviññāṇāhārākāyādīnaṃ pariḷāṇanena pariññātā honti tappaṭipakkhappahānatoti dassento **“cattāro āhārā”**tiādimāha. **Sabbatthāti** “upādānehi anupādāno bhavatī”ti evamādīsu.

Tattha yasmā pañca kāmagaṇā savisesā kāye labbhantīti visesena kāyo kāmupādānassa vatthu, sukhavedanassādavasena paralokanirapekkho “natthi dinna”ntiādi (dī. ni. 1.171; ma. ni. 1.445; 2.94-95, 225; 3.91, 116; saṃ. ni. 3.210; dha. sa. 1221; vibha. 938) parāmāsaṃ uppādetīti diṭṭhupādānassa vedanā, citte niccaggahaṇavasena sassatassa “attano silādivasena parisuddhaparāmasanaṃ hotī”ti silabbatupādānassa cittaṃ, nāmarūpaparicchedena bhūtaṃ bhūtato apassantassa “attābhiniveso hotī”ti attavādupādānassa dhammā vatthu, tasmā **“catūsu satipaṭṭhānesu bhāviyamānesu upādānehi anupādāno bhavatī”**ti vuttaṃ.

Yasmā pana vuttanayeneva kāyo kāmāyogassa vatthu, bhavesu sukhaḅbhaṇavasena bhavassādo hotīti bhavāyogassa vedanā, santatighanaggahaṇavasena citte attābhiniveso hotīti diṭṭhiyogassacittaṃ, dhammavinibbhogassa dukkaratā, dhammānaṃ dhammamattatāya ca duppaṭivijjhantā sammoho hotīti avijjāyogassa dhammā, vatthu, tasmā catusatipaṭṭhānabhāvanāya tesu tesu pahānasiddhito yogehi viṣaṃyuttatā vuttā. Eteneva āsavehi anāsavatā, ogehi nittiṇṇatā ca saṃvaṇṇitā hoti kāmāragādīnaṃ eva kāmāyogakāmāsavakāmoghādibhāvato.

Vuttanayeneva kāyo abhijjhākāyaganthassa vatthu, “dukkhāya vedanāya paṭighānusayo anusetī”ti (ma. ni. 1.465) dukkhadukkhavipariṇāmadukkhasaṅkhāradukkhabhūtā vedanā visesena byāpādakāyaganthassa vatthu, citte niccābhinivesavasena sassatassa “attano silena suddhi”tiādiaparāmasanaṃ hotīti silabbataparāmāsassa cittaṃ vatthu, sappaccayanāmarūpadassanābhāvato bhavavibhavadiṭṭhisāṅkhāto idaṃsaccābhiniveso hotīti tassa dhammā vatthūti catusatipaṭṭhānāti yojetabbaṃ.

Vuttanayeneva visesato kāyo rāgasallassa vatthu, vedanā dosasallassa, “cittaṃ niccaggahaṇavasena attābhinivesaṃ attānaṃ seyyādito dahatī”ti cittaṃ mānasallassa, vuttanayeneva dhammā mohasallassa vatthūti catusatipaṭṭhānāti yojetabbaṃ.

Yasmā pana kāyānupassanādīhi kāyavedanācittadhammesu pariññātesu rūpavedanāsaññāsaṅkhārakkhandhā pariññātā honti, citte hi pariññāte saññāpi pariññātāva hoti, tasmā **“viññāṇaṭṭhitiyo cassa pariññāṃ gacchantī”**ti vuttaṃ.

Tathā visesato kāye sāpekkhā chandāgatiṃ gacchatīti kāyo chandāgatiyā vatthu, vuttanayeneva vedanā byāpādassa nimittanti sā dosāgatiyā vatthu, santatighanaggahaṇavasena sarāgādicitte sammoho hotīti mohāgatiyā cittaṃ, dhammasabhāvānavabodhena bhayaṃ hotīti bhayāgatiyā dhammā vatthūti catusatipaṭṭhānabhāvanāya agatigamanappahānaṃ hotīti āha **“agatigamanehi ca na agatiṃ gacchatī”**ti.

“Akusalassa somanassassa vāsenā”ti idaṃ “ayampi attho sambhavatī”ti katvā vuttaṃ. “Sukhāya vedanāya rāgānusayo anusetī”ti (ma. ni. 1.465) pana vacanato sukhavedanāggahaṇena tatthānusayanena samudayasaccaṃ desitanti veditabbaṃ. **Desitaṃ dukkhaṃ ariyasaccanti** dukkhadukkhaḅbhaṇena sātisaṃ dukkhaṃ ariyasaccaṃ pakāsitaṃ hotīti pāliyaṃ “dukkhaṃ ariyasaccaṃ desita”nti vuttaṃ. Sahacaraṇādīsu yaṃ vattabbaṃ, taṃ heṭṭhā **niddesavāraṇṇanāyaṃ** (netti. aṭṭha. 5 ādayo) vuttaṃ.

Lakkhaṇahāravibhaṅgavaṇṇanā niṭṭhitā.

6. Catubyūhahāravibhaṅgavaṇṇanā

25. Hārānanti niddhāraṇe sāmivacanaṃ. Hāresu imassa catubyūhahārassa viśesato suttassa byañjanavicayabhāvatoti yojanā. Tena vuttaṃ “**byañjana...pe... dasseti**”ti. **Yāyāti** niruttiyā.

Yathārahanti saṃvaṇṇiyamāne sutte yaṃ yaṃ arahati nibbacaṇaṃ vattaṃ, taṃtaṃlokasamaññānurodheneva. Pubbhāgapaṭipadā sampādetvā pacchā saccābhisamayaṃ pāpuṇātī āha “**sammuti...pe... hoti**”ti, taṃtaṃpaññattiggahaṇamukhena paramatthaggaṇaṃ hotīti evaṃ vā iminā sambandho.

Yamidaṃ anindriyabaddharūpasantānaṃ sandhāya “**ubhayamantarenā**”ti idha vuttaṃ. Otaṇaṇhāre (netti. aṭṭha. 42 ādayo) panassa dvārappavattaphassādidhamme sandhāya vuttabhāvaṃ dassetuṃ “ubhayamantarenāti phassasamuditesu dhammesū”ti attho vutto. Aṭṭhakathācariyā panāhu “antarenāti vacanaṃ pana vikappantaradīpana”nti. Tasmā ayamettha attho – na imaṃ lokaṃ, na huram lokaṃ, atha kho ubhayamantarenāti. Aparo vikappo – **ubhayamantarenāti** vā vacanaṃ vikappantarābhāvadīpanaṃ. Tassattho – na imaṃ lokaṃ, na huram lokaṃ nissāya jhāyati jhāyī, ubhayamantarena pana aññaṃ ṭhānaṃ atthīti.

Yepi ca “antarāparinibbāyī, sambhavesī”ti ca imesaṃ suttapadānaṃ atthaṃ micchā gahetvā atthi eva antarābhavoti vadanti, tepi yasmā avihādīsū tattha tattha āyuvemajjhaṃ anatikkamitvā antarā aggamaṅgādhigamena anavasesakilesaparinibbānena parinibbāyantīti **antarāparinibbāyī**, na antarābhavabhūtoti purimassa suttapadassa attho. Pacchimassa ca ye bhūtā eva, na puna bhavissanti, te hi (kathā. anuṭṭi. 507) khīṇāsavā, purimapadehi “**bhūtā**”ti vuttā. Tabbiparītatāya sambhavaṃ esantīti **sambhavesino**. Appahīnabhavasamyojanattā sekkhā, puthujjanā ca. Catūsu vā yonīsū aṇḍajajalābujasattā yāva aṇḍakosaṃ, vatthikosāṇa na bhindanti, tāva **sambhavesī** nāma. Aṇḍakosato, vatthikosato ca bahi nikkhantā **bhūtā** nāma. Saṃsedajaopapātikā ca paṭhamacittakkhaṇe **sambhavesī** nāma, dutiyacittakkhaṇato paṭṭhāya **bhūtā** nāma. Yena vā iriyāpathena jāyanti, yāva tato aññaṃ na pāpuṇanti, tāva **sambhavesī**, tato paraṃ **bhūtā**ti attho, tasmā natthīti paṭikkhipitabbaṃ. Sati hi ujuke pāḷianugate atthe kiṃ aniddhāritasāmatthiyena antarābhavena attabhāvaparikkappitena payojananti.

Yaṃ pana ye “santānavasena pavattamānānaṃ dhammānaṃ avicchedena desantaresu pātubhāvo diṭṭho. Yathā taṃ vīhiādiaviññāṇakasantāne, evaṃ saviññāṇakasantānepi avicchedena desantaresu pātubhāvena bhavitabbaṃ. Ayaṇca nayo sati antarābhave yujjati, nāññathā”ti yuttiṃ vadanti. Tehi iddhimato cetovasippattassa cittānugatikaṃ kāyaṃ adhiṭṭhahantassa khaṇena brahmalokato idhūpasaṅkamane, ito vā brahmalokagamane yutti vattabbā. Yadi sabbattheva vicchinnadese dhammānaṃ pavatti na icchitā, yadipi siyā “iddhivisayo acinteyyo”ti, taṃ idhāpi samānaṃ “kammavipāko acinteyyo”ti vacanato, tasmā taṃ tesam matimattameva. Acinteyyasabhāvā hi sabhāvadhammā, te katthaci paccayavisesena vicchinnadese pātubhavanti, katthaci avicchinnadese ca. Tathā hi mukhaghosādīhi aññaṃsmiṃ dese ādāsapabbatappadesādike paṭibimbapaṭighosādikaṃ paccayuppannaṃ nibbattamānaṃ dissati, tasmā na sabbam sabbattha upanetabbanti ayamettha saṅkhepo. Vitthārato pana paṭibimbassa udāharaṇabhāvasādhanādiko antarābhavavicāro **kathāvattahuppakaraṇassaṭṭikāyaṃ** (kathā. anuṭṭi. 507) gahetabbo.

Apare pana “**idhāti** kāmabhavo, **huranti** arūpabhavo, **ubhayamantarenāti** rūpabhavo vutto”ti vadanti, “**idhāti** paccayadhammā, **huranti** paccayuppannadhammā, **ubhayamantarenāti** paṇṇattidhammā vuttā”ti ca vadanti, taṃ sabbaaṭṭhakathāsu natthi, tasmā vuttanayeneva attho veditabbo. **Avasitṭhaṃ rūpanti** āpodhātuākāsadhātūhi saddhiṃ lakkhaṇarūpāni, ojaṇca sandhāyāha anindriyabaddharūpassa adhippetattā. Tassa khīṇāsavassa taṃ nibbānārammaṇaṃ cittaṃ na jānanti na ñāyanti “jhāyamānā”ti vuttattā. Sesam suviññeyyameva.

Catubyūhahāravibhaṅgavaṇṇanā niṭṭhitā.

7. Āvaṭṭahāravibhaṅgavaṇṇanā

29. Akusalānaṃ dhammānaṃ viddhaṃsanasabhāvattā, akusalānaṃ vā pajahane kusalānaṃ sampādane paṭṭhapanasabhāvattā **ārambhadhātu**. **Tathābhūtā**ti sīlādīhi samaṅgībhūtā. Kāmadhātuādīkā tidhātuoyova **tedhātu**. Tassa abhibhavanato **tedhātuissaro** maccurājā. Anādimatisaṃsāre cirakālaṃ laddhapatitṭhāpi acirakālaṃ bhāvitehi kusalehi dhammehi samucchindanīyattā abalā kilesāti vuttaṃ “**abalaṃ dubbala**”nti. Tenāha “**abalā naṃ balīyanti**”ti.

Idaṃ vacanaṃ ayaṃ gāthāpādo. **Samādhissa padaṭṭhānanti** ettha samādhissa kāraṇaṃ samatānuyoge niyojanatoti yojetabbaṃ. Esa nayo sesesupi. **Papañcāti** rāgādayova. **Tathā ceva saṃvaṇṇanti** desanāya padaṭṭhānabhāveneva atthasaṃvaṇṇanā katāti attho.

Nti taṃ desanaṃ. **Tassāti** sabhāgādivasena āvaṭṭanassa. Paripakkaññānaṃ viśesādhigamāya. **Lābhavinicchayapariggahamacchariyānī**tiādīsu **lābhoti** rūpādīraṃmaṇappaṭilābho. So pariyesanāya sati hotīti pariyesanāggahaṇena gahito. **Vinicchayoti** “ettakaṃ me rūpāraṃmaṇatthāya bhavissati, ettakaṃ saddādiāraṃmaṇatthāya, ettakaṃ mayhaṃ, ettakaṃ parassa, ettakaṃ paribhuñjissāmi, ettakaṃ nidahissāmi”ti evaṃ pavatto vitakko vinicchayo. So lāpitahetukattā pariyesanamūlakatāya pariyesanāggahaṇeneva gahito, tathā pariggahamacchariyāni. Tattha **pariggaho** “mama ida”nti pariggaṇhanaṃ. **Macchariyaṃ** “mayheva hotū”ti parehi sādharmaṇabhāvāsanaṃ. Tenevassa porāṇā evaṃ vacanatthaṃ vadanti “mayhevidamacchariyaṃ hotu, mā aññesaṃ acchariyaṃ hotūti pavattattā macchariyanti vuccatī”ti (dī. ni. aṭṭha. 2.103; a. ni. aṭṭha. 3.9.23). Paribhogatthānaṃ pana vinicchayādīnaṃ paribhogantogadhatā veditabbā. **Chandarāgo** dubbalarāgo. **Ajjhosānaṃ** “mama ida”nti taṇhāvasena balavasanniṭṭhānanti āha “**chandarāgaajjhosānā taṇhā evā**”ti. **Ārakkhanimittaṃ** dvārapidahanamañjūsāgopanādīnā suṭṭhu rakkhaṇanimittaṃ. Pāpāni karonto paribhoganimittaṃ ratto giddho gadhito mucchito hutvā migova paribhuñjananimittaṃ pamādaṃ āpajjatīti evaṃ pariyaṇārakkhā **paribhoganimittaṃ**. Pamādo tividho taṇhāya vasena kathitoti dassento “**tividho taṇhāyāti vutta**”nti āha.

Avisesena vuttanti “katamena upādānena saupādānā”ti vibhāgena pucchitvāpi “avijjāya ca taṇhāya cā”ti avinibbhujitvā vuttaṃ. **Taṇhaṅca avijjaṅca caturupādānaṃ vasenāti** kāmupādānādīnaṃ catunnaṃ upādānānaṃ vasena vibhajitvā khandhānaṃ **dukkhabhāvena** dukkhasaccabhāvena saha pariññeyyabhāvaṃ, upādānānaṃ **samudayabhāvena** samudayasaccabhāvena saha pahātabbabhāvaṃ dassetīti yojanā.

30. “**Yo**”tiādīnā vutto tividho pamādo pariyesati, ārakkhaṅgaṅga karoti, paribhoganimittaṅcāti sambandho. Pamādo hi pamajjantassa puggalassa bhogānaṃ pariyesanāya, ārakkhaṅgaṅga ca hetubhūto kattubhāvena upacarito, paribhogassa pana nimittaṃ. “Tappaṭipakkhenā”ti padassa atthaṃ vivarati “**appamādānuyogena**”ti, tena samathabhāvaṃ dasseti. **Khepanāti** khayapāpanā. **Vodānapakkhavisabhāgadhammavasenāti** vodānapakkho ca so pamādassa visabhāgadhammo cāti **vodāna...pe... dhammo**, samatho, tassa vasena.

Samathe satīti adhiṭṭhānabhūte jhāne sati, taṃ pādakaṃ katvāti attho. **Yā paññāti** nāmarūparicchedādivasena pavattapaññā. Tenāha “**ayaṃ vipassanā**”ti. **Pahīnesūti** pahīyamānesu.

Vodānapakkhanti ārambhadhātuādīvodānapakkhaṃ nikkhipitvā. **Visabhāgadhammavasenāti** pamādavaseneva. **Sabhāgadhammavasenāti** pubbe nikkhittassa ārambhadhātuādīvodānadhammassa samathādisabhāgadhammavasena.

Puna apaniyodāpaniyaṃ sikhāppattapariyodāpanaṃ idhādhippetanti āha “**taṃ pana arahattena hotī**”ti.

Mohasamuṭṭhānatā vuttā “moho eva samuṭṭhāna”nti katvā. Aññathā pīsuṇāvācāya dosasamuṭṭhānatā musāvādassa viya mohasamuṭṭhānabhāvā vattabbā siyā.

Kammāpathabhāvaṃ pattānaṃ, appattānañca akusaladhammānaṃ “sabbapāpa”nti padena pariggahitattā vuttaṃ “**kammāpathakammavibhāgenā**”ti.

31. Sesapadānanti “kusalassa upasampadā”tiādīnaṃ (dī. ni. 2.90; dha. pa. 183; netti. 30, 50, 116, 124; peṭako. 29) gāthāya avasiṭṭhapadānaṃ. **Yathādhigatanti** attanā adhigatappakāraṃ, pacchā bhūmidisā.

Upari yāpentīti manussalokato upariṭṭhimaṃ devalokaṃ gamenti.

32. Yathāvuttassa dhammassāti sīlassa ca maggassa ca. **Taṇhāvijjādīnanti ādisaddena** tadekaṭṭhakilesā gayhanti, tesam padaṭṭhānadhammā ca. **Samathavipassanādīnanti ādisaddena** sāmāññaphalānaṃ saṅgaho. Yadaggena cettha “nirodho rakkhatī”ti vutto, tadaggena maggo rakkhānakiriyāya karaṇaṃ vuttaṃ “**yena rakkhatī**”ti. Visabhāgadhammavasena purimāni sabhāgadhammāvattaṇavasena pacchimāni saccāni niddhāritānīti yojetabbaṃ.

Āvaṭṭahāravibhaṅgavaṇṇanā niṭṭhitā.

8. Vibhattihāravibhaṅgavaṇṇanā

33. Dhammesūti puññādidānādibhedabhinnesu sabhāvadhammesu. **Tattha labbhamānoti** tesu yathāvuttesu dhammesu labbhamāno. **Bhūmivibhāgoti** kāmāvacarādīdassanādibhūmippabhedo. **Padaṭṭhānavibhāgoti** te puññādidhammā yesam padaṭṭhānaṃ, tesam vā ye dhammā padaṭṭhānaṃ, tabbibhāgo. **Yesam suttānanti** mūlapadaṭṭhānabhūtānaṃ saṃkilesabhāgiyādīnaṃ catunnaṃ suttānaṃ vasena. Asaṅkaravavattānena hi etesu suttasu sātīsayam dhammā vibhattā nāma honti. Tenāha “**visesato**”ti. Yadi evaṃ kasmā vāsanābhāgiyanibbedhabhāgiyasuttāni evettha gahitānīti? Nayidamevaṃ nikkhamanapariyosānabhāvena itaresampi gahitattā. Yato hi nissatā vāsanābhāgiyā dhammā, te saṃkilesabhāgiyā. Yaṃpariyosānā nibbedhabhāgiyā dhammā, te asekkhabhāgiyāti dvayaggahaṇeneva itaresampi dvayaṃ gahitameva hoti. Tenāha “**imesam catunnaṃ suttānaṃ desanāyā**”ti. **Imāni cattāri suttānīti** pāliyā, vakkhamānāya desanāyā vā itaradvayasāṅgaho daṭṭhabbo, na paṭikkhepo.

Tenevāti niyamassa akatattā, tato ca tena tannissitena ca brahmacārī bhavatīti siddhaṃ hoti. **Eva-**saddo vā samuccayatto daṭṭhabbo. **Siyā tassa paṭikkhepoti** tassa aṭṭhasamāpattibrahmacariyassa siyā paṭikkhepo. Evaṃ sati sāvasesā desanā siyā.

Tadaṅgādippahānadvayaṃ padaṭṭhānabhūtaṃ idha gaṇanūpagaṃ na hotīti “**samucchedaṭṭhāpassaddhippahānānaṃ vasenā**”ti vuttaṃ. Tathā hettha keci “tenevā”ti paṭhanti. “**Teneva brahmacariyenāti paṭhantī**”ti idaṃ “saṃvarasīle ṭhito”ti (netti. 33) ettha vuttaṃ pāḷivikappaṃ sandhāya vadati. “**Yasmā...pe... vakkhatī**”ti idaṃ pacchimapaṭṭhasseva yuttatāya kāraṇavacanaṃ.

Kathaṃ mantāti? Anibbedhasabhāvattā mahaggatapuññānaṃ na nibbedhabhāgiyasuttena saṅgaho, vāsanābhāgiyattā pana vāsanābhāgiyasutteneva saṅgahoti. Tadupasaṅgā hi pacchimo eva paṭho yuttataro. Itarathā sāvasesā desanā bhaveyya. Tenāha “**na hi...pe... desetī**”ti.

Saṃkilesabhāgiyaasekkhabhāgiyānaṃ parato vakkhamānattā vuttaṃ “**vakkhamānānaṃ...pe... vasenā**”ti. “**Sabbato**”ti idaṃ pubbaparāpekkhaṃ. Tassa parāpekkhatāya “sabbatobhāgena ekādasasu

thānesu pakkhipitvā”ti aṭṭhakathāyaṃ yojitaṃ. Tattha padādike vicayahārapadatthe sandhāya “**ekādasasu thānesū**”ti vuttaṃ. Pubbapekkhatāya pana “sabbatobhāgena desanāya phalenā”tiādinā yojetabbaṃ.

Samkilesabhāgiyānaṃ taṇhāsamkilesādinā desanānayo veditaḃbo. **Phalaṃ** apāyadukkheṇa manussesu dobhaggiyena. Asekkhabhāgiyānaṃ asekkhehi sīlakkhandhādīhi desanānayo. **Phalaṃ** aggaphalena ca anupādisesāya ca nibbānadhātuyā veditabbaṃ. Itaresaṃ pāliyaṃ vuttameva. Kāmarāgabyāpādauddhambhāgiyasamyojanaggahaṇena samkilesabhāgiyānaṃ, virāgaggahaṇena asekkhaggahaṇeneva ca asekkhabhāgiyānaṃ vakkhamānattā vuttaṃ “**vakkhamānānaṃ...pe...vasenā**”ti. Padapadatthavicārayuttiniddhāraṇamukheṇa dhammavibhattiādivicāro kātāboti dassetaṃ pāliyaṃ “**vicayena...pe... tabbānī**”ti vuttanti aṭṭhakathāyaṃ “**vicayena...pe... dasseti**”ti vuttaṃ.

34. Evanti iti. Dhammeti vuttasabhāgadhamme. Sādhāraṇāsādhāraṇabhāvehiti sāmāññavisesena visiṭṭhehi. **Dve dhammā sādhāraṇā**ti dve ime dhammā yehi sabhāgadhammā sādhāraṇā nāma honti. Katame dve? Nāmaṃ, vatthu ca. Tattha **nāmaṃ** nāmapaññatti, taṃmukheṇeva saddato tadatthāvagamo. Saddena ca sāmāññarūpeneva tathārūpassa atthassa gahaṇaṃ, na visesarūpena, tasmā saddavacaniyā atthā sādhāraṇarūpanāmāyattagahaṇiyatāya nāmasādhāraṇā vuttā. **Vatthū**ti pavattiṭṭhānaṃ. Yattha hi ye dhammā pavattanti, tesam sabbesaṃ te dhammā sādhāraṇāti pavattiṭṭhānasankhātānaṃ vatthūnaṃ sādhāraṇā. Yasmā panidaṃ dvayaṃ tesam dhammānaṃ sādhāraṇabhāve pakatibhūtaṃ sabhāvabhūtaṃ, tasmā vuttaṃ “**dve dhammāti dve pakatiyo**”ti. **Ekasantatipatitāyā**ti samānasantatipavattiyā. Tenāha “**samānavatthukā**”ti. Dassanapahātabbānañhi yathā micchattaniyatāsattā pavattiṭṭhānaṃ, evaṃ aniyatāpīti ubhaye hi te samānavatthukā. Esa nayo itaresupī. Sakkāyaditṭhivicikicchāsīlabbataparāmāsā hi bhinnasabhāvāpete dhammā dassanena pahātabbataṃ nātivattantīti te nāmasāmāññataṃ pattā, rūparāgādayo ca bhāvanāya pahātabbataṃ āha “**pahānekattā nāmasādhāraṇā**”ti. Yathā pana “vatthūnaṃ sādhāraṇā vatthusādhāraṇā”ti ayamatto labbhati, evaṃ “vatthunā sādhāraṇā vatthusādhāraṇā”ti ayampi attho labbhatīti dassento “**sahajekattā vatthusādhāraṇā**”ti āha. Te hi aññamaññaṃ phusanādisabhāvato bhinnāpī yasmim pavattanti, tena vatthunā sādhāraṇā nāma honti. Ettha ca labbhamānampi kusālādināmasādhāraṇaṃ anāmasitvā vatthusādhāraṇā tāva yojitāti veditabbā. **Paṭipakkhādīhīti ādisaddena samānaphalatāsahabyatādike saṅgaṇhāti. Sesapadesūti** “puthujjanassa”tiādivākyesu. Kathaṃ? Tattha hi puthujjanassa, sotāpannassa ca sambhavato anāgāmino, arahato ca asambhavatotiādinā yojetabbaṃ.

Kathaṃ te odhiso gahitāti kenākārena te “sādhāraṇā”ti vuttadhammā bhāgaso gahitā. “Amukassa, amukassa cā”ti ayañhettha attho. Sāmāññabhūtā dhammā **sādhāraṇā** nāma, evaṃ sante kathaṃ tesam micchattaniyatāniyatādivasena vibhāgena pavattiṭṭhānatā vuccati, na vattabbanti adhippāyo. Atha vibhāgena taṃ vattabbaṃ, nanu te sādhāraṇāti na vattabbamevāti? Evaṃ sādhāraṇāti micchattaniyatānaṃ, aniyatānanti imesaṃ ubhayesaṃyeva te dhammā sādhāraṇā. Tenāha – “**na sabbasattānaṃ sādhāraṇatāya sādhāraṇā**”ti. “**Yasmā**”tiādinā tattha kāraṇamāha, tenetaṃ dasseti “keci dhammā kesañcīdeva dhammānaṃ sādhāraṇā honti, aññesaṃ asādhāraṇā”ti. Tenāha “**paṭiniyatañhi tesam pavattiṭṭhāna**”nti.

Itarathāti aniyatapavattiṭṭhānatāya sabbesaṃ sādhāraṇā, asādhāraṇā vā siyuma, tathā sati. **Tathā vohāro**ti “sādhāraṇā, asādhāraṇā”ti ca ayaṃ vohāro sāmāññā eva na bhaveyya. **Ete eva dhammā**ti “sādhāraṇā”ti vuttadhammā eva. **Evanti** “micchattaniyatāna”ntiādinā vuttappakārena. **Niyatavisayā** paricchinnappavattiṭṭhānā. “**Yopi**”tiādi puggalādhiṭṭhānena vuttassevatthassa pākātakaraṇaṃ. “**Na hi**”tiādinā anvayato, byatirekato ca tamevatthaṃ vibhāveti. **Sesepī**ti “bhāvanāpahātabbā”ti evamādimhipi.

Paccattaniyatoti pātipuggaliko. **Itarassā**ti apaccattaniyatassa. **Tathā**ti asādhāraṇabhāvena. Koci dhammo kañci dhammaṃ upādāya sādhāraṇopi samāno tadaññaṃ upādāya asādhāraṇopi hotīti āha “**sādhāraṇāvidhuratāyā**”ti. Tenāha “**taṃ taṃ upādāyā**”tiādi. Tathā hi “dhammatā”ti

vuttapaṭhamamaggaṭṭhatā dīpitā, tādīsānaṃ eva anekesaṃ ariyānaṃ vasena sādharmaṇāti.
Paṭhamassāti aṭṭhamakassa. **Dutiyassāti** sotāpannaṃ. Puna **aṭṭhamakassāti** “aṭṭhamakassa, anāgāmiṃsā cā”ti ettha vuttaaṭṭhamakassa. Tenāha “**anāgāmiṃmaggaṭṭhassā**”ti. Aggaphalaṭṭhato paṭṭhāya paṭilomato gaṇiyamāno paṭhamamaggaṭṭho **aṭṭhamako**, maggaṭṭhatāya, pahīyamānakilesatāya ca sabbehi maggaṭṭhā aṭṭhamakā viyāti **aṭṭhamakā**, “ekacittakkhaṇato uddham na tiṭṭhatī **aṭṭhamako**”ti apare niruttinayena. “Sekkhā”ti nāmaṃ sādharmaṇanti sambandho. **Itaresūti** “bhābhābhābhā”ti vuttasu anariyesu. Tenāha pāliyaṃ “**hīnukkaṭṭhamajjhimaṃ upādāyā**”ti.

Niyāmāvakkantiyāti avakkantaniyāmatāya. **Ñānuttarassāti** ñānādhikassa.
Tathāvidhapaccayasamāyogeti ñānavisesapaccayasamavāye. Yathā hi ñānabalena dandhābhiññatā na hoti, evaṃ paṭipadāpaṭipannopi sukkena visosiyatīti. Sā hi sukhāpaṭipadā khippābhiññā taṃsamaṅgino ñānuttarattā vipassanāya padaṭṭhānanti vuttā.

Dhammato anapetā cintā **dhammacintā**, yonisomanasikārena pavattitattā dhammesu cintā, **dhammo** vā ñānaṃ, tasmā dhammāvahā cintā **dhammacintā**, cintāmayāñānaṃsa hetubhūtā cintāti attho.

Pāliyaṃ sutamayapaññāggahaṇena “ye te dhammā ādikalyāṇā...pe... tathārūpāssa dhammā bahussutā hontī”tiādi (a. ni. 8.2) suttapadasaṅgaho attho pariggahito, tathā yonisomanasikāraggaṇaṇena “so ‘anicca’nti yoniso manasi karotī”tiādinā vutto upāyamanasikāro pariggahito. Sammādiṭṭhiggaṇaṇena “sammādiṭṭhiṃ bhāveti vivekanissita”ntiādinā vuttā sammādiṭṭhi pariggahitāti dassento āha “**atha kho...pe... dassetu**”nti. **Sesanti** “dhammasvākkhātā”ti evamādi.

Yassa ca pubbe attho na saṃvaṇṇito, tattha kalyāṇamittatāya āyatanagato pasādo, cittavūpasamo ca phalanti dassento “**sappurisa...pe... padaṭṭhāna**”nti āha. **Attasammāpaṇihitattā pāpajegucchinibbidibahulova hotīti dassento āha** “attha...pe... padaṭṭhāna”nti. Dhammo svākkhāto ādito paṭṭhāya yāva pariyoṣānā sabbasampattipāripūrihetūti dassento “**dhammasvākkhātā...pe... padaṭṭhāna**”nti āha. Kusalamūlaropanā hi samāpattipariyoṣānāti. **Saṅghasutṭhūtāya** saṅghassa sutṭhubhāvāya saṅghassa sappatissatāya “sutṭhu, bhante”ti vacanasamapaṭicchanabhāvāya. Itaraṃ suviññeyyameva.

Vibhattihāravibhaṅgavaṇṇanā niṭṭhitā.

9. Parivattanahāravibhaṅgavaṇṇanā

35. Sammādiṭṭhissa...pe... nijjiṇṇā bhavātīti ettha yathā maggasammādiṭṭhivasenattho vutto, evaṃ kammassakatākammaṃ pathasammādiṭṭhīnampi vasena attho labbhateva. Kammaṃ pathakathā hesā. **Yathāvuttanākārenāti** “avimuttāva samānā”ti, “avimuttiya”nti ca vuttapakārena. **Micchābhīnivesavasenāti** asammāsambuddhaṃ eva sammāsambuddhoti, aniyyānikaṃ eva niyyānikoti, asantaṃ eva pana santanti, anariyaṃ eva ariyoti viparītābhīnivesavasena. **Micchādhimokkhoti** ayāthāvapasādo, ayāthāvasanniṭṭhānaṃ vā. Uppannamoho micchāvimuttiñānadassananti sambandho.

36. Vādānaṃ vā anuvādā vādānuvādā, tesam vādānaṃ upādāti attho. **Vādānupavattiyoti** vādānaṃ dosānaṃ anupavattiyoti.

Antadvayaparivattananti kāmasukhaattakilamathānuyogasaṅkhātassa antadvayassa paṭipakkhavasena parivattanaṃ.

Etesupi vāresūti “niyyāniko dhammo tesam adhammo, sukho tesam adhammo”ti ca imesu vāresu. **Vuttanayenāti** yadi attaparitāpanaṃ attano dukkhāpanaṃ dhammo, dhammassa paṭiviruddho adhammo siyā, dukkhassa ca sukhapaṭiviruddhanti jhānamaggaphalasukhassa, anavajjapaccayaparibhogasukhassa ca tesam adhammabhāvo āpajjatīti evaṃ vattabbā. “**Yaṃ yaṃ vā**

panātiādīnā’ti idaṃ avasesapāṭhāmasanaṃ. Ettha **yaṃ yaṃ vā pana dhammanti** yaṃ vā taṃ vā dhammaṃ, kusalaṃ vā akusalaṃ vā iṭṭhaṃ vā anīṭṭhaṃ vāti vuttaṃ hoti. **Rocayati vā upagacchati vā**ti cittena rocati, diṭṭhiyā upagacchatīti. **Tassa tassa dhammassa yo paṭipakkhoti** tassa tassa rucitassa, upagatassa vā dhammassa yo paṭipakkho nāma. **Svassa anīṭṭhato ajjhāpanno bhavatīti** yo dhammo assa rucitassa, upagatassa vā dhammassa anīṭṭhato paccanīkato abbhupagato hoti, tena paṭipakkhena desanāya parivattanaṃ parivattano hāroti attho. Tenāha **“paṭipakkhassa lakkhaṇaṃ vibhāvetī”**ti.

Parivattanaḥāravibhaṅgavaṇṇanā niṭṭhitā.

10. Vevacanaḥāravibhaṅgavaṇṇanā

37. Aññamaññehīti aññehi aññehi. **Āyatinti** paccavekkhaṇakāle. **Kathañcīti** yena kenaci pakārena, paṭhamaṃ vuttana pariyāyena appaṭivijjhanto aparena pariyāyena paṭivijjheyāti adhippāyo. Pariyāyavacanaṃ niddisatīti sambandho. Evaṃ sabbattha. **Tasmim̐ khaṇeti** pariyāyavacanaṃ vuttakkhaṇe. **Vikkhittacittānanti** ārammaṇantarehi vividhakkhittacittānaṃ. **Aññavihitānanti** aññaṃ cintentānaṃ. Kasmā pana aññena pariyāyena tadatthāvabodhanaṃ, nanu tena vutte dalhīkaraṇaṃ hotīti codanaṃ sandhāyāha **“tenevā”**tiādi. Tattha **tadaññesanti** tehi vikkhittacittādīhi aññesaṃ, yehi paṭhamaṃ vacanaṃ sammadeva gahitaṃ. **Tatthāti** vuttavacanaṃ punappunaṃ vacane. Adhigataanvatthāyā punarutti **parivajjanatthaṃ** visesaṇabhāvena **tāhi tāhi saññāhi**pi ayampi saddo imassatthassa vācako, ayampi saddo imassatthassa vācakoti paññāpanehi. Desetabbassa tassa tassa atthassa attano cīte **upanibandhanaṃ** ṭhapanānaṃ. **Tatthāti** dhammaniruttipaṭisambhidāyaṃ. **Bījāvāpanaṃ** hetusampādanaṃ.

Evaṃ bhagavato pariyāyadesanāyaṃ anekāni payoṇāni vatvā idāni attano sammāsambuddhatāya evaṃ tathāgatā buddhalīlaya anekehi pariyāyehi dhammaṃ desentīti dassento **“kiṃ bahunā”**tiādīmāha.

Pāliyaṃ **“pihā nāma yā vattamānassa atthassa patthanā”**ti paccuppannavisayataṃ dassetvā puna anāgatavisayataṃ dassetuṃ **“seyyataraṃ vā”**tiādi vuttanti **“anāgatapaccuppannatthavisayā taṇhā pihā”**ti āha.

Atthanipphattipaṭipālanāti imasmiṃ vā pade pihāya evatthavasena anāgatapaccuppannatthavisayabhāvadīpanato.

Dhammārammaṇeneva saṅgahitā “dhammārammaṇa”ntveva gahaṇaṃ gatā. **Catuvīsati padānāti** ettha gehasitadomanassūpavicārādīnaṃ catunnaṃ chakkānaṃ vasena catuvīsa koṭṭhāsā.

38. Sāyeva patthanākārena dhammanandītiādīmāhāti ettha ayamatto – sā eva patthanākārena pavattiyā āsādīpariyāyena vuttā taṇhā rūpādīdhammesu nandanaṭṭhena **dhammanandī**. Tesam̐ eva piyāyanaṭṭhena **dhammapemaṃ**. Gilitvā pariniṭṭhapetvā ṭhānato **dhammajjhosaṇanti**.

Imināpīti na kevalaṃ “paññā pajānaṃ”tiādiāveṇīkariyāyeneva vevacanaṃ vattabbaṃ, atha kho iminā ādhipateyyādisādhāraṇapariyāyenaṃ vevacanaṃ vattabanti attho. **Imināya nāyenti** etena pariyāyavacanaṃ. Na hi desanattasādhanāṃ “itipi so bhagavā”tiādīpālinayadassananti dasseti. **Balanipphattigato**tiādīsū dasasu tathāgatābalesu nipphattiṃ pāripūriṃ gato. Sambodhipahānantarāyadesanā visesaṇcodanāsu visāradabhāvasaṅkhātāni cattāri ṇāṇāni patto adhigatoti **vesārajjappatto**.

Lobhajjhāsayaṃ ādījjhāsayaṃ visesena ativattoti **ajjhāsayaṃ ativatto**. Atītatthasāṅkhepādisāṅkhepavirahitāyā **asaṅkhepasaṅkhātānaṃ** nibbānaṃ, akuppadhammatāya guṇehi vā asaṅkhepaṃ asaṅkheyyaṃ gato upagatoti **asaṅkhepagato**. Sesam̐ suviññeyyameva. **Uddheyyanti**

uddharitabbam.

Dhammānussatiyaṃ evaṃ attho daṭṭhabboti sambandho. Saṃsāradukkhato pāti, santena sukkena rameti cāti vā **pāraṃ**.

Abhūtapubbattāti anuppannapubbattā, tenassa niccatamva vibhāveti kenaci devatopasaggādinā anupasaṃjanīyattā anupasaṭṭhattā.

“**Duppassa**”ntipi pāli, duradhigamanti attho. **Guṇasobhāsura**bhibhāvenāti guṇehi sobhāya, sugandhibhāvena ca.

Yathā akkhaṇavedhī puggalo sippanipphattiyā rattandhakāratimisāya acirakkhaṇālokena atisukhumampi dūragataṃ lakkhaṃ vijjhati, evaṃ ariyasāvako sīlasampattiyā atisukhumaṃ nibbānaṃ catusaccadhammaṃ ekapaṭivedheneva paṭivijjhatīti āha “**sippanca sīlaṃ akkhaṇavedhitāyā**”ti. **Lokikanti** nidassanamattaṃ daṭṭhabbaṃ lokuttaradhammaolokanassāpi adhiṭṭhānabhāvato.

Vevacanaḥāravibhaṅgavaṇṇanā niṭṭhitā.

11. Paññattihāravibhaṅgavaṇṇanā

39. Bhagavato sābhāvikadhammakathāyāti attano bhāvo **sabhāvo**, sabhāvena nibbattā, tato vā āgatāti **sābhāvikā**, sā eva dhammakathāti **sābhāvikadhammakathā**, buddhānaṃ sāmukkaṃsikadhammakathāti attho, tāya karaṇabhūtāya dhammaḍḍesaṇāya anaññatṭepi kathādesanānaṃ upacārasiddhena bhedenevaṃ vuttaṃ, avayavasamudāyavibhāgena vā. Tenāha “**kā ca pakatikathāya desanā? Cattāri saccāni**”ti. Idañhi atthassa desanāya abhedopacāraṃ katvā vuttaṃ. **Tassā** desanāya paññāpanā. **Ayaṃ paññattihāro**ti saṅkhepeneva paññattihārasa sarūpamāha. **Sāti** yathāvuttadesanā. **Tathā tathāti** yathā yathā saccāni desetabbāni, tathā tathā. Kathañcetāni desetabbāni? Pariññeyyādippakārena. **Yathādhīppetanti** adhippetānurūpaṃ, bodhaneyyabandhavānaṃ bodhanādhīppāyānukūlanti attho. **Atthanti** desetabbattaṃ, dukkhādiatthameva vā. **Nikkhipatīti** patiṭṭhāpeti. Yato “cattāro suttanikkhepā”tiādi (ma. ni. aṭṭha. 1.mūlapariyāyasuttavaṇṇanā) **aṭṭhakathāsu** vuccati.

Tatthāti nikkhepadesanāyanti attho. **Maggapakkiyāti** dukkhasaccato bahikatāti adhippāyo.

Yasmiṃ ṭhāneti yasmiṃ bhavādisaṅkhāte ṭhāne. **Yathāvuttā desanāti** caturāhārapaṭibaddhārāgādimukhena vaṭṭadīpanī vuttapakārā desanā.

41. Teparivaṭṭavasenāti etthāpi “saccesu”ti yojetabbam. Pariññāpaññattīti āhāti sambandho. **Ajjhattarato, samāhitoti** padadvayena samādhānavisiṭṭhaṃ ajjhattaratatābhāvanaṃ dīpeti gocarajjhattatādīpanato. Kevalo hi ajjhattasaddo ajjhattajjhattagocarajjhattesupi vattati. Ajjhattaratatāvisiṭṭhaṃca samādhānaṃ sātisaṃyamaṃ cittaṭṭhitim dīpetīti imamatthaṃ dasseti “**samādhānavisiṭṭhassā**”tiādinā.

Āsajjanaṭṭhenāti āsaṅganaṭṭhena. **Tathā dassananti** atathābhūtassāpi bhābarūpassa viya attano vidāṃsanaṃ. **Alakkhikoti** vilakkhiko.

Kāmānanti kāmāvacaradhammānaṃ. **Rūpānanti** rūpāvacaradhammānaṃ. **Nissaraṇanti** kāmānaṃ rūpāvacaradhammā nissaraṇaṃ, tesam arūpāvacaradhammā nissaraṇaṃ. **Evaṃ taṃsabhāvānanti** sauttarasabhāvānaṃ. **Tathāti** yathā saṅkhatadhammānaṃ nissaraṇabhāvato, kilesasamucchedakassa ariyamaggassa ārammaṇabhāvato ca attheva asaṅkhatā dhātu, tathā vuccamānenāpi kāraṇena attheva

asañkhatā dhātūti dasseti. **Katthaci visayeti** asañkhatadhātum sandhāya vadati. **Aviparītatthoti** bhūtattho. “Yato kho bho ayaṃ attā pañcahi kāmagaṇehi samappito samañgībhūto paricāreti, ettāvata kho bho ayaṃ attā paramadiṭṭhadhammanibbānappatto hoti (dī. ni. 1.94), sapakaṭṭhanibbānabhāvino” ti ca evamādīsu upacāravuttisabbhāvato. **Yathā taṃ sīhasaddoti** yathā “sīho māṇavako” tiādīnā māṇavakādīsu upacāravuttinā vattamāno migarāje bhūtatthavisaye diṭṭho, evaṃ nibbānasaddopi kāmagaṇarūpajjhānasamañgītāsu upacāravuttīyā vattamāno katthaci visaye aviparītattho. Yattha ca visaye aviparītattho, sā asañkhatā dhātu. Hatthatale saāmalakaṃ viya ñeyyaṃ paccakkhato passantassa ekappamāṇassa satthuvacanamevettha pamāṇanti dassento “**kiṃ vā etāya yutticintāyā**” tiādīmāha. “**Paṇṇānāssa atthassa siddhiyā pakāsanāpaññattī**” ti nigamaṃ sandhāyāhāti.

Paññattihāravibhaṅgavaṇṇanā niṭṭhitā.

12. Otaraṇahāravibhaṅgavaṇṇanā

42. Indriyehīti karaṇe karaṇavacanamaṃ “maggena gacchatī” tiādīsu viya, “pharasunā chindatī” ti evamādīsu viya ca. **Otaraṇāti** anuppavesanā.

Paññākkhandhe saṅgaṇhanavasena sammāsañkappo viyāti yojanā. Adhicittaanuyuttānaṃ saddahanussahanupaṭṭhānasamādahanehi saddhādīsu upakarontesu eva paññā dassanakiccaṃ sādhetīti dassento “**saddhā...pe...vuttānī**” ti āha. **No ca bhavaṅgāti** tesamañ sañkhārānaṃ pavattikāraṇatābhāvaṃ dasseti.

43. Tathā vuttoti “nissayo” ti vutto. **Cetanāsīsena taṇhaṃ eva vadati** cetanāsahacaraṇato.

Rattassāti maggena asamucchinnarāgassa. Yena puggalo “ratto” ti vuccati, tassa rāgassa sambandhinī sukhā vedanā vuttā tattha tassa anusayanato. Tenāha “**sukhāya...pe...vutta**” nti. Esa nayo sesesupi. Tenāha “**tathā**” tiādi.

Tāni eva indriyānīti sukhasomanassupekkhindriyāni. “Sañkhārapariyāpannānī” ti vacanaṃ sandhāyāha “**idha vedanāsīsena cetanā vuttā**” ti. Na hi vedanā sañkhārakkhandhapariyāpannā hoti. **Taṇhāya, diṭṭhiyāti** ca upayoge karaṇavacananti dassento “**taṇhāyā**” tiādīmāha. Idāni upayogavaseneva “taṇhāyā” tiādīnaṃ atthaṃ dassetuṃ “**yathā vā**” tiādīmāha. Tattha **sesadhammānanti** taṇhāvajjitaavisiṭṭhadhammānaṃ. **Taṇhāya nissayabhāveti** yadā taṇhā tesamañ nissayo hoti.

Taṇhāya sesadhammānaṃ paccayabhāveti yadā sesadhammā taṇhāpaccayā honti. “**Karajakāyasannissitā**” ti iminā vedanādikkhandhattayanissitāpi gahitā kāyappassaddhibhāvato. **Kāraṇabhāvanti** paramparahetubhāvaṃ. **Taṇhādiṭṭhiupayenāti** diṭṭhiupayena ca diṭṭhisahagatatāṇhāupayena ca.

“**Āgatīti idhāgati, gatīti peccabhavo**” ti padadvayena vuttamevatthaṃ pākaṭataraṃ kātum pāliyaṃ “**āgatigatīpi na bhavanti**” ti vuttaṃ. Idha **huranti dvārārammaṇadhammā dassitā** āsannadūrabhāvehi dvārārammaṇehi vinivattetvā gahitattā. Idha **dvārappavattadhammā** “ubhayamantarenā” ti padassa atthabhāvena vuttā. Catubyūhahāre pana anindriyabaddharūpadhammā tathā vuttā. **Kāraṇabhūtena** anantarapaccayabhūtena, upanissayapaccayabhūtena ca. Ye dhammā upādāya “attā” ti samaññā, **tesamañ viññānādidhammānaṃ** abhāvena anuppādadhammataṃ āpāditattāti attho. “**Anissitassa calitaṃ natthī**” tiādīnā paṭilomato paccayabhāvo dassitoti dassento pāliyaṃ “**esevanto dukkhassāti paṭiccasamuppādo**” ti vatvā nanu “avijjāpaccayā sañkhārā” tiādiko paṭiccasamuppādoti codanaṃ sandhāya yathāvuttassa paṭiccasamuppādabhāvaṃ dassetuṃ “**so duvidho**” tiādīnā lokiyalokuttaravasena paṭiccasamuppādo vibhatto. **Tadatthatāyāti** vītarāgavimuttiatthatāya. **Tabbhāvanti** lokuttarapaṭiccasamuppādabhāvaṃ.

Otaraṇahāravibhaṅgavaṇṇanā niṭṭhitā.

13. Sodhanahāravibhaṅgavaṇṇanā

45. **Sodheti nāmā**ti pucchitamatthaṃ hatthatale ṭhapitaāmalakaṃ viya paccakkhato dassento niggumbaṃ nijjaṭaṃ katvā vivaranto tabbisayaaññāṇasaṃsayādimalāpanayanena sodheti, evaṃ sodhento ca padassa atthena abhedopacāraṃ katvā “padaṃ sodheti” cceva vuccati. Tenāha “**padaṃ sodheti nāmā**”ti. Pucchāya vissajjanamevettha sodhananti āha “**tadatthassa vissajjanato**”ti. Ārabhīyatīti **ārambho**, desanāya pakāsiyamāno attho. Tenāha “**na tāva...pe... pabodhitattā**”ti. Idha sodhanaṃ nāma paṭicchannarūpassa atthassa desanānubhāvena vivaṭabhāvakaraṇanti tamatthaṃ upamaṃya vibhāvetuṃ “**aññāṇapakkhanda**”ntiādi vuttaṃ.

Sodhanahāravibhaṅgavaṇṇanā niṭṭhitā.

14. Adhiṭṭhānahāravibhaṅgavaṇṇanā

46. **Dhārayitabbā**ti upadhāretabbā, upalakkhitabbāti attho. **Vuttameva** “sāmaññavisesakappanāya vohārabhāvena anavaṭṭhānato”tiādinā (netti. aṭṭha. 14).

Taṃ taṃ phalanti nirayādiṃ taṃ taṃ phalaṃ. **Añcitā**ti gatā. **Yonī**ti ekajāti. Samānavasena missībhavati etāyāti hi **yonī**, upapatti. **Peccā**ti maritvā. **Ussannatāyāti** vitakkabahulatāya. “Ussannattā”tipi vadanti. Sassatādīhi vā ussannattā. Asurajātiyā nibbattāpanako **asurajātinibbattanako**.

Saṅkhāti paññā. Paññāpadhānā ca bhāvanāti āha “**paṭisaṅkhāya paṭipakkkhabhāvanāyā**”ti.

47. Patthaṭabhāvena **pathavī**. Sabhāvadhāraṇaṭṭhena, nissattanijjīvaṭṭhena ca **dhātu**. Āpīyati, appāyatīti vā **āpo**. Tejanavasena tikkhatāvasena, dhanavasena vā **tejo**. Vāyanavasena vegagamanavasena, samudīraṇavasena vā **vāyo**. **Vīsati ākārāti** kesādayo vīsati koṭṭhāsā, pakārā vā. Kakkhaḷalakkhaṇādhikatāya kesādī kakkhaḷalakkhaṇā vuttā.

Pāṭiyekko pathavīdhātukoṭṭhāsoti pathavīkoṭṭhāsamatto, attasuññadhammamattoti attho. **Santappatī**ti ettha sarīrapakatimatikkamitvā uṇhabhāvo santāpo, sarīradahanavasena pavatto mahādāho, ayametesam viseso. **Yena ca jīriyatīti** ekāhikādijarārogena jarīyatīti ca attho yujjati. “Satavāraṃ tāpetvā tāpetvā udake pakkhipitvā uddhaṭasappi satadhotasappī”ti vadanti. Rasarudhiramaṃsamedanhāruaṭṭhiatṭhimiñjā **rasādayo**. Keci nhāruṃ apanetvā sukkaṃ sattamaṃ dhātuṃ vadanti. **Vivekanti** visumbhāvaṃ, visadisabhāvanti attho. Vatthusāṅkhāto hi āhāro pariṇāmaṃ gacchanto pāṇabhakkhagahaṇipadaniya muttakarīsabhāvehi viya attanāpi visadisarasasaṅkhātaṃ visumbhāvaṃ nibbattento tabbhāvaṃ gacchatīti vuccati, tathā rasādayopi rudhirādikoṭṭhāsaṃ. Tenāha “**rasādibhāvena vivekaṃ gacchatī**”ti.

Sabhāvalakkhaṇatoti asucibhāvena lakkhitabbato.

48. **Yāthāvasarasalakkhaṇanti** rasiṭṭhoti **raso**, paṭivijjhitabbo sabhāvo, attano raso **saraso**, yāthāvo saraso, **yāthāvasaraso** yāthāvasaraso eva lakkhitabbattā lakkhaṇanti **yāthāvasarasalakkhaṇaṃ**. Atha vā **yāthāvasarasalakkhaṇanti** aviparītaṃ attano pavattisaṅkhātaṃ kiccañceva pīḷanasāṅkhātaṃ lakkhaṇaṇca. “Idaṃ kiccaṃ, idaṃ lakkhaṇa”nti avijjāhetu nītuṃ na sakkoti, tabbisayaññānuppattiṃ nivārentī chādetvā pariyonandhitvā tiṭṭhatīti vuttā. Tena vuttaṃ “**jānitum paṭivijjhitum na detī**”ti. Tayidamassā kiccanti **kiccato kathitā**. **Kathitā**ti ca vuttā, yato ca avijjā asampaṭivedharasāti vuccati. Jāyati etthāti **jāti**, uppattiṭṭhānaṃ. Yadi pi nirodhamagge avijjā

ārammaṇaṃ na karoti, te pana jānitukāmassa tappaticchādanavasena anirodhamaggesu nirodhamagaggahaṇassa kāraṇabhāvena pavattamānā tattha uppajjatīti vuccati, tesampi avijjāya uppattiṭṭhānatā hoti, itaresaṃ ārammaṇabhāvena cāti.

Atthānatthanti hitāhitam. **Sammohavinodaniyaṃ** pana “**atthattha**”nti (vibha. aṭṭha. 226) vuttam, tattha attho eva **atthatthoti** atthassa aviparītātādassanattam dutiyena atthasaddena visesaṇam. Na hi ñāṇam anatthe “attho”ti gaṇhātīti. **Kāraṇākāraṇanti** etthāpi evaṃ daṭṭhabbam. **Atthatthanti** vā āmeḍitavacaṇam sabbesaṃ atthānaṃ pākāṭakaraṇabhāvappakāsanattam, phalaṃ phalanti attho, hitapariyāyepi eseva nayo. Nti atthānatthādikaṃ. **Ākāranti** atthādikāraṇameva.

Paṭividdhassa puna avekkhanā **paccavekkhaṇā**. Ducintitacintitādilakkhaṇassa bālassa bhāvo **bālyaṃ. Sampajānātīti** samaṃ pakārehi jānāti. Balavamoho **pamoho**. Samantato mohanaṃ **sammoho**. Duggatigāmikammassa visesapaccayattā **avindiyaṃ. Vindatīti** labhati. Anavajjadhammānaṃ vijjā viya visesapaccayo na hotīti **vindiyaṃ na vindati. Ayaṃ avijjāya vemattatāti** ayaṃ “dukkhe aññāṇa”ntiādinā kiccajātilakkhaṇehi vutto avijjāya aviseso. **Vijjātiādināṃ** vuttanayānasārena attho veditabbo.

Pāsāṇasakkharavālikāviraḥitā bhūmi saṇhāti “**saṇhatṭhenā**”ti vuttam.

Tattakameva kālanti pañcakappasatāni. Vibhūtam samattikkantaṃ rūpasaññāsāṅkhātāṃ rūpaṃ etāyāti **vibhūtarūpaṃ**, samāpattinti padattho. Na hi kāci arūpasamāpatti rūpasaññāsahagatā pavattīti. Nirodhasamāpattiyaṃ vattabbameva natthi, tattha nevasaññānāsāññāyatanaṃ samāpattiyā viṣuṃ gahitattā vuttam “**sesārūpasamāpattiyō**”ti.

Damatham anupagacchanto duṭṭhasso **khaluṅkasso. Uttaridamathāyāti** ariyamaggadamathāya.

Itaroti dukkhāpaṭipado khippābhiñño, sukhāpaṭipado ca khippābhiñño. **Ubhayatobhāgehīti** rūpakāyanāmakāyabhāgehi. **Ubhayatoti** vikkhambhanasamucchedavimuttivasena.

Anekopīti sabhāvena anekopi. **Ekasaddābhidheyyatāyāti** sāmāññasaddābhidheyyatāya.

Adhiṭṭhānahāravibhaṅgavaṇṇanā niṭṭhitā.

15. Parikkhārahāravibhaṅgavaṇṇanā

49. “**Hinotī**”ti padassa attham dassento “**kāraṇabhāvaṃ gacchatī**”ti āha anekatthattā dhātūnaṃ. **Etīti** āgacchati, uppajjatīti attho.

Avijjāyapi hetubhāveti ettha avijjā anantarāya avijjāya anantarasamanantarūpanissayanatthivigatāsevanapaccayehi, anantarāya pana saha-jātāya saha-jātaaññamaññanissayasampayuttaatthiavigatahetupaccayehi, asaha-jātāya upanissayakoṭiyā eva paccayo hotīti veditabbam. Attano phalaṃ karotīti **kāraṇanti** āha “**kāraṇabhāvo ca phalāpekkhāyā**”ti.

Nibbattiattho phalattho phalasaṅkhāto attho.

Yo sabhāvoti puññādiabhisāṅkhārānaṃ yo abhisāṅkharaṇasabhāvo, so hetu. **Sesapadesūti** viññāṇādipadesu. **Yathāvuttappabhedoti** “asādhāraṇalakkhaṇo hetū”tiādinā vuttappabhedo. **Yo koci paccayoti** janakādibhedam yaṃ kiñci kāraṇam. **Abhisāṅkharaṇatoti** paccakkhato, paramparāya ca nibbattanato.

Parikkhārahāravibhaṅgavaṇṇanā niṭṭhitā.

16. Samāropanahāravibhaṅgavaṇṇanā

50. Suttēna gahitēti suttē vutte. Padaṭṭhānaggahaṇaṃ adhiṭṭhānavisayadassanattamaṃ, vevacanaggahaṇaṃ adhivacanavibhāgadassanattahanti yojanā. **Visayādhiṭṭhānabhāvato**ti visayasaṅkhātapavattiṭṭhānabhāvato. **Vanīyatīti** bhajīyati. **Vanatīti** bhajati sevati. **Vanutēti** yācati, patthetīti attho. **Pañca kāmagaṇā kāmataṇhāya kāraṇaṃ hoti** ārammaṇapaccayatāya. **Nimittaggāho anubyañjanaggāhassa** kāraṇaṃ hoti upanissayatāyāti evaṃ sesesupi yathārahaṃ kāraṇatā vattabbā.

51. “Kāye kāyānupassī viharāhī”tiādīsu yaṃ vattabbaṃ, taṃ heṭṭhā **lakkaṇahāravibhaṅgavaṇṇanāyaṃ** (netti. aṭṭha. 23) vuttanayeneva veditabbaṃ. Ayaṃ pana viṣeso – **rūpadhammapariññāyāti** rūpūpikaviññāṇaṭṭhitipariññāya.

“Dukkha”nti passantī sā vedanānupassanāti yojetabbaṃ. **Vedanāhetupariññāyāti** phassaṇapariññāya. **“Vedanāvasenā”**ti padena attanā uppāditadukkhasena. **Vedanāpariññāyāti** vedanūpikaviññāṇaṭṭhitipariññāya. **Niccābhīnivesapaṭipakkhato** aniccānupassanāyāti adhippāyo. **Niccasaññānimittassāti** niccasaññāhetukassa. **Saññāpariññāyāti** saññūpikaviññāṇaṭṭhitipariññāya. Paṭṭhamamaggavajjhataṃ agatigamanassa vuttaṃ **“diṭṭhābhīnivesassa...pe... agatigamanassa cā”**ti.

Saṅkhārapariññāyāti saṅkhārūpikaviññāṇaṭṭhitipariññāya.

Samāropanahāravibhaṅgavaṇṇanā niṭṭhitā.

Niṭṭhitā ca hāravibhaṅgavaṇṇanā.

1. Desanāhārasampātavaṇṇanā

“Eva”ntiādi hārasampātadesanāya sambandhadassanaṃ. Tattha purimena upamādvayena suparikammakatamaṇikoṭṭimasadisī, suviracitajambunadābharaṇasadisī ca pāḷi. Tattha katanānāvaṇṇapupphūpahārasadisī, vividharaṃsijālāsamujjalabaddhanānāratanaḷasadisī ca hāravibhaṅgadesanāti dasseti. Pacchimena tassa paṇītamahārahe jaṭāhi saddhiṃ dukkaratarataṃ dīpeti. Yāyaṃ gāthā vuttāti yojanā.

52. Yasmāyaṃ hāravibhaṅgavāro nappayojeti yathāvuttēna kāraṇēna, tasmā sā hāravibhaṅgavārassa ādimhi na paccāmaṭṭhāti adhippāyo. **Hārasampātavāro pana taṃ payojētīti** yasmā pana hārasampātavāro taṃ gāthaṃ payojeti yathāvuttēneva kāraṇēna, tasmā **“soḷasa...pe... āhā”**ti āha. **Yojanānāyadassananti** yojanāya nayadassanaṃ.

Tenāti “taṃ maccuno pada”nti vacanēna. **Sabbaṃ vipallāsanti** dvādasavidhampi vipallāsaṃ. **Sāmaññassa...pe... voharīyati** yattha paṭiṭṭhitamaṃ sāmaññaṃ, so viṣeso. Atthato pana saññādayo eva rūpādivisayaṃ viparītākāreṇa gaṇhante vipallāsoti dassento **“saññāvipallāso”**tiādimāha.

Indajāḷādivasēna maṇiādiākāreṇa upaṭṭhahante upādānakkhandhapañcake ahaṃmamādikāraṇatāya niruttinayēna “attā”ti vuccamāno taṃbuddhivohārappavattinimittatāya attabhāvo sukhādīnaṃ vatthutāya **“attabhāvavattū”**ti pavuccatīti āha **“tehi”**tiādi. **Tesanti** upādānakkhandhānaṃ. **Vipallāsānaṃ pavattiākāro** “asubhe subha”ntiādi. **Visayo** kāyavedanācittadhammā. **Avijjā ca...pe... eva** sammohapubbakattā sabbavipallāsānaṃ. **Ca**-saddo **subhasukhasaññānanti** etthāpi ānetvā yojetabbo.

Tatthāyaṃ yojanā – “avijjā ca subhasukhasaññānaṃ paccayo eva, na taṇhā eva, avijjā subhasukhasaññānaṃ paccayo, na niccaattasaññānaṃ evā”ti. Evaṃ santepe purimānaṃ dvinnāṃ viparītasaññānaṃ taṇhā, pacchimānaṃ avijjā visesapaccayoti dassento āha “**tathāpi**”tiādi. Avijjāsīsenā cettha diṭṭhiyā gahaṇaṃ veditabbaṃ. Tenāha “**diṭṭhinivutaṃ citta**”nti, “**yo diṭṭhivipallāso**”ti ca ādi, yathā ca avijjāsīsenā diṭṭhiyā gahaṇaṃ, evaṃ diṭṭhisīsenā avijjāyapi gahaṇaṃ siyāti āha “**diṭṭhisīsenā avijjā vuttā**”ti. Taṇhāvijjāsu subhasukhasaññānaṃ yathā taṇhā visesapaccayo, na evaṃ avijjā. Niccaattasaññānaṃ pana yathā avijjā visesapaccayo, na tathā taṇhāti dassento “**moho visesapaccayo**”ti āha.

Pacchimānaṃ dvinnāṃ...pe... hotīti atītaṃse taṇhābhīnivesassa balavabhāvābhāvato. Teneva hi “so atītaṃ rūpaṃ attato samanupassati”cceva vuttaṃ, na “abhinandati”ti. **Taṇhāvīpallāsoti** taṇhaṃ upanissāya pavatto vipallāso, na hi taṇhā sayāṃ vipallāso. Tenāha “**taṇhāmūlako vipallāso**”ti. **Diṭṭhābhīnandanavasenā**ti taṇhupanissayadiṭṭhābhīnandanavasena, yato so “taṇhāvīpallāso”ti vutto. **Etenāti** “yo taṇhāvīpallāso”tiādi pāṭhena. Soḷasa saññīvādā, aṭṭha asaññīvādā, aṭṭha nevasaññīnāsāññīvādā, pañca paramadiṭṭhadhammanibbānavādā ca, yathā attano gatāya, nibbānappattiyā ca parikappavasena subhasukhākāraggāhino, na evaṃ satta ucchedavādāti āha “**yebhuyyenā**”ti. **Paṭipakkhavasena**pīti visuddhivasenapi. Yāva hi upakkilesā, tāva cittaṃ na visujjhateva. Yadā ca te pahīnā, tadā visuddhameva. Tenāha “**na hī**”tiādi. “Arakkhitena cittaṇa”ti pāḷiṃ nikkhipitvā vipallāsamukheneva desanāya niddhāriyamānattā vuttaṃ “**yathānusandhināva gāthaṃ niṭṭhapetu**”nti.

Mārassāti kilesamārassa. Tassa hi vase ṭhito sesamārānaṃ hatthagato evāti. Tenāha “**kilesamārāggahaṇenevā**”tiādi.

Mārābandhananti sattamārapakkhe mārassa bandhananti **mārābandhanaṃ**. So hi kilesābandhanabhūte attano samāraparise maññati. Tena vuttaṃ “antali...pe... mokkhasī”ti (mahāva. 33). Itaramārapakkhe mārova bandhananti **mārābandhanaṃ**. **Visaṅkhāro** nibbānaṃ.

Mohasampayogato cittaṃ “mūḷha”nti vuttanti rattaduṭṭhānampi mūḷhatāya sabbhāve “mūḷha”nti viṣuṃ vacanaṃ āveṇīkamohavasena vuttanti dassento “**dvinnāṃ momūhacittuppādānaṃ vasenā**”ti āha. **Evanti** evaṃ rāgādiakusalappattiyā kusalaḥhaṇḍacchedanato arakkhitāṃ cittaṃ hoti, sabbopi micchābhīniveso ettheva saṅgahaṃ samosaraṇaṃ gacchatīti āha “**micchādiṭṭhi ...pe... veditabba**”nti. **Sabbepīti** “arakkhitāṃ, micchādiṭṭhihatāṃ, thinamidhābhībhūta”nti tīhipi padehi vuttadhammā.

Cakkhunāti dvārena. **Rūpanti** visabhāgavatthusannissitaṃ rūpāyatanaṃ. **Nimittaggāhīti** “itthī”ti vā puriso”ti vā “subha”nti vā “asubha”nti vā parikappitanimittaṃ gaṇhāti, tassa vā gahaṇasīlo. **Anubyañjanaggāhīti** hatthapādahasitakathitādiṭṭhābhīnandanavasena anu anu byañjanato anubyañjanasāññite ākāre gaṇhāti, tesāṃ vā gahaṇasīlo. **Yatvādhikaraṇanti** yaṃ nimittaṃ, nimittānubyañjanaggahaṇanimittanti attho. Evaṃ “cakkhundriyaṃ asaṃvutaṃ viharanta”nti, yo “nimittaggāhī, anubyañjanaggāhī”ti ca vutto puggalo, tamenāṃ **cakkhundriyaṃ** cakkhudvāraṃ **asaṃvutaṃ** satikavāṭena apihitaṃ katvā vattantaṃ, tassa ca rūpassa iṭṭhākāraggahaṇe **abhijjhā**, aniṭṭhākāraggahaṇe **domanassaṃ**, asamapekkhane **moho** micchābhīnivese **micchādiṭṭhīti** evaṃ abhijjhābyāpādā, aññe ca lāmakatṭhena **pāpakā** akosallasambhūtatṭhena **akusalā** dhammā **anvāssaveyyuṃ** anu anu pavatteyyuṃ.

Tassa saṃvarāya na paṭipajjatiti tassa cakkhudvārassa saṃvarāya satikavāṭena pidahanatthaṃ na paṭipajjati. Sā pana appaṭipatti cakkhundriyassa anārakkhāsaṃvarassa anuppādoti dassento “**na rakkhati...pe... āpajjati**”ti āha. Javane uppajjamānopi hi asaṃvaro tena dvārena pavattanato “cakkhundriyāsaṃvaro”tveva vuccatīti. Sesadvāresupi vuttanayeneva attho veditabbo. “**Pubbantakappanavasena cā**”tiādinā saṅkhepato vuttamatthaṃ vitthārato dassento “saṅkhepato ca vitthāro añño”ti katvā taṃ samuccinanto “**yā ca kho imā**”tiādimāha.

Yathāvuttā akusalā dhammāti dvādasa akusalacittuppādadharmā, tesam vatthūni vā. Te hi samudayavajjā pañcupādānakkhandhā. “**Eva**”nti iminā nettipāliyaṃ, aṭṭhakathāyañca niddhāritappakārena. **Idhā**ti imissaṃ “arakkhitena cittaṇā”ti gāthāyaṃ.

Yadipi desanāhārasampātapaḷiyaṃ “**tasmā rakkhitacittassā**”ti gāthā sarūpato na gahitā, atthato pana “**tesaṃ bhagavā pariññāyā**”tiādinaṃ gahitā evāti tassā gahitabhāvaṃ vibhāvetuṃ “**kathaṃ deseti**”ti pucchitvā “**tasmā rakkhitacittassā**”ti gātham uddhari.

Yonisomanasikārena kammaṃ karontoti “so ‘idaṃ dukkha’nti yoniso manasi karotī”tiādinaṃ nayena vipassanāsankhātēna yonisomanasikārena bhāvanākammaṃ karonto, bhāventoti attho. **Yathābhūtañānti** nātapaḷiyaṃ pubbhāgavipassanāya “avijjāsamudayā rūpasamudayo, avijjānirodhā rūpanirodho”tiādinaṃ (paṭi. ma. 1.50) samapaññāsāya ākārehi. Nirayagatiyaṃ dukkhadukkhatā, sugativiseṣe brahmalokekadesē saṅkhāradukkhatā, itarattha dve tissopīti dassento āha “**yathāsambhavaṃ tividhadukkhatāyogenā**”ti.

Desanāhārasampātavaṇṇanā niṭṭhitā.

2. Vicayahārasampātavaṇṇanā

53. Kusaladhammārammaṇāti kusaladhamme uddissa pavattimattaṃ sandhāya vuttaṃ, na tesam ārammaṇapaccayattaṃ idha “**kusalā dhammā**”ti lokuttaradhammānaṃ adhippetattā. Na hi kadāci anupādāniyā dhammā upādānārammaṇā honti. Phaladhamme uddissa pavattāya taṇhāya gahitattā “**kusala...pe... daṭṭhabbo**”ti vuttaṃ. **Desanāhāreti** desanāhārasampāte. **Kathaṃ pana kusalabhāvoti** “kusalā”ti vacanamattaṃ gahetvā codeti, tañca nidassanamattaṃ daṭṭhabbaṃ, pahānahetubhāvopissā siyā codakena sampaṭicchitova. “**Mānopi duvidho**”tiādinaṃ mānassa ca tassā taṇhāya ca sevittabbabhāvo akusalānaṃ pahānāya, kusalānaṃ uppattiyā ca paccayabhāvato.

Nekkhammassitaṃ domanassaṃ nāma “ariyabhūmiṃ pāpuṇitum nāsakki”nti anusocato uppannaṃ domanassanti sambandho. **Evanti** iminā pāliyaṃ vuttappakārena, pihaṃ upaṭṭhapetvā chasu dvāresu iṭṭhārammaṇe āpāthagate aniccādivasena vipassanaṃ paṭṭhapetvāti yojanā. Iṭṭhārammaṇaṅcettā yathāvuttaanusocanadomanassuppattīnaṃ yathābhinivitṭhassa ārammaṇassa aniṭṭhatāyāti dassanattaṃ. “**Kathaṃ nekkhammasena**”ti padassa atthaṃ vivarituṃ “**vipassanāvasena**”tiādi vuttaṃ. Vipassanādivinimuttā vā paṭhamajjhānādivasena vuttā kusalā dhammā idha nekkhammaṃ. Anussatiggahaṇena upacārajjhānameva gahitanti “**paṭhamajjhānādivasena**”ti vuttaṃ. **Ādisaddena** dutiyajjhānato paṭṭhāya yāva aggaphalā upariviseṣā saṅgahitā. **Yāya** paññāvimuttiyā.

Upekkhāsati pārisuddhibhāvenāti upekkhājanitasati pārisuddhisabbhāvena. **Kammayogganti** vipassanābhāvanādikammassa yoggaṃ anurūpaṃ anucchavikaṃ. **Assaddhiyeti** assaddhiyāhetu, “**assaddhiyena**”tipi paṭhanti, so evattho. **Obhāsagatanti** nāñobhāsagataṃ. Kāmaṃ pubbepi paññā vuttā, assaddhiyādīhi pana aññesaṃ kilesānaṃ vidhamanampi paññāya eva hoti, sā ca evaṃbhūtāti dassanattaṃ “**obhāsagataṃ kilesandhakāre na iñjati**”ti vuttaṃ.

Kopo kodho. **Appaccayo** domanassaṃ. Iddhividhañānādikā cha abhiññā pākātā evāti “dve ca viseṣe”ti vuttadhamme dassetuṃ “**manomayiddhi, vipassanāñāñāñcā**”ti āha. **Aṅgaṇāni** rāgādayo. **Upakkilesā** abhijjhāvisamalobhādayo. **Anulomanam** tadekaṭṭhatā. **Phandanā** dubbalā vikkhepappavatti. Balavatī **anavaṭṭhānaṃ**. Sabbo micchābhiniveso ayonisomanasikārena hoti, micchāvitakkena ca. Tattha **ayonisomanasikāro** akusalacittuppādo tappariyāpanno micchāvitakko vikkhepasahito evāti vuttaṃ “**micchābhinivesahetutāya diṭṭhipakkho**”ti vuttañhetam “vitakkopi diṭṭhiṭṭhānaṃ, ayoniso manasikāropi diṭṭhiṭṭhāna”nti (paṭi. ma. 1.124).

Atha vā **iñjanā**ti phandanā, diṭṭhaparittāso. Yathāha “tadapi tesam bhavataṃ samaṇabrāhmaṇānaṃ

ajānataṃ apassataṃ vedayitaṃ taṇhāgatānaṃ paritassitavipphanditamevā’’ti (dī. ni. 1.105 ādayo). **Aṭṭhiṭṭi** anavaṭṭhānaṃ, diṭṭhivitakko. Tena hi puthujjano kāle sassataṃ, kāle ucchedanti taṃ taṃ diṭṭhiggahaṇaṃ pakkhandanto sattato paribbhaṭṭhaandho viya, samudde vissatṭhavāhanikā viya, yante yuttagoṇo viya ca tathā tathā paribbhamati. Tenāha “diṭṭhiyopi diṭṭhiṭṭhānaṃ, vitakkopi diṭṭhiṭṭhāna’’nti (paṭi. ma. 1.124) ca. Etasmiṃca pakkhe micchābhinivesatāya, micchābhinivesahetutāya ca tassā dve pakkhāti ekadesasarūpekaseso katoti veditabbaṃ.

“**Eva**’’ntiādinā “so uparima’’ntiādiṭṭhāyaṃ sambandhaṃ dasseti. **Paṭighasaññāti** bhummatthe paccattavacananti dassento “**paṭigha...pe... saññāsū**’’ti āha. **Rūpāvacarasaññāti** saññāsīsena rūpāvacarajjhānāni vadati. **Nānattasaññāti** nānāsabhāvā, nānāsabhāve vā ārammaṇe saññā. Ṭhapetvā paṭighasaññā avasiṭṭhakāmāvacarasaññā hetā. **Tā samatikkamatī** tā rūpasaññānānattasaññāyo ārammaṇehi saddhiṃ sammadeva atikkamati.

Rūpāvacarajjhānobhāsopi kasiṇārammaṇā. Kasiṇanissando hi āruppajjhānuppatti. **Dassananti** kasiṇarūpānaṃ dassanaṃ. Abhijjhābyāpādappahānena saddhiṃ vīriyārambho upakārako samatho satipassaddhiyo parikkhāraṅgatā vuttā eva. Satirahitaṃ sammasanaṃ nāma natthīti “**yā upaṭṭhitā sati asammuṭṭhā, ayaṃ vipassanā**’’ti vuttaṃ. Tena satisīsena vipassanā gahitāti dasseti. Sammosānaṃ pahānamāhāti sambandho.

54. Paccuppannasukhaāyatisukhavipākakiriyanirāmisaakāpurisasevitabhāvehi eva sesā pāliyaṃ etassa samādhissa santapaṇītatādivisesā vuttā, tepi idha saṅgahitāti tesam padānaṃ atthaṃ dassento “**aṅgasantatāyā**’’tiādimāha. Tattha **aṅgasantatāyāti** phalajjhānaṅgānaṃ upasantatāya. **Kilesadarathasantatāyāti** kilesadarathapaṭippassaddhiyā. **Paṇītoti** uḷāro. **Ekodibhāvenāti** maggasamādhisaṅkhātena ekodibhāvena. **Ekodibhāvanti** samādhānaṃ. Lokiyasamādhissa paccanīkanīvaraṇapaṭhamajjhānanikantiādiṇi niggaḥetabbāni, aññe ca kilesā vāretabbā. Imassa pana arahattasamādhissa paṭippassaddhakilesattā na niggaḥetabbaṃ, vāretabbaṃca atthīti so maggānantaraṃ samāpattikkhaṇeva appayogeneva adhigatattā, ṭhitattā ca aparihānivasena vā adhigatattā **nasasaṅkhāraniggayhavāritagato**.

“**Sativepullappatto**’’ti etena appavattamānāyapi satiyā satibahulatāya sato eva nāmāti dasseti. “**Yathāparicchinnakālavasenā**’’ti etena paricchinnasatīyā satoti dasseti.

Vakkhamānenāti “pītipharaṇā’’tiādinā anantaraṃ vakkhamānena. “Pītipharaṇatā’’ti pana pāli āgatā. Taṃ “pañcaṅgiko sammāsamādhī’’ti (dī. ni. 3.355) samādhiaṅgabhāvena paññā uddiṭṭhāti katvā vuttaṃ. Tato eva **aṭṭhakathāyaṃ “pītipharaṇatā**’’tiādiṇaṃca atthasaṃvaṇṇanā katā. Tattha “so imameva kāyaṃ vivekajena pītisukhena abhisandeti’’tiādinā (dī. ni. 1.226) nayena pītiyā, sukhasa ca pharaṇaṃ veditabbaṃ. Sesam suviññeyyameva.

Samādhivasena samatho uddhaṭoti sabhāvavasena samatho uddhaṭo, na upakāradhammavasenaṭi adhippāyo.

55. Rāgapaṭipakkhattā samādhissa “**adhicittasikkhāya sikkhanto**’’ti vuttaṃ. **Vuttanayānusārenāti** “sukhapaṇidhiādisamuggahāṇena appaṇihito’’tiādinā. Ettha ca saṅkhārānaṃ khaṇabhaṅgurataṃ sammadeva passantassa na rāgo patiṭṭhaṃ labhatīti aniccānupassanā rāgacaritassa sappāyā vuttā, tathā saṅkhārānaṃ sabhāvadukkhattaṃ sammadeva passantassa pakatīyāpi dukkhitesu dukkhuppādanam vaṇe khārodakasekasadisanti na doso patiṭṭhaṃ labhatīti dukkhānupassanā dosacaritassa sappāyā vuttā, tathā saṅkhāresu sammadeva ghanavinibbhoge kate attasuññatāya upaṭṭhahamānāya na moho patiṭṭhaṃ labhatīti anattānupassanā mohacaritassa sappāyā vuttāti veditabbaṃ. Rāgapaṭipakkhattā samādhissa “**adhicittasikkhāya sikkhanto**’’ti vuttaṃ. Esa nayo itaresu. Sesamettha suviññeyyaṃ.

Khantibahulo uppannaṃ aratiṃ anabhiratiṃ abhibhuyya viharanto sukkena samādhim adhigacchatīti khantippadhānatāpi samathapakkhahajanassa kāraṇaṃ vuttā. **Uṭṭhānaṃ sampajjati** sampannakāyikavīriyaṃ. Sammākammantavāyāmānaṃ yo kāyikādivikappo vutto pāḷiyaṃ, so nesam kāyikassa payogassa samuṭṭhānavasena veditabbo.

“**Khippādhigamo**”ti iminā maggāsevanabhāvaṃ dasseti. “**Vipassanāya vimuttādhigamo**”ti iminā vipassanānubhāvena samucchadavimutti vikkhambhanavimutti viya samathānubhāvenāti dasseti. **Lokiyehīti** nissakkavacanaṃ. **Mahantānanti** uḷārānaṃ, paṇṭānanti attho.

56. Tanti vicayahāraṃ. **Visaṃvādanahetūnaṃ** lobhādīnaṃ pāpadhammānaṃ. **Sodhentoti** yathā saraṇādivisayā aññānādisamkilesā na pavattanti, evaṃ sodhento. **Paripūrentāti** yathā sīlaṃ akhaṇḍādibhāvena paripuṇṇaṃ hoti anūnaṃ, evaṃ paripūrentā.

“**Tathā paṭipajjanto**”ti iminā satthu mahāpatikārabhāvo paripuṇṇo dassitoti paṭhamavāde “**dassanābhūmiṇca bhāvanābhūmiṇcā**”ti vuttaṃ.

Yassa atthāyāti yassa yassa pahānatthāya. **Tathā paṭipannassāti** yathā asubhajjhānādhim pādakaṃ katvā anāgāmimaggādiadhigamo hoti, tathā paṭipannassa.

Vadhitanti ghātitaṃ.

“**Manussabhūto**”ti idaṃ pubbāparāpekkhaṃ katvā “pitā manussabhūto khīṇāsavo”ti ca tathā “mātā manussabhūtā”ti yojetabbaṃ. Bhedānurūpassa sāvanaṃ **anussāvanaṃ**, bhedānurūpena vā vacanena viññāpanaṃ.

57. Manussattanti manussajātītā. **Liṅgasampattīti** purisabhāvo. **Hetūti** manovacīpaṇidhānasiddhiyā saddhim pubbahetusampadā. **Satthāradassananti** satthu sammukhībhāvo. **Guṇasampattīti** abhiññāsamāpattilābho. **Adhikāroti** attano sarīranirapekkhaṃ satthu upakārakaraṇaṃ. **Chandatāti** buddhabhāvāya dalhacchandatā anivattidhammatā.

Na uppajjantīti pana atthīti “na me ācariyo atthi, sadiso me na vijjatī”tiādi (ma. ni. 1.285; 2.341; kathā. 405; mahāva. 11; mī. pa. 4.5.11) imissā lokadhātuyā ṭhatvā vadantena bhagavatā “kiṃ panāvuso sārīputta, atthetarahi añño samaṇo vā brāhmaṇo vā bhagavato samasamo sambodhiyanti evaṃ puṭṭho ahaṃ, bhante, ‘no’ti vadeyya”nti (dī. ni. 3.161) vatvā tassa kāraṇaṃ dassetuṃ “aṭṭhānametaṃ anavakāso, yaṃ ekissā lokadhātuyā dve arahanto sammāsambuddhā”ti (dī. ni. 3.161; a. ni. 1.277) imaṃ suttaṃ dassentena dhammasenāpatināva buddhakhettabhūtaṃ imaṃ lokadhātuṃ ṭhapetvā aññattha anuppatti vuttā hotīti adhīppāyo.

Khettapariggaho kato nāma hoti “idaṃ buddhakhettaṃ nāmā”ti.

Evaṃ ṭhānāṭṭhānabhāvaṃ gatāti vuttappakārena ṭhānabhūtā, vuttanayena vā aññepi yathārahaṃ ṭhānāṭṭhānabhāvena pavattā. **Sattapaññattiyā upādānabhūtāti** indriyabaddhe khandhe sandhāya vadati.

58. Phalassa paccakkhakarītāti “imassa kammaṃsa idaṃ phala”nti taṃtaṃkammaphalāvabodho. **Appadānābhāvoti** paccayasamavāye kammaṃsa ekantato phaluppādanaṃ. Tenāha “**katūpacitāna**”nti.

59. Ajjhositavatthunāti taṃhābhīnivesavasena abhinivīṭṭhavatthunā. **Rūpabhavaarūpabhavādināti** bhavataṃhā viya sayam dasseti.

Khandhattayavasenāti sīlādikkhandhattayavasena. **Paṭipadāvibhāgenāti** “sabbatthagāminī”ti

ādipaṭipadāya bhedenā.

Tatthatatthagāminīti nirayādinibbānanti dvīsu gandhabbaṭṭhānesu tattha tattheva gamanasīlā. **Sabbatthagāminī**ti yathāvuttesu sabbatṭhānesu ca gamanasīlā.

Sañjīvo kālasuttaṃ saṅghāto roruvo mahāruruvo tāpano mahātāpano avīcīti ete **aṭṭha mahānirayā**. Ekekassa cattāri cattāri dvārāni, ekekasmim dvāre cattāro cattāro gūthanirayādayoti evaṃ **soḷasa ussadaniraye** vaṇṇenti.

Sakkasuyāmādiko **jeṭṭhakadevarājā**. Pajāpativaruṇāsānādayo viya dutiyādiṭṭhānantarakārako **paricārako**.

Kilesakāmapakkheti “saṅkappo kāmo, rāgo kāmo, saṅkapparāgo kāmoti (mahāni. 1) ettha vuttasaṅkappavasena vuttaṃ. Sopi hi vibādhati, upatāpeti cāti kilesattasambhavato kilesakāmo vutto, na kilesavatthubhāvato. **Kāmapaṭisaṃyuttoti** kāmarāgasāṅkhātena kāmena sampayutto, kāmapaṭibaddho vā. Aññesu ca kāmapaṭisaṃyuttesu dhammesu vijjamānesu vitakke eva kāmasaddo dhātusaddo niruḷhoti veditabbo vitakkassa kāmasaṅkappavuttiyā sātisayattā. Esa nayo byāpādadhātuādīsu. Parassa, attano ca dukkhāpanaṃ **vihimsā**. Taṃ tu micchāhi vihimsā.

Bījādihātunānattavasena khandhādinānattaṃ veditabbaṃ. **Khandhoti** dvidhābhūtaggo.

60. Ajjhāsaya dhātūti ajjhāsayasabhāvo. Yathā gūthādīnaṃ sabhāvo eso yaṃ gūthādīheva saṃsandati, evaṃ puggalānaṃ ajjhāsayasassevesa sabhāvo, yaṃ dussīlādayo dussīlādikeheva saṃsandanti.

Saddhāmūlakattā kusalakiriyāya vuttaṃ “**yaṃ saddhāvasenā**”tiādi. Tathā hi vuttaṃ “saddhā bīja”nti (su. ni. 77). Yaṃ lobhavasena, saddhāvasena ca dosavasena, saddhāvasena ca mohavasena, saddhāvasena cāti yojetabbaṃ. **Vīriyavasenā**ti sammappadhānavīriyavasena. **Paññāvasenā**ti maggasammādiṭṭhivasena.

Akusalassa kammaṃsa katokāsatāya pāḷiyaṃ vuttattā “**vipākāvaraṇena nivuta**”nti vuttaṃ. Taṃ pana nidassanamattaṃ daṭṭhabbaṃ kammāvaraṇādīhipi nivutatāya icchitattā. Tathā hi yathā devadattaṃ kokālikāṃ sunakkhattaṃ licchaviṃputtanti udāhaṭaṃ, yadipi bhagavā paṭivedhassa aṭṭhānataṃ disvā nibbedhabhāgiyadesanaṃ na deseti, vāsanābhāgiyaṃ pana tathārūpassa deseti evāti dassento “**saccappaṭivedha**”ntiādimāha. **Ajātasattuādīnanti ādisaddena** saccakādīnaṃ saṅgaho daṭṭhabbo. Tassāpi bhagavā anāgate vāsanatthāya dhammaṃ desesi. Satthā hi “anāgate tambapaṇṇidīpe sāsaṇaṃ paṭiṭṭhahissatī”ti tatthāyaṃ kulaghare nibbatta pabbajitvā **kālabuddharakkhitatthero** nāma pabhinnapaṭisaṃbhido mahākhīṇāsavo bhavissatīti idaṃ disvā dhammaṃ desesi, so ca tathā ahoṣīti.

Asampunṇeti ekantato vipākādānasamatthātasena pāripūriṃ anupagate. Diṭṭhupanissayadiṭṭhisahagatassa kammaṃ sandhāya “**kamme asampunṇe**”ti vuttaṃ. Tenāha “**kilesantarāya missakaṃ kammantarāyaṃ dassetvā**”ti.

61. Diṭṭhi panettha padhānabhāvena pāḷiyaṃ gahitā sīlabbataparāmāsassa adhippetattā. Tathā hi vuttaṃ “**yathā puṇṇaṅca govatikāṃ, acelaṅca kukkuravatika**”nti. Asampunṇattā eva hi tassa micchādiṭṭhikammasamādānassa tesāṃ bhagavā “cattārimāni, puṇṇa, kammāni”tiādinā (ma. ni. 2.81) dhammaṃ desesi. Tāya ca desanāya te taṃ diṭṭhiṃ paṭinissajjitvā sammatte paṭiṭṭhahimsu.

62. Paṇḍitāya vodānaṃ **paṇḍitavodānaṃ**. Tadeva paṭhamajjhānādīhi vuṭṭhahitvā dutiyajjhānādiadhigamaṃ paccayattā vuṭṭhānaṃ nāma hotīti āha “**vuṭṭhānaṃ paṇḍitavodāna**”nti.

Bhavaṅgavuṭṭhānaṃ bhavaṅguppatti. Bhavaṅgacitte hi uppanne taṃsamaṅgisamāpattito vuṭṭhito nāma hoti. Saññāvedayitaapagamo eva **apagamavimokkho**.

Idaṃ vuṭṭhānanti idaṃ yathāvuttaṃ kosallaṃ vuṭṭhānahetubhāvato vuṭṭhānaṃ. Tathā hi vuttaṃ “vodānampi tamhā tamhā samādhimhā vuṭṭhāna”nti (vibha. 828). Imāya pana vuṭṭhānapāliya asaṅgahitattā “nirodhasamāpattiyā vuṭṭhānaṃ pālimuttakavuṭṭhānaṃ nāmā”ti **sammohavinodaniyaṃ** (vibha. aṭṭha. 828) vuttaṃ. Ye pana “nirodhato phalasaṃpattiyā vuṭṭhāna”nti pāliyaṃ natthīti vadeyyuṃ, te “nirodhā vuṭṭhahantassa nevasaññānāsaññāyatanam phalasaṃpattiyā anantarapaccayena paccayo”ti (paṭṭhā. 1.1.417) imāya pāliya paṭisedhetabbā.

63. Ayaṃ cassa āsayoti ettha āsayajānanādīnā yehi indriyehi yehi paroparehi sattā kalyāṇapāpāsāyādīkā honti, tesam pajānaṃ vibhāvetīti veditabbaṃ. Evañca katvā indriyaparopariyattaāsāyānusayaññānaṃ visuṃ asādhāraṇatā, indriyaparopariyattanādhimuttikatāññānaṃ visuṃ balatā ca siddhā hoti.

Thāmagatoti ettha thāmagamaṃ nāma aññesaṃ asādhāraṇo kāmarāgādīnaṃ eva āveṇiko sabhāvo veditabbo, yato “thāmagato anusayaṃ pajahatī”ti (paṭi. ma. 3.21) vuttaṃ.

Āvajjanamatteneva sarati ākaṅkhāyattavuttikattā. Vuttañhi “ākaṅkhapaṭibaddhaṃ buddhassa bhagavato ñāṇaṃ, manasikārapaṭibaddhaṃ buddhassa bhagavato ñāṇa”ntiādi (mahāni. 156; cūḷani. mogharājamānavapucchānidessa 85; paṭi. ma. 3.5). Sabbaññūtaññāṇaṃ viya hi sabbaṃ bhagavato ñāṇaṃ parikammaṇirapekkhanti.

64. Upakkilesavimuttattāti ettha cittādi eva upakkilesā, nibbattakassa vā kammaṃ pāribandhakilesā. Kasiṅakammaṇiparikkammajānanānibbattanakasiṅabhāvo cuddasavidhena cittaparidamaṃ abhiññābhinihāroti sabbatthāpi vīriyabalassa bahūpakāraṭṭā vuttaṃ “**vīriyabhāvanābalanibbatta**”nti. **Dibbasadisattāti** dibbe bhavanti **dibbaṃ**, yathāvuttaṃ pasādacakkhu, dibbaṃ viyāti **dibbaṃ**, aggataṃ abhiññāṇaṃ. **Dibbavihāro** cattāri rūpāvacarajjhānāni. Tesam vasena nibbattivā paṭiladdhabattā **dibbaṃ**, tena dibbahetukattā dibbanti vuttanti dasseti. **Dibbavihārasannissitattāti** rūpāvacaracattahajjhānena nissayapaccayena nibbattattā, tena dibbanissitaṃ dibbanti dasseti. Divusaddaṃ akkharacintakā kīḷādīsu paṭhantīti vuttaṃ “**taṃ sabbaṃ saddasatthānusārena veditabba**”nti. Purimā hi tayo atthā kīḷatthassa vasena, itare jutigatiatthavaseneva dassitāti.

Manussūpacāranti manussagocaraṃ. **Daṭṭhuṃ na sakkā** ittarakhaṇattā khaṇapaccuppannaṃ. “**Āsannacutikā**”tiādīnā santatipaccuppannavasena “cavamāne upapajjamāne”ti vuttanti dasseti. “**Mohanissandayuttattā**”tiādīnā sattānaṃ hīnapaṇitattādibhāvassa mohādikammaṇidānahetukataṃ, nissandaphalatañca dasseti. Dibbacakkhussa pādakaṃ etesanti **dibbacakkhupādakāni**. Tena vuttaṃ “**dibbacakkhunā saheva ijjhantī**”ti. Tāni hissa paribhaṇḍaññāni.

Samādīyantīti **samādānāni**, kammāni samādānāni etesanti **kammasamādānā**. Samādātabbanānāvidhakammāti attho purime atthe, dutiye pana kammāni samādāpentīti **kammasamādānā**, micchādiṭṭhiyā kammasamādānā **micchādiṭṭhikammasamādānā**, hetuatthe cetam karaṇavacanaṃ.

Taṃ vācanti taṃ ariyānaṃ upavadanavācaṃ. **Taṃ cittanti** samuṭṭhāpakacittaṃ. **Taṃ diṭṭhinti** yena micchāgāhena ariye anuddhamseti, micchābhinivesaṃ. Ayampettha attho – yathā nāma hetusampannaṃ bhikkhuno visuddhaṃ sīlaṃ, samādhiñca sampādetvā ṭhitassa dandho satuppādo khippābhiniññāya diṭṭheva dhamme aññā, sati vā upādisese anāgāmitā. Evamevaṃ yo ariyūpavādī yathāvuttacittadiṭṭhīhi apakkamitvā appatirūpaṃ sabhāvaṃ “mayā, bhante, tumhākaṃ upari vutta”nti accayadesanāya te na khamāpeti, so kāyassa bhedaṃ niraye evāti. Tesu pasannacittassa khamāpanañhettha

tesaṃ vācādīnaṃ pahānaṃ paṭinissaggova. Ito **sāvajjatarāṃ nāma aññaṃ natthi** sabbānatthavidhānato, sabbahitasukhaparidhaṃsanato ca.

Kāyassa bhedaṭi idha **kāyasaddo** attabhāvapariyāyoti āha “**upādinakkhandhapariccāgā**”ti. **Tadanantaranti** tassa maraṇasaṅkhātassa khandhapariccāgassa anantaraṃ. Abhinibbattakkhandhattho **parasaddo**, anorimabhūtavatthuvīsayo vā siyā, avadhivisesanamattaṃ vā. Tesu purimaṃ sandhāyāha “**abhinibbattakkhandhaggahaṇe**”ti, pacchimassa pana vasena “**cutito uddha**”nti.

Vuttavipariyāyenāṭi “suṭṭhu caritaṃ, sobhanaṃ vā carita”ntiādīnā. **Hanananti** ghātaṇaṃ.

Kāraṇākāraṇanti ṭhānāṭṭhānaṃ. Cetanācetanāsampayuttadhamme nirayādinibbānagāmiṭṭhānāṃ kammanti gahetvā āha “**kammaparicchamevā**”ti. **Kammavipākantaraṃ** kammavipākaviseso kammavipākassa vibhāgo. **Appetuma na sakkoti** aṭṭhamanavamabalāni viya, taṃsadisaṃ iddhiṭṭhānaṃ viya vikubbituma, etenassa balasadisataṅga nivāreti. Jhānādīṭṭhānaṃ viya vā appetuma, vikubbituṅga. Yādipi hi jhānādīṭṭhānaṃ idha chaṭṭhaṃ balanti tassa savitakkasavicāratā vuttā, tathāpi jhānādīhi vinā paccavekkhaṇā natthīti jhānādīṭṭhānaṃ tadantogadhaṃ katvā evaṃ vuttama. Atha vā sabbaññaṭṭhānaṃ jhānādīkiccaṃ viya na sabbaṃ balakiccaṃ kātuma sakkotiṭṭhi dassetuma “**jhānaṃ hutvā appetuma, iddhi hutvā vikubbituṅga na sakkoti**”ti (vibha. mūlaṭi. 831) vuttama, na pana kassaci balassa jhānāiddhihāvoti daṭṭhabbaṃ.

Vicayahārasampātavaṇṇanā niṭṭhitā.

3. Yuttihārasampātavaṇṇanā

65. Paṭipakkhapaṭibālā kusalā dhammā uppajjitumeva na sakkonti, uppannāpi sammadeva attano kiccaṃ kātuma asamattatāya anuppannasadisāti paṭipakkhanivāraṇena kusalānaṃ dhammānaṃ kiccakaraṇabhāvaṃ dassetuma “**manacchaṭṭhāni...pe... bhavissati**”ti vuttama. **Viharantassāti** viharāṇahetu. **Viharantoti** etthāpi eseva nayo, tena rakkhitacittatā vuttanayena ekantato sammāsaṅkappagocarātāya ca saṃvattatīti dasseti. **Vuttanayenāṭi** micchāsaṅkappānaṃ avasaraṃ adatvā visodhitanekkhammādivitakkatāya. **Aviparītamevāṭi** kāyādiyasubhādito ādānaṃ. **Vinipātabhayanti** duggatibhayaṃ. **Sabbopi cāyamatthoti** “sammāsaṅkappagocarō sammādiṭṭhi bhavissati”tiādīsu attho yuttīyā yutto eva anarūpakaraṇabhāvato.

Yuttihārasampātavaṇṇanā niṭṭhitā.

4. Padaṭṭhānahārasampātādivaṇṇanā

66. Yasma vā saṃkilesato rakkhitacittassa tīṇi sucaritāni pāripūriṃ gacchanti, tasmā **rakkhitacittassāti** ettha yāyama rakkhitacittatā, sā kāyasucaritādīnaṃ tīṇama sucaritānaṃ padaṭṭhānanti evamettha attho vedītabbo. **Attādhīnanti** attaparādhīnaṃ.

Tato evāṭi kāraṇaggahaṇena phalassa gahitattā eva.

68. Tattha itisaddoti “pāripālīyati”ti itisaddo.

73-4. Pāliyaṃ **pañcindriyāni tīhi khandhehi saṅgahitāni** ettha saddhāvīriyasatindriyehi pātimokkhādi tividhaṃ sīlaṃ gahitaṃ sodhetabbatā. Tesanti tehi sīlakkhandho saṅgahito. Samādhīpaññāndriyehi samādhīpaññākkhandhā gahitāti pākāṭoyamattho, tathā sesampīti āha “**ito paresu...pe... vuttanayamevā**”ti.

76. Hetuhetusamuppannapaccayapaccayuppannasāṅkhātassāti ettha hetupaccayavibhāgo hetṭhā vuttoyeva.

Padatṭhānahārasampātādivaṇṇanā niṭṭhitā.

Missakahārasampātavaṇṇanā

Idāni yasmā suttesu hārānaṃ yojanānayadassanattā hārasampātadesanā hāravibhaṅgadesanā viya na hārasarūpamattadassanattā, tasmā **peṭakopadese** āgatanayānusārena aparehi vipariyāyehi hārasampātayojanāvidhiṃ dassento “**apicā**”tiādīmāha. Tattha vijjāvijjāya kusalākusalacittappavattiyā alobhādosalobhadosāpi paramparabhāvena pavattanti nidānabhāvatoti dassento “**cha dhammā...pe... mūlānī**”ti āha. Yathā ca nidānabhāvena pubbaṅgamatā, evaṃ attano vasevattanenāpi pubbaṅgamatā labbhatevāti vuttaṃ “**sādhipatikānaṃ adhipati, sabbacittuppādānaṃ indriyānī**”ti. **Alobhassāti** alobhayuttassa cittuppādassa. **Nekkhammacchandenā**ti kusalacchandenā. Nekkhammasaddo pabbajjādīsū niruḷho. Vuttañhi –

“Pabbajjā paṭhamam jhānaṃ, nibbānañca vipassanā;
Sabbepi kusalā dhammā, ‘nekkhamma’nti pavuccare”ti. (itivu. aṭṭha. 109; dī. ni. ṭī. 2.359; a. ni. ṭī. 2.2.66) –

Tesu idha kusalā dhammā adhippetā. Tena vuttaṃ “kusalacchandenā”ti. Nekkhammacchandenā upanissayabhūtena, na adhipatibhūtena. Idaṃ vuttaṃ hoti – alobhappadhāno ce cittuppādo hoti, nekkhammacchandenā upanissayabhūtena mano tassa pubbaṅgamo hoti. Sesapadadvayepi eseva nayo.

Yadaggena tesam dhammānaṃ mano pubbaṅgamaṃ, tadaggena tesam jeṭṭham, padhānañcāti vuttaṃ “**manoseṭṭhāti mano tesam dhammāna**”ntiādi. Manomayatā manena katādibhāvo, so ca manassa tesam saḥajātādīnā paccayabhāvo evāti vuttaṃ “**manomayāti...pe... paccayo**”ti. **Te panāti** ettha **pana**-saddo visesatthadīpako, tenetaṃ dasseti – yadipi tesam dhammānaṃ chandādayopi paccayā eva, indriyādipaccayena pana savisesam paccayabhūtassa manasseva vaseneva vuttaṃ “manomayā”ti. Tattha **chandasaṃmudānītāti** yathāvuttanekkhamaḍichandenā sammā uddhamuddham nītā, tato samudāgatāti attho. Tato eva nekkhammavitakkādito samuppannattā **anāvīlasāṅkappasamuṭṭhānā**. Tajjāmanovīññādhātusamphassena saḥādhiṭṭhānato **phassasamodhānā**. “Phuṭṭho, bhikkhave, vedeti, phuṭṭho sañjānāti, phuṭṭho ceteti”ti (saṃ. ni. 4.93) hi vuttaṃ. **Idaṃ manokammanti** kāyaṅgavācāṅgacopanaṃ akatvā saddhāsamanāgatena pasannena manasā pavattaṃ idaṃ kusalaṃ manokammaṃ. Taṃ pana anabhijjhāsahagataṃ, abyāpādasahagataṃ, sammādiṭṭhisahagatanti tividham hoti.

Bhāsatiti avisaṃvādanādīnā vācāṅgacopānavasena pavattentiya vacīviññattiyā sādhetabbaṃ sādhetīti attho, tena kāyadvārato pavattakusalavacīkammampi saṅgahitaṃ hoti. Tathā hi vakkhati “vacīviññattivipphārato, tathā sādiyanato ca bhāsati”ti. Sabbampi vacīkammaṃ saccādivasena catubbidham. **Karoti**ti attano, paresaṅca hitāhitāni kāraṇākāraṇehi kāyaṅgacopānavasena pavattentiya kāyaviññattiyā sādhetabbaṃ sādhetīti attho, tena vacīdvārato pavattakusalakāyakammampi saṅgahitaṃ hoti. Tathā ca vakkhati “kāyaviññattivipphārato, tathā sādiyanato ca karoti”ti (netti. aṭṭha. 76 missakahārasampātavaṇṇanā). Kammāpathavasena gayhamāne pāṇātipātādivasena taṃ tividham hoti. Tenāha “**iti dasakusalakammāpathā dassitā**”ti. Dasapuññakiriyavattuvasenāpi gāthāya attho yujjati. Tathā hi vakkhati “so pasannacitto”tiādi. Bhāsati vā karoti vā kevalam manasā pavattatīti aniyamattho **vā**-saddo. Tathā ceva saṃvaṇṇitaṃ.

Dasavidhassa kusalakammassāti dasavidhassa kusalakammāpathakammassa, vakkhamānanayena vā dasapuññakiriyavattusaṅkhātassa kusalakammassa. Nanu tattha dānādīmayam tividhameva puññakiriyavattu vuttanti? Saccam, taṃ pana itaresam tadantogadhattā.

“Sukhamanvetī”ti sañkhepena vuttaṃ sukhānugamaṃ vitthārena dassento “**idhassu puriso**”tiādīmāha. Tattha **evaṃ santanti** evaṃ bhūtaṃ, appahīnānusayo hutvā sukhavedanīyaphassasambhūtanti attho.

Tattha “**yaṃ mano**”tiādinā gāthāttavasena catusaccaṃ niddhāreti. Ādito vavatthāpitesu khandhādīsū khandhamukhena saccānaṃ kathitattā sattānaṃ bhinnarucibhāvato nānāyehi vipassanābhūmikosallatthaṃ, pubbāparasambandhadassanatthañca evaṃ vuttaṃ “**evaṃ...pe... niddhāretabbānī**”ti. Saccamukhena assādādike niddhāretvā desanāhārasampātaṃ yojetuṃ “**tattha samudayenā**”tiādīmāha, taṃ vuttanayameva. Yañhettha aññampi atthato na vibhattaṃ, taṃ heṭṭhā vuttanayattā, uttānatthattā cāti veditabbaṃ.

Mananalakkhaṇeti mananalakkhaṇahetu. “**Mananalakkhaṇenā**”ti vā pāṭho. **Īhābhāvato** byāpārābhāvato. Yena pasādēna samannāgatattā mano “pasanno”ti vutto, tassa pasādassa kiccaṃ mane āropetvā āha “**akālusiyato, ārammaṇassa okappanato ca pasannenā**”ti. **Tathā sādiyanatoti** vācāya vattabbaṃ avatvāva phassasādiyanato anujānato. Dutiye **tathā sādiyanatoti** kāyena kātabbaṃ yathā kataṃ hoti, tathā vācāya saṃvidhānato. **Tathā pasutattāti** yathā sukhamanveti, tathā upacittatā evāti attho. **Tatoti** tato kāraṇā, manasā pasannena, bhāsanena, karaṇena ca hetunāti vuttaṃ hoti. **Anaññatthāti** etasmiṃ pana atthe. **Tatoti** tato eva. Yo hi pasannamano tena yaṃ bhāsanam, karaṇaṇca, tato eva naṃ sukhamanveti vuttaṃ hoti. **Sātabhāvato** sātavedanābhāvato. **Iṭṭhabhāvato** manāpabhāvato. Kammato vipākupattiphalaḍānasamatthabhāvena kammassa nibbattattā vipākasseva anibbattattāti āha “**katū...pe... anveti vutta**”nti **kāraṇāyatta vuttitoti** katabhāvahetukattā kammassāti adhippāyo. **Asaṅkantitoti** yasmīṃ santāne kammaṃ nibbattaṃ, tadaññasantānā saṅkamanato.

Ādhīpaccayogatoti sahaḷātādhipativasena ādhīpaccayuttattā. Sahaḷātadhammānañhi taṃsampayuttassa manassa vasena pubbaṅgamatā idhāhippetā. **Tato evāti** ādhīpaccayogato eva. **Manassāti** upayogatthe sāmivacaṇaṃ. Tesam dhammānanti sambandho. **Kusalabhāvo yujjati** pasādassa yonisomanasikārahetukattā. Nanu vibhajjabyākaraṇesu tesam sāvakānaṃ saddhā uppajjati? Nāyaṃ saddhā, tadākārā pana akusalā dhammā tathā vuccantīti veditabbaṃ. Tathā hi vakkhati “nāyaṃ pasādo”tiādi (netti. aṭṭha. 76 missakāhārasampātavaṇṇanā). **Sukhaṃ anveti yujjati** kammassa phalaḍāne samatthabhāvato. Yathā hi kataṃ kammaṃ phalaḍānasamatthaṃ hoti, tathā kataṃ upacittanti vuccatīti.

Manopavicārā idha nekkhammasitā somanassūpavicārā, upekkhūpavicārā ca veditabbā kusalādhīkārattā. Te pana yasmā cittaṃ nissāyeva pavattanti, nānissāya, tasmā vuttaṃ “**mano manopavicārānaṃ padaṭṭhāna**”nti. **Kusalapakkhassa padaṭṭhānanti** ettha kusalo tāva phasso kusalassa vedanākkhandhassa saññākkhandhassa sañkhārakkhandhassa saḷātādīnā paccayo hoti. “Phuṭṭho, bhikkhave, vedeti, phuṭṭho sañjānāti, phuṭṭho ceteti”ti (saṃ. ni. 4.93) vuttaṃ. Evaṃ vedanāḍīnampi veditabbaṃ. Saddhāḍīnampi paccayabhāve vattabbameva natthi. **Sabbassāti** catubhūmakassa. Kāmāvacarā hi kusalā dhammā yathārahaṃ catubhūmakassāpi kusalassa paccayā honti, evaṃ itarabhūmakāpi.

“Pasannena manasā bhāsati”ti vuttattā visesato sammāvācāpaccayaṃ bhāsanam idhāhippetanti vuttaṃ “**bhāsati sammāvācā**”ti. Tatthāyamadhippāyo “bhāsati yamidaṃ padaṃ, iminā sammāvācā gahitā hoti”ti. **Karotīti sammākammantoti** etthāpi eseva nayo. Suparisuddhe kāyavacīkamme ṭhitassa ājīvapārisuddhi, na itarassāti vuttaṃ “**te sammāājīvassa padaṭṭhāna**”nti. Tattha **teti** sammāvācākammantā. Yasmā pana ājīvatṭhamake sīle patitṭhitassa uppannānuppannānaṃ akusaladhammānaṃ pahānānuppadānāni, anuppannuppannānaṃ kusaladhammānaṃ uppadānapāripūriyā ca sambhavanti, tathā sammāvāyāme ṭhitasseva kāyādīsū subhasaññādividdhaṃsini sammāsati sambhavati, tasmā vuttaṃ “**sammāājīvo...pe...padaṭṭhāna**”nti. Jeṭṭhakasīlam pātīmokkhasaṃvaro, saddhāsādhano ca soti āha “**taṃ sīlassa padaṭṭhāna**”nti.

Tesanti kāyavacīkammānaṃ. **Kamma**paccayatāyāti kusalakammahetukatāya.

Padattho ca vuttanayenāti “mananato ārammaṇavijānanato”tiādīnā.

Ayaṃ āvaṭṭoti ayaṃ sabhāgavisabhāgadhammāvaṭṭanavasena āvaṭṭo. Ettha hi kusalamūlasammattamaggādiniddhāraṇā sabhāgadhammāvaṭṭanā. Avijjābhavataṇhānaṃ niddhāraṇā visabhāgadhammāvaṭṭanā.

Vibhattihāre padaṭṭhānabhūmivibhāgā vuttanayā, suviññeyyā cāti dhammavibhāgameva dassento “**nayida**”ntiādīmāha. Tattha “**nayidaṃ yathārutavasena gahetabba**”nti suttassa neyyatthataṃ vatvā “**yohī**”tiādīnā taṃ vivarati. “Dukkameva anvetī”ti kasmā vuttaṃ, nanu yattha katthaci hitesitā kusalamevāti? Nayidamīdisaṃ sandhāya vuttaṃ, adhammaṃ pana dhammoti, dhammañca pana adhammoti dīpanena lokassa sabbānatthabījabhūtesu sakalahitasukhupāyapaṭikkhepakesu titthakaresu asantaḡuṇasambhāvanavasena pavattamicchādhimokkhaṃ sandhāya vuttaṃ. Yo hi loke appamattakampi puññaṃ kātukāmaṃ pāpikaṃ diṭṭhiṃ nissāya paṭibāhati, sopi gārayho, kimaṅgaṃ pana ariyavinaye sammāpaṭipattiṃ paṭibāhantesūti dukkhaphalāva tattha sambhāvanāpasamsā payirupāsana. Tathā hi vuttaṃ – “na kho ahaṃ, moghapurisa, arahattassa maccharāyāmi, apica tuyhevetāṃ pāpakaṃ diṭṭhigataṃ...pe... dīgharattaṃ ahitāya dukkhāya saṃvattati”ti (dī. ni. 3.7), “yo nindiyaṃ pasamsati (su. ni. 663; saṃ. ni. 1.180, 181; a. ni. 4.3; netti. 92), sabbassāpi anattassa mūlaṃ bālūpasevanā”ti ca.

Idaṇhi suttanti “manopubbaṅgamā...pe...pada”nti (dha. pa. 1, 2) paṭhamaṃ gāthaṃ sandhāya vadati. **Etassāti** saṃvaṇṇiyamānasuttassa.

Kiccapaññattīti adhipatipaccayasānkhātassa kiccassa paññāpanaṃ. **Padhānapaññattīti** padhānabhāvassa paññāpanā. **Sahajātapaññattīti** tesāṃ dhammaṇaṃ manasā sahabhāvapaññāpanā.

Mahābhūtātīti itisaddo ādiattho, tena mahābhūtāvinābhāvī sabbo rūpadhammo saṅgayhati.

“Manopubbaṅgamā”ti samāsapade “mano”ti padaṃ tadavayavamattanti āha “**neva padasuddhī**”ti. Tenevāha “**manopubbaṅgamāti padasuddhī**”ti. “**Chāyāva anapāyini**”ti idaṃ sukhānugamassa udāharaṇamattaṃ, na yathādhippetatthaparisaṃmāpanaṃ. “**Sukhamanvetī**”ti pana yathādhippetatthaparisaṃmāpananti vuttaṃ “**padasuddhi ceva ārambhasuddhi cā**”ti.

Ekattatāti manopubbaṅgamādisāmaññaṃ sandhāya vadati. Evaṃ sesesupi. **Vemattatā** “manopubbaṅgamā”tiādīnā sāmāññato vuttadhamme pasādo dhāraṇāya nivattetvā pasannasānkhāte visese avaṭṭhāpanato. Sesesupi eseva nayo. Pasādo sinehasabhāvo, assaddhiyaṃ viya lūkhasabhāvaṃ dosaṃ vinodetīti āha “**byāpādavikkhambhanato**”ti. **Bahiddhāti** saddheyyavatthum sandhāyāha. **Okappanatoti** ārammaṇaṃ anupavisitvā anupakkhanditvā saddahanato.

Deyyadhammādayoti ettha ādisaddena saṃvegahirottappakasiṇamaṇḍalādayo saṅgayhanti. **Iṭṭhārammaṇādayoti** ādisaddena iṭṭhamajjhattārammaṇā, dvāraddhammā, manasikāroti evamādināṃ saṅgaho daṭṭhabbo. **Tathā phassoti** yathā vedanādīnaṃ iṭṭhārammaṇādayo paccayo, evaṃ phassopīti paccayatāsāmaññaṃeva upasaṃharati tathā-saddo. **Vedanādīnanti** hi vedanādayo tayo khandhā gahitā. **Viññāṇassa vedanādayoti** nāmarūpaṃ sandhāya vadati.

“**Sīlamayassa adoso padaṭṭhāna**”nti vuttaṃ khantipadhānattā sīlassa. **Adhiṭṭhātīti** anuyuñjati uppādeti. **Soti** evaṃ kusalacittaṃ bhāvento. “**Anuppannāna**”ntiādīnā bhāvanāpahānasamāropanāni dassento nibbedhabhāgiyavasena gāthāya atthaṃ vicinitvā samāropeti, evampi sakkā yojetunti vāsānābhāgiyavasena padaṭṭhānaniddese udāharīyati.

Evam “manopubbaṅgamā dhammā”ti gāthāya vasena hārasampātayojanāvidhiṃ dassetvā idāni gāthāntarena dassetuṃ “**tathā dadato puñña**”ntiādīmāha. Tatha **bhāvanāmayanti** paññābhāvanāmayam.

“**Alobho kusalamūla**”ntiādi dānādīnaṃ alobhādīpadhānattā vuttaṃ, sabbattha ca “vutta”nti padaṃ ānetvā yojetabbaṃ. **Tesanti** rāgādīnaṃ. **Nissaraṇanti** ca parinibbānameva sandhāya vadati.

Pariccāgasīlo alobhajjhāsayo kāmesu ādīnavadassāvī sammadeva sīlaṃ paripūretīti āha “**dadato... pe... padaṭṭhāna**”nti. Idha **oḷārikā** nāma kilesā vītikkamāvattānaṃ, tappahānaṃ tadaṅgappahānena veditabbaṃ. **Majjhimananti** pariyoṭṭhānāvattānaṃ. **Sukhumānanti** anusayāvattānaṃ. **Katāvībhūmi** nti khīṇāsavabhūmiṃ.

Dadatoti maggasahagatena alobhena sadevakassa lokassa abhayadānaṃ dadato. **Puññanti** lokuttarakusalaṃ. **Samyamatotī** maggapariyoṭṭhānehi sammāvācākamantāṅgāvehi diṭṭhekaṭṭhādīsaṃkilesato maggasaṃyamena saṃyamantassa. **Veranti** pāṇātipātādīpāpaṃ. **Kusaloti** maggasammādiṭṭhiyā kusalo vicakkaṇo. **Jahāti pāpakanti** tehi tehi maggehi taṃ taṃ pahātabbaṃ pāpadhammaṃ odhiso jahāti samucchindati. Tenāha “**maggo vutto**”ti.

“Dadato”tiādīnā pubbe avibhāgena kusalamūlāni uddhaṭṭhāntīti idāni vibhāgena tāni uddharanto “**lokiyakusalamūla**”ntiādīmāha.

Puthujjanabhūmi sekkhabhūmi dassitā pahānassa vipakatabhāvādīpanato. **Asekkhabhūmi dassitā** anupādāparinibbānadīpanato.

Saggagāminī paṭipadā pubbabhāgappaṭipatti.

Puññe kathite puññaphalampi kathitameva hotīti vuttaṃ “**dadato...pe... desanamāhā**”ti. Saccakammaṭṭhānena vinā saṃkilesappahānaṃ natthīti dassento āha “**kusalo...pe... desanamāhā**”ti.

Verasaddo adinnādānādīpāpadhammesupi niruḷhoti vuttaṃ “**evam sabbānīpi sikkhāpadāni vitthāretabbānī**”ti. **Dvepi vimuttiyo** sekkhāsekkhavimuttiyo, saupādisesaanupādisesavimuttiyo ca. Tathā hi vakkhati “nibbutoti dve nibbānadhātuyo”tiādi (netti. aṭṭha. 76).

Kāraṇūpacārena, kāraṇaggahaṇena vā phalaṃ gahitanti āha “**dve sugatiyo**”tiādi. Vaṭṭavivaṭṭasampattiyo imissā desanāya **phalaṃ**, tassa dānaṃ sīlaṃ bhāvanā **upāyo**, “sampattidvayaṃ icchantena dānādīsu appamattena bhavitabba”nti ayamettha bhagavato **ānattīti** imamatthaṃ sandhāyāha “**phalādīni yathārahaṃ veditabbānī**”ti.

Vicayoti vicayahārasampāto, so vuccatīti attho. Esa nayo ito paresupi. “**Tividhampi dānamaya**”ntiādīnā padatthavicayaṃ dasseti, tena assādādayo, itare ca vicayahārapadatthā atthato vicitā eva hontīti. Rūpādīraṃmaṇassa pariccāgo vuttoti sambandho. **Sabboti** sakalo anavasesato kiccassa vuttattā.

Dānābhiratassa cāgādhiṭṭhānaṃ pāripūriṃ gacchatīti vuttaṃ “**dadato...pe... padaṭṭhāna**”nti. Viratisacce, vacīsacce ca tiṭṭhato saccādhiṭṭhānaṃ pāripūriṃ gacchatīti vuttaṃ “**saṃyama...pe... padaṭṭhāna**”nti. Kosallayogato ca pāpappahānato ca paññāpāripūriṃ gacchatīti vuttaṃ “**kusalo...pe... padaṭṭhāna**”nti. Anavasesarāgādīsu pahīnesu upasamo upaṭṭhito nāma hotīti vuttaṃ “**rāga...pe... padaṭṭhāna**”nti.

Kusaloti puggalādhiṭṭhānena kosallasammādiṭṭhi vuttatīti āha “**kusalo...pe... maggaṅgādibhāvena**

ekalakḅhaṇattā’ti. **Ādisaddena** bodhipakkhiyabhāvādiṃ saṅgaṇhāti. **Khepetabbabhāvenā** pahātabbabhāvena.

Averatanti asapattataṃ. **Kusaladhammehī**ti anavajjadhammehi, phalanibbānehīti adhippāyo. Dānassa mahapphalatā, sīlādiguṇehi satthu anuttaradakkhiṇeyyabhāvo, anupādāparinibbānanti imesaṃ paccavekkhaṇā imassa dānassa nidānanti ayamatto pāliyaṃ niruḷhova. Nibbacananidānasandhaya suviñṇeyyāvāti āha “**nibbacananidānasandhaya vattabbā**”ti.

Paṭipakkhaniddesena samudayoti desanattamaṃ paṭipakkhaniddesanaena niddhārito ayaṃ macchariyādisaṃkilesapakkhiko samudayo. **Alobhena...pe... dānādīhī**ti yehi alobhādīhi dānādayo dhammā sambhavanti, tāni dānādiggahaṇeneva gahitānīti kusalamūlāni niddhāreti “**imāni tīpi kusalāni**”ti. **Tesanti** kusalamūlānaṃ.

Bhayahetu deti paṇṇākārādivasena. **Rāgahetu deti** sabhāgavatthussa. **Āmisakiñcikkahetu deti** lañjādivasena. **Anukampanto** vā karuṇākhetto. **Apacayamāno** guṇakhetto, upakāraheto vā. **Bhayūparatoti** bhayena orato. Tena tathārūpena saṃyamena veraṃ na cīyateva. Evaṃ sabbassa akusalassa pāpako vipākoti yojanā.

“**Dadato**”tiādīnā yathā dānapaṭikkhepena parivattanaṃ dassitaṃ, evaṃ pahānapaṭikkhepenapi parivattanaṃ dassetabbanti vuttaṃ “**akusalo pana na jahātī**”ti.

Kammaphalaṃ saddahanto dānakiriyāyaṃ padahanto yena vidhinā dānaṃ dātabbaṃ, tattha satim upaṭṭhapento cittaṃ samādahanto sammādiṭṭhiṃ purakkharonto dāne sammāpaṭipanno hotīti āha “**dānaṃ nāma...pe... hotī**”ti.

Bhāvanāpahānasamāropanāni pāliyaṃ sarūpato viñṇāyantīti padaṭṭhānavēvacanasamāropanāni dassetaṃ “**taṃ sīlassa padaṭṭhāna**”ntiādi vuttaṃ, taṃ suviñṇeyyaṃ. Aññaṇca yadettha atthato na vibhattaṃ, taṃ vuttanayattā, uttānatthattā cāti veditabbaṃ.

Hārasampātavāravaṇṇanā niṭṭhitā.

Nayasamuṭṭhānavāravaṇṇanā

79. “Visayabhedato”ti saṅkhepena vuttamatthaṃ vitthārato vivaritaṃ “**yathā hī**”tiādimāha. Tattha **nayatoti** nayaggāhato. **Na** hi paṭivedhaññaṃ viya vipassanāññaṃ paccakkhato pavattatīti. **Anubujjhiyamānoti** abhisamayaññaṃ anurūpaṃ bujjhiyamāno. Yathā ekapaṭivedheneva maggaññaṃ pavattati, evaṃ tadanucchavikaṃ vipassanāññaṃ gayhamānoti attho. Evañca katvā nandiyāvattādānaṃ tiṇṇaṃ atthanayabhāvo samatthito hotīti. Tathā hi atthavisesasarūpatāya tayo nayā “**suttattho**”ti vuttā, padaṭṭhavicārahāvepi pana hārā “**byañjanavicayo**”ti. Yadi evaṃ kathaṃ tayoti codanaṃ sandhāyāha “**paṭivijjhantānaṃ panā**”tiādi. Tattha ekameko saṃkilesavodānaṃ vibhāgato dvisaṅgahoti yojanā. **Catuchaatṭhadiso cāti** na paccēkaṃ te nandiyāvattādayo catuchaatṭhadisā, atha kho yathākkamanti. “**Eva**”ntiādi yathāvuttassa atthassa nigamaṃ.

Tathā cāti yathāvuttassa atthassa upacayena samatthanā. **Pubbā koṭi na paññāyatīti** ettha yaṃ vattabbaṃ, taṃ parato paṭṭhānakathāyaṃ āvi bhavissati. “**Andhaṃ tamaṃ tadā hoti, yaṃ lobho sahate nara**”ntiādi (cūḷani. khaggavisāṇasuttaniddesa 128) vacanato kāmataṇhāpi paṭicchādanasabhāvā, yato kāmaccandaṃ “**nīvaraṇa**”nti vuttaṃ. Avijjāya pana bhavesu ādīnavappaṭicchādanaṃ sātisaṃyanti. Tathā avijjāpi saṃyojanasabhāvā, yato sā bahiddhā saṃyojanabhāvena vuttā. Evaṃ santēpi taṇhāya bandhanaṭṭho sātisaṃyayo apekkhitabhāvatoti imamatthaṃ dassento “**tathāpi...pe... vutta**”nti āha.

“**Samyuttā**”ti padassa sampayuttāti atthoti āha “**missitā**”ti. “**Avijjābhūhūtā...pe... abhinivisantā**”ti etena avijjāya ayāthāvagahaṇahetutaṃ dasseti, tato so avindiyam vindaṭṭi **avijjāti** vuccati. Kilissanam upatāpananti āha “**kilissanappayogaṃ attaparitāpanapaṭipatti**”nti. **Alliyanam** sevanam.

Dukkanti ...pe... jānantī attanā anubhūyamānam tathā tathā upaṭṭhitam kāyikacetasikadukkham, itarampi vā ekadesam jānanti. Taṇhāyapi eseva nayo. Sabhāgavisabhāgapaṭipajjitabbākārato tattha tesam ñānam natthevātidassento “**idaṃ dukkha**”ntiādimāha. **Pavattipavattihetumattampī** “pavatti pavattihetū”ti ettakampi. **Kā pana kathāti** pacurajanasādhāraṇe lokiyepi nāma atthe yesam ñānassa paṭighāto, paramagambhīre ariyānam eva visayabhūte lokuttare nivattinivattihetusānkhāte atthe kā nāma kathā, chinnā kathāti attho. Aṭṭhasamāpattipabhedassa kevalassa samathassa tādise kāle bāhirakānañca ijghanato “**vipassanādhiṭṭhāna**”nti visesitam. **Vūpasamo** samucchedo, paṭippassaddhi ca.

“**Samsārassa anupacchedanato**”ti idaṃ diṭṭhigatānam diṭṭhigatikamatadassanam. So hi puttamukhadassane asati samsāro ucchijjeyyāti bhāyati. Yato vuttam –

“Gaṇḍuppādo kīkī ceva, kuntī brāhmaṇadhammiko;
Ete abhayaṃ bhāyanti, sammūlhā caturo janā”ti. (su. ni. aṭṭha. 2.293; a. ni. ṭī. 3.5.192);

Tadabhiññāti tam yathāvuttaantadvayaṃ abhijānanti guṇam āropetvā jānantīti tadabhiññā. Atthabhañjanato, rogagaṇḍasallasadisatāya attabhāvasamkilesānañca **rogagaṇḍasallatā**.

Sakkāyadassaneti ettha diṭṭhidassanam, sakkāyova dassanam sakkāyadassananti attho veditabbo. **Tesanti** diṭṭhicaritānam. **Attābhiniveso balavā**. Tasmā yathāupaṭṭhitam rūpaṃ “attā”icceva gaṇhantīti adhippāyo. Tathā vedanādiṃ. Taṇhācarito pana yathāupaṭṭhitam rūpaṃ taṇhāvattum katvā attaniyābhinivesena abhinivisantā tadaññameva attato samanupassanti. Evaṃ vedanādisu. Tenāha “**taṇhācaritā**”tiādi. **Vijjamāneti** paramatthato upalabbhamāne. **Kāyeti** samūhe. Diṭṭhiyā parikappito attādi eva paramatthato nupalabbhati, diṭṭhi pana labbhatevāti āha “**satī vā vijjamānā**”ti.

Sakkāyadassanamukhenāti sakkāyadiṭṭhimukhena.

Ucchedasassatanti taṃsahacaraṇato ucchedasassatadiṭṭhi vuttā. “Ucchedasassatavādā”tipi pāṭho.

Kasiṇāyatanānti kasiṇajjhānāni.

Tejetvāti nisānetvā.

81. Ettāvatā nandiyāvaṭṭassa bhūmiracanasena samkilesapakkho dassitoti āha “**tattha diṭṭhicaritotiādinā vodānapakkham dasseti**”ti. “**Yasmā sallekhe tibbagāravo**”ti iminā tattha tibbagāravattā samlekhanusantatavuttinā bhavati dasseti. Sesesupi eseva nayo. **Micchādhimokkho** saddhāpatirūpako avatthusmiṃ pasādo.

Puggalādhiṭṭhānena dhammameva vibhajati āha “**sattāpi...pe... dasseti**”ti.

Ye hi kecīti ettha **hi**-saddo nipātamattam. “**Imāhi eva catūhi paṭipadāhi**”tipi pāḷi. Dukkāpaṭipadādivibhāgena maggo eva idha vuttoti āha “**paṭipadā hi maggo**”ti **catuddisāsānkhātam maggantī** catuddisāsānkhātam pavattanupāyam. Dve disā eṭṭasāti **dvidisā**. **Nandiyāvaṭṭassāti** nandiyāvaṭṭanayasa.

82. Vivattati vaṭṭaṃ etthāti **vivattaṃ**, vivattaṃ eva **vivaṭṭaṃ**, asaṅkhatadhātu, nibbuti eva vā. Tena vuttam **“nibbāna”**nti.

“Kattha daṭṭhabba”nti vā pāli. **Upacayeti** upacayāvattahāyanti attho. **Dasannanti** lobhādikilesavatthūnaṃ. **Vipallāsahetubhāvato**ti subhasaññādivipallāsahetukabhāvato. Vipariyesaggāhavasena hi ādīnavesu eva saṃyojanīyesu dhammesu assādānupassitā. Na hi yathābhūtañāṇe sati tathā sambhavo. Tena vuttam **“dasannaṃ...pe... bhāvato”**ti. **Dasavidhakāraṇeti** dasavidhe kāraṇe, dasavidhassa vā kāraṇe. **Ayonisomanasikāraparikkhatā dhammā** subhārammaṇādayo.

Tabbisayā kilesāti āhārapariññāparibandhabhūtā kilesā. **Viññāṇaṭṭhitīsupi** eseva nayo. Kāye pavattamāno paṭhamo vipallāso kāyasamudāye, kāyekadese ca kabaḷīkāre āhāre pavatto eva hotīti vuttam **“paṭhame āhāre visayabhūte paṭhamo vipallāso pavattati”**ti. Tathā vedanāyaṃ pavattamāno dutiyavipallāso tappaccaye phassāhāre, citte pavattamāno tatiyavipallāso tappaccaye manosañcetanāhāre, dhammesu pavattamāno catutthavipallāso tappaccaye viññāṇāhāre pavatto eva hotīti vuttam **“catutthe āhāre catuttho vipallāso”**ti. Tenāha **“sesāhāresupi eseva nayo”**ti. **Āhārasīsenā** vā āhārapaṭibaddho chandarāgo gahito. **Viññāṇaṭṭhitīsupi** eseva nayo. Tenevāha **“āhārasīsenā tabbisayā kilesā adhippetā”**ti. **Paṭhame āhāre visayabhūtetī** ca paṭhame āhāre chandarāgassa visayabhāvaṃ patte, tabbhāvaṃ anatikkanteti attho. Appahīnacchandarāgassa hi tattha vipallāsā sambhavanti, na itarassa. Tathā dutiyavipallāsādisu appahīnesu. Itare upādānāni pavattanteva appahīnattāti āha **“sesapadesupi eseva nayo”**ti. Yasmā ca upādānādisu appahīnesupi yogādayo pavattanteva yathārahaṃ taṃsabhāvattā, tadekaṭṭhasabhāvato ca, tasmā vuttam pāḷiyam **“paṭhame upādāne paṭhamo yogo”**tiādi. Tenāha **“sesapadesupi eseva nayo”**ti.

83. **Aparijānantassāti** ñātapariññāya, tīraṇapariññāya, pahānapariññāyāti tīhi pariññāhi paricchinditvā ajānantassa, tesam samudayañca atthaṅgamañca assādañca ādīnavañca nissaraṇañca yathābhūtaṃ anavabujjhantassāti attho. **Tibbo** bahalo **chandarāgo hoti** taṇhācaritabhāvato adhippāyo. Iti upakkilesassa diṭṭhābhīnivesassa hetubhāvato imamattaṃ sandhāyāha **“vuttanayenevā”**ti. Subhasukhasaññākāmupādānakāmabhavayogaabhijjhākāyaganthakāmabhavāsava-kāmabhavogharāgasallachandāgatigamanāni taṇhāpakkhikatāya, taṇhāsabhāvattāya ca **taṇhāpadhānāni**. Sīlabbatupādānabyāpādakāyaganthadosasalladosāgatigamanāni pana taṇhābhāve bhāvato, viññāṇaṭṭhitiyo taṇhāvisayato, sabbesaṃ vā taṇhāvisayato taṇhāpadhānatā labbhateva. Pacchimakānaṃ diṭṭhipadhānatā vuttanayānusārena veditabbā.

84. **Kabaḷīkāre āhāreti** kabaḷīkārahāraṇīyāyā chandarāge. “Appahīne”tiādikam pariyaṇakatham muñcitvā nipariyaṇameva dassento kabaḷīkārahāraṇassa **“asubhasabhāvattā, asubhasamuṭṭhānattā cā”**ti vuttam. Labbhamaṇe hi ujuke atthe kiṃ pariyaṇakathāyāti. Chandarāgo vā tattha atthasiddhoti evampettha attho vutto. Na hi tattha asati chandarāge vipallāso sambhavati. **Dukkhasabhāvattāti** saṅkhāradukkhatāya dukkhasabhāvattā. **Dukkhapaccayattāti** tividhadukkhatālakkaṇassa dukkhassa kāraṇato. **Viññāṇe niccasaññino**. Tathā hi **sāti** nāma bhikkhu kevaṭṭaputto “taṃyeva viññāṇam sandhāvati saṃsarati”ti tattha niccābhīnivesam saṃvedesi. Yebhuyyena saṅkhāresu attasaññitā diṭṭhigatikānaṃ “cetanā attā”tiādiditṭhiparidīpanesu veditabbā. **“Bhavavisuddhi”**ti padassa atthavacanam **“nibbutisukha”**nti. **“Sīlabbatehi...pe... sukhanti daḷham gaṇhātī”**ti iminā sīlabbatupādānam idha bhavupādānanti dasseti. Tathā hi vakkhati “sīlabbatupādānasāṅkhātena bhavupādānenā”ti.

Paccayā honti upanissayapaccayādīnā. **Paṭhame yoge ṭhitoti** paṭhame yoge patiṭṭhito. Appahīnā hi kilesā kammavaṭṭādīnaṃ kāraṇabhūtā taṃsamāṅgino sattassa patiṭṭhāti vuccanti. Parassa abhijjhāyaṃ **parābhijjhāyaṇam**. Bhavapatthanāya bhavadiṭṭhibhavarāgavasena piyaṇitassa vatthuno vipariñāmaññathābhāve domanassuppattiṃ sandhāya vuttam **“bhavarāga...pe... padūsentī”**ti.

Ganthivāti ganthiṃ katvā. Dvidhābhūtaṃ rajjuādike viya ganthikaraṇaṇhi ganthanaṃ. Cittaṃ pariyādāya tiṭṭhantā āsavānaṃ uppattihetu hontīti sambandho. Pariyuṭṭhānappattā ekacce kilesā visesato āsavuppattihetu hontīti dassanattham aṭṭhakathāyaṃ uppaṭipāṭivacanaṃ. Tappaṭipakkhe visaye patthetīti yojanā. **Tabbisayabahule bhava patthetīti** yathā mānusakehi kāmehi nibbinnarūpā devūpapatti. **Tamsabhāvattāti** diṭṭhisabhāvattā. **Aparāparanti** aññamaññaṃ. Ekaccā hi diṭṭhi ekaccassa diṭṭhābhinivesassa kāraṇaṃ hoti, yathā sakkāyadiṭṭhi itarāsaṃ. **Abhinivisantassāti** abhinivesanahetu. **“Ayonisomanasikārato...pe... avijjāsavo uppajjati”**ti idaṃ saccābhinivesassa phalabhūtaṃ avijjāsavaṃ dasseti ekantavassimeghavuṭṭhānena viya mahoghappavatti. **Avijjāsavo siddho hoti** vuṭṭhihetukamahoghasiddhiyā uparimeghavuṭṭhānaṃ viya.

“Nandīrāgasahagatā”tiādīsu (mahāva. 14) viya tabbhāvatto sahagatasaddoti āha **“anusaya... pe... bhūtā vā”**ti. **Cittassa abhantarasaṅkhātā hadayanti** vipākacittappavattiṃ sandhāya vadati. Vipākavaṭṭepi kilesavāsanāhitā atthi kāci visesamattā.

Lobhasahagatassa viññāṇassa. **Itarassa** dosasahagatādikassa. Byañjanena viya bhojanassa ārammaṇassa abhisāṅkharāṇaṃ visesāpādanaṃ **upasecanaṃ**, nandī sappītikataṇhā upasecanaṃ etassāti **nandūpasecanaṃ** upasecanabhūtāyapi nandiyā rāgasallaupanisato. Upasitte pana vattabbameva natthīti dassetuṃ pālīyā **“rāgasallena nandūpasecanaṃ viññāṇenā”**ti vuttanti tamattham pākaṭam kātuṃ **“kena pana taṃ nandūpasecana”**nti pucchati.

Rāgasallenāti hetumhi karaṇavacananti dassento **“rāgasallena hetubhūtenā”**ti āha. **Upānissayapaccayattho** cettha hetvattho. Upagantabbato viññāṇenāti vibhattiṃ pariṇāmetvā yojetabbaṃ. **“Paṭiṭṭhābhāvato”**ti iminā viññāṇassa nissayā dipaccayatam vadati. Tenāha **“rūpakkhandham nissāya tiṭṭhati”**ti. Evaṃ dutiyādiviññāṇaṭṭhitīsipi nissayā dipaccayatā vattabbā paṭiṭṭhāvacanato.

85. Yadipi akusalamūlādike tipukkhalassa, taṇhādike nandiyāvattassa disābhāvena vakkhati, tathāpi aññamaññānuppavesato ekasmiṃ naye siddhe itarepi siddhā eva hontīti imassa visesassa dassanattham **“āhārādayo...pe... vavattapetu”**nti vuttaṃ. Vakkhamāne vā akusalamūlataṇhādike **ādisaddena** saṅgahetvā **“āhārādayo”**ti vadanto **“nayāna”**nti bahuvacanamāha. **Ekassa atthassāti** rāgararitassa upakkilesatāsaṅkhātassa ekassa payojanassa. **Byañjanatthopi gahito**, na byañjanameva gahitanti suttapadāni aññamaññāpariyāyavacanāni yathārahaṃ taṇhāvattahūnaṃ tattha kathitattā vuttaṃ **“savatthukā taṇhā vuttā”**ti. Dosavatthūnaṃ, diṭṭhivatthūnaṃca tattha kathitattā **“savatthuko doso, savatthukā diṭṭhi ca vuttā”**ti imamattham sandhāyāha **“vuttanayānusārenā”**ti.

Dukkhākārena saha dukkhākāraṃ gahetvāti attho. **Evañcetanti** yadi taṃtaṃanupassanābahulassa vasena purimāhāradvayādīsu vimokkhamukhavisesaniddhāraṇaṃ kataṃ, etaṃ evameva veditabbaṃ, na aññathā. Tattha kāraṇaṃ vadanto **“na hi”**tiādīmāha. Tassattho – yathā ariyamaggānaṃ odhiso kilesappajahanato pahātabbesu dhammesu niyamo atthi, na evaṃ vipassanāya pariññāpahānānaṃ aniccantikattāti.

Apare panāhu – **purime** āhāradvaye parikilesabhāvena, dukkhapaccayatā ca dukkhalakkhaṇaṃ supākaṭam. Tattha purime viññāṇaṭṭhitidvayaviññāṇāhāre tatiyaviññāṇaṭṭhitiyaṃ aniccalakkhaṇaṃ, manosañcetanāhāre catutthaviññāṇaṭṭhitiyaṃ anattalakkhaṇaṃ supākaṭanti tissannaṃ anupassanānaṃ pavattimukhatāya tehi appaṇihitādivimokkhamukhehi pariññaṃ gacchantīti. Tathā vipallāsādīsu purimadvayaṃ dukkhānupassanāya ujuvipaccanīkaṃ, itaradvayaṃ aniccānattānupassanānaṃ. Iti pavattimukhatāya ca ujuvipaccanīkaṭāya ca ime dhammā yathārahaṃ appaṇihitādivimokkhamukhehi pariññeyyā, pahātabbā ca vuttā. Tattha
subhasukhasaññākāmapādānasīlabbatupādānakāmayogabhavayogaabhijjhākāya
ganthakāmasavakāmogha bhavogha rāgasallachandaagatigamanāni sukhasādavasena pavattanato
dukkhānupassanāya paṭipakkhabhāvato byāpādakāyaganthadosasalladosaagatigamanāni

pavattimukhatāya appaṇihitavimokkhamukhena pahātabbāni. Tatiyasaññādayo niccābhinivesatannimittāhi aniccānupassanāya paṭipakkhabhāvato animittavimokkhamukhena pahātabbā. Catutthasaññādayo attābhinivesatannimittāhi anattānupassanāya paṭipakkhabhāvato suññatavimokkhamukhena pahātabbā. Tattha mānasallabhayaagatigamanānaṃ niccābhinivesanimittatā veditabbā. Na hi aniccato passato mānajappanaṃ, bhayaṃ vā sambhavati. Avijjāyogādānaṃ attābhinivesanimittatā pākaṭā evāti.

86. Appamaññāvajjā rūpāvacarasamāpattiyo **dibbavihārā**

“devūpapattisaṃvattanikakusalasamāpattiyo cā”ti katvā, satipi tabbhāve parahitapaṭipattito, niddosatāya ca seṭṭhā vihārāti catasso appamaññā **brahmavihārā**, catasso phalasaṃpattiyo **ariyavihārā** “ārakā kilesehi ariyānaṃ vihārā”ti. Catasso āruppasamāpattiyo **āneñjavihārā**, satipi devūpapattisaṃvattanikakusalasamāpattibhāve āneñjasantatāhi lokiyesu sikhāpattito.

Adhikaraṇabhedenāti vatthubhedena.

Yaṃ abhiṇhaṃ na pavattati, taṃ **acchariyanti** dassetuṃ “**andhassa...pe... uppajjanaka**”nti vuttaṃ. **Adhiṭṭhāti** sīlādi **etena** saccena, **ettha** vā sacce nimittabhūte, **adhiṭṭhānamattameva vā** taṃ saccanti evaṃ karaṇādhikaraṇabhāvattā paccayasena veditabbā samānādhikaraṇasamāsapakkhe. Tathā aññapadatthasamāsapakkhe. Itarasmim̐ pana samāse karaṇādhikaraṇattā eva, te ca kho sīlādivasena ca veditabbā. Sukhanti jhānavipassanāmaggaḥalanibbānasukhaṃ. Lokiyavipākasukhampi labbhateva. “Nāññatra bojjhā...pe... pāṇina”nti (saṃ. ni. 1. 98) hi imāya gāthāya saṅgahitā anattaparihāramukhena sattānaṃ abhayā nibbānasampattisukhāvahā cattāro dhammā idha “**sukhabhāgiyā**”ti vuttāti. **Anavasesapariyādānatoti** pharaṇavasena anavasesaggahaṇato.

Paṭhamassa satipaṭṭhānassa paṭhamapaṭipadāvasena pavattassāti adhippāyo. Evaṃ sesesupi. “**Yathā hī**”tiādinaṃ yathāvuttapaṭipadāsatipaṭṭhānānaṃ nānantariyakataṃ upamāya vibhāveti. Satipi ca sabbāhi paṭipadāhi sabbesaṃ satipaṭṭhānānaṃ niyamābhāve nānantarikabhāvena desanākkamenevettha nesam̐ ayamanukkamo katoti veditabbo. Atha vā kāyavedanāsu subhasukhasaññānaṃ dubbinivethiyatāya asubhadukkhānupassanānaṃ kiccaśiddhito purimena paṭipadādvayena purimaṃ satipaṭṭhānavayaṃ yojitaṃ tadabhāvato. Itarena itaraṃ. Tāni hi purimesu satipaṭṭhānesu katakammaṃ icchitabbāni. Atha vā yathā taṇhācaritadhiṭṭhacaritānaṃ mandatikkhapaññānaṃ vasena catasso paṭipadā yojitā, evaṃ cattāri satipaṭṭhānāni sambhavanti dassetuṃ paṭipadāsatipaṭṭhānānaṃ ayamanukkamo kato.

“**Tathā**”ti iminā yathā samānapaṭipakkhatāya paṭhamassa satipaṭṭhānassa bhāvanā paṭhamassa jhānassa viśesāvahā, evaṃ pītisaḥagatādisamānatāya dutiyasatipaṭṭhānādibhāvanā dutiyajjhānādinaṃ viśesāvahāti imamatthaṃ upasaṃharati. **Pītipaṭisaṃvedanādīti** ādisaddena sukhaṭisaṃvedanaṃ, cittasaṅkhārapaṭisaṃvedanaṃ, passambhanañca saṅgaṇhāti. Cittassa abhippamodanaggahaṇaṇcetha nidassanamattaṃ daṭṭhabbaṃ paṭisaṃvedanasamādahanavimocanānampi vasena pavattiyā icchitabbattā. **Aniccavirāgādīti** ādisaddena nirodhapaṭinissaggā saṅgayhanti.

Rūpāvacarasamāpattinanti ettha paṭiladdhamattaṃ paṭhamajjhānaṃ paṭhamajjhānasamāpattiyā paṇḍavasībhāvāpādanassa paccayo hoti, na itarāsaṃ. Itarāsaṃ pana adhiṭṭhānabhāvena paramparāya paccayo hotīti veditabbaṃ. Byāpādavihiṃsāvitaḥkaaratirāgā **byāpādavitakkādayo**. **Sukhenāti** akicchena, akasirenāti attho.

Dibbavihārādike cattāro vihāre padaṭṭhānaṃ katvā nānāsantānesu uppannāya vuṭṭhānagāminivipassanāya yathākkamaṃ anuppannākusalānuppadānādivasena pavattavisayaṃ sandhāya pāliyaṃ “**paṭhamo vihāro bhāvito bahulīkato**”tiādi vuttaṃ. Sammappadhānasadisāñhettha sammappadhānaṃ vuttaṃ. Ariyavihāre ca heṭṭhime nissāya uparimaggādhigamāya vāyamantassa ayaṃ nayo labbhati. Maggariyāpannasēva vā sammappadhānassa nānāsantānikassa

yathāvuttavipassanāgamanena taṃtaṃkiccādīkassa vasenetam vuttam. Sakkā hi vipassanāgamanena saddhindriyādītikkhātāviseso viya vīriyassa kiccavisesavisayo maggo viññātum.

Tathā sikhāppattaupekkhāsati pārisuddhidibbavihāram nissāya uppannam paṭhamam sammappadhānam mānappahānam ukkamseti, brahmavihārasannissaye uppannam dutiyam sammappadhānam kāmālayasamugghātam, ariyavihārasannissayena uppannam tatiyam sammappadhānam avijjāpahānam, santavimokkhasannissayena uppannam catuttham sammappadhānam bhavūpasamam ukkamsetīti dassetum “**paṭhamam sammappadhāna**”ntiādi vuttam.

Pahīnamāno na viṣamvādeyyāti **mānappahānam saccādhīṭṭhānam** vaḍḍheti viṣamvādananimittasseva abhāvato. Appahīnamāno hi mānanissayena kiñci viṣamvādeyya. Kāmālaye, diṭṭhālaye ca samugghāṭite cāgapaṭipakkhassa avasaro eva natthīti **ālayasamugghāto cāgādhīṭṭhānam** vaḍḍheti. Avijjāya samucchinnāya paññābuddhiyā paribandhova natthi, bhavaśāṅkhāresu ossaṭṭhesu abhavūpasamassa okāsova natthīti mānappahānādayo saccādhīṭṭhānādike samvaḍḍhentīti dassetum “**mānappahāna**”ntiādi vuttam.

Aviṣamvādanasīlo dhammacchandabahulo chandādhīpateyyam samādhim nibbatteti. Cāgādhimutto nekkhammajjhāsāyo akosajjabahulatāya vīriyādhīpateyyam, ñānuttaro cittaṃ attano vase vattento cītādhīpateyyam, vūpasantasabhāvo upasamahetubhūtāya vīmaṃsāya vīmaṃsayato vīmaṃsādhīpateyyam samādhim nibbatteti saccādhīṭṭhānādīpārisuddhichandasamādhīdīnam pāripūriyā samvattati dassetum “**saccādhīṭṭhānam bhāvita**”ntiādi vuttam.

Dhammacchandabahulo chandasamādhimhi ṭhito iṭṭhāniṭṭhachalārammaṇāpāte anavajjasevī hoti. Āraddhavīriyo vīriyasamādhimhi ṭhito saṃkilesapakkhassa santapanavaseneva puññaṃ paripūreti. Cittaṃ attano vase vattento cittasamādhimhi ṭhito paññāya upakārānupakārake dhamme pariggaṇhanto **buddhim** phātiṃ gamissati. Vīmaṃsāsamādhimhi ṭhito dhammavicayabahulo upadhiṭṭhānissaggāvahameva paṭipattim brūhetīti imamattham dassetum “**chandasamādhī bhāvito**”ntiādi vuttam.

Dūrādūrapaccatthikanivāraṇe bahūpakāro **indriyasamvaro** mettāya viṣesuppattihetuto **mettam** vaḍḍheti. Tapena saṃkilesadhamme vikkhambhento vīriyādhiko paradukkhāpanayanakāmatam sāhatthikam karotīti **tapo karuṇam** samvaḍḍheti. Paññā pariyodāpitā sāvajjānavajjadhāme pariggaṇhantī pahāsanipātato **muditam** rakkhantī paribrūheti. Upadhinissaggo pakkhando ninnapaṇapabbhārova sammadeva sattasāṅkhāresu udāsino hotīti so **upekkhā**vihāram parivaḍḍhetīti imamattham dassetum “**indriyasamvaro bhāvito**”ntiādi vuttam. Tenāha “**yo yassa viṣesapaccayo, so tam paripūretīti vutto**”ti.

87. Disābhāvenāti nayānam disābhāvenāti yojetabbam. Athopissa pubbe vuttanayeneva vedītabbo. **Yena** catukkena **yassa** rāgacaritādīpuggalassa **vodānam** visuddhi. Yathā apariññātā, appahīnā ca paṭhamāhāravipallāsādayo rāgacaritādīnam puggalānam upakkilesā, evam paṭhamapaṭipadādayo bhāvitā bahulikatā nesam visuddhiyo hontīti vuttanayānusāreṇa sakkā viññātuntī āha “**heṭṭhā vuttanayamevā**”ti.

Atha vā purimāhi dvīhi paṭipadāhi sījhamānā vipassanā attano kiccavuttisaṅkhātam pavattidukkhampi saṅgaṇhantī dukkhānupassanābhāhullavisesato dukkhalakkhaṇam paṭivijjhantī “**appaṇihitam vimokkhamukha**”nti vuttā. Tatiyāya paṭipadāya sījhamānā sukhappavattikatāya sammadeva santatighaṇam bhinditvā aniccalakkhaṇam vibhāventī “**animittam vimokkhamukha**”nti vuttā. Catutthāya pana paṭipadāya sījhamānā sukhappavattikatāya, visadaññātāya ca samūhakkicārammaṇaḥṇam bhinditvā sammadeva anattalakkhaṇam vibhāventī “**suññatam vimokkhamukha**”nti vuttā.

Tathā kāyavedanānupassanā visesato dukkhalakkhaṇaṃ vibhāventī, cittānupassanā aniccalakkhaṇaṃ, dhammānupassanā anattalakkhaṇanti tā yathākkamaṃ “**appaṇihitaṃ vimokkhamukha**”nti vuttā.

Sappītikatāya assādāni paṭhamadutiyañjānāni virajjanavasena visesato dukkhato passantiyā vipassanāya vasena “**appaṇihitaṃ vimokkhamukha**”nti vuttāni. Tatiyaṃ santasukhatāya bāhirakānaṃ niccābhinivesavatthubhūtaṃ sabhāvato “anicca”nti passantiyā vipassanāya vasena “**animittaṃ vimokkhamukha**”nti vuttaṃ. Catutthaṃ upakkilesavigamādīhi parisuddhaṃ susamāhitaṃ yathā paresaṃ, evaṃ attano ca yathābhūtasabhāvāvabodhahetutāya sammadeva “suñña”nti passantiyā vipassanāya vasena “**suññataṃ vimokkhamukha**”nti vuttaṃ.

Evaṃ vihārānaṃ vipassanāvaseneva vimokkhamukhatā, tattha “dibbabrahmavihārānaṃ santasukhatāya assādānīyatā”tiādīnā appaṇihitavimokkhamukhatā yojetabbā. Ariyavihārassa paññādhikattā visesato anattānupassanāsanissayatāya suññatavimokkhatā. Āneñjavihārassa santavimokkhatāya aniccalakkhaṇappaṭivedhassa visesapaccayasabhāvato animittavimokkhamukhatā yojetabbā.

Tathā purimānaṃ dvinnaṃ sammappadhānānaṃ saṃkilesavisayattā kilesadukkhavītikamassa dukkhānupassanābāhullattā appaṇihitavimokkhamukhatā. Tatiyassa anuppannakusaluppādanena dhammānaṃ udayavayavantaṭāvibhāvanato aniccalakkhaṇaṃ pākāṭanti animittavimokkhamukhatā. Catutthassa uppannānaṃ ṭhitattaṃ byāpārāpajjanena dhammānaṃ avasavattitādīpanato anattalakkhaṇaṃ supākāṭanti suññatavimokkhamukhatā.

Mānappahānālayasamugghātānaṃ sahāyataṇhāpahānatāya taṇhāpaṇidhivisodhanato appaṇihitavimokkhamukhatā. Avijjāpahānassa paññākiccādhikatāya suññatavimokkhamukhatā. Bhavūpasamassa saṅkhāranimittapaṭipakkhatāya animittavimokkhamukhatā.

Pakatiyā dukkhasabhāve saṅkhāre ñāṇasaccena avisaṃvādentō dukkhato eva passati, cāgādhivimuttatāya taṇhaṃ vidūrīkaronto rāgapaṇidhiṃ visosetīti purimaṃ adhiṭṭhānadvayaṃ “**appaṇihitaṃ vimokkhamukha**”nti vuttaṃ. Itarassa pana adhiṭṭhānadvayassa suññatānimittavimokkhamukhatā vuttanayā eva.

Chandādhipeyyā cittaṅgattā visesato dhammacchandavato nekkhammavitakkabahulassa hoti, vīriyādhipeyyā pana kāmavitakkādike vinodentassāti tadubhayaṃ nissāya pavattā vipassanā visesato rāgādhippaṇidhīnaṃ visosanato “**appaṇihitaṃ vimokkhamukha**”nti vuttā. Cittādhipeyyaṃ, vīmaṃsādhipateyyaṃ nissāya pavattā yathākkamaṃ aniccānattānupassanābāhullato “**animittaṃ vimokkhamukhaṃ, appaṇihitaṃ vimokkhamukha**”nti ca vuttā.

Abhijjhāvinayano indriyasamvaro, kāmasaṅkappādivinodano tapo ca vuttanayeneva paṇidhipaṭipakkhato **appaṇihitaṃ vimokkhamukhaṃ**, buddhi anattānupassanānimittaṃ, upadhipaṭinissaggo nimittaggāhapaṭipakkhoti tadubhayasannissayā vipassanā yathākkamaṃ “**suññataṃ, animittaṃ vimokkhamukha**”nti vuttā.

Āsannapaccatthikarāgaṃ paṭibāhantī **mettā** rāgapaṇidhiyā paṭipakkho, **karuṇā** paradukkhāpanayanākāravuttikā dukkhasahagatāya dukkhānupassanāya visesapaccayoti tadubhayasannissayā vipassanā “**appaṇihitaṃ vimokkhamukha**”nti vuttā. **Muditā** sattānaṃ modaggaṇābahulā tadaniccātādassanato aniccānupassanāya visesapaccayoti tannissayā vipassanā **animittaṃ vimokkhamukhaṃ**. **Upekkhā** ñāṇakiccādhikatāya anattānupassanāya visesapaccayoti tannissayā vipassanā “**suññataṃ vimokkhamukha**”nti vuttāti evamettha pavattīākārato vipassato nissayato, kiccato ca bhinditvā vimokkhamukhāni yojitānīti.

Samatikkamanam pariññāpahānañca. **Saparasantāneti** attano, paresañca santāne, tena kāyiko, vācasiko ca vihāro “vikkīlita”nti vuttoti dasseti “vividho hāro”ti katvā. Tassa pana vibhāvanā idha adhippetā nayassa bhūmibhāvato. **Yena** paṭipakkhabhāvena. **Tesaṃ paṭipakkhabhāvoti** tesaṃ āhārādīnaṃ paṭipakkhabhāvo pahātabbabhāvo paṭipadādīnaṃ paṭipakkhabhāvo pahāyakabhāvoti yojetabbaṃ. Tattha paṭipadāggahaṇena vipassanā kathitā. Vipassanā ca cattāro āhāre parijānantī tappaṭibaddhachandarāgaṃ pajahatīti ujukameva tesaṃ paṭipakkhatā, evaṃ jhānādīnampi upādānādipaṭipakkhatā vedītabbā tadupadesena vipassanāya kathitattā. Vipallāsasatipaṭṭhānānaṃ paṭipakkhabhāvo pākaṭo eva. Nti sīhavikkīlitaṃ. Vīsatiyā catukkehi visabhāgato vitthārena vibhattanti tīhi padehi saṅghetvā kathikattā vuttaṃ “**saṅkhepena dassento**”ti.

Indriyānanti saddhādiindriyānaṃ. Dasannaṃ catukkānaṃ niddhāraṇāti yojanā.

88. Niggacchatīti nikkhamati. Tato niddhāretvā vuccamāno hi niggacchanto viya hotīti. **Cattāro puggaleti** “taṇhācarito mando”tiādīnā (netti. 6) vutte cattāro puggale. Puggalādhiṭṭhānena cettha dhammo vuttoti āha “**bhūmiṃ niddisitvā**”ti. **Tato evāti** yathāvuttapuggalacatukkato eva. **Itarattāpīti** “sukhāya...pe... puggalā”ti etthāpi. **Sādhāraṇāyāti** paṭhamacatutthāhipi vimissāya. **Yathāvuttāsūti** dutiyatatiyāsu.

Heṭṭhāti desanāhāravibhaṅgavicayahārasampātavaṇṇanāsu.

Eseva nayoti kusalamūlādīdvādasatikasaṅgaho anavajjapakkho. “Vodāyati sujḥati etenāti vodāna”nti (netti. aṭṭha. 11) vaṃ netabbataṃ sandhāyāha.

Yathā hārauddeso kato, evaṃ nayānaṃ akarāṇe kāraṇaṃ, payojanañca vibhāvetukāmo “**kasmā panā**”tiādīmāha. **Nayehi** nayantarehi. **Sambhavadassanattanti** upapattidassanattamaṃ. Tattha sambhavo anuddesakkamena niddisane karaṇaṃ dassanaṃ payojanaṃ. Yadi hi ime nayā uppattiṭṭhānavasena asaṃkiṇṇā bhavēyyuṃ, hārā viya uddesānukkameneva niddisitabbā siyuṃ. Tathā hi vuttaṃ hārānaṃ uddesāvasāne “ete soḷasa hārā pakittitā atthato asaṃkiṇṇā”ti (netti. 1).

Yasmā panete mūlapadehi mūlapadantaraniddhāraṇena aññamaññaṃ te niggacchanti, tasmā ekasmiṃ niddiṭṭhe itaropi atthato niddiṭṭhoyeva nāma hotīti imassa atthassa dassanattamaṃ “**uddesānukkamena niddeso na kato**”ti.

Idāni tameva saṅkhepena vuttamatthaṃ vitthārena dassetuṃ “**paṭhamanayato hī**”tiādī vuttaṃ. Tattha taṇhādhiṭṭhacaritavasena dvidhā puggale vibhajivā tesaṃ vasena nandiyāvaṭṭanayaṃ nīharitvā puna te eva taṇhādhiṭṭhacarite catuppaṭipadāvibhāgena vibhajivā sīhavikkīlitaṃ nayassa sambhavo dassito, te eva catuppaṭipadābhedabhinne puggale puna ugghaṭitaññuādivibhāgena tidhā vibhajivā tipukkhalassa nayassa sambhavo dassito. Taṃ sandhāyāha “**paṭhamanayato...pe... niddiṭṭho**”ti.

Yasmā subhasukhasaññāhi lobho, niccasaññāya doso “iminā me anatto kato”ti āghātuppattito, attasaññāya moho gahito hoti. Tathā asubhasaññādīhi alobhādayo, tasmā dhammādhiṭṭhānavasena tatiyanayato dutiyanayassa sambhavo. Yasmā pana lobhe sati sambhavato lobhaggahaṇeneva doso gayhati. Lobho ca taṇhā, moho avijjā, tappaṭipakkhato alobhādosehi samatho gayhatī, amohena vipassanā, tasmā dhammādhiṭṭhānavaseneva dutiyanayato paṭhamanayassa sambhavoti imaṃ visesaṃ dīpetuṃ uddesānukkamena niddeso na katoti dassento “**dhammādhiṭṭhānavasena panā**”tiādīmāha.

Tenevāti tatiyanayato dutiyanayassa viya dutiyanayato paṭhamanayassapi sambhavato. Evaṃ pāliyaṃ puggalādhiṭṭhānavasena āgataṃ nissāya aṭṭhakathāyaṃ dhammādhiṭṭhānavaseneva nayaniggamo niddhāritoti ayameva viseso. **Yadi evanti** pāliyaṃ āgatappakārato aññenapi pakārena nayā niddhāretabbā, evaṃ sante yathā puggalādhiṭṭhānavasena paṭhamanayato tatiyanayassa, tatiyanayato dutiyanayassa sambhavo dassito, evaṃ dhammādhiṭṭhānavaseneva paṭhamanayato

tatiyanayadutiyanayānaṃ, dhammādhittānāvaseneva dutiyanayato tatiyanayassa sambhavo dīpetabboti imamattamaṃha “**dve hutvā...pe... siyā**”ti.

Tattha **nayoti** pacchā vuttadutiyanayo. **Atthatoti** atthāpattito, atthato labbhamānattā eva sarūpena na kathitoti attho. Idāni taṃ atthāpattiṃ ekantikam katvā dassetuṃ “**yasmā**”tiādi vuttaṃ. **Anuppaveso icchito** taṃtaṃnayamūlapadānaṃ nayantaramūlapadesu samavarujjhanato. Tathā hi “yattha sabbo akusalapakkho saṅgahaṃ samosaraṇaṃ gacchati, yattha sabbo kusalapakkho saṅgahaṃ samosaraṇaṃ gacchati”ti (netti. 3) ca vuttaṃ. **Ayaṅca atthoti** “nayānaṃ aññamaññaanuppaveso niggamo”ti ayaṃ duvidho attho. Piṭakānaṃ atthakathanam **peṭakam**, so eva upadesoti **peṭakopadeso**, upadesabhūtā pariyaṭṭisaṃvaṇṇanāti attho.

Ādito paṭṭhāyāti nayānaṃ aññamaññaanuppavesaniggamamattameva avibhāvetvā nayavicārassa paṭhamāvayavato pabhuti **vibhāvanā** dīpanā pakāsanā.

Dosadiṭṭhīti appassādatādidosagāhikadiṭṭhī, dosadassinoti attho. Te hi asamūhatānusayā, kāmesu ca ādīnavadassino. Idañhi nesam āṅgadvayaṃ attakilamathānuyogassa kāraṇaṃ vuttaṃ. **Natthi atthoti** yo rāgābhībhūtehi andhabālehi parikkappito diṭṭhadhammiko kāmehi attho, so madhubindugiddhassa madhulittasatthadhārāvālehanasadiso appassādo bahudukkho bahupāyāso bahuādīnavo savighāto saparilāho samparāyiko tathevāti sabbadāpi viññūjātikassa kāmehi payojanaṃ na vijjati. **Anajjhositāti** anabhībhūtā viharanti. **Tena vuccati sukhā paṭipadāti** tena mandakilesabhāvena tesam puggalaṇaṃ akicchena sijjhamānā vipassanā paṭipadā “sukhā paṭipadā”ti vuccati. **Ajjhositāti** abhinivīṭṭhā. **Ime sabbe sattāti** ime taṇhādiṭṭhicaritabhāvena dvidhā vuttā aparimāṇappabhedā sabbepi paṭipajantā sattā.

Sukhena paṭinissajjantīti kilese akicchena pajahanti. “**Imā catasso paṭipadā**”tiādi paṭipadānaṃ ettāvātāyaṃ, visayabhāvakkicesu ca byabhicārābhāvadassanaṃ. **Ayaṃ paṭipadāti** nigamaṇaṃ, ayaṃ paṭipadā yāya vasena sīhavikkīlītassa nayassa bhūmidassanaṃ cattāro puggalā niddhāritāti adhippāyo. **Catukkamaggena kilese niddisatīti** anantaram vakkhamānena āhārādicatukkamaggena dasavatthuke kilesasamūhe niddisati. **Catukkamaggena ariyadhammesu niddisatīti** tappaṭipakkhena paṭipadādicatukkamaggena ariyadhammesu bodhipakkhiyesu visayabhūtesu niddhāretvā kathetabbā.

Idaṅca pamāṇaṃ cattāro āhārāti imesaṃ vipallāsānaṃ pavattiyā pamāṇaṃ, yadidaṃ cattāro āhārā. Idaṃ vuttaṃ hoti – yāvadeva cattāro āhārā pariññaṃ na gacchanti, tāvadeva cattāro vipallāse vibhajanti. Yāvadeva cattāro vipallāsā appahīnā, tāvadeva cattāri upādānāni paribrūhantīti. Evaṃ sabbattha yathārahaṃ vattabbaṃ. Tenāha “**evaṃ imāni sabbāni dasa padāni**”ti. “Yojetabbāni”ti ca vacanaseso.

“**Abhijjhāya ganthati**”ti iminā abhijjhāyanaṃ eva ganthananti dasseti. Esa nayo sesesupi. **Papañcentoti** diṭṭhābhīnivesaṃ vitthārento.

Vippaṭṭisārūppattihetubhāvo kilesānaṃ āsavananti āha “**āsavanti**”ti. **Kim vippaṭṭisārāti** tena kilesānaṃ vītikamavattumaṃ vadati. Yasmā appahīnānusayasseva vippaṭṭisārā, na itarassa, tasmā “**ye vippaṭṭisārā, te anusayā**”ti vuttaṃ. Padadvayenapi phalūpacārena kāraṇaṃ vuttaṃ.

Paṭhamena padenāti yathāvuttesu dasasu suttapadesu paṭhamena padena. **Paṭhamāya disāyāti** tadatthasaṅkhātāya sīhavikkīlītassa saṃkilesapakkhe paṭhamāya disāya.

Itīti evaṃ, vuttanayenāti attho. **Kusalākusalānanti** yathāvuttaanavajjasāvajjadhammānaṃ. **Pakkhapaṭipakkhavasenaṃ** vodānapakkhatappaṭipakkhavasena. **Yojanāti** paṭhamadisādhībhāvena yutte katvā manasānupekkhanā. “Manasā volokayate”ti (netti. 4) hi vuttaṃ.

Tassāti disālōkanassa. Sotāpattiphalādīnaṃ pariyosānatā indriyavasena veditabbā. Yesañhi saddhādīnaṃ indriyānaṃ vasena satipaṭṭhānādīni sījḥanti, tesam vasena sotāpattiphalādīnaṃ pariyosānatā. Tattha sotāpattiphale saddhindriyaṃ pāripūriṃ gacchati. Sotāpanno hi saddhāya paripūrikārī. Sakadāgāmiphale vīriyindriyaṃ pāripūriṃ gacchati. Sakadāgāmī hi āradhāvīriyo uparimaggādhiḡamāya. Anāgāmiphale samādhindriyaṃ pāripūriṃ gacchati. Anāgāmī samādhismiṃ paripūrikārī. Aggaphale arahatte satindriyañca paññindriyañca pāripūriṃ gacchati. Arahā hi sativepullappatto, paññāvepullappatto cāti.

Apare panāhu – saddhābalena subhasaññāya pahānaṃ. Saddahanto hi paṭikkūlamānāsikāre kammaṃ karoti. Vīriyabalena sukhasaññāya pahānaṃ. Vīriyavā hi sukhasādaṃ abhibhavivā yonisomanāsikāramanuyuñjati. Samādhibalena niccasaññāya pahānaṃ. Samāhito hi saṅkhārānaṃ udayabbayaṃ pariggaṇḥanto aniccasaññāṃ paṭilabhati. Paññābalena attasaññāya pahānaṃ. Paññāvā hi saṅkhārānaṃ avasavattitaṃ sallakkhento attasuññataṃ paṭivijjhati. Sati pana sabbatthāpi icchitabbā. Tenāha “satim ca khvāhaṃ, bhikkhave, sabbatthikaṃ vadāmi”ti (saṃ. ni. 5.234; mī. pa. 2.1.13). Evaṃ catuvipallāsappahāyīnaṃ catunnaṃ indriyānaṃ pāripūriṭṭhānaṃ cattāri sāmāññaphalāni catuvipallāsamukhānaṃ catunnaṃ disānaṃ pariyosānāni vuttānti.

“**Lobho akusalamūla**”ntiādi lobhādīnaṃ hetuphalabhāvena sampayuttatāya dassanaṃ.

Tattha **manāpikenāti** yebhuyyavasena vuttaṃ. Amanāpikenāpi hi ārammaṇena vipariyesavasena lobho uppajjati. **Manāpikenāti** vā manāpikākārena. Phassavedanūpavicārarāgavitakkaṃ pariḷāhā saḡajātāpi labbhanti, asaḡajātāpi. “**Uppādo**”ti etena uppajjamānasaṅkhārāggaḡaḡanti “**uppajjati**”ti vuttaṃ. Uppādalakkhaṇasseva pana gaḡaḡe “uppajjati”ti na vattabbaṃ siyā. Na hi uppādo uppajjati, rāgajapariḷāhahetukatā ca tesam rāgassa taṇhāsabhāvattā. Taṇhā hi dukkhassa samudayo, yaṃ kiñci samudayadhammaṃ, sabbam taṃ dukkhanti. Tathā ca vuttaṃ “taṇhāsahajātavedanāya pana lobho saḡajātādipaccayehi ca paccayo”ti. Evaṃ iṭṭhārammaṇe uppānalobhasahagatasukhavedanāya udayo idha “**uppādo saṅkhatalakkhaṇa**”nti vutto, tassā vipariṇāmo “**vipariṇāmadukkhatā**”ti. Vipariṇāmaḡatthā ca udayāvattham vinā na hotīti sā taṃ nissāya uppajjantī viya vuttā “**uppādam... pe... dukkhatā**”ti.

Doso akusalamūlantiādisupi vuttanayānusārena attho veditabbo. Ayaṃ pana viḡeso – **ḡhitassa aññathattaṃ** nāma jarā, taṃ nissāya domanassassa uppajjanato vuttaṃ “**ḡhitassa...pe... dukkhadukkhatā**”ti. **Dosajapariḷāhahetukatā** jarāya dosabahulassa puggalassa nacirena jīraṇato veditabbā.

Vayoti saṅkhārānaṃ nirodho. Aniccatāvasena ca saṅkhatadhammānaṃ saṅkhāradukkhatāti vuttaṃ “**vaya...pe... saṅkhāradukkhatā**”ti. Tenāha bhagavā “yadaniccaṃ taṃ dukkha”nti (saṃ. ni. 3.15, 45, 76; paṭi. ma. 2.10). Mohajapariḷāhahetukatā vayalakkhaṇassa yebhuyyena sammohanimitattā, maraṇassa avijjāpaccayattā ca saṃsārapavattiyā veditabbā.

Alobhādīnaṃ paññādipāripūrihetukatā yathārahaṃ upanissayakoṭisahajātakoṭiyā ca paccayabhāvena veditabbā. Sabbe hi kusalā dhammā sabbesaṃ kusalānaṃ dhammānaṃ yathāsambhavaṃ paccayavisesā honti evāti. Abyāpādavittakkasannissayo upavicāro **abyāpādūpavicāro**. **Avihimsūpacārepi** eḡeva nayo.

Ayaṃ tipukkhalo nāma dutiyo nayo saddhiṃ disālōkananayena niddiṭṭhoti vacanaseso. “**Ime cattāro**”tiādi puggalādhīṭṭhānēna nandiyāvattassa nayassa bhūmidassanattaṃ āradhama. **Ime** yathāvuttapaṭipadācatukkassa vasena catubbidhā. **Visesenāti** diṭṭhitaṇhāsannissayatāvisesena. Diṭṭhicarito hi tikkhapañño, mandapañño ca sukhāya paṭipadāya khippābhiññāya ca dandhābhiññāya ca niyyātīti dvidhā vuttoti. Tathā taṇhācarito dukkhāya paṭipadāya khippābhiññāya ca dandhābhiññāya ca niyyātīti dvidhā vuttoti dassito cāyamattho. Tenāha “**dve honti diṭṭhicarito ca taṇhācarito cā**”ti.

Cattāro hutvāti sīhavikkīlītassa nayassa bhūmidassane cattāro hutvā ʃhitā, catuppaṭipadāvasena cattāro katvā vuttāti attho. **Tayo hontīti** tipukkhalassa nayassa bhūmidassane ugghaṭitaññūādivasena tayo bhavanti. **Tayo hutvāti** tathā tayo hutvā ʃhitā tayo katvā kathitā. **Dve hontīti** idāni nandiyāvaṭṭassa nayassa bhūmidassane dve bhavanti. **Ajjhosānanti** diṭṭhiajjhosānaṃ. **Abhinivesoti** taṇhābhiniveso. **Ahaṃkāroti** ahaṃmāno “aha”nti vā karaṇaṃ **ahaṃkāro**. Diṭṭhimānamaññānānaṃ vasena “ahamasmi”ti samanupassanā **mamaṃkāro**, mamāyanaṃ taṇhāggāho.

Dasapadāni “paṭhamā disā”ti kātābbānīti nandiyāvaṭṭassa nayassa “paṭhamā disā”ti karaṇīyāni, “paṭhamā disā”ti vavattapetābbānīti attho. **Samkhittena...pe... pakkhassāti** anekappabhedassapi kaṇhapakkhassa saṃkilesapakkhassa atthaṃ saṃkhittena saṅkhepena paṭipakkhe vattamāne vodānadhamme uddissa ñāpenti pakāsentī, paṭhamā kātābbāti yojanā. **Dasa padāni dutiyakānīti** taṇhādikā dasa koṭṭhāsā “dutiya disā”ti kātābbā. “Samkhittena...pe... kaṇhapakkhassā”ti ānetvā yojetabbaṃ.

Yonisoti upāyaso. **Yoniso manasikāro** aniccādivasena paṭhamamanasikāro. **Paññāti** sutacintāmayī paññā, jhānābhīññā ca. **Nibbidāti** nibbedhaññaṃ. Somanassadhammūpasañhitāṃ pamodādisahagataṃ cetasikasukhaṃ.

Kusalapakkhe cāti ca-saddo samuccayattho, tena ubhayapakkhato samuccayavasena catasso disā, na paccekanti dasseti.

Tesanti taṇhādīnaṃ, taṇhāya, taṇhāpakkhikānañcāti attho. Satipi anavasesato rāge pahīyamāne anavasesato avijjāpi pahīyateva, rāgassa pana cetovimutti ujupaṭipakkhoti dassanattaṃ **“rāgavirāgā”**ti vuttaṃ. **Avijjāvīrāgāti** etthāpi eseva nayo. Ayañca attho “āsavānaṃ khayā anāsavaṃ cetovimuttiṃ paññāvimutti”ntiādīnā (ma. ni. 1.438) āgatapāḷiyā atthavaṇṇanāvasena vuttā, idha pana “rāgavirāgā cetovimutti sekkhaphalaṃ, avijjāvīrāgā paññāvimutti asekkhaphala”ntiādīnā (netti. 51) vevacanasamāropāne āgatattā purimā anāgāmiphalaṃ. Tañhi kāmarāgassa ujuvipaccanīkato samādhipāripūriyāva visesato “rāgavirāgā cetovimutti”ti vuccati, pacchimā arahattaphalaṃ taṇhāya, avijjāya ca anavasesappahānato, paññāpāripūriyā ca “avijjāvīrāgā paññāvimutti”ti vuccati.

Tatthāti nandiyāvaṭṭanaye. **Tesūti** “cattāri padāni”ti vuttessu taṇhādīsū catūsū mūlapadesu. Idha samosaraṇanti saṅgaho vutto, so ca sabhāvato, sabhāgato ca hotīti taṇhādīni cattāri dassetvā **“tesu aṭṭhārasa mūlapadāni samosaranti”**ti vuttaṃ. **Samathaṃ bhajanti** sabhāvato, sabhāgato cāti adhippāyo. **Vipassanaṃ bhajanti** etthāpi eseva nayo. Nayādhiṭṭhānaṃ nayādhiṭṭhāne anuppaveso nayānaṃ navesu anuppaveso eva nāma hotīti āha **“tipukkhalo...pe... anuppavisanti”**ti.

Alobhāmohapakkhaṃ abhajāpetvā adosapakkhaṃ bhajāpetabbassa nandiyāvaṭṭasīhavikkīlītāmūlapadassa abhāvato adoso ekasuttakoṭiyā ekakova hotīti dassento āha **“adoso adoso evā”ti**. **Doso doso evāti** etthāpi eseva nayo. **Samosaranti** sabhāgato ca sabhāvato ca saṅgahaṃ gacchantīti attho.

Bhūmi gocaroti ca mūlapadāni eva sandhāya vadati. **Ekekaṃ nayaṃ anuppavisati** taṃtaṃmūlapadānuppavesato. Kusale vā viññāte akusalo paṭipakkho, akusale vā kusalo paṭipakkho **anvesitabbo** saṃvaṇṇiyamānasuttapadānurūpato upaparikkhitabbo. Anvesanā upaparikkhā “disālokana”nti vuccati. **So nayo niddisitabboti** tathā anvesitvā tehi dhammehi disā vavattapetvā so so nayo niddhāretvā yojetabbo. Yathā mūlapadesu mūlapadānaṃ anuppaveso saṃvaṇṇito, imināva nayena mūlapadato mūlapadānaṃ niddhāraṇāti veditābbāti dassento **“yathā ekamhi...pe... niddisitabbāni”**ti āha. **“Ekekasmiñhi”**tiādi kāraṇavacanaṃ.

Tattha **tatthāti** ekekasmiṃ naye. **Ekasmiṃ dhamme viññātetī** taṇhādīke ekasmiṃ mūlapadadhamme sarūpato, niddhāraṇavasena vā viññāte. **Sabbe dhammā viññātā hontīti**

tadaññamūlapadabhūtā sabbe lobhādayo viññātā nayassa bhūmicaraṇāyogyatāya pakāsā pākāṭā honti. “**Imesa**”ntiādi nayattayadisābhūtadhammānaṃ matthakapāpanena tiṇṇaṃ nayānaṃ kūṭaggahaṇaṃ, taṃ heṭṭhā vuttanayameva.

Puna “**imesū**”tiādi kammanayadvayassa vibhāgavibhāvanaṃ, taṃ viññeyyameva.

Nayasamuṭṭhānavāraṇṇanā niṭṭhitā.

Sāsanapaṭṭhānavāraṇṇanā

89. Saṅgahavārādīsūti saṅgahavārauddesaniddesavāresu. **Sarūpato na dassitaṃ**, atthato pana dassitamevāti adhippāyo. Tameva hi atthato dassanattaṃ udāharaṇabhāvena nikkhipati, yathā mūlapadehi paṭṭhānaṃ niddhāretabbanti. “**Aññamaññaṅgaho**”ti idaṃ mūlapadapaṭṭhānānaṃ aññamaññato niddhāretabbatāya kāraṇavacanaṃ “sati anuppavese tato viniggāmo siyā”ti. **Paṭṭhānanti** ettha **pa-**iti upasaggapadaṃ, taṃ pana “vibhatesu dhammesu yaṃ seṭṭhaṃ, tadupāgamu”ntiādīsu viya pakāratthajotakanti dassento “**pakārehi ṭhāna**”ntiādīsu viya pakāratthajotakanti dassento “**pakārehi ṭhāna**”nti āha. **Idhāti** imasmiṃ nettippakaraṇe. **Tassāti** desanāsaṅkhātassa pariyaṭṭisāsanassa. **Tathābhāvadīpananti** veneyyājñāsāyānurūpena pavattitattā saṃkilesabhāgiyatādippakārehi ṭhitabhāvena dīpetabbattā “dīpissatīti **dīpana**”nti katvā. **Paṭiṭṭhahanti** adhisīlasikkhādayo samudāyarūpena gahitā. **Etehi** saṃkilesadhammādīhi, saṃkilesadhammādīnaṃ adhisīlasikkhādīnaṃ pavattanupāyatā anupubbikathāya sāmukkaṃsīkāya dhammadesanāya dīpetabbā. **Tesanti** saṃkilesadhammādīnaṃ. Puna **tesanti** suttāni sandhāyāha.

Goṭṭhāti vajā. **Paṭṭhitagāvoti** gatagāvo. **Āgataṭṭhānasminti** sīhanādasuttaṃ (ma. ni. 1.156) vadati. Pavattagamanattā etthāti vacanaseso. Atha vā gacchati etthāti **gamaṇaṃ**, desanāññāssa nissaṅgavasena pavattagamanadesabhāvato paṭṭhānaṃ nāmāti attho. **Vomissāti** “saṃkilesabhāgiyañca vāsanābhāgiyañca”tiādīnā dukatikacatukkabhāvena missitā.

Samkilesabhāve ñāpetabbe pavattaṃ, taṃ visayaṃ katvā desitanti attho, atthamattavacanañcetanaṃ, saṃkilesabhāge bhavanti saddanayena attho veditabbo. “**Samkilesabhāgika**”ntipi pāṭho, tassa saṃkilesabhāgo etassa atthi, saṃkilesabhāge vā niyuttaṃ, saṃkilesabhāgassa vā pabodhanasīlaṃ **saṃkilesabhāgikaṃ**, tadeva saṃkilesabhāgiyanti attho veditabbo. **Padālanam** samucchindanaṃ, padālanasannissayatā cettha padālanaggahaṇena gahitāti daṭṭhabbaṃ. **Asekkheti** asekkhadhamme. **Tesam vomissakanayavasena**ti tesam saṃkilesabhāgiyādīnaṃ catunnaṃ paṭikkhepāpaṭikkhepavomissakanayavasena.

“**Tāni pana cha dukā**”tiādīnā padānaṃ gahaṇaparicchedato vavattāpanataṃ vatvā parato “sādhāraṇāni katāni”ti padassa atthasamvaṇṇanāya sayameva sarūpato dassessati. “**Anuddharaṇe kāraṇam natthi**”ti vatvā uddharaṇe pana kāraṇam dassento “**tathā hi vakkhati**”tiādīnā pālimāhari. **Vodānam nāma** saṃkilesato hoti saṃkiliṭṭhasseva vodānassa icchitattā. Yasmā vodānaṃ tadaṅgādivasena saṃkilesato visujjanaṃ, tasmā “**taṃ pana atthato vāsanābhāgiyādi eva hoti**”ti vuttaṃ. Tattha tadaṅgavikkhambhanehi vodānaṃ vāsanābhāgiyādivasena hoti, samucchedaṭṭippassaddhīhi vodānaṃ nibbedhabhāgiyavasena, asekkhabhāgiyavasena vodānaṃ paṭippassaddhiyā eva veditabbam. Yāyaṃ desanā rāgādibhāginī siyā, sā **saṃkilesabhāgiyā**. Yāyaṃ desanā cāgādibhāginī siyā, sā **vāsanābhāgiyā**. Yā pana āpattivicchedanī sāvasesaṃ, anavasesaṃ, sā **nibbedhabhāgiyā, asekkhabhāgiyā ca**.

“Taṇhāsaṃkilesabhāgiyaṃ sutta”ntiādīnā paṭhamameva saṃkilesabhāgassa dassitattā vuttaṃ “**saṃkilesa tividho...pe... visayadassanattaṃ āraddha**”nti. Bhavarāgo **bhavapatthanā**. **Uppajjatīti** na vigacchati. **Tatra tatra bhaveti** yadi vā kāmabhāve, yadi vā rūpabhāve, yadi vā

arūpabhāve. **Padantarasaṃyojanavasenā**ti dukanayeneva padantarena yojanavasena. **Missitāni katānī**ti saṃsaṭṭhāni katāni.

Ekakacatukkavasena dassitabbāni padāni eva gahetvā āvuttinayadassanavasena missetvā avasiṭṭhadukavasena, tikacatukkavasena ca itare aṭṭha paṭṭhānabhāgā dassitāti āha “**tāniyeva yathāvuttāni aṭṭha suttāni**”tiādi. **Cattāro ekakāyeva** pāḷiyaṃ ādito dassitā. **Chadukā** pāḷiyaṃ āgatā cattāro, aṭṭhakathāyaṃ dveti. **Cattāro tikā** pāḷiyaṃ āgatā dve, aṭṭhakathāyaṃ dveti. Dve catukkā pana aṭṭhakathāyameva āgatā. “**Pāḷiyaṃ anāgatā**”ti idaṃ sarūpato anāgamaṃ sandhāya vuttaṃ, nayato pana āgatabhāvo dassito eva. Ye panettha pāḷiyaṃ anāgatā, tesam udāharaṇāni parato dassayissāma.

Soḷasahīti soḷasavidhehi. Na hi tāni suttāni soḷaseva, atha kho soḷasappakārānīti mūlagaṇaṇaṃ ṭhapetvā kāraṇasuttaladdhena saṅkhāragabbhena tadanurūpo yo gaṇanavittāro, tassa paṭṭhānāvidhi paṭṭhānāyā. **Iminā...pe... natthī**ti yathāvuttapaṭṭhānavinimutto pariyattisāsanappadeso na vijjati yathārahaṃ taṃtaṃpaṭṭhānabhāvena pavattatāti dasseti. Yadi suttageyyādi navavidhaṃ pariyattisāsaṇaṃ yathāvuttapaṭṭhānavaseneva pavattaṃ, tattha kathamidha anidassitānaṃ gāthādīnaṃ saṃkilesabhāgiyādibhāvo gahettabboti pañhaṃ sandhāya “gāthāya gāthā anuminitabbā”tiādi pāḷi pavattatāti dassetuṃ “**kathaṃ panā**”tiādi vuttaṃ.

Tattha **ayaṃ gāthā viyā**ti “kāmandhā jālasañchannā, manopubbaṅgamā dhammā, uddhaṃ adho sabbadhi vippamutto, yassa selūpamaṃ citta”ntiādinā idha udāhaṭagāthā viya. **Gāthā**ti aññāpi tepiṭake buddhavacane āgatā idha anudāhaṭā. Saṃvaṇṇanākāle sammukhībhāvena “ayaṃ gāthā viyā”ti vuttā yā kāci gāthā “saṃkilesabhāgiyā”ti vā “saṃkilesavāsanānibbedhaasekkhabhāgiyā”ti vā **anuminitabbā** nayaggāhena nāpetabbāti dassetuṃ vuttaṃ “**saṃkilesa...pe... jānitabbāti attho**”ti. **Vā**-saddo hi idha avuttavikappanatto. **Sesapadesū**ti veyyākaraṇasuttapadesu.

90. Ariyānaṃ dhammanti cārittavārittabhedaṃ sīlacāraṃ. Ekantakaraṇīyassa akaraṇampi **vītikamo** eva.

Avijjādike saṃkilesadhamme tadaṅgādivasena dhunāti **dhonā** vuccati paññā. **Paccavekkhitvā paribhuñjanapaññā**ti pana pakaraṇena avacchinnatā vuttaṃ. **Taṃ atikkamivā carantoti** paccayānaṃ apaccavekkhitvā paccayaparibhoge ādīnaṃ apassanto iṇaparibhogavasena paribhuñjanto na parimuccati nirayādidukkhato, vaṭṭadukkhato ca.

Kukkujanakaṃ nāma kadaliyā pupphanāli. **Parābhavāyā**ti vināsāya. **Tathā**ti yathā phalapākantā kadalī, evaṃ veḷunaḷāpi osadhijātikattāti upasaṃhārattho tathā-saddo. Tenāha “**phalaṃ veḷuṃ phalaṃ naḷa**”nti.

Sukhettepī pi-saddena ko pana vādo ūsarādidosaduṭṭhesu khettesūti dasseti. “**Chakaṇa...pe... attho**”ti etena yathāvuttaabhisankharaṇābhāvena bījadosaduṭṭhanti dasseti.

91. Sajjīnti sañjitaṃ. **Aparikkhateti** paṭipakkhehi dhammehi avikkhambhite aroge.

Yāya samannāgato puggalo “kiṃ suttaṃ mayā, kiṃ vā suṇāmi”ti kusalaṃ gavesī carati, sā dhammojapaññā **kissavā** nāma. **Dubbhāsītā**ti duṭṭhu bhāsītā, issāmacchariyadosādīhi duṭṭhā vā bhāsītā.

92. Vicināti visesato cināti pasavati.

Vigatabhūtāti vigatasacca. Tenāha “**alīkavādī**”ti.

Avajātaputtāti lāmakaputta. Bhagavato sāsane pabbajitvā nihīnavuttitaṃ sandhāya vadati.

Nerayikoti niraye nibbattanako. Pāpakammīno papatanti etthāti **papatam**, narakam.

Taṇhādīnaṃ sabhāvabhedatoti taṇhādīṭṭhiduccarītaṇaṃ taṇhāyanaviparītadassanaduṭṭhacaritatāsāṅkhātasabhāvavibhāgato. **Avatthābhedatoti** taṇhāya chandapemalobharāganandīpipāsāmuccādayo, diṭṭhiyā gāhapaṛāmāsamicchābhini vesavisukavipphanditaviparītadassanādayo, duccarītassa tīracchānapettivīsayaasurayonigāmitādayo avatthāvisesā. **Ca-saddena tesam** kāmataṇhādirūpataṇhādiattānudiṭṭhādisassatagāhādīkāyaduccarītādi- paṇātipātādippakārabhedo saṅgayhati.

93. Vipulanti uḷāraṃ, telādīhi ceva dhanadhaññādīhi ca pahūtasannicayanti attho. **Sambādhāti** janasaṃmaddasaṅghāṭā.

Daṇḍena na himsatīti ettha vuttaṃ yaṃ daṇḍanidhānaṃ, taṃ vaṭṭavivaṭṭanissitaṃ. Tadubhayassāpi phalaṃ dassento “**so puggalo**”tiādīmāha.

94. Kiñcati taṃsamaṅginaṃ vimaddatīti **kiñcanaṃ**, rāgādi, palibundhati kusalappavattiṃ nivāretīti **palibodho**, rāgādiyeva, kiñcanaṃeva palibodho **kiñcanapalibodho**. Atha vā kiñcanañca palibodho ca **kiñcanapalibodho**, āmisakiñcikkhañca rāgādisaṃkilesa cāti attho.

Visitanti vilomaṃ, visamaṃ kiriyanti attho. **Rājabhaṇḍanti** orodhe sandhāya vadanti.

Yācayogoti yācanayogo, yācakānaṃ manorathaparipūraṇato. Tenāha “**yācītabbayutto**”ti. **Dānayuttoti** satataṃ dānakiriyāsamaṅgī. **Dānasaṃvibhāgaratoti** ettha **dānaṃ** nāma atthikānaṃ yathādhīppāyapaṭiyattapariccāgo, **saṃvibhāgo** attanā paribhuñjītabbato appamattakatopi saṃvibhajanaṃ. **Imehi kho...pe... hotīti** ettha hotīsaddena “samannāgato”ti padaṃ sambandhitabbaṃ, na “sotāpanno”ti dassetuṃ “**sotāpanno...pe... hotī**”ti vuttaṃ. Tehi dhammehi samannāgamo hi idha vidhīyati, na sotāpannabhāvo, tena sotāpannalakkhaṇamete dhammā, na sotāpannabhāvalakkhaṇanti dasseti. Tathā hi “**sotāpannena...pe... labbhamānataṃ dasseti**”ti vuttaṃ.

95. Lapati katheti etenāti **lapanam**, oṭṭhaṃ.

97. Muditoti dibbasampattiyā pamudito.

99. Kiñcāpi **udatārīti** taraṇakiriyā atītabhāvena vuttā, taraṇameva pana gahetvā āha “**oghataraṇassa ariyamaggakiccattā**”ti. Evaṃ **vīppamutto**, **vimuttoti** ca ettha muccanakiriyāyapi vattabbaṃ.

100. Pātu-saddapubbako bhavanti-saddo siyā uppādapariyāyo siyā āvibhāvapariyāyoti “**pātubhavanti**”ti padassa “uppajjanti, pakāsentī cā”ti attho vutto. **Pātubhūtaḍḍhammassāti** uppannabodhipakkhiyadhāmma, vibhūtaḍḍhasaccadhāmma vā. **No kalloti** na vutto. **Sahetudhammanti** ettha paccayuppannadhammāva gahitā, na paccayadhāmmāti? Nayidamevaṃ daṭṭhabbaṃ paccayadhāmmānaṃpi paccayuppannabhāvānavattanato. Atha vā **sahetudhammanti** paccayuppannadhammo padhānabhāvena vutto, paccayadhammo pana guṇabhāvenāti evamettha ubhayaṃ vuttabhāvo veditabbo.

Āraññakanti āraññakaṅgasamannāgataṃ. **Aññātoti** paricayavasena na ñāto, asaṃsaṭṭhoti attho. Tenāha “**niccānavo**”ti.

Byāpādavīhīmsāvītakavirahe veriparisāṅkāya abhāve akittiparimuttīti evamādīhipi kāraṇehi

kodhappahānena **sukhaṃ** supati. Kodhapariḷāhābhāvo pana pākaṭataroti āha “**kodha...pe... sayatī**”ti. **Visamūlassāti** ettha visasarikkhatāya “**visa**”nti dukkhaṃ adhippetanti āha “**dukkhavipākassā**”ti. **Sukhanti** cetasikasukhaṃ. Akkuṭṭhassa paccakkosītvā ca paccakkosanahetu uppajjatīti yojanā.

101. Sallubbāhanaṃ salluddharaṇaṃ.

Visayabhedena, pavattiākārabhedena ca anekabhedattā kāmasaññāya vuttaṃ “**yāya kāyaci**”ti.

Dānamukhenāti dānena mukhabhūtena, dānaṃ pamukhaṃ katvāti attho.

“**Ariyamaggasampāpanavasenā**”ti iminā anukampānuddayānaṃ ekantānavajjatameva vibhāveti. “Anukampā”ti padassatthavivaraṇaṃ “**karuṇāyanā**”ti, itarassa “**mettāyanā**”ti.

102. Pakatiādīti ādisaddena aṇuissarapajāpatipurisakālādhiṭṭhāyakāriādike saṅgaṇhāti.

Kāmesūti kāmaguṇesu rūpādivisayesu.

Bahalakilesatāyāti bahulakilesabhāvena. **Pubbahetumandatāyāti** vivaṭṭūpanissayassa kusalassa akatattā.

Cittavūpasamabhāvanāyāti cittavūpasamakārabhāvanāya samathavipassanāya.

Parissayā sīlādiparipūraṇassa paribandhabhūtā kilesā eva. Anariyā paññāsīsaṃ ukkhipitvā ṭhātumeva na sakkonṭīti vuttaṃ “**ñāṇasirena adhosirā hutvā**”ti.

103. Bhagavato, bhikkhusaṅghassa ca vasanayogyabhāvo, tehi nivutthabhāvo ca tassa sātisayo vaṇṇoti vuttaṃ “**paṭhamagāthāya jetavanassa vaṇṇaṃ kathetvā**”ti. Vuttañhetam –

“Gāme vā yadi vāraññe, ninne vā yadi vā thale;

Yattha arahanto viharanti, taṃ bhūmirāmaṇeyyaka”nti. (dha. pa. 98; theragā. 991);

Idha **dhammasaddo** samādhipariyāyo “evaṃdhammā te bhagavanto”tiādīsu (dī. ni. 2.13; ma. ni. 3.198; saṃ. ni. 5.378) viyāti āha “**dhammoti samādhi**”ti **samādhipakkhikā dhammā** sativāyāmā.

Nānugaccheyyāti nānutaseyya. Anutasanameva hi taṇhādīṭṭhīhi anugamaṇaṃ. **Paṭivipasseyyāti** vipassanāsammasanamāha. Yamakato, hi khaṇikato, paṭipāṭito ca sammasanaṃ vipassanāyapi sammasanato paṭivipassanā nāma. Sā hi vipassanāya diṭṭhiuggahāṇanamānasamuggahāṇanikantipariyādānahetutāya visesato paṭipakkhena asaṃhīraasaṃkuppānahetubhūtā paribrūhanā hoti. “**Punappunaṃ...pe... appento**”ti etena nibbānārammaṇadhammānubrūhanaṃ yathā “brūhetā suññāgārāna”nti (ma. ni. 1.64) dasseti.

Yaṃ kiñci apadisitvā paṭiññādānaṃ **saṅgaro**. So pana attano kiccavisesaṃ apadisitvā mittasanthavavasena vā kālāgamaṇaṃ apadisitvā kiñcikkhānuppādānena vā paṭibāhakaṇaṃ apadisitvā balaggabodhavasena vā siyāti tassa mittakaraṇādipariyāyatam sandhāyāha “**saṅgaroti...pe... nāma**”nti. **Evaṃ paṭipannattāti** evaṃ aniccaaññāmukhena tiyaddhakesu saṅkhāresu appamādappaṭipattiyā paṭipannattā.

Dibbacakkhu suvisuddhanti sāvasesā desanāti āha “**yaṃ sacchikarotī**”ti. Rūpāyatanañhettha adhippetam.

104. Antanti saikhārānaṃ pārimantabhūtaṃ. Vedānanti maggañāṇavedānameva.

Arahattādhigamena **antaṃ** pariyoṣānaṃ **gatattā**. Kammavipākavaṭṭānaṃ, kilesavaṭṭassāpi ca ussadena upacayena **ussadā**, rāgādayo.

Sukkabhāsatāya **sukkā**, abhivisiṭṭhaggahā. Sabbāni vā tārakarūpāni **sukkā**. **Vindatīti** upalabhati, paṭivijjhatīti attho.

“**Ajjhattaṃ vipassanābhiniveso hotī**”ti idaṃ “sakesu dhammesū”ti pāragubhāvassa visesitattā vuttaṃ, tañca kho abhiniveseneva desitaṃ. “Sabbāṃ, bhikkhave, abhiññeyya”nti (saṃ. ni. 4.46; paṭi. ma. 1.3) vuttaṃ. Pāragutā ca tesāṃ khandhānaṃ pariññābhisamayavasena hoti. Tato ca nesāṃ hetubhūtasamudaye, tadappavattilakkhaṇe nirodhe, nirodhagāminiyā paṭipadāya ca pahānasacchikiriyābhāvanābhisamayapāripūrivāsena itarasaccesupi pāragubhāvo vutto eva hoti. Sabbaso hi sakaattabhāvabodhenapi catusaccābhisamayo hotiyeva. Vuttañhetāṃ “imasmimyeva byāmamatte kaḷevare sasaññimhi samanake lokañca paññapemi, lokasamudayañcā”tiādī (saṃ. ni. 1.107; a. ni. 4.45). Atha vā **sakesu dhammesūti** attano dhammesu. Attadhammā nāma atthakāmassa kulaputtassa sīlādīdhammā. Sīlasamādhipaññādayo hi vodānadhammā ekantahitasukhasampādanato purisassa sakadhammā nāma, na anathāvahā saṃkilesadhammā viya paradhammā. Tesāṃ sīlādīnaṃ pāripūriyā pāraṃ pariyaṇṭaṃ gatoti **pāragū**. “**Akkula pakkula**”iti evaṃ vihiṃsanakapayogaṃ. **Ajakalāpena** (udā. 7) hi tadā bhagavantaṃ bhāsāpetukāmena kataṃ yakkhagajjitaṃ “akkula pakkula”iti iminā ākārena sattānaṃ sotapathaṃ agamāsi, tasmā taṃ “**akkulaṃ pakkulakaraṇa**”nti vuttaṃ.

Nābhinandatīti “ayaṃ maṃ daṭṭhuṃ āgatā”ti na tussati. Yasmā pana “bhagavato bhāsitaṃ abhinandī”tiādīsu (ma. ni. 1.88) viya sampaṭicchanaṭṭhopi abhinandasaddo hoti, tasmā vuttaṃ “**cittena na sampaṭicchati**”ti. **Na socatīti** “mayā asammoditā gacchati”ti na cittasantāpaṃ āpajjati. “**Saṅgā saṅgāmajjīṃ mutta**”nti idaṃ abhinandasocanānaṃ abhāvassa kāraṇavacanāṃ.

Tenāti udake nhānena. Tenevāha “na udakena suci hotī”ti. Tassattho – udakummujjanādīnā neva sattānaṃ suci pāpato suddhi nāma hotīti. Udakummujjanādīni hi idha uttarapadalopena “**udaka**”nti vuttaṃ. **Udakenāti** vā ummujjanādīkiriyaśādhanaḥhūtena udakena sattānaṃ suci pāpasuddhi na hotīti. Atha vā sucitena yathāvuttana udakena pāpamalato suddho nāma satto na hotīti. Yadi siyā, sabbesameva macchabandhānaṃ pāpasuddhi siyā. Tenāha “**bahvettha nhāyatī jano**”ti. Mātughātādīpāpakammakārīnaṃ, aññesañca gomahiṃsādīnaṃ udakaṃ orohantānaṃ antamaso macchakacchape upādāya sabbesampi pāpasuddhi siyā, na panevaṃ hoti. Kasmā? Nhānīyapāpahetūnaṃ appaṭipakkhabhāvato. Yañhi yaṃ vināseti, so tassa paṭipakkho. Yathā āloko andhakārassa, vijjā avijjāya, na evaṃ nhānaṃ pāpassa, tasmā niṭṭhamettha gantabbaṃ “na udakena suci hotī”ti. Yena pana suci hoti, taṃ dassetuṃ “**yamhi saccañcā**”tiādī vuttaṃ. Tatha **saccanti** vacīsaccañca viratisaccañca. Atha vā **saccanti** ñāṇasaccañceva paramatthasaccañca. **Dhammoti** seso ariyadhammo. Saccassa panettha visuṃ gahaṇaṃ tassa bahukarātādassanattamaṃ. Sesāṃ suviññeyyameva.

Jātibalānisedhakanti jātimattabrāhmaṇānaṃ bhovādīkānaṃ paṭisedhakaṃ. Jātivādassa vā nisedhakaṃ, “na jaccā brāhmaṇo hotī”ti (su. ni. 655) hi vuttaṃ. Thero hi tathāvādena te aniggaṇṭhantopi niggaṇṭhanto viya hotīti katvā vuttaṃ.

105. Vimuttiyanti anupādisesanibbānadhātuyāṃ.

Savāsananti ettha khīṇāsavassāpi akhīṇāsavasadisakāyavacīpayogahetubhūtā santāne kilesabhāvanā **vāsanā** nāma āyasmato pilindavacchassa (a. ni. aṭṭha. 1.1.215; dha. pa. aṭṭha. 2. pilindavacchattheravatthu) vasalavohāro viya, saha vāsanāyāti **savāsanāṃ**, bhāvanapūṃsakañcetāṃ “visamaṃ candimasūriyā parivattantī”tiādīsu (a. ni. 4.70) viya. Yathāvuttavāsanampi asesetvāti attho. Kummaggapariharaṇavasena maggasampaṭipattīti magge kusalo amaggepi kusalo eva hoti. Bhagavā pana sabbaññutāya sabbattheva kusaloti āha “**magge ca amagge ca kovido**”ti.

106. Tamena yuttoti yathāvuttatamo tassa atthīti **tamo**, puggalo. Appakāsabhāvena ʘitā khandhāva tamo. **Ālokabhūtoti** jātiguṇāloko, pākaṭaguṇoti attho.

Kilesamayam bandhanam “daḥha”nti vadanti. Yato saccāni paṭivijjhantā buddhāva nam chindanti, na aññe.

Ducchedanatthena satipi daḥhabhāve sithilavuttitam tassa dīpetum “**bandhanabhāvampī**”tiādīmāha. Tena “aho sukhumataram kho, bhikkhave, mārabandhana”nti vuttam.

107. Yadipe cetanā kusalākusalasādhāraṇā, apuññābhisankhāro idhāhippetoti tassa vasena attham dassento “**akusalacetanāvasena ceteti**”ti āha. **Cetanam** abhisandahanam, cittassa byāpārāpattibhāvena pavattīti attho. Yasmā pana cetanā yadā viññattim samuṭṭhāpeti, tadā diguṇussāhādiguṇavāyāmā viya hutvā pākaṭam payogam nipphādeti, tasmā “**pakappeti**”ti vuttā. Pākaṭappayogakappanañhettha pakappanam adhippetam. Tenāha “**tameva pakappeti**”ti. Paccayaṭṭho idha ārammaṇatthoti vuttam “**pavattiyā paccayo hoti**”ti.

108. Yathā jalasamuddassa vīcisamuṭṭhānavasena labbhamāno vego “vīcimayo”ti vuccati, evam cakkhusamuddassāpi rūpāvabhāsanavasena labbhamāno vego “**rūpamayo**”ti vutto. Eseva nayo sesesupi. **Āviñchanatoti** ākaḍḍhanato, ākaḍḍhanañcetta santānassa tanninabhāva hetutāya daṭṭhabbam.

Samudanam kilesatemanam, avassavahetutā, kilesānam ūmiādisadisatā samāvaṭṭanena sattānam anathāvahatāya veditabbā. Uparūpariveguppattiyā upagatassa uṭṭhātum appadānena, guṇasāravinaśanena ca kodhupanāhādīnam ūmiādisadisatā daṭṭhabbā.

Abhimukho nandatīti tadārammaṇam sukham somanassam sādiyanto sampaṭicchati. **Abhivadatīti** taṇhābhinivesavasena abhinivissa vadati. Tañhissa abhinivesam dīpetum “**aho sukha**”ntiādi vuttam. Ajjhosānam adhimuccanabhūṭāya taṇhāya taṇhāvattukassa anupavisitvā āveṇikatākaraṇanti āha “**ajjhosāya tiṭṭhatīti gilitvā pariniṭṭhapetvā**”ti.

109. “**Kasmā**”tiādīnā santāpadukkhānam asuppatikāratam āha “**yena vā pakārenā**”ti. **Yenāti** yena vā kāmajjhosānadiṭṭhijjhosānabhūtena micchābhinivesappakārena. Gahaṭṭhapabbajitā tathārūpam katvā attano vaḍḍhiṇca maññanti. **Avaḍḍhi eva pana hoti** tassa pakāressa vaḍḍhiyam anupāyabhāvato ca upāyabhāvato ca avaḍḍhiyam. **Tathāpīti** tattha tattha icchāvighātam pāpuṇantopi. Yasmā ito bāhirakā sabbena sabbam bhavanissaraṇam appajānanto mandakilesam dīghāyukam sukhabahulam ekaccaṇ bhavam teneva mandakilesādibhāvena “nibbāna”nti samanupassanti, tasmā bhavena bhavavippamokkham vadantīti.

Bhavadiṭṭhisahagatā taṇhā purimapade uttarapadalopena **bhavataṇhāti** vuttāti āha “**bhavataṇhātiādīsu viyā**”ti.

Yatthāti yasmim bhava.

Tato evāti bhūtaratīyā eva. **Aññamaññañhi sattānam chandarāgo balavā hoti.** **Anavasesatoti** anavasesena, na kiñci sesetvā.

Samsārasotassa anukūlabhāvena gacchatīti **anusotagāmī**. Tasseva paṭikkūlavasena nibbidānupassanādīhi pavattatīti **paṭisotagāmī**, acalappasādādisamannāgamena ʘitasabhāvoti attho.

110. “Palabbhati, nikhajjati”tiādīsu viya upasaggo padavaḍḍhanamattanti āha “**abhijātikoti**

jātiyo”ti. Kaṇhadhammasamannāgatattā vā **kaṇho**. Paṭhamavayepi majjhimavayepi pāpasamaṅgī hutvā ṭhito kaṇhadhamme **abhijāyati**, pacchāpi pāpaṃ pasavatīti attho. **Sukkoti** vā ettha vuttavipariyāyeneva attho veditabbo.

111. Purimasminti purimasmim̐ pade. Visaye bhummaṃ tattha deyyadhammassa patiṭṭhāpanato. **Dutiye adhikaraṇe**, tadadhikaraṇaṅhi nibbānanti. Gahaṭṭhapabbajitakiccesu vā visiṭṭhadhammadassanattamaṃ paccayadānārahattānaṃ samadhuratāniddeṣo. Atha vā **yena yena pana vatthunāti** rūpārūpanirodhādīnā taṇhāvattunā. **Amarāvikkhepavatthuādīnāti** ettha **ādi**-saddena subhasukhādīmicchābhīnivesavattumaṃ saṅgaṇhāti. Yathā vā taṇhādīṭṭhiduccarītānaṃ vasena saṃkilesabhāgiyassa suttassa vibhāgo, evaṃ samathavipassanāsucaritavasena taṇhāvodānabhāgiyādisuttavibhāgoti dassetuṃ pāliyaṃ **“taṇhā...pe... niddisitabba”**nti vuttaṃ.

Idaṃ evaṃ pavattanti yathā ducintitādivasena bālo hoti puggalo, evaṃ tassa ducintitacintitādībhāvanāvasena pavattaṃ idaṃ saṃkilesabhāgiyaṃ nāma suttanti pubbe saṃkilesadhammavibhāgena vuttaṃ idāni sāmāññato saṅgahetvā vadati. **Idaṃ vāsanābhāgiyaṃ suttanti** etthāpi iminā nayena attho veditabbo.

Kilesaṭṭhānehīti kilesānaṃ pavattiṭṭhānehi. **Kilesāvattahāhīti** kilesānaṃ pavattiākāravisesehi. **Kāmarāgādīhi saṃyujjati** kāmarāgādīhetu kammavipākādīnā. Satipi tesamaṃ kālantaravuttiyaṃ saṃyutto nāma hoti, yato kāmarāgādāyo **“saṃyojana”**nti vuccanti. **Upādiyatīti** daḷhaṃ gaṇhāti pavatteti. Sesamaṃ vuttanayattā, uttānattā ca saṃvaṇṇitaṃ.

112. Udāharaṇavasenāti nidassanavasena, ekadesadassanavasenāti attho. Sakalassa hi pariyaṭṭisāsanassa soḷasahi paṭṭhānabhāgehi gahitattā. Yathā tadekadesānaṃ soḷasannampi paṭṭhānabhāgānaṃ gahaṇamaṃ udāharaṇamattaṃ, tesamaṃ pana soḷasannaṃ ekadesaggahaṇamaṃ udāharaṇanti kimettha vattabbaṃ. Tena vuttaṃ **“ekadesadassanavasenāti attho”**ti. Kasmā panettha pāliyaṃ paṭṭhānassa ekadesova udāhaṭo, na avasesoti? Nayanidassanattamaṃ. Iminā nayena avasesopi paṭṭhānabhāvo veditabboti.

Tattha **“appampi ce saṃhita bhāsamāno...pe... sa bhāgavā sāmāññassa hotī”**ti (dha. pa. 20) idaṃ vāsanābhāgiyaṃ asekhabhāgiyaṃ. Ettha hi **“appampi ce saṃhita bhāsamāno”**ti idaṃ vāsanābhāgiyaṃ, **“sa bhāgavā sāmāññassa hotī”**ti idaṃ asekhabhāgiyaṃ.

Tathā **maghadevasuttaṃ**. Tattha hi **“bhūtapubbaṃ, ānanda, imissāyeva mithilāyaṃ maghadevo nāma rājā ahoṣi dhammiko dhammarājā dhamme ṭhito mahādhammarājā, dhammaṃ carati brāhmaṇagahapatikesu negamesu ceva janapadesu ca, uposathaṅca upavasati cātuddasiṃ, pañcadasiṃ, aṭṭhamiṅca pakkhassā”**tiādi (ma. ni. 2.308), idaṃ vāsanābhāgiyaṃ. **“Idaṃ kho panānanda, etarahi mayā kalyāṇamaṃ vattaṃ nīharitaṃ ekantanibbidāya virāgāya nirodhāya upasamāya abhiññāya sambodhāya nibbānāya saṃvattatī”**ti (ma. ni. 3.189) idaṃ asekhabhāgiyaṃ. **“Pamādaṃ appamādena, yadā nudati paṇḍito”**ti (dha. pa. 28) idaṃ nibbedhabhāgiyaṃ. **“Paññāpāsāda...pe... avekkhatī”**ti (dha. pa. 28) idaṃ asekhabhāgiyanti idaṃ nibbedhabhāgiyaṃ asekhabhāgiyaṃ.

Tathā **“tīṇimāni, bhikkhave, indriyāni”**ti (saṃ. ni. 5.493) suttamaṃ. Tattha **“tīṇimāni, bhikkhave, indriyāni. Katamāni tīṇīti? Anaññātāññassāmītindriyaṃ aññindriya”**nti idaṃ nibbedhabhāgiyaṃ, **“aññātāvindriya”**nti (saṃ. ni. 5.493) idaṃ asekhabhāgiyaṃ.

Raṭṭhapālasuttaṃ (ma. ni. 2.293 ādayo) saṃkilesabhāgiyaṃ vāsanābhāgiyaṃ asekhabhāgiyaṃ. Tattha hi **“ūno loko atitto taṇhādāso”**tiādinā (ma. ni. 2.306) saṃkilesa vibhatto, **“eko vūpakaṭṭho”**tiādinā (ma. ni. 2.299) asekhadhammā, itarena vāsanādhammāti.

“Dhamme ca ye ariyapavedite ratā, anuttaro te vacasā manasā kammunā ca;

Te santisoraccasamādhisaññhitā, sutassa paññāya ca sāramajjhagū'ti. (su. ni. 332);

Idaṃ vāsanābhāgiyañca nibbedhabhāgiyañca asekkhabhāgiyañca. Ettha hi “dhamme ca ye ariyapavedite ratā”ti ayaṃ vāsanā, “anuttarā...pe... saññhitā”ti ayaṃ nibbedho, “sutassa paññāya ca sāramajjhagū”ti asekkhadhammā.

Tathā “saddho sutavā niyāmadassī”ti gāthā (su. ni. 373). Tattha hi “saddho sutavā”ti vāsanā, “niyāmadassī vaggagatesu na vaggasāri dhīro, lobhaṃ dosaṃ vineyya paṭigha”nti nibbedho, “sammā so loke paribbajeyyā”ti asekkhadhammā.

Sabbāsavasamaṃvaro parissayādīnaṃ vasena sabbabhāgiyaṃ veditabbaṃ. Tattha hi saṃkilesadhammā, lokiyasucaritadhammā, sekkhadhammā, asekkhadhammā ca vibhattā. Asabbabhāgiyaṃ pana “passaṃ passaṭī”tiādikaṃ (ma. ni. 1.203) udakādiānūvādanavacanāṃ veditabbaṃ. Evametasmaṃ soḷasavidhe sāsanaṃpaṭṭhāne ete taṇhādivasena tayo saṃkilesabhāgā, vodānādivasena tayo vāsanābhāgā, sekkhānaṃ sīlakkhandhādīnaṃ vasena tayo nibbedhabhāgā, asekkhānaṃ sīlakkhandhādīnaṃ eva vasena tayo asekkhabhāgā, tesamaṃ vasena mūlapaṭṭhānāni eva dvādasa honti. Tāni pana vitthāranayena vibhājiyamānāni channavutādhikāni cattāri sahasāni honti. Yathādassanaṃ panetāni uddharitabbāni. Tāni pana yasmā saṅgahato kāmataṇhādivasena tayo taṇhāsaṃkilesabhāgā, sassatucchadavasena dve diṭṭhisāṃkilesabhāgā, kāyaduccaritādivasena tayo duccharitasāṃkilesabhāgāti aṭṭha saṃkilesabhāgā. Dhammāmisābhayaḍānavasena tividhaṃ dānamayaṃ puññakiriyaṃvatthu, kāyasucaritādivasena tividhaṃ sīlamayaṃ puññakiriyaṃvatthu, samathavipassanāvasena duvidhaṃ bhāvanāmayamaṃ puññakiriyaṃvatthūti aṭṭheva vāsanābhāgā.

Saddhānusārī saddhāvimutto dhammānusārī diṭṭhippatto kāyasakkhīti (pu. pa. mātikā 7.32-36; pu. pa. 26-30) pañcannaṃ sekkhānaṃ paccekaṃ tayo sīlādikkhandhāti pannarasa nibbedhabhāgā, suññatānimittapañihitabhedā paññāvimmuttānaṃ tayo aggaphaladhammā, tesu paccekaṃ tayo tayo sīlādikkhandhā, tathā ubhatobhāgavimmuttānanti aṭṭhārasa, sikkhitabbābhāvasāmaññaena asaṅkhatadhātumaṃ pakkhipitvā ekūnavīsati asekkhabhāgā, iti purimāni ekatiṃsa, imāni ekūnavīsatiṃti samapaññāsa saṃkilesabhāgiyādidhammā honti. Tasmā imesaṃ samapaññāsāya saṃkilesabhāgiyādidhammānaṃ vasena samapaññāsa suttāni honti.

Yasmā ca te paññāvimmuttā ubhatobhāgavimmuttavibhāgaṃ akatvā asaṅkhatāya dhātuyā aggahaṇena nippariyāyena asekkhabhāgābhāvato naveva asekkhabhāgāti samacattālīsa honti, tasmā **peṭake** “cattārisāya ākārehi pariyesitabbaṃ, paññāsāya ākārehi sāsanaṃpaṭṭhānaṃ niddiṭṭha”nti (peṭako. 21) ca vuttaṃ. Saṅgahato eva pana pubbe vuttavittāranayena soḷasa honti, puna tividhasaṃkilesabhāgiyādivasena dvādasa honti, puna taṇhādiṭṭhiduccharitasāṃkilesataṇhādiṭṭhiduccharitavodānabhāvena cha honti, puna saṃkilesabhāgiyaṃ vāsanābhāgiyaṃ dassanabhāgiyaṃ vāsanābhāgiyaṃ asekkhabhāgiyaṃ asekkhabhāgiyabhāvena tīni honti, puna mūlapaṭṭhānavasena cattāri honti, puthujanabhāgiyasekkhabhāgiyaasekkhabhāgiyabhāvena tīni honti, puna saṃkilesabhāgiyavodānabhāgiyabhāvena dve eva honti. Paṭṭhānabhāvena pana ekavidhameva, iti paṭṭhānabhāvena ekavidhampi saṃkilesavodānabhāgiyabhāvena duvidhanti vibhāgato yāva channavutādhikaṃ catusahassappabhedamaṃ hoti, tāva netabbaṃ. Evametamaṃ paṭṭhānaṃ saṅgahato, vibhāgato ca veditabbaṃ.

Imassāpi paṭṭhānavibhāgassa, na purimassevāti adhippāyo. Lokikaṃ assatthīti, lokikasahacaraṇato vā **lokiyaṃ**, suttamaṃ **padesenāti** ekadesena. **Sabbapadesūti** taṃtaṃtikānaṃ tatiyapadesu. **Buddhādīnanti** buddhapaccekaḍḍhabuddhasāvakaṇaṃ. Dhammo panettha buddhādiggahaṇena veditabbo, **ādisaddena** vā.

Pariṇamatīti paripaccati. **Dharantīti** pabandhavasena pavattanti. Nti pāpakammaṃ. **Teti** kusalābhiniḍḍattakkhandhā. **Rakkhanti** vipākādānato vipaccitumaṃ okāsaṃ na dentīti attho. Ayañca attho

upapajjavedanīyesu yujjati, itarasmimpi yathārahaṃ labbhateva. Tenāha “**dutiye vā tatiye vā attabhāve**”ti.

113. Attano anavajjasukhāvahaṃ paṭipattiṃ paṭipajjanto paramatthato attakāmo nāmāti āha “**attano sukhakāmo**”ti. Sukhānubandhañhi sukhaṃ kāmanto sukhaveva kāmetīti ca **sukhakāmoti**.

Vitthataṭṭhenāti suvipphāraditṭhīnaṃ pavattanaṭṭhānatāsankhātena vitthāraṭṭhena.

114. **Diṭṭhe dukkhādidhammeti** bhāvenabhāvalakkhaṇe bhummaṃ, dukkhādidhamme diṭṭhe ñātetī attho.

“**Uddha**”ntiādi kāladesānaṃ anavasesapariyādānanti āha “**uddhanti anāgataṃ, upari cā**”tiādi. **Gamanenāti** cutūpapātagamanena.

115. **Nagaradvārathirakaraṇatthanti** nagarassa dvārabāhathirakaraṇatthaṃ. **Gambhīranematāyāti** “nemaṃ”vuccati nikhātathambhādīnaṃ pathaviṃ anupavisitvā ṭhitappadeso, gambhīraṃ nemaṃ etassāti **gambhīranemo**, tassa bhāvo **gambhīranematā**, tāya. **Kampanaṃ** yathāṭhitassa ito cito ca sañcōpanaṃ, **cālanam** ṭhitaṭṭhānato cāvanaṃ. **Ajjhogāhetvāti** aviparītasabhāvābhisamayavasena anupavisitvā, anupaviṭṭho viya hutvāti attho.

Samyojanānaṃ pajahanavāsenati gāthāya vacanasesaṃ ānetvā dasseti. Atha vā pahātabbassa pahānena vinā na bhāvanāsiddhīti atthasiddhaṃ pahātabbapahānaṃ ajjhataṃ, bahiddhāti padadvayena yojetvā dassetuṃ ajjhataṃ bahiddhāti orambhāgiyaudhambhāgiyasamyojanānaṃ visamyoagahitoti imamatthaṃ pāliyā samatthetuṃ “**tenāha sabbaloke**”ti vuttaṃ.

Alobhasīsenāti alobhena pubbaṅgamaṇa, yato yogāvacarō “nekkhammacchando”ti vuccati. Asubhasaññā rāgappaṭipakkhatāya “vīsesato alobhappadhānā”ti vuttā, dasāsūbhavasena vā. **Adhigatajjhānādīnīti** ādisaddena vipassanādīni saṅgaṇhāti. Vihimsāratirāgānaṃ byāpādahetukato cattāropi brahmavīhārā abyāpādapadhānāti āha “**catu...pe... abyāpādo dhammapada**”nti. Adhigatāni jhānādīnīti yojanā. **Dasānussati...pe... adhigatāni sammāsati dhammapadam** satisīsenā tesam adhigantabbattāti adhippāyo. Ānāpānabhāvanāyaṃ samādhīpi padhāno, na satī evāti dassanattaṃ “**dasakasiṇa...pe... sammāsamādhī dhammapada**”nti vuttaṃ. Catudhātuvavattānāvāsena adhigatānampi ettheva saṅgaho daṭṭhabbo.

116. **Upalakkhaṇakāraṇānīti** sañjānananimittāni.

Pāpameva **pāpiyoti** āha “**pāpaṃ hotī**”ti, “pāpiyo”ti ca līngavipallāsavasena vuttaṃ. **Ekavacane bahuvacānanti** ekavacane vattabbe bahuvacānaṃ vuttaṃ.

117. **Olīyanatāṇhābhīnivesavāsena**ti bhavataṇhābhavaditṭhivasena. Tā hi bhavesu satte allīyāpentī. **Atidhāvanābhīnivesavāsena**ti ucchedaditṭhivasena. Sā hi avatṭupacchedameva vatṭupacchedaṃ katvā abhinivīsanato atidhāvanābhīniveso nāma. **Olīyantīti** sammāpaṭipattito saṅkocāṃ āpajjanti. **Abhidhāvanti**ti sammāpaṭipattiṃ atikkamanti.

Tesañcāti tesam ubhinnaṃ abhinivesānaṃ, tadaññesañca sabbamaññītānaṃ.

118. **Idaṃ iṭṭhavipākaṃ aniṭṭhavipākanti** idaṃ iṭṭhavipākasaṅkhātaṃ aniṭṭhavipākasaṅkhātaṃ phalaṃ.

“**Akaṅkhato na jāneyyu**”nti etena “ākaṅkhato”ti iminā padena saddhiṃ

sambandhadassanamukhena ‘‘na jaññā’’ti padassa atthaṃ dasseti.

Na upalabbhatīti natthīti attho.

120. Tānīti kammakammanimittagatinimittāni. Pattharaṇākāroyeva hesa, yadidaṃ chāyānaṃ volambanaṃ. **Evam hotīti** ‘‘akataṃ vata me kalyāṇa’’ntiādippakārena vipphaṇṣāro hoti.

122. Esakehīti gavesakehi sapaṇasantāne sampādakehi. **Dukkhudrayanti** dukkhaphalaṃ. **Tīhi kāraṇehīti** kāyavācācittēhi. Tāni hi taṃtaṃsaṃvarānaṃ dvārabhāvena kāraṇānīti vuttāni. **Tīhi ṭhānehīti** vā tīhi uppattiṭṭhānehi. **Pihīti** pidhāyakaṃ.

‘‘**Uṭṭhānaṭṭhānasāṅkhāta**’’nti idaṃ pāsāṇabhāvasāmaññaṃ gahetvā vuttaṃ.

123. Rajamissakanti puppharajamissakaṃ. **Tassāti** tassa sekkhāsekkhamunino. Mahicchādīnaṃ viya gāme caraṇappaccayā gānavāsīnaṃ saddhāhāni vā bhogahāni vā na hoti, atha kho uparūpari vuddhiyeva hotīti dassento ‘‘**pākatikameva hotī**’’ti āha. **Ajjhattikakammaṭṭhānanti** catusaccakammaṭṭhānaṃ.

Tenāti kusalena kāyavacīkammena. Thirabhāvo thāmaṃ nāmāti tassa atthaṃ dassento ‘‘**thāmavāti ṭhitimā**’’ti āha.

Attasaṃmissayaṃ pemaṃ attāti gahetvā ‘‘attasama’’nti vuttanti āha ‘‘**attapemena samaṃ pemaṃ natthī**’’ti. Bhagavato vipassanāññābhāsappavattiṃ sandhāyāha ‘‘**paññā pana...pe... sakkotī**’’ti. Sabbaññutaññaṃ, pana abhiññāññāni ca anantāparimāṇaṃ lokadhātuṃ obhāsenti.

124. Kissa bhīti kena kāraṇena bhīti.

Ṭhapetvāti pavattetvā. Vacanīyo yācakānanti yojanā, yācitabbayuttoti attho. **Yaññaupakkharoti** yaññaupakaraṇaṃ. ‘‘**Etesu dhammesu ṭhito catūsū**’’ti vuttaṃ catukkaṃ vavathapetum ‘‘**saddhoti ekaṃ aṅga**’’ntiādi vuttaṃ.

Gāthāyaṃ vuttadhamme dve dve ekaṃ katvā aṅgakaṇaṃ **dukanayo**.

Jātidhammanti pavattidhammaṃ sandhāya vadati.

125. Saccekadesato saccasamudāyo anavasesapariyādānato visiṭṭhoti dassento ‘‘**paramatthasaccaṃ vā hotū**’’ti āha. **Caturo padāti** cattāri padāni, liṅgavipallāsena vuttaṃ, cattāro dhammakotṭhāsāti attho. Kevalaṃ sattavibhāgadassanattameva catupadaggahaṇaṃ, na adhigatadhammānurūpatāya.

Nimmadāti na madā.

‘‘**Saccavādī jino romo**’’tipi pāṭho. Tattha **romoti** diṭṭhirāgarattānaṃ titthiyānaṃ, titthakarānañca adhammavādīnaṃ rāgaviparītadhammadesanato bhayajanako, adhammavādīnaṃ vā tattha ādīnavadassanena bhāyitabbo, appahīnāsaṃvarānaṃ vā durupasaṅkamanato durāsadoti attho.

Sacco ca so dhammo cāti **saccadhammo**. Tenāha ‘‘**ekantanissaraṇabhāvenā**’’tiādi.

Ekāyanabhāvanti ekamaggabhāvaṃ, aññaṃmaggabhāvanti attho.

Dassanabhāgiyaṃ bhāvanābhāgiyanti nibbedhabhāgiyameva dvidhā vibhajitvā vuttanti āha “**saṃkilesabhāgiyādīhi catūhi padehi**”ti. **Sesattikānanti** sattādhiṭṭhānattikādīnaṃ aṭṭhannaṃ tikānaṃ. **Sesapadānañcāti** saṃkilesabhāgiyañca vāsanābhāgiyañcātiādīmissakapadānañca. **Ca-saddena** saṃkilesabhāgiyādipadāni ca saṅgaṇhāti. Lokiyattikasēva hi “sesapadānī”ti vuttehi missakapadehi evaṃ saṃsandane nayadassanaṃ, itaresaṃ pana tikānaṃ saṃkilesabhāgiyādipadehi ceva sesapadehi ca saṃsandane idaṃ nayadassananti “**vuttanayānusārena suviññeyya**”nti vuttaṃ. **Samatikkamananti** pahānaṃ. Satipi vāsanābhāgiyasamkilesabhāgiyadhammānaṃ lokiyabhāve purimehi pana pacchimā pahātabbā tadaṅgavasena, vikkhambhanavasena ca. Evaṃ pajahanasamatthatāya pahānanti vuttaṃ “**vāsanābhāgiyaṃ suttaṃ saṃkilesabhāgiyassa samatikkamāya hotī**”ti. Saṃkilesadhammānaṃ samatikkamena adhigantabbā vodānadhammā viyāti yojanā. **Bhāvanā** nāma tividhā jhānabhāvanā, vipassanābhāvanā, maggabhāvanāti. Tāsu maggabhāvanāya gahitāya vipassanābhāvanā gahitā eva hotīti taṃ anāmasitvā itarā dve eva gahitā. Tathāpi “bhāvanābhāgiyassa suttassa paṭinissaggāyā”ti vutte kiṃ sabbena sabbam asekkhassa jhānabhāvanāpi paṭinissatṭhāti codanaṃ manasi katvā pāliyaṃ “**asekhabhāgiyaṃ suttaṃ diṭṭhadhammasukhavihārattha**”nti vuttanti dassento “**asekhadhammesu uppannesu maggabhāvanākiccaṃ nāma natthī**”ti vatvā “**jhānabhāvanāpi diṭṭhadhammasukhavihāratthā evā**”ti āha.

Ekam eva bhavabījyaṃ paṭisandhiviññānaṃ **ekabījaṃ**, taṃ assa atthīti **ekabījī**. **Sandhāvitvā** samāgantvā, nibbattanavasena upagantvāti attho. **Saṃsaritvāti** tasēva vevacanaṃ. Kulaṃ kulaṃ gacchatīti **kolamkolo**. Purimapade anunāsikalopaṃ akatvā niddeso.

Tesaṃ sotāpannānaṃ. **Etam pabhedanti** ekabījīādivibhāgaṃ. Purimabhavasiddham vivaṭṭūpanissayapuññakammaṃ idha **pubbahetu** nāma. Yo “katapuññatā”ti vuccati, so paṭhamamagge sādhiṭe caritatthatāya vipakkavipākaṃ viya kammaṃ uparimamaggānaṃ upanissayo na siyāti adhippāyenāha “**upari...pe... āpajjati**”ti. **Tiṇṇaṃ maggānaṃ niratthakatā āpajjati** paṭhamamaggeneva tehi kātabbakicassa sādhitattā. **Paṭhamamagge...pe... āpajjati**ti anuppannassa atthakiriyāsambhavato. Evaṃ tiṇṇaṃ vādānaṃ yuttiabhāvaṃ dassetvā catutthavādo evettha yuttoti dassento āha “**vipassanā...pe... yujjati**”ti. “**Sace hi**”tiādīnā taṃ yuttiṃ vibhāveti. Vimuttiparipācanīyānaṃ dhammānaṃ paripakkatāya indriyānaṃ tikkhatāya ñāṇassa visadatāya vipassanāya balavabhāvo vedītabbo. So hi vomissakanayena saṃsaraṇako idhādhippeto “deve ceva mānuse ca sandhāvitvā”ti vuttattā. Idha kāmabhāve ṭhito **idhaṭṭhako**. Manussadevalokūpapajjanato okārena **vokiṇṇo**. Ariyasāvakaṃsa taṃtaṃsattaniṅkāyupapatti tassa tassa sodhanasadisam kilesamalādiānatthāpanayanatoti āha “**cha devaloke sodhetvā**”ti. “**Akaniṭṭhe ṭhatvā**”ti etena heṭṭhābrahmalokasodhanaṃ vuttamevāti vedītabbāṃ.

Saddham dhuraṃ katvāti saddham dhuraṃ jeṭṭhakaṃ pubbaṅgamaṃ katvā. Saddhāya anussati paṭipatti, saddham vā pubbabhāgiyaṃ anussati, saddhāya vā anusaraṇasīloti **saddhānusārī**. **Dhammānusārī**ti etthāpi eseva nayo. **Dhammoti** panettha paññā vedītabbā. Saddahanto vimuttoti **saddhāvimutto**. Yadiṭṭi sabbathā avimutto, saddhāmattena pana vimuttoti attho. Saddhāya vā adhimuttoti **saddhāvimutto**. **Vuttanayenāti** uparimaggavipassanāya balavamandamandarabhāvena. Diṭṭhiyā pattoti **diṭṭhippatto**, catusaccadassanasāṅkhātāya diṭṭhiyā nirodhappattoti attho. Diṭṭhantaṃ vā pattoti **diṭṭhippatto**, dassanasāṅkhātassa sotāpattimaggāñāṇassa anantarappavattoti vuttaṃ hoti. Paṭhamaphalato paṭṭhāya hi yāva aggamaggā diṭṭhippattāti. **Idanti** yathāvuttasotāpannānaṃ saddhāvimuttadiṭṭhippattatāvacanaṃ. **Aṭṭhannaṃ vimokkhānanti** catasso rūpāvaccarasamāpattiyo, catasso arūpāvaccarasamāpattiyoti **aṭṭha vimokkhā**, tesaṃ.

Phuṭṭhantaṃ sacchikarotīti **kāyasakkhī**, phuṭṭhānaṃ anto **phuṭṭhanto**, phuṭṭhānaṃ arūpajjhānānaṃ anantaro kāloti adhippāyo. Accantasamyoḃe cetam upayogavacanaṃ, phuṭṭhānantarakālemeva sacchikātabbāṃ sacchikarotīti vuttaṃ hoti, “visamaṃ candimasūriyā parivattantī”tiādīsu (a. ni. 4.70) viya vā bhāvanapūṃsakanti etaṃ daṭṭhabbāṃ. Yo hi arūpajjhānena rūpakāyato, nāmakāyēkadesato ca vikkhambhanavimokkhena vimutto, tena nirodhasāṅkhāto vimokkho ālocito pakāsito viya hoti, na

kāyena sacchikato, nirodham pana ārammaṇaṃ katvā ekaccesu āsavesu khepitesu tena so sacchikato hoti. Tasmā so sacchikātabbaṃ nirodham yathāālocitaṃ nāmakāyena sacchikarotīti “**kāyasakkhī**”ti vuccati, na tu vimutto ekaccānaṃ eva āsavānaṃ aparikkhīṇattā.

Abhedenāti antarāparinibbāyīādibhedena vinā. “Abhedenā”ti ca idam “saddhāvimuttadiṭṭhippattakāyasakkhino”ti idhāpi ānetvā yojetabbaṃ. Yatheva hi antarāparinibbāyīādibhedānāmasaneneva eko anāgāmī hoti, evaṃ yathāvuttabhedaāmasaneneva saddhāvimutto, diṭṭhippatto, kāyasakkhīti tayo anāgāmīno hontī. Ayañca anāgāmīno tādisamavattābhedaṃ gahetvā gaṇanā katāti veditabbaṃ. “**Avihādīsū**”tiādi suviññeyyameva.

Paññāya eva vimutto, na cetovimuttibhūtena sātisayena samādhināpīti **paññāvimutto**. **Ubhatobhāgavimuttoti** ubhohi bhāgehi ubhatobhāgato vimutto. Kilesānaṃ vikkhambhanasamucchinnehi rūpakāyanāmakāyato vimuttoti imamattaṃ dassento “**vikkhambhana... pe... vimutto nāmā**”ti āha. Arūpasamāpattiyā rūpakāyato, aggamaggena arūpakāyato vimuttaṃ. Yathāha –

“Idha, bhikkhave, ekacco puggalo ye te santā vimokkhā atikkamma rūpe āruppā, te kāyena phusitvā viharati, paññāya cassa disvā āsavā parikkhīṇā hontī, ayaṃ vuccati, bhikkhave, puggalo ubhatobhāgavimutto”ti (ma. ni. 2.182).

Yaṃ pana **mahānidānasutte** “rūpī rūpāni passatī”tiādike (dī. ni. 2.129) nirodhasamāpattiante aṭṭha vimokkhe vatvā –

“Yato kho, ānanda, bhikkhu ime aṭṭha vimokkhe anulomampi samāpajjati...pe... ayaṃ vuccatānanda, bhikkhu ubhatobhāgavimutto, imāya ca, ānanda, ubhatobhāgavimuttīyā aññā ubhatobhāgavimutti uttaritarā vā pañītarā vā natthī”ti (dī. ni. 2.130) –

Vuttaṃ, taṃ ubhatobhāgavimuttasetṭhavasena vuttaṃ. Tattha yasmā āruppasamāpattīsu ekāyapi rūpakāyo vikkhambhito eva nāma hoti, tasmā catunnaṃ āruppasamāpattīnaṃ, nirodhasamāpattīyā ca lābhīnaṃ vasena pañca ubhatobhāgavimuttā veditabbā. Esa nayo **kāyasakkhimhipi**. Aṭṭhavimokkhekaḍḍesi hi aṭṭhavimokkhasamaññā yathā “loke sattā”ti.

Terasasu sīsesu palibodhasīsādīni, pavattasīsañca pariyādiyitabbāni, adhimokkhasīsādīni pariyādakāni, **gocarasīsaṃ** pariyādakaphalaṃ. Tañhi visayajjhataṃ phalaṃ, **vimokkho** pariyādakassa maggassa, phalassa ca ārammaṇaṃ. **Saṅkhārasīsaṃ** saṅkhāravivekabhūto nirodhoti pariyādiyitabbānaṃ, pariyādakaphalānañca saha visayasamsiddhidassanena samasīsibhāvaṃ dassetuṃ **paṭisambhidāyaṃ** (paṭi. ma. 1.87) terasa sīsāni vuttāni. Idha pana “yassa puggalassa apubbaṃ acarimaṃ āsavapariyādānañca hoti jīvitapariyādānañcā”ti (pu. pa. 16) **puggalapaññattīyaṃ** āgatattā tesu kilesapavattasīsānaṃ eva vasena yojanaṃ karonto “**kilesasīsa**”ntiādimāha. Tattha pavattasīsampi maggo pavattito vuṭṭhahanto cutito uddham appavattikaraṇena yadipi pariyādiyati, yāva pana cuti, tāva pavattisambhavato “**pavattasīsaṃ jīvitindriyaṃ cuticittaṃ pariyādiyati**”ti āha.

Kilesapariyādānena attano anantaraṃ viya nipphādetabbā, paccavekkhaṇavārā ca kilesapariyādānasēva vārāti vattabbaṃ arahanti. “Vimuttasmiṃ vimuttamiti ñānaṃ hoti”ti (ma. ni. 1.78; saṃ. ni. 3.12, 14) hi vacanato paccavekkhaṇaparisaṃpanena kilesapariyādānaṃ samāpitaṃ nāma hoti. Taṃ pana parisamāpanaṃ yadī cuticittena hoti, teneva jīvitaparisaṃpanaṃ hotīti imāya vāracutisamatāya kilesapariyādānajīvitapariyādānaṃ apubbācarimatā hotīti āha “**vārasamatāyā**”ti. **Bhavaṅgaṃ otarivā parinibbāyatoti** ettha parinibbānacittameva bhaṅgotaraṇabhāvena vuttanti daṭṭhabbaṃ.

Caritanti caritā kāyavacīmanappavatti. Ettha ca yena rāgādhikabhāvena puggalo “rāgacarito”ti

lakkhīyati, tayidaṃ lakkhaṇaṃ. Tenāha “**rāgajjhāsayo rāgādhikoti attho**”ti, tena appahīnabhāvena santāne thāmagatassa rāgassa balabhāvo lakkhīyatīti daṭṭhabbaṃ. Eseva nayo sesesupi.

Sīlavantehīti ādisaddassa lopaṃ katvā niddeso katoti dassento āha “**sīlavantādihi**”ti. **Ādisaddena** dāyakādīnaṃ saṅgaho daṭṭhabbo.

Ārammaṇabhūtā ñeyyanti ārammaṇabhūtāva ñeyyaṃ.

Puthujjanabhūmiādīsūti puthujjanasekkhāsekkhabhūmīsu. Tattha puthujjanabhūmivasena saṃvaro, sekkhabhūmivasena pahānabhāvanā, asekkhabhūmivasena sacchikiriyā, puthujjanabhūmīsekkhabhūmivasena vā yathārahaṃ saṃvarapahānabhāvanā. Pubbabhāgiyā hi saṃvarapahānabhāvanā puthujjanassa sambhavanti, itarā sekkhassa, asekkhabhūmivasena sacchikiriyā. **Nayato dassitanti** “yaṃ, bhikkhave, mayā ‘idaṃ na kappatī’ti appaṭikkhittaṃ, taṃ ce kappiyaṃ anulometi, akappiyaṃ paṭibāhati, taṃ vo kappatī”tiādīnā (mahāva. 305) nayadassanavasena pakāsitaṃ. **Sarāgādisaṃvattananti** sarāgādibhāvāya saṃvattanaṃ.

Aññamaññaṃ saṃsaggatoti “saṃkilesabhāgiyañca vāsanābhāgiyañcā”tiādīnā saṃkilesabhāgiyādīnaṃ padānaṃ aññamaññasamsaggato. **Anekavidhoti** dvādasavidho yāva dvānavutādhikacatusahassavidhopi anekappakāro. **Lokiyasattādhīṭṭhānādisamsaggatoti** ādisaddena lokiyaṃ ñāṇaṃ, lokuttaraṃ ñāṇaṃ, lokiyañca lokuttarañca ñāṇaṃ, lokiyaṃ ñeyyaṃ, lokuttaraṃ ñeyyaṃ, lokiyañca lokuttarañca ñeyyaṃ, lokiyaṃ ñāṇañca ñeyyañca, lokuttaraṃ ñāṇañca ñeyyañca, lokiyañca lokuttarañca ñāṇañca ñeyyañcātiādiko sambhavanto paṭṭhānabhedo saṅgahito. **Ubhayatthāti** saṃkilesabhāgiyādike, lokiyādike ca. **Yathārahanti** yo yo saṃsaggavasena yojanaṃ arahati, so so dhammo. Sambhavāvirodheneva hi yojanā. Na hi “lokiyaṃ nibbedhabhāgiya”ntiādīnā yojanā sambhavati.

Tīsu piṭakesu labbhamānassāti tisso saṅgītiyo āruḷhe tepiṭake buddhavacane upalabbhamānassa vijjamānassa, etena na kevalaṃ saṅgaho eva yathāvuttābhedaṇaṃ paṭṭhānabhāgānaṃ niddhāraṇāya kāraṇaṃ, atha kho pāḷiyaṃ dassanañcāti vibhāveti. Tenāha “**yaṃ dissati tāsu tāsu bhūmīsū**”ti. “**Teneva hī**”tiādīnā yathāvuttassa atthassa paṭṭhānugamaṃ dasseti.

Sāsanapaṭṭhānavāraṇaṇā niṭṭhitā.

Nigamanakathāvaṇṇanā

Saddhammāvataṭṭhāneti desantarato āgantvā saddhammassa avataṭṭhānānāsaṃbhūte saddhammassavanadhāraṇaparicayaparipucchāmanasikārabahulānaṃ nivāsaṭṭhānataṃ sandhāyetaṃ vuttaṃ, attano vā santāne pariyattisaddhammassa anuppavesanaṭṭhānatāya evaṃ vuttaṃ. Sesamaṃ suviññeyyamevāti.

Nettiatṭhakathāya līnatthavaṇṇanā niṭṭhitā.

Nettipakarāṇa-tīkā niṭṭhitā.